

But 6

W- 76

R.4
5/27





DE CRITICIS

VET. GR. ET LATINIS,

eorumque variis apud poetas po-
tissimum reprehensionibus,

DISSERTATIO HENRICI

STEPHANI.

auroris Bernen

per ipsius permittum est.

LECTORI.

Ex criticis monitis criticum tibi contrahere callum,

Ut criticas sapiant callida scripta notas.

RESTITUTIONIS Comment. SERVII in Virg.
& magnæ ad eos accessionis Specimen.

*Corrigido conforme al indice del año
de 1632.*

De del maxmoy



PARISIIS

EXCUDEBATUR,

ANNO M. D. LXXXVII.

DE CRITICIS

VET. GR. ET LATINIS.

continetur variorum poetarum po-

etiam in rebus

nonibus

DISSERTATIO HENRICI

Stephani

Stephani

de rebus

LECTORI

Ex critica monum. veterum libri continetur

et critica sapientia. Scriptum

RESTITUTIONIS COMMITT. SERV. in Virg.

et magnae collectionis specimen.

Stephani

de rebus



Stephani

PARISIIS

EXCUBITUR

ANNO M. D. C. LXXVII



ORNATISS. VIROS,
PHILIPPOTCANAI O,
regio apud consilium Prætorianum consiliario,
HENR. STEPH. S. D.



QUUM in aula regis nostri à nonnullis
qui sponfione inter se certauerant, &
me Palæmonē suum elegerant, rogatus
essem quid propriè sonaret vox criti-
ci: non illa quidem qua medicivtuntur
quum criticos dies dicunt, sed quæ de iis dicitur qui
in poetas inquirunt, eorūque sunt censores: & cūr
critici potius quàm critæ vocarentur: item, an Græci
soli aliquos qui eo fungerentur officio habuissent:
(cæterarum eadem de re quæstiuncularum in præsen-
ti non recordor) respondi illis ex tempore quæ mihi
in mentem subito venerunt, & tamen magno illorū
discendi desiderio, sicut & vincendi (quum sponfio-
ne, vti dixi, certassent) satisfacere visa sunt. At quum
postea non eos solos qui aulicè tantummodo & au-
lica magis quàm alia vlla docti essent, sed alios etiam
quosdam, diligentissimos alioqui rerum ad philolo-
giam pertinentium indagatores, talia ignorare, præ-
fertimque illius vocabuli vim, comperissem: nec ve-
rò quēquam esse vidissem qui & hæc & alia quæ de
iis doceri magno cum fructu possunt, docuisset: ad
*ij.

scribendam aliquam super hac re dissertatiunculam,
vel in mediis aulae omnium tumultuosissimæ tumultibus animum appuli. Quo minus erit quod mireris siquid in ea sit quod non lucernâ, sed potius tumultuariam scriptionē olere tibi videatur. Nā si verū hoc,

(Carmina proueniunt animo deducta sereno,

verum (vt opinor) erit & istud, tranquillitatem serenitatemque animi, inter alia, ad ferendum de carminibus iudicium requiri. quanto autem magis, quum de iis ipsis qui carminum iudices censesque sunt, ferre oportet? At hoc (dicet fortasse quispiam) nimium suo iudicio tribuentis est. Quid enim aliud hoc est quàm iudicis iudicem se constituere? Respondeo, illum qui tam modestè de lata à quopiam critico sententia iudicat, vt interim non solum prouocationē ad tertium iudicem relinquat, sed ne ratam quidem esse ei que stari velit, nisi ab eo prius confirmata fuerit, non plus sibi quàm literarij fori leges patiantur, permittere.

Enimvero, quum de scribenda tantum dissertatiuncula cogitassem (ideoque in certa temerata primam scriptionis meae partem minimè diuisissem) tandem pro dissertatiuncula dissertationem dare necesse habui, quum alius ex alio sermo ad hoc argumentum pertinens oriretur: sic tamen vt & nonnulla (sicut lectori fassus sum) quæ adiicienda erant, sciens prudensque prætermiserim.

Quod autem dixi, huius argumenti tractationem lectori multum asferre emolumenti posse, verum esse experientur qui dissertationem hanc legerint, & criticas quæ in ea proponuntur censuras attentè & accuratè expenderint. nullum enim ad formadum iudicium (quod primas in omni scriptione partes tene-

re debet) aptius argumentū esse existimo: ideoque nō minus diligenter ei qui laudē ex iis quæ scribit reportare cupit, cognoscenda esse τὰ κεινὰ dixerim, quàm ab eo qui sumus imperator euadere nititur, disci debere, autore Xenophonte, τὰ ταπεινά. Nō dubitas porro quin, κεινὰ quum dico, reprehensiones criticas, & eorum quæ reprehensa sunt emendationes intelligā: ipse verò non dubito quin hīc tibi, sicut & mihi, dictum illud in mentem sit venturum,

Ex vitio alterius sapiens emendat suum.

Quòd si vsq; ad nostri seculi criticos expatiata oratio mea esset, dicendū de illis etiam fuisset qui suas cōiecturales deprauationes in multos locos confidēter, vel præsidenter potius, intruserunt. Nec tacendū de iis fuisset qui dum id quod alicui subest loco mendū nō subolfaciunt, ad violētas expositiones confugiūt. Qua de re in multis meorū Schediasmatum questus sum locis: ac de illis nominatim qui Horatium ita mētis appellatione vsum volunt vt tum tēporis mēte caruisse videri possit: hoc in loco, — qui nō moderabitur ire,

Infectum volet esse dolor quod sua serit & mens.

Ego certē non quomodo hīc exponenda sit ista vox, sed quomodo corrigendus sit hic locus (quē tamen nemo vnquā, quòd sciam, mendosum suspicatus est) quarendum puto: atque interim scribendum esse *ex mens* pro *& mens* contēdo: quum Horatio in *ex mens* imitari Græcum ἐκ μέν, vt vulgus in *amēs* imitabatur ἀμείν, placuisse dico.

Hæc tu, vir ornatissime, tanquam additamentum aliquod ad istam de criticis dissertationem à me tibi dicatam, accipe. Quod munus qui tibi conuenire nō existimabit, is te libris qui exercendi acris tui iudicij materiā suppeditāt, dignissimū esse ignorabit. Vale.

reducere) apud argumens esse existimandum quod non
minus diligenter ei dui laudē ex his dui scribit repon
tate cupit cognoscenda esse ut xxiij. diximus, quam
ad eo quod minus imperator eundem nititur, dicit de
peratore Xenophontē ut xxiij. No dubitas per
to dui. xxiij. dui dico, reprehensiones criticas
& eorum dui reprehensa sunt emendationes intel
ligantur vero non dubito dui his tibi, sicut & mihi
dictum illud in meum sit venturum.

Quod si videris ad nostrum criticos expatiata ora
tio mea esse, dicendum de illis etiam fuisse dui suas co
recturas deputationes in multis locis consideras
vel praesentibus potius, intrinsecis. Nec tacendum de
his fuisse dui dui id quod alium libellum loco men
dum non inobstant ad violentas expositiones con
gruas. Quae de re in multis meorum scholasticarum dui
tum locis de illis nomination dui Horatius ita me
as appellatone vltim volunt ut tum repositis me
tunc videri possit hoc in loco, dui non modum
in istis videri esse de hoc quod dui dui.

Ego certe non quomodo hic exponenda sit illa
vox, sed quomodo corrigenda sit hic locus (dū ca
men nemo videri quod sciam mendosum sub
tus esse dui videri potius, atque intelan libellum
etiam pro eo, ut concedo, dui Horatio in
tunc in istis Graecum ut xxiij. ut videri in xxiij. im
tabat ut xxiij. dui dico.

Hic ut vix ornatus, tandem ad huiusmodi
ad quod ad istam de criticis dissertationem a me tibi
diximus, ut xxiij. Quod minus dui tibi conuenit non
existimare in rebus dui exercendi acris in iudici
mentis subpbat dignissimum esse ignoscere. Vale.



HENRICVS STEPHANVS

LECTORI.

MVLTI in ore sunt Critici, quibus ne hoc quidem ipsum in mentem venit, quinam tam honorifico titulo digni sint, aut quinam olim eum, vel meriti sint, vel mereri debuerint. Sanè, quum onomastica sua consulunt, hoc tantum ab illis docentur, Criticos esse poetarum indices. Itane verò Græcis Critici non aliud quàm Critæ sonat? Eadem certè opera mihi persuaferint nihil differre ποιητικούς, ab ijs qui ποιηται vocantur, nihil σεμνικούς, ab ijs qui σεμνοὶ appellantur. Sed qui huius mei de Criticis commentarii principium saltem legerint, quantum inter illa, sicut inter hæc, sit discriminis, aperi sumè, ut spero, cognoscent: & hoc cognitum sic animo infigent (nisi mea me spes fallit) ut illi perpetuò, hæreere possit. Quod si ulterius in huius libri lectione pergere non grauibuntur, etiam quæ illorum partes essent, quantum sibi iuris eorum nonnulli in aliorum scripta, præsertimque poetica, arrogarent, sunt intellecturi. Iam verò, si eum perlegere non pigebit, fore confido ut eos quantum profecerint non pœniteat. Quid? (dicet aliquis) an legendo multas multorum locorum criticas reprehensiones, Critici euadere poterunt? Non equidem hoc crediderim: sed hoc saltem fore, ut perspectæ, ut introspectæ hæc & illæ reprehensiones (curenim τὰς ἰδίαις κριτικαῖς ita vocare non liceat?) eorum velut forment, & de nullo cuiusquam autoris loco ἀνεκτός pronuntiare posthac, permittant. Quemadmodum enim quotidie in iudicijs aliquis accusator non solum iure sed & æquitate niti videtur, tãtis per aũ defensor silet: simulatque autè hic respondere cœpit iis quæ obiecta sunt, calumniator dicitur qui antea vocatus fuit accusator: ita certè Criticos

nannunquam videri scio merito reprehendisse quosdam poetarum
aut aliorum scriptorum locos, quorum tamen ubi examinatur re-
prehensio, iniqua planè comperitur. cuius rei nonnulla tibi exem-
pla Dissertatio ista suppeditabit. Sed multas interim iustissimas
reprehensiones inter ceteras inuenies.

Quòd si & reliqua ad hoc argumentum spectantia persequi,
atque id plenè tractare mihi licuisset, maior in utranque partem
exemplorum numerus tibi suppeteret. Nam Cracorum Critico-
rum, Aristarchi, Aristophanis, Cratetis, Zenodoti quasdam
partim διορθώσε, partim ἀφ' διορθώσε: & quaedam eorun-
dem (præsertim verò Aristarchi) partim τολμήματα simpliciter,
partim ἀφ' τολμήματα tibi proposuissem, in quibus id quod di-
co animaduertere potuisses.

Verùm nec istud dissimulare volo, disserendum etiam fuisse (ut
plena & numeris omnibus absoluta hæc Dissertatio esset) de ami-
cis Criticis, quibus sua recitare scripta Latini præsertim solebant.
In quo amicorum & familiarium Criticorum numero (ita enim
eos amicos voco qui Criticorum officioungebantur, etiamsi nihil
minus quàm hanc, ut ita dicam, artem profiterentur) Horatia-
nus ille Quintilius meritò ponetur, & ita quidem ut primum in
ea locum teneat. Ille inquam Quintilius, de quo ita Horatius,

Quintilio siquid recitares, corrige (sodes)

Hoc, aiebat, & hoc, melius te posse negares,

Bis terque expertum frustra, delere iubebat,

Et malè tornatos incudi reddere versus.

Si defendere delictum quàm vertere mallets,

Nullam ultra verbum aut operam insumebat inanem,

Quin sine riuali teque & tua solus amares.

Sed quum rari sint nostro seculo hi Quintilij, rariores sunt quos
sua φιλαυτία Quintilijs morigeros esse patiaturs. Qua de re alius
erit dicendi locus. Tu interim vale.



HENRICI STEPHANI

DE CRITICIS ET DE CRITICA

FACULTATE DISSERTATIO.

NONnulla sunt magni momēti, & magni (vt ita dicam) ponderis vocabula, si quidem eorum origo & primigenia natiuāque significatio consideretur: quæ alioqui, tanquam minimè talia, nullo examine dignamur: nihiloque aliud mens nostra sub illis sibi repræsentat quàm quod vulgaris vsus consuetudine declarant. At est tamen hic vsus eiusmodi, vt, quantumuis sit antiquus, abusus aut saltem licentiosior vocari vsus possit. Hoc ad eò in quibusdam earum potissimum contingit vocum quibus Latini è Græco sermone sumptis suum locupletauerunt. Ac, si vel maximè in nomine CRITICVS contingere id dixero, quod verum est loquutus (vt opinor) fuero. Quotus enim quisque est cui, quum hoc vocabulum audit, vnà cum eo qui illi datur significatu is etiam quem à sua origine habet (si originalem dicere non licet) in mentem veniat? Quomodo autem ea verbi cuiuspiam significatio alicui in mentem veniat, qui eam nec scit, nec vnquam sciuit? Quis verò sciuisse vel scire possit quod neque doctus antea fuerit, neque nunc doceatur? Consulantur enim vulgaria onomastica, consulantur auto-

A.



rum enarratores: ex iis non aliud discetur, quàm Criticum dici cum grammaticum qui poematum est iudex, siue, qui de poematis iudicat. Atqui (ut omittam alia duo quæ hac in expositione peccantur, & quòd critici officium malè ad grammaticum restringitur, & quòd male critici iurisdicção poemæ iis poematum coercetur) si κριτικός aliud nihil est quàm κριτής, (id est iudex) certè nec ποιητικός aliud erit quàm ποιητής, nec εἰρητικός quàm εἰρητής: nec στρατηγικός, quàm στρατηγός: in aliis denique infinitis quæ eiusdem formæ sunt, δούρατος minimè ἀπὸ τῆς πρῆξεως distinguetur: id est, ipsa agendi aliquid facultas ac peritia & ipsa actio confundentur. Hoc tamen minimè nouum mihi fuerit: quippe qui animaduertirim, nonnullos interpretes cùm in aliis quibusdã vocabulis hanc ἡγέλην habentibus ita lapsos esse, tum verò in ποιητικός. Nam ποιητικός verterunt poeta: quum tamen possit quis esse poeta, aut saltem poetæ nomen habere, & multa quæ sunt artis poetice præstare, qui non sit ποιητικός: & vicissim. Istud enim de eo dicitur, qui, etiamsi poeticum nihil scribat, tamen quandam à natura inclinationem & dexteritatem ingenij ad poesin, siue aliqua poetices velut semina habet. Ac, quoniam duorum recordor epigrammatum, quæ olim super isto harum vocum lusi discrimine, de duobus fratribus, quorum vnus erat poeta nomine, alter verè ποιητικός, licet poeta non vocaretur, quòd artem exercere poeticam noller: ea hîc aptam habitura sedem putauî. Prius igitur est hoc,

Es tu ποιητής, ποιητικός est tibi frater:

Nomine ποιητής, frater at est δούρατι.

O vtinam vel tu pariter ποιητικός eßes,

Aut certè ille tuus frater vtrumque foret.

Cui siquidem δῶα μὲς ποινῆς, Arlice, nulla est,

Nōne ultra δῶα τὸν, irritus ἐστὶν labor?

At posterius est istud: quod tetrastichon est tantummodo, cui præcedens hexastichon lucem affert,

Αὐδὺς ποινῆς, frater ποινῆς, audit:

Audis quod minimè es, audit at ille quod est.

Scilicet inuita scribis tu Pallade versus,

Scriberet at versus ille libente dea.

Vfus autem sum verbo Audire, ut Græci utuntur interdum suo ἀκούειν. Quam libertatem usurpauit Horatius, quum dixit, *Tu rectè viuis si curas esse quod audis.* Item, *Subtilis veterum index & callidus audis.* Id est, diceris. siue appellaris.

Sic certè & de κριτῆς ac κριτικὸς multa ludi possent: (si tamen ἐν τοῖς παλαιῇς ἀξίῳ liceret παίζειν, ἀπὸ τοῦ παρὰ δέξιν) quinetiam de στρατῆρος & στρατηγός: quæ non minori quàm superiora errore confunderentur, στρατηγόν, eodem quo & στρατῆρον modo, imperatorem interpretando: quum, sicut multi sunt aut saltem vocantur ΠΟΕΤΑΕ, qui minimè sunt ΠΟΕΤΙΚΟΙ (quod prius esse debuerant) ita, multi sint imperatores, id est duces exercitus, qui STRATEGOI quidem sunt, at non etiam STRATEGΙΚΟΙ: quod illos prius esse oportebat. Unde fit ut sicut illi inuita Minerva versus pangant, ita hi inuito Marte bella gerant. Utinam verò nulli forent ΠΟΕΤΑΕ, nisi qui & ΠΟΕΤΙΚΟΙ essent: nulli STRATEGOI, nisi qui & STRATEGΙΚΟΙ: nulli denique vlla de IE CRITAE forent, nisi qui & CRITΙΚΟΙ essent. Atque utinam (ut immodicus voti non sim) meum de his saltem votum exaudiretur. Nam vel vna hæc res magnam nobis aurei seculi partem euocaret: præsertim verò si & κριτικὸς, & tamen haudquaquam λη-

πικροὶ ἔσσης. Hodie enim multi qualibet de re sunt χρι-
ται, qui non sunt χριτικοί: & ex iis quibus, singulari Dei
beneficio, contigit ut utrumque sint, plerisque inue-
nias in quibus τὸ ληπτικὸν siue τὸ λημματικὸν corrumpit τὸ
χριστικόν.

Quidni autem, quamvis properem, sex meos sena-
rios tibi, lector, hîc proponam? quum ad hunc locum
pertineant? quum huic loco quadrent? Alioqui sum
ego is qui meos versus (qualescunque sunt) libenter in-
tra penetralia Vestæ contineam. Quod nisi ita esset,
iampridem iis ipsis de quibus instituta hæc dissertatio
est criticis nouam materiam præbuissem, simulque
Græcæ linguæ studiosis ἐχαισάμην ἂν τοῦτο, vel potius
προσέχαισάμην. Quemadmodum enim bellatore equo
ad ea uti quæ cuiuslibet equi ministeria esse possunt,
eo est abuti: ita ego, quum semper iudicauerim, abusu-
rum me propemodum Græca lingua, si ad alia eam
adhiberem quàm quæ Latinæ & facultates & faculta-
tem superant: libens, non solum in epigrammatis iis
quæ tota Græca sunt, sed etiam in Latinis quibusdam,
ea Græco sermone eleganter & festiuè dixi, (dicere
quidem certè conatus sum) quæ in Latino nihil elegan-
tiæ, nihil festiuitatis habuissent. Ex eo autem numero
aliquot hæc Dissertatio habebit: sed istud potissimum,
quanto sint Græcorum maiores quàm Latinorum di-
uitiæ (si tamen paupertas aliquas habere diuitias dici
potest) testatur. Nam (ut taceam de verbo Στρατηγός:
(quo vno verbo significatur, Imperator seu dux exer-
citus esse cupio, Imperatorio fungi munere cupio: eó-
que, si bene memini, & Xenophon utitur) vim certè
alterius vocabuli Στρατηγός, vix Latinis verbis repræ-
sentare quisquā potest. Sed audi tandē, vel potius lege.

Στρατηγὸς non es, στρατηγὸς tamen:

Pater στρατηγὸς negat στρατηγῶν.

Ergo se uterque quē στρατηγὸν obtulit?

Inuito uterque Marte ne bellum gerat,

Τὸ στρατηγῶν tu cedito tuo patri,

Patérve cedat τὸ στρατηγὸν tibi.

Sed de hoc στρατηγὸς, simúlque de altero illo ποιητὴς, quæ, quòd ὁμοιοσχῆματα sint, in exemplum attuli, plura dicere, huius loci non est: verùm quæ de natiua vocabuli ΚΡΙΤΙΚΟΣ significatione disseram, illorum etiam naturam patefacient.

Quicumque igitur de aliorum scriptis vult ἀψυδῶς κρίνει, id est, non mendax iudicium ferre, qui de illis ἀχρεὺς κρίτης, id est, iustus iudex, esse cupit, eum natura κριτικὸν fecerit oportet. Quem autem natura κριτικὸν fecisse dici potest? Eum profectò quem præ aliis iudicandi peritum reddidit, & tanquam ad suscipiendas iudicis partes præparauit. Quémnam verò hac instruxisse peritia dicenda est? Cui sagacitatem quandam & solertiam, seu sagacem quandam & solertem prudentiam indidit, qua illa quæ talia vel talia sunt, ab iis quæ talia vel talia esse videntur, scit διακρίνει, id est, discernere, siue diiudicare. Primum enim verbi κρίνειν vsum esse hunc puto, quo pro discernere ponitur (quod alioqui composito διακρίνειν vsitatiùs in soluta præsertim oratione dicitur) & iudicandi significatum ex eo illi datum esse, quòd (vt dixi) qui iudicat, discernat ea quæ verè, quæ ὅτις ἐσὶ ἀπὸ τοῦ γένους talia vel talia sunt, ab iis quæ in speciem tantummodo talia vel talia esse dici possunt. Nam vt pro tribunali, id quod primo aspectu iustum videtur, ab eo quod reuera iustum est, discernere oportet: sic etiam ab eo qui alienorum scriptorum est κριτικὸς.

κῶς κριτῆς, ea quæ prima fronte emen latè & rectè dicta videri possunt, ab iis quæ verè talia sunt distingui oportet. Atque, vt quo quis magis oculorum acumine valet, eo facilius lanam quæ colorem mentitur, ab ea quæ vero minimèque adulterino tincta colore est, dignoscit, ita, quo quis est κριτικώτερος, eo minus in iis quæ dixi hæret.

V E R V M, (vt tandem intra suos limites mea se sistat oratio: id est, de iis dumtaxat criticis disserat, de quibus institutus hic sermo est) nequaquam mihi dubium est quin olim hoc de aliorum scriptis iudicandi munus non alij suscipere soliti fuerint quàm quibus natura hanc κριτικὴν δυνάμιν ingenuerat: vel potius, quibus ars & exercitatio principia huius κριτικῆς δυνάμεως à natura ingenta promouerat: sed progressu temporis ij etiam qui minimè critici erant, id est, facultate critica præditi, fungi tamen criticorum officio voluerint. Vnde nihil mirum est si ἀκρισίας aut χακοκρισίας tales κριτικοὶ damnati fuerunt. Hac autem nostra tempestate quàm multi hac damnatione digni sunt? Quod enim seculum vt plures, ita arrogantiores huius generis censores tulit? Quamobrem tetrastichon hoc, quo vnum eorum petii, in multos distringi potest.

Scriptorum κριτὴν te iactas esse meorum.

Horum vt sis κριτῆς, κριτικὸς esto prius.

Κριτικὸς esse potes, tibi si κριτικέων haud est?

At, non desit vt hoc, mens prius esto tibi.

Vera certè hæc gradatio est. nam vt quis aliqua de re idoneus sit κριτῆς, id est, idoneus iudex, cum κριτικὸν prius esse, id est iudicandi facultate valere, necesse est. At κριτικὸς vt sit quispiam, habeat oportet id quod κριτικέων dicitur, estque velut iudicandi instrumentum. Quomodo

autem iudicandi instrumentum illi esse dicetur qui mente carere dici potest? aut quid mentis in iudicio eius quæremus in quo eam desideramus? Ideo rectè de Doleti carminibus,

Carmina quòd sensu careant mirare Doleti,

Quando qui scripsit carmina, mente caret?

Sed quemadmodum mente carere dicuntur non tantum qui ea prorsus destituti sunt, verumetiam quibus parum est mentis: ita κρίτικόν esse negamus (præsertimque ubi de eo agitur qui κρίτικοῦ munere sit dignus) non eum dumtaxat cui nulla prorsus est vis κρίτικῇ, sed eum quoque in quo hæc perexigua est. Neque verò mirum hoc videri debet, quum ad id etiam iudicium quod ab aliquo sensu corporis ferendum est, ὁ εὐαίθετος tantum siue ἀσθητικώτατος, non etiam is in quo qualiscunque sit δυνάμεις ἀσθητικῇ, aduocetur. Sic quum de aliquo sono, de modulatione aliqua pronuntiandum est, hoc ante omnia requiritur, ut non δειήκοος, sed εὐήκοος, non βαρυνήκοος sed ὀξύήκοος sit iudex. Primum igitur hoc fuisse credamus in illo Pylæmenis auditu quem Synesius τὸ κρίτικωτάτω τῷ ἀκοῶν appellat. Postquam enim dixit Pylæmeni, se misisse λόγον Ἀπικουρήν, τῆς ἀκριβοῦς ἐργασίας, addit, de eodem in tertia persona loquens, ὃν ἂν μὲν ἐπαινέσῃ Πυλαμίδης, ἢ κρίτικωτάτῃ τῷ ἀκοῶν, αὐτὸ τοῦτο τῇ ἀφροδυχῇ τοῦ θεοῦ σιωπήσῃ. Sed interpretes, quum hæc verba, ἢ κριτικωτάτῃ τῷ ἀκοῶν, vertit, *exactissimi homo iudicij*, non satis exacto ipse iudicio hanc interpretationem illis verbis dedit. Nam hæc laus, *Exactissime homo iudicio*, latè patet, neque magis ad eum pertinet qui auditu quàm qui alio sensu valet: aut etiam ad eum cui sua iudicatrix seu iudicatoria facultas (nisi iudicandi facultatem dicere potius debemus) alibi quàm in corporeo quopiam sensu

posita est: quum ille tamen non dicat ὁ κριτικώτατος τῶ ἀνθρώπων, sed ἡ κριτικώτατη τῶ ἀκούων. id est, *Homo exactissimo aurium iudicio præditus*. vel, *acerrimo*, vel, *acutissimo*, vel *subtilissimo*, vel *sincerissimo*. Quinetiam iungi hæc duo possunt, *sincerissimo & subtilissimo*, vt Cicero sincerum & subtile iudicium dixit. Nec malè, *valde intelligenti aurium iudicio*, (si *intelligentissimo* non placeat) dicatur. Iam verò & qui *Optimo iudicio* verterit, reprehendi non possit: quum huius nominis significatio superiorum laudum quamlibet complectatur. Cæterum non ita conuenisset elegantia Synesianæ ὁ πάντων ἀνθρώπων κριτικώτατὶς ἀκούων ἔχει, vel ὁ κριτικώτατος τὴν ἀκούων, vt illi conuenit, ἡ κριτικώτατη τῶν ἀκούων. Id est, (si verbum verbo reddatur) *Auditus omnium maximè facultate iudicandi præditus*. vel, *iudicandi solertia valens*. Quòd si ex aliquo recentiorum vel potius recentissimorum scriptorum mutuari vocabulum liceret, totidem verbis, *Auditus omnium iudiciosissimus* dicerem.

Sed nescio quomodo circa huius vocis κριτικώτατη interpretationem nimis fortasse κριτικῶς me gessid id est, criticorum ἀκρίβειας & λεπτολογίας nimis fortasse sum imitatus. Antequam tamen illi Synesij loco planè valedicam, hoc addo, testari Ciceronem libro De natura deorum secundo, esse aurium admirabile quoddam artificiosumque iudicium, quo iudicatur, & in vocis & in tiliarum neruorumque cantibus, varietas sonorum, interualla, distinctio, & vocis genera permulta: canorum, fuscum: læue, asperum: graue, acutum: flexibile, durum: quæ hominum solum auribus iudicantur. Hæc autem dicit postquam humani etiam visus præstantiam descripsit: ideóque particula *item* vtitur. *Aurium item* (inquit) *est admirabile quoddam artificiosumque iudicium:*

cium: quo iudic. &c.

Cæterum, quod dixi, ad id etiam iudicium quod ab aliquo sensu corporis ferendum est, non contentos esse nos homine cui qualiscunque sit *δύαμις αἰσθητική*, sed τὸν εὐαίσθητον tantum aut etiam τὸν αἰσθητικώτατον aduocare: id non abs re à nobis fieri, non solum verbum *παρὰ δ' ἀνθρώπων*, quod ad totum genus refertur, sed & duo ista, *παρὰ ποῦ & παρὰ ποῦ* (in quibus, à genere ad species venimus) apertè testantur. Hæc enim quoties audimus, recordemur oportet, duos qui potissimum commendari possunt in nobis sensus, visum & auditum, falli & ipsos interdum. Dico autem, duos hosce sensus esse magis quàm cæteros in nobis commendabiles, quòd illos præ duobus hisce habeamus imbecillos (vt & Cicero alicubi, si benè memini, fatetur) & odoratu saltem non à canibus tantum, sed ab aliis etiam plerisque animalibus superemur. Enimvero quamvis non pauciores fortasse *παρὰ ποῦ* quàm *παρὰ ποῦ*, plus tamen fidei oculis quàm auribus habendum esse quidam ex veteribus etiam censuerunt. Ac pro illis facere Herodoteum illud dictum creditur (cuius vt testimonio plerique omnes solent) *ὅτι γὰρ τὸ χῆμα ἔστιν ἀπὸ τοῦ ὄφθαλμοῦ μᾶλλον*. At ego in ea sententia non sum. Siquidem *ὅτι ἀπὸ τοῦ ὄφθαλμοῦ* non pro iis auribus accipio quibus minus fides haberi debet, sed pro iis quæ minus fidem habent, quæ minus credulæ sunt. Ideoque non assentior iis qui interpretantur, *Aures hominibus minus quàm oculi sunt fideles*. Hunc enim illorum verborum sensum non esse, vel ex iis quæ proximè præcedunt apud Herodotum verbis liquet: ac potius comparisonem illam eodem pertinere quò hæc Plautina, *Pluris oculatus testis vnus quàm aurium decem*. Perinde enim est ac si apud Herodo-

tum diceret Gygi Candaules, Scio enim fieri non posse
 ut quis ita credat illud quod ex alio audiuit, quantum-
 libet fide digno, ut credit id cuius suosmet & ipse ocu-
 los testes habet. Quinetiam quum dicit Horatius,

Segnius irritant animos dimissa per aurem,

Quàm quæ sunt oculis subiecta fidelibus, & quæ

Ipse sibi tradit spectator:

non ita sensum cum sensu confert, ut velit nos minus
 fidei nostris auribus quàm oculis habere: tanquam
 oculorum, in sua cernendi actione, quàm aurium in sua
 audiendi, certius sit iudicium seu testimonium: sed tan-
 tùm comparat ea quæ quis spectauit ipsemet, cum iis
 de quibus aures eius alii narranti fidem habent, qui spe-
 ctatorem se fuisse dicit. Et quoniam quæ alij nobis nar-
 rant, ea nobis, id est nostris auribus, velut tradunt (vn-
 de πατὴρ παρ' ἐδδοτα, quasi à patribus seu maioribus tradita,
 ea vocantur quorum notitiam ex eorum commemo-
 ratione habemus) contrà, spectatorem, sibi ipsummet
 tradere ait illa quibus suos ipse oculos testes adhibet.
 Alioqui non minus quispiam, quæ aurium quàm quæ
 oculorum sensu percipit & usurpat, ea sibi tradere dici
 potest. Neque verò minus aliquis auribus suis fidem
 habebit de clamore quem quis, dum occideretur, emi-
 serit, quàm suis oculis de ictu quo petitus fuerit. Sed
 nec segnius fortasse irritabitur (ut Horatianis verbis
 utar) eius animus audiendo illum clamorem, quàm
 ictum hunc videndo. Ab Horatio autem sensum cum
 sensu, eo quo dixi modo non conferri, sed tantummo-
 do comparare ea quæ ipsi spectauimus cum iis de qui-
 bus fidem aliis narrantibus habemus, qui spectatores
 fuerunt, ostendunt quæ sequuntur:

non tamen intus

Digna geri promes in scenam: multaque tolles

Ex oculis, quæ mox narret facundia præsens.

Non aliò denique locus ille Horatianus respicit quàm quò iste tragici, τὸν περὶ τῶν τὰ ὤψις ἄλλῃ ἀπειρ. ἢ γὰρ ὅψις οὐ πάρα. Cum quibus conueniunt hæc Ciceronis, qui, tanquam expertus ea de re loquens, scribit Torquato, *Nam etsi, quocunque in loco quisque est, idem est ei sensus & eadem acerbitas ex interitu rerum & publicarum & suarum, tamen oculi augent dolorem, qui ea quæ ceteri audiunt, intueri coguntur, nec auertere à miseris cogitationem sinunt.* Idem eidem in alia epistola, *Equidem nos, quòd Romæ sumus, miserrimum esse duco, non eò solùm quòd in omnibus malis acerbius est videre quàm audire.* &c. Iam verò quum in illo Horatii loco sensuum inter se comparatio (vti dixi) non fiat, malè illud *fidelibus* (vbi dicit, *Quàm quæ sunt oculis subiecta fidelibus*) ita intelligitur dictum de oculis, quasi sua in actione, siue suo in munere, fide digniores sint quàm aures, & perpetuum sit ac velut naturale eorum hoc epithetum. Quò igitur poetam respicere dicemus? nimirum ad oculos minimè *παρρηγοῦντα*. hi enim, fideles dici non possunt: nihilo certè magis quàm aures, quum *παρρηγοῦνσι*. Nec verò Cicero de duobus illis primariis sensibus ita loquitur, vt vnum alteri præferre videri possit. Postquam enim visus humani excellentiam descripsit, ad auditum transiens (vt antea docui) aurium item admirabile quoddam artificiosumque iudicium esse ait. Dixerat autem, antequam de visu verba faceret, *Omnisque sensus hominum multo antecellit sensibus bestiarum.* Quibus non est cur repugnantia loquutus videar, vbi dixi nos odoratu saltem non à canibus tantùm sed ab aliis etiam plerisque animalibus superari. Nam hoc quoque Ciceronè fal-

surum fuisse puto (sicut & visus acumine nos ab aquila & quibuldam aliis animantibus vinci) sed additurum, se ideo scripsisse, omnem sensum hominum multo antecellere sensibus bestiarum, quod homines suis sensibus ad res multo maiores & præstantiores quam suis bestiarum, utantur.

Atque, ut vnde diuertit, cò reuertatur oratio, illud etiam *fidelibus* ab Horatio adiectum, si eo quo dixi modo intelligatur (ut certè intelligi debet) id confirmat quod dixi, videndum esse ut αἰσθητὴς, siue εὐαίσθητος, sit ille qui τῶν αἰσθητῶν iudex eligitur. Neque tamen dubium est quin ἀρετὴ τοῦ αἰσθητοῦ tum præsertim necessaria sit iudici, quum ei de duobus quæ inter se comparantur, ferendum iudicium est: ut si eius auribus de duobus acutis sonis, uter acutior: de duobus grauius, uter grauior sit: vel si oculis, de duabus vestibus eodem colore splendens iudicandum sit vtra splendidior: si de duobus saporibus, uter dulcior, uter amarior, palato sit pronuntiandum. Alioqui, si simpliciter auditum, ex duobus sonis, uter acutus, uter grauis, eodemque cæteros sensus modo de cæteris quæ sub eos cadunt iudicare oporteat, hoc cuiuslibet esse qui sensu præditus sit, quidam philosophi censuerunt: sed alij, ut integri incorruptique sensus essent, addiderunt. Ordiamur à sensibus (inquit Lucullus apud Ciceronem) quorum ita clara iudicia & certa sunt, ut si optio naturæ nostræ detur, & ab ea deus aliquis requirat, contentane sit suis integris incorruptisque sensibus, an postulet melius aliquid: non videam quid querat amplius. Neque verò hoc loco expectandum est dum de remo inflexo aut de collo columbæ respondeam. non enim is sum qui, quidquid videtur, tale

dicam esse quale videatur. Et statim post, non Integros & incorruptos, sed sanos dicit: quod duobus illis responderet. Verum addit Valentes, quo vegetos, aut etiam ἀρμόζοντας (quod aliquanto plus esse videtur) intelligo: alioqui planè synonymo usus esse dicendus foret. *Meo autem iudicio* (inquit) *ita est maxima in sensibus veritas, si & sani sunt & valentes, & omnia remouentur quæ obstant & impediunt. Itaque & lumen mutari saepe volumus, & situs earum rerum quas intuemur: & interualla aut contrahimus aut diducimus.* &c. Sed in calce libri De finibus primi, rursus illa duo priora sensibus tribuuntur: *Si tota oratio nostra omnem sibi fidem sensibus confirmat. id est, incorruptis atque integris testibus.* Sed alicubi idem Cicero Zenonem sensibus tribuisse fidem dicit: non addens, integris incorruptisque: siue, sanis & valentibus. Quidam tamen in alio eius loco dicit, Epicurum, in eo quod ait, sensibus ipsis iudicari, voluptatem bonum esse, dolorem, malum: plus tribuere sensibus quàm nobis leges permittant. Hoc autem iuxta illorum sententiam dici puto, qui iudicium veritatis esse in sensibus negabāt, quamuis id à sensibus oriretur: qui sensus omnes, hebetes & tardos esse arbitrabantur, nec percipere vllō modo res eas quæ ipsis subiectæ viderentur: quæ essent ita parue vt sub sensum cadere non possent: aut ita mobiles & concitatae, vt nihil vnquam vnum esset cōstans: ne idem quidem: quia continenter laberentur & fluerent omnia. Affero autem receptā vulgo lectionē, quum & constans quidam legāt. Et in Academ. iiii, aduersus Lucullum dicitur, *Quid ergo est quod percipi possit, si ne sensus quidē vera nuntiant:* Et paucissimis interiectis illius infracti remi (id est, qui fractus videtur) & colli

columbæ sit mentio: *Tu autem te negas in fracto remo neque columbæ collo commoueri. Primum cur? nam & in remo sentio non esse id quod videatur: & in columba plures videri colores, necesse plus vno.* Quo etiam in loco vulgatam lectionem sequor, quamuis illa negationis geminatio quæ est in vocula *neque*, præcedente verbo *negas*, suspecta sit. Eodem porrò pertinent quæ in alio eiusdem loco legimus, videri nauigantibus moueri ea quæ stant. Nam & hoc, vnum est ex argumentis quibus vtuntur qui ostendere conantur ita falli sensus, vt iis fides habenda non sit.

S E D E N I M quum auditus solus sit ex sensibus cuius ἀκρόασις in iis de quibus nunc agimus criticis requiratur, de hoc tantum pergam verba facere. Dico igitur non paruum critico laudem dari quum iisdem quibus Pylæmenes à Synesio laudatur verbis, & ἡ κριτικὴ τῆς ἀκρόας vocatur. Tunc enim non solum criterio tibi necessario instructus dici potest, sed etiam κριτήριον habere quod sit κριτικὰ ταῦτα. Nam Criteria (quasi quis dicat Iudicatoria, id est iudicandi instrumenta) de iis quidem quæ sub sensuum aliquem cadunt, sunt ea quæ & αἰσθητικά nominantur (vt si à sentiendo Sensitoria deduceremus) at cæterorum criterium est intellectus. Quum enim ipsa κριτήριον natura tribus modis cōsideretur, ὅφ' οὐ, & δι' οὐ, & κατ' οὐ: id est, A quo, Per quod, Secundū quod: sub illo δι' οὐ, id est Per quod, haud aliud quàm sensum vel intellectum proponere nobis possumus. Nam vel sensus vel intellectus est id δι' οὐ κρίνομεν. id est, per quod iudicamus. Quædam tamen sunt vbi licet sensus tantum criterium requiri videatur, tamen & intellectus suum conferens, multum adiuuat: adeo vt dici fortasse verbis Horatianis possit res vna opem

alterius poscere, & amicè coniurare. Exempli gratia, vbi scribit idem poeta,

Non quivis videt immodulata poemata iudex,
an iudici hæc immodulata poemata animaduersuro
sufficere quendam ἀκριβῆ ἀκρίως existimamus? & an κρι-
τικῇ, cam, quamuis nihil intellectus conferat, appellare,
an teretes illi aures esse dicere possumus? Atque idem
fortassis & de isto eiusdem loco dici potest,

Legitimūque sonum digitus callemus & aure.

Si enim neque huc neque illuc suam symbolam con-
ferret intellectus, cessaret profectò in rebus eiusmodi
omnis discordia inter iudicium intelligentium (vt Ci-
cero vocat) & ipsius vulgi: quod Horatius interdum
rectum videre, interdum peccare dicit.

Sed intellectus eo rectius hoc fungi officio potest,
quo magis εὐρυία quædam, vel ἐπιτήμη, siue τέχνη, aut sal-
tem ἐμπειρία (etiam si magis ἀπλοῦς sit quàm πηλική) ad-
miniculatur. Horum igitur aliquid habuerunt aut ha-
bere certè debuerunt ij qui olim critici appellati fue-
runt. Alioqui enim quomodo eorum nonnulli de iis
etiam scriptis siue de eo scriptorum genere κριεῖν ausi
fuissent, quorum artifices ipsi esse non poterant? de
poematis, quum tamen poetæ non essent? de historico-
rum scriptis, quum in scribenda historia se non exer-
cuissent? de orationibus, quum nullam vnquam cau-
sam orassent? Nec dubium est quin εὐρυία potissimum
fungeretur in illis vice cotis, acutum Reddere quæ ferrum
valet, exors ipsa secandi. Quod Horatij dictum ab Ho-
crate manasse creditur, qui interrogatus cur, quum alii
ab eo artem dicendi docerentur, ipse taceret, respon-
dit, καὶ εἰ ἀκούω, αὐταὶ μὲν τὰ μέν ἐν δ' ὡραῖται, τὴν δὲ σιδῆρος, ὁ δὲ
καὶ τὸ μπιλὸν ποιοῦσι. At Dionysius Halicarnassæus aliud

exemplum affert, quod, vbi ad illū deuenero, referam.

Quemadmodum autem nemini dubium esse debet quin ex modestia profectum sit aliquod eiusmodi responsum, ad multos, ac præcipuè ad Horatiū, quod attinet: (neque enim, nisi ποικιλὸς fuisse, & quandam ποικιλὴν δάμνην saltem in seipso sensisset, munus illud suscepturus erat) ita persuasum habeo (quod & antea attigi) audaciam adeò creuisse paulatim, vt nonnulli etiam quos nulla critica facultate natura instruxisset, criticorum nihilominus nomen non ambirent modò, sed acciperent, & partes quoque illorum susciperent. Sed quàm periculosum esset illorum iudicium sequi, vel ex eo patet, quòd ne ipsi quidem Horatio hac in re fidem habere nos posse ostenderim, quin Plautum è manibus deponamus: siue inuidia siue aliud quidpiam eius hñc iudicium deprauarit. At ecce tamen nostro seculo, tanquam Horatij manibus gratificari volentes nonnulli, quæ scripta magis quàm Plautina, cōtemptui à nobis haberi, aut etiam, quæ potius abiici à nobis voluerunt? Quasi verò, quum Ælius Stolo Musas Plautino sermone loquuturas fuisse dixit, si Latinè loqui vellent, quum Aulus Gellius eum Latinæ linguæ decus, & alibi, linguæ atque elegantiae in verbis Latinæ principem vocauit, tam honorificos titulos sine assensu & quidem testimonio multorum non suæ ætatis solū, sed & aliorum, qui eam longè præcessissent, dare ausi fuissent. Quid quòd fuerūt & qui Terentij decus ex Plauti dedecore incrementum accepturum putauerunt? Ex eorum autem numero vnus epistolam cuidam typographicæ Terentii editioni ante plures annos præfixit, in qua ita Terentium laudat, Plautum ita vituperat, vt quicumque fidem illi habuerit, Plautū

in manus

in manus nunquam sit sumpturus, Terentium ex illis nunquam sit depositurus. Adeo autem Terentio est deditus, adeo laudi eius & honori fauet epistolæ illius autor, siue Andreas Nauagerius, siue alius, is est, (nomen enim typographi illa, sicut plerumque fit, mentitur) ut non solum Volcatij Sedigiti sed Horatii quoque de Terentio reiicere iudicium audeat, quod eum à Cæcilio vinci grauitate dixerit. Atque hinc quoque apparet quàm periculosum sit quorundam criticorum nostri aut nostro proximi sæculi iudicium, quod Laurentius Valla, (quem alioqui de Latinis scriptoribus iudicem nemo eligendum non censuisset) aliquot ex primariis Latinæ linguæ scriptoribus laude sua spoliari, ut eorum spoliis vnum Fabium Quintilianum ornaret: quemadmodum in sequentibus ostendam.

Verum, ut ab huiusmodi criticis ad veteres illos reuertar, Aristophanem & Aristarchum, (quibus hoc nomen primis non illibenter, sicut nec immeritò, antiquitas dedisse fertur) grammaticos fuisse, literarum monumentis traditum est. Et quoniam ut hi, ita etiam ex illorum posteris multi circa poemata potissimum censuram suam exercebant, seu censoria (ut loquitur Fabius) virgula utebantur: hinc factum est ut progressu temporis criticorum appellatio quodam velut priuilegio concessa illis fuerit qui poematum censores essent, ea ad grammaticorum leges examinando. Quinetiam eò ventum est ut honor grammaticorum quorumlibet, qui ἀκριβοῦς haberentur, (id est, ut opinor, exactiore & reconditiore doctrina præditi) tanquam hæreditario quodam iure, illo altero titulo auctior redderetur. Fateor tamen non satis ex Eustathio liquere, utrum

horum dicendum sit: an grammaticos illos qui essent ἀκριβέστεροι, dictos fuisse κριτικούς, sine adiectione: an verò appellatos fuisse γραμματικούς κριτικούς. Scribit enim in librum Iliadis, Ἡρακλείδης δὲ φησιν ὡς τὴν πρὸς κριτικῶν, ὅ ἐστιν ἀκριβέστερων γραμματικῶν, ὣν ἔστι καὶ Τισίας, ὑπερβαπὶν ἔλαττον εἶναι. Potest autem ita intelligi hic locus, vt κριτικῶν iungatur cum γραμματικῶν: si quidem ὅ ἐστιν ἀκριβέστερων per parenthesis positum existimetur. Sed vtrumcunque horum verum sit, hoc certè constat: quemadmodum multi grammatici criticorum nomen habuerunt, qui tamen eo munere non fungerentur, (ad eo vt honorarium tantum non etiam onerarium illis esse nomen dici posset) ita vicissim has partes suscepisse multos, qui se grammaticos minimè profiterentur: nec minus aduersus orationem solutam quàm poemata censuræ suæ autoritatem usurpasse. Quam libertatem non infeliciter apud Latinos Quintilianus & Aulus Gellius æmulati sunt, æmulari autem voluit & Macrobius. Quintilianus etiam Anneus Seneca pleraque ad criticam facultatem pertinentia suis illis Controuersiarum libris admiscuit.

Verum (vt à Græcis longius non discedam) inter eos qui hoc iuris apertè & non tanquam aliud agentes sibi sumperunt, (ex iis quidem certè quibus annorum iniuria pepercit) præcipui longè distantibus inter se temporibus fuerunt Dionysius Halicarnassæus & Dionysius Longinus. Hermogenes autem, dando aduersus criticos consilio, potius quàm criticè reprehendendo, criticum egit. Nam aduersus criticos consilium dedisse dico, quum suos tam accuratè docuit, tam diligenter quæ ab optimis quibusque scriptoribus rectè dicta sunt, ante oculos posuit, & de his ita præcepta tradidit, vt illorum qui hæc mente condita tenebunt, scripta,

criticorum censuræ hac in parte obnoxia esse vix possint.

Caterum cur critica seueritas, ea quæ maxima est, appellata sit, in causa potissimum Aristarchus fuit. Quamuis enim duo grammatici & titulo & supercilio primi extiterint quos antea nominaui, Aristophanes & Aristarchus, & in eadem tempora inciderint, huius tamen non illius seueritas in prouerbum abiit. Quanta autem ea fuerit, ostendit Quintilianus suarum Institutionum oratoriarum libro primo. Nam de duobus illis potissimum intelligenda existimo quæ de seueritate iudicij veterum grammaticorum illic scribit. Postquam enim dixit, professionem grammaticorum, quum breuissimè in duas partes diuidatur, rectè loquendi scientiam & poetarum enarrationem, plus habere in recessu quàm fronte promittat, addit, *Nam & scribendi ratio coniuncta cum loquendo est, & enarrationem præcedit emendata lectio. Et mixtum his omnibus iudicium est: quo quidem ita seuerè sunt usi veteres grammatici, ut non versus modò censoria quadam virgula notare, & libros qui falsò viderentur inscripti, tanquam subdititios, summouere familia permiserint sibi: sed autores, alios in ordinem redegerint, alios omnino exemerint numero. Vbi libros falsò inscriptos vocat quos vno illi verbo ψευδοπιγράφοις appellabant: ut subdititios, (qui & supposititij) quos illi επιβολιμαίους: licet frequentius νόθους vocarent. Quum autem summouere familia dicit, de iis intelligit qui γυμνασίοις admixti & in eandem familiam recepti erant. Vcluti, si octauum de Peloponnesiaco bello librum, Thucydidis esse, de quorundam sententia, negaremus, cum subdititium esse, & familia summoueri debere dicemus. Sic autem dicemus, Aristophanem sibi permissi-*

Ille ὁ πρῶτος familia Hesiodi summouere. Legimus enim apud eundem Quintilianū. *In qua sententia Hesiodum esse plurimi tradunt, qui ante grammaticum Aristophanem fuerunt. Nam is primus ὁ πρῶτος, in quo libro scriptum hoc inuenitur, negauit esse huius poetæ.* Obserua porro, eundem Quintilianum in illo priore loco non dixisse tantum grammatici, sed veteres grammatici: eodémque modo à Cicerone in quadam ad Dolabellam epistola (quem locum mox afferam) non *criticus*, sine adiectione: sed *criticus antiquus*, tanquam κατ' ἐξοχὴν quandam, dictum esse.

Ex duobus tamen iis quos dixi veteribus vel potius vetustissimis grammaticis, Aristarchus præsertim (licet alterius discipulus perhibeatur) adeo celebris tantæque autoritatis fuit, vt eius nomen, de quouis exactissimæ ac seuerissimæ censuræ critico, locum pro uerbis dederit. Tantum enim fidei iudicio Alexandrini huius grammatici adhibitum ab omnibus fuit, vt quemcunque in Homericis poematis versum non probaret, is Homeri esse non crederetur, sed πρῆμεβελῆδοι: idèoque inter τοιευτοὺς, seu ἀποιοι, aut etiam ὁβελιστοὺς referretur. Vtitur autem τῷ πρῆμεβελήδοι, nec non τῷ ὁβελίζει, Cicero in vna earum epistolarum quas Dolabellæ scripsit, lib. 9, *Profert alter (vt opinor) duobus versiculis expensum Niciæ: alter Aristarchus hos ὁβελίζει.* Ego, tanquam criticus antiquus, indicaturus sum utrum sint τοὶ ποιητῆς, an πρῆμεβελήδοι. Vbi assentior iis qui tāquam Aristarchus, legere malunt. Hoc porro negotium Aristarcho mandasse fertur Pisistratus Athenarum tyrannus, (quod tamen admitti non posse, ostendam in sequentibus) quum tot versus Homericis insertos videret, vt repurgari huius poetæ libros necesse esset.

Quantum autem suo hac in re iudicio consideret Aristarchus, ostendit M. Tullius, quum Appio scribit, *Vt enim Aristarchus Homeri versum esse negat quem non probat: sic tu (libet enim mihi iocari) quod disertum non erit, ne putaris meum.* Idem verò oratione in L. Pisonem notæ ab eo apponi solitæ malo versui mentionem facit: *Verumtamen, quoniam te non Aristarchum, sed Phalarim grammaticum habemus, qui non notam apponas ad malum versum, sed poetam armis persequare: scire cupio quid tandem isto in versu reprehendas, Cedant arma togæ. Vbi Cicero poetam quem Phalaris armis persequutus sit, videtur Stesichorum intellexisse.*

Cæterum, in quibus præterea rebus ista Aristarchi seueritas versaretur, quibus locis ille suam notam, aut (cum Fabio) suam censoriam virgulam apponeret, quisquis scire cupit, Horatii de arte poetica epistolam (si poematum illud pro epistola habendum est) in manus sumat. Audiet enim canentem Horatium,

Vir bonus & prudens versus reprehendet inertes,

Culpabit duros: incompertis allinet atrum

Transuerso calamo signum: ambitiosa recidet

Ornamenta: parum claris lucem dare coget.

Arguet ambigüe dictum: mutanda notabit.

Et (quod illum de eo quod dixi dubitare non sinet) videbit cum subiunxisse, tanquam & quæcūque dixit, & cætera omnia eodem pertinentia, verbis complecti duobus volentem,

Fict Aristarchus.

Perinde est enim ac si diceret, Atque (vt paucis absoluâ) omni Aristarchi libertate & seueritate vtetur. Pauca tamen Horatius prætermisisse hic videtur, ex iis quæ Aristarchi alicuius operam poscere putantur. Ac

expectasset quidem aliquis fortasse vt etiam eorum quę
improprię dicta essent, mentionem faceret: sed (vt omit-
tam plerisque ambigüe dictis simul etiam improprie-
tatem subesse) multo plus periculi est ambigüe quàm
improprię loqui. Ideoque magis etiam necessariũ fuit,

Arguet ambigüe dictum,

quàm,

Arguet improprię dictum.

Hęc porro Aristarchi crebra & honorifica apud om-
nes mentio fecit vt eius nomen in appellatiuum etiam
ex proprio transiret: & ita quidem vt nec Cicero ita eo
vti dubitarit, Attico scribēs, *Quid multa? totum hunc lo-
cum, quem in aristocratia ego varię meis orationibus (qua-
rum tu Aristarchus es) soleo pingere, de flamma, de ferro (&c.)
valde grauit̃er pertexuit.* Credibile denique est, critici &
censoris officio melius Aristarchum, quàm eius præce-
ptorem Aristophanem, functum fuisse: quum illius,
non huius, nomen de quouis alienorum scriptorum
fidei simul & seueri cęlore seu castigatore in prouer-
bium abierit. Nisi fortę Aristarchi potius quàm Ari-
stophanis nomini datus hic vsus fuerit, quod ambi-
guitate nomen hoc non itidem caruisset.

Hodie autem Aristarchi in plurimis supercilium,
in paucissimis iudicium (quod tamę in critico primum
est, & cuius quandam præstantiam hoc ipso etiam ti-
tulo præ se fert) manere videmus. Ideoque quod in
vnum hac de re lusi epigramma, multis conuenire po-
test. Est autem huiusmodi,

Tu critici titulũmque superciliũmque, Leuine,

Sumis, ceu critici munus obire queas.

A lenitate quod est (vt scis) ab origine prima

Nomen, id infaustum muneris omen habes.

Est leuitatis & hoc, quòd aperto vix bene libro,

Immiti criticas imprimis vngue notas.

Est leuitatis & hoc, quòd tu quaecunque notasti,

Immemor illorum es, clausus vt ille fuit.

Quæ leuitas! nunquam iungis verba vltima primis,

Quique locus legitur, non tibi perlegitur.

Iudicium & leuitas pugnant: critici tamen illud

Præcipua est virtus: nomen hic inde trahit.

Tolle supercilium critici iulúmque, Leuine:

Haud critico satis est posse μέγα φρονέειν.

Priscus Aristarchus μέγα φρων erat: haud nego: verum

Vt μέγα erat φρονέειν, sic & δεινὰ φρονέειν.

Primam autem in voce Criticus syllabam hîc breuem feci, Latinorum more, non oblitus me alioqui antea in κριτικός, sicut & in κριτής, eam produxisse.

Sciendum est porro, criticorum mentionem plerunque fieri plurium simul (non adiectis tamen nominibus) ac non vnus tantummodo. Sic certè Strabo de isto versu Homeriloquens, qui est in eius Bœotia, siue catalogo nauium,

Στῆσε δ' ἄγων ἱν' Ἀθηναίων ἵσαντο πάλαι γαρες,

scribit non placuisse criticis interiici hunc versum. Vnde apparet, iudicasse illos cum esse ex iis quos παρεμβεβλημένους (vt antea dixi) vocabant: qui etiam πέντε γειμένοι & παρεγγεγραμμένοι dicti fuerunt. Non immeritò autem versum hunc cæteris inferi volebant critici, quum Solon vel Pisistratus is fuisse diceretur qui cum interposuisset, vt teste Homero probaret, Salaminem iam à principio Atheniensium fuisse: quum alioqui de illa inter Athenienses & Megarenses esset contentio. Quemadmodum igitur Athenienses Homerum scripsisse aiebant,

Αἴας δ' ἐκ Σαλαμῖνος ἄλυν δυοκαίδεκα ἤτας,

Σπῖσι δ' ἄγων ἴν' Ἀθηναίων ἴσαντο φάλαγγας:

ita vicissim Megarenses, ab eo ita scriptum fuisse,

Αἴας δ' ἐκ Σαλαμῖνος ἄλυν δυοκαίδεκα ἤτας,

Ἐκ τ' Αἰγυρίουσης, Νισαῖης τε, Τείπεδός τε.

Megarensium enim esse hæc loca. Animaduertendum vero hîc est, non verisimile videri, Pisistratum dedisse Aristarcho illam Homeri repurgandi prouinciam, si ipsemet aliquid in eo corrumpere ausus fuerat. ut omnittam, illos, Pisistratum inquam & Aristarchum, minime σκληρόνους fuisse.

Ceterum, quosdam fuisse criticos crediderim, qui nequaquam tantum autoritatis, quantum alij, sibi tribuerent, suóque iudicio cum tanta quantam dicit Quintilianus seueritate vterentur, sed quosdam locos suo modo exponere contenti essent. Sic certè Eustathius de istis Homeri versibus loquens, qui sunt Iliadis libro 1,

Ἡ δὲ χλωσσαμένη δῖον γένος ἰοχέμερα

ὧρσεν ἐπὶ χλοῦνι συῶ ἄχρῖον ἀργιόδοντα,

Ὅς κακὰ πόλλ' ἔρδεισκεν, ἔθαν Οἰήος ἀλωῖν:

in horum postremo criticos (quorum esset Tifias) ἔθων aliter expoluisse ait quàm exponi vulgò soleret. Sed dubium est (ut antea dixi) an hîc intelligat Eustathius, πὺς ἀκριβετέρους γραμματικούς, dictos fuisse criticos, sine adiectione: an verò grammaticos qui tales essent, videlicet ἀκριβετέροι (quasi magis exactos dicas: id est, doctrina quadam magis exacta & recondita præditos) vocatos etiam fuisse grammaticos criticos. Ac mihi certè non minus istud hîc verisimile: & ex horum potissimum numero fuisse illos qui quasdam sibi peculiare ἐξηγήσεις proponere contenti essent. Sed addam & hoc, nequaquam

quam credibile mihi esse, fidem illis in omnibus adhibitam fuisse: atque hoc vel ex ista tam peregrina expositione coniecere. Quid enim magis ξείνων, magis ἀμώκτων afferri potest, quàm ἕως in illo Homeri versu dictum esse per literarum metathesin pro θείων? & quidem θείων pro ἑταθείων, id est ἑτατρείων, accipiendo?

S I C V T verò prisca scriptores Græci, potissimùmque poetæ, sic etiam Latini suos criticos habuerunt: ut cum aliunde, tum ex isto Horatij loco patet,

Ennius, & sapiens & fortis, & alter Homerus

(Ut critici dicunt) leuiter curare videtur

Quò promissa cadant & somnia Pythagorea.

Vbi quum ita loquitur Horatius, *ut critici dicunt*, perinde esse puto ac si diceret, si criticis credere dignum est, illòsque perstringere arbitror, tanquam iudicium in illis desiderantem: quòd quum alterum Homerum esse prædicent, cum aliunde tum verò ex somnii eius testimonio hanc in opinionem adducti (aiebat enim Ennius somniasse, mortuum se esse, & per Pythagoreâ metempsychosin, animam Homeri suum in corpus immigrasse: atque ab eo tempore Homericæ venæ hæredem quodammodo extitisse) atque interim non animaduertant, multos esse poematum eius locos, qui tantam expectationem non sustineant, multos esse versus qui illi de eo conceptæ opinioni non respondeant. Dicit autem, *Quò promissa cadant*, id est, quis suorum promissorum sit euentus: promissa præstet, necne: quasi non alios quàm illa Homericæ ut anima, ita etiam vena dignos versus scripturum se promississet.

Satyra autem libri prioris vltima, vnius criticorum sui temporis mentionem facit, qui Sp. Metius Tarpæ vocabatur.



*Turgidus Alpinus ingulat dum Memnona, dūmq̃ue
 Desingit Rheni luteum caput, hæc ego ludo,
 Quæ nec in æde sonent certantia iudice Tarpa,
 Nec redeant iterum atque iterum spectanda theatris.*
*Quinetiam in epistola de arte poetica, illius meminit,
 si quid tamen olim
 Scripseris, in Meti descendat iudicis aures,
 Et patris, & nostras.*

Nec verò alius quàm hic esse existimatur, ille qui à Cicerone Spurius Metius appellatur : in epist. ad Marium, quæ libri epistolarum ad familiares septimi est prima : *Nobis autem erant perpetiendæ quæ Sp. Metius probauisset.* Ceterùm vetera scholia in illū Satyræ vltimæ libri prioris locum, Metium Tarpam, iudicem fuisse criticum tradunt (vbi obserua non dici tantùm criticum, sed iudicem criticum : sicut & alibi) auditorem assiduum poematum & poetarum, in æde Apollinis seu Musarum : quò conuenire poetæ solerent, suæque scripta recitare. Quibus hæc etiam addit, quæ diligenter obseruanda sunt, illa poetarum scripta, nisi à Tarpa aut alio critico (qui numero erant quinque) probarentur, in scenam non solita deferri. Horatius quidem certè, iis etiam quæ subiungit ostendit se neque huius critici neque aliorum iudicium morari : sed tanquam ludentem & fallere tempus cupientem (nam & huc respicere illum puto, quum ludere se dicit) quædam sibi & amicis suis scribere, ac minimè vulgi in theatro applausum ex illis captare : siue, vt alibi loquitur, non egere plausoris aulææ manentis, & vsque sessuri donec cantor plaudere iubeat. — *nam satis est equidem mihi plaudere,* inquit. Malè autem quidam ad Mæcenatem hoc restringunt : quum & alibi ostendat Horatius se vt iudi-

cium vulgi contemnere, ita cum aliorum tum equitum iudicio multum tribuere : & quidem plebi equitem alicubi opponat: vt in epist. ad Augustum, duobus in locis. nam & ibi *ἐν τοῖς* voce illa vitur, licet plures intelligens.

Atque hîc operæpretium est considerare, contrariâ esse poetæ & oratoris conditionem: quum poeta aspernari vulgi iudicium possit, contrâ autem, summi sit oratoris, summum oratorem populo videri: ac, si probetur orator multitudini, non sit quòd doctorum iudicium magnopere desideret: vt in suo Bruto nos docet M. Tullius. Vbi tamen legimus etiam, eos qui vulgi opinione disertissimi habiti sint, intelligentium quoque iudicio fuisse probatissimos. Ibidem, postquam narratum est illud Antimachi, qui, quum conuocatis auditoribus, legeret eis magnum illud volumen suum, & cum legentem omnes præter Platonem reliquissent, Legam, inquit, nihilominus. Plato enim mihi vnus instar est omnium. Vbi, inquam, narratum hoc est, additur, Et rectè. poema enim reconditum, paucorum approbationem, oratio popularis assensum vulgi debet mouere.

Verùm, ad illos Horatii criticos vt redeam, quemadmodum ipse de iis quibus Ennium ornauerat laudibus, testes criticos citauerat: ita eorum sequi testimonium videtur in his quæ de aliis addit,

Ambigitur quoties vter utro sit prior, aufert

Pacuius docti famam senis, Accius alti:

Diciur Afranji toga conuenisse Menandro,

Plautus ad exemplar Siculi properare Epicharmi:

Vincere Cæcilius gravitate, Terentius arte.

Nec tamen putandum est omnium criticorum idẽ

de his iudicium fuisse. Quintilianus certe eodem modo Accium & Pacuuium coniungens, de iis hæc scribit, *Tragœdia scriptores Accius atque Pacuuius, clarissimi grauitate sententiarum, verborumque pondere, & autoritate personarum.* Et paucis interiectis, *Virium tamen Accio plus tribuitur Pacuuium videri doctiorem, qui esse docti affectant, volunt.* Pauca verò illa quæ intericiuntur, quibus eos excusat potius quàm accusat, sunt ista, *Ceterum nitor, & summa in excolendis operibus manus magis videri potest temporibus quàm ipsis defuisse.* Hæc autem faciunt vt de hisce duobus potissimum intelligenda existimem ista quæ Horatius iis quæ attuli subiungit,

Interdum vulgus rectum vider, est ubi peccat.

Si veteres ita miratur laudatque poetas,

Vt nihil anteferat, nihil illis comparet: errat.

Si quædam nimis antiquè, si pleraque durè

Dicere credit eos, ignauè multa, fatetur:

Et sapit, & mecum facit, & loue iudicat æquo.

Atque vt omittam quod de Liuii carminibus iudicat in iis quæ proximè sequuntur: de Plauto, (de quo melius quàm de illis iudicare possumus, quum huius aliquam saltem partem, at illorum parua tantum fragmenta iniuria temporum nobis reliquerit) quale iudicium eius fuit an criticum in eo agere dicemus?

At nostri proavi Plautinos & numeros &

Laudauere sales: nimium patienter virumque

(Ne dicam stultè) mirati, si modò ego & vos

Scimus inurbanum lepido seponere dicto,

Legitimumque sonum digitis callemus & aure.

Horatiùmne (inquam) criticum hîc agere dicemus? Profectò, si personam hanc suscipit, criticum omnium audacissimum agit. Quæ enim esse maior in hoc ge-

nere audacia potest, quàm scriptorem cum quem alios laudibus in cœlum propemodum tulisse sciret, non tantùm in ordinem cogere, sed ita deprimere, ut explodendus omnino videretur? Præsertim verò si, quæ de eodem in Epistola ad Augustum legimus, non laudandi sed reprehendendi studio dixit, non dubitabimus quin dignum qui exploderetur censuerit. Scripsit enim,

— aspice, Plautus

*Quo pacto partes tutetur amantis ephēbi,
Ut patris attenti, lenonis ut insidiosī.*

Nam si Plauto hac etiam in parte, in qua potissimum excellere censetur, laus omnis eripiatur, (quod fiet, si exponamus, Aspice quàm malè Plautus tutetur horum partes, quàm malè comico decoro his in personis seruiat) quæ illi superesse dici poterit? quæ? inquam: si quidem Horatio de illis quoque assentiamur quæ in sua Arte poetica de eius numeris & salibus scribit.

Operæpretium est autem considerare, quousque quorundam huius ætatis criticorum aduersus hunc comicum audacia processerit, dum illis Horatij verbis, tanquam firmissimo præiudicio, suum inniti posse iudicium existimant. Nam Andreas Nauagerius, aut quicumque est illius quam dixi epistolæ autor, Francisci Asulani nomine ad Ioannem Grolierium, qui tum primarius Insubriæ quæstor erat, scriptæ, & Terentii editioni præfixæ: quicumque (inquam) est illius autor, non contentus Terentium Plauto anteferre, vix vllum huic locum relinquit. Ac primùm quidem illum Volcatium Sedigitum, qui cum critica quadam aut etiam plusquam critica audacia iudicium de comiis Latinis tulit, acriter reprehendit. *Quicumque* (inquit)

Volcatius ille Sedigitus fuit, qui iudicium de Latinis comicis, in his qui circumferuntur iambis tam audacter tulit, ut nihil eum qui contrà sentiat, sentire dixerit: ne ille mihi omni ipse prorsus videtur sensu caruisse. Cæcilio palmam statuit. Facilius id fortasse quàm decuit. Quanquam enim de eo cuius nulla extent scripta, iudicari nihil possit: non parui tamen Ciceronis iudicium, qui nunc, malum eum esse Latinitatis autorem, nunc, male loquatum dicit, faciendum est. Deinde, postquam dixit, se tamen ob hanc ipsam causam quòd omnia eius scripta interciderunt, condonare Ciceroni velle hoc iudicium, & rectè Cæcilio delatam palmam existimare: ne temere in eum quem non legerit, pronuntiasse quidquam videatur: quum præsertim Horatius etià gravitate eum dicat vincere. Hæc (inquam) ubi dixit, subiungit, Quid quòd Plautum ceteros superare, ac sexto demum loco consequi Terentium asserit? ullòne id pacto assentiri possumus? Ego verò tantum abest ut in hac sim sententia, ut longo intervallo post Terentiū Plautum arbiurer collocandam. His subiungit, se, ut hoc sentiat, non solùm elegantia sermonis moveri, qua Terentium facillimè omnes excellere, neminem esse qui neget: sed velle, in hoc parem illi Plautum esse: velle, quod hominis fortasse vitium sit, ætati adscribere: ut durior dicatur esse Plautus, asperis quibusdam atque obscuris verbis uti, quòd tunc sic loquerentur, & non posset alio quàm ætatis suæ sermone uti. Longè Terentius (inquit) cultior: nihil in eo non lene, nihil non elegans. Limatior tum scilicet Latina lingua facta est. non eius hæc propria existimanda laus, sed communis illius ætatis omnium. Ut hæc (inquam) ita esse concedam, quid cetera quæ multo maioris artis sunt, possunt ne ulla ratione paria in utroque fieri? Omnibus mihi Plautus in rebus (li-

ceat liberè proferre quod sentio) videtur nimis: ita illo Terentius parcior, ut nihil ab eo tamen, quod desiderari possit, relinquatur. Hiant nonnunquam neque satis coherent Plauti comœdia: ita omnia Terentij inter se nexa, ita ex omnibus unum quoddam conficitur, ut nihil aptius illius fabulis, nihil magis fieri ad unguem possit. Ac postquam (paucissimis interiectis) adiecit, decorum illud, quod in omnibus tantopere custodiendum est rebus, in fabulis verò, (vbi congrua unicuique personæ effingenda sunt omnia) nisi seruetur, nihil prorsus fiat: neminem Terentio melius obseruasse: Plautum contrà huius nonnunquam obliuisci ait. Tandem verò ad Plauti facetias venit, & de iis non solum assentitur Horatio, sed magis etiam vituperat. Scribit enim, *Ac mihi quidem aliquando hæc quæ diximus consideranti, ob id Plautus minus in his fortasse posuisse curæ videri solet, quòd unum illi studium facetiarum fuit. nihil ille aliud propositum comico poetæ credidit, quàm populo risum mouere. Id dum unum capiat, uni huic rei dum inseruit, ut id quod voluit maximè assensurus sit, & urbanissimus sit spectatoribus visus, multa certè alia & potiora omisit.* Ac ne his quidem contentus, ita eius sales vituperat, ut magis nemo possit: his verbis, *Atque ipsi tamen etiam illi sales, dum undique eos colligit, undique ex omni re aucupatur, hebetes plerumque ac scurriles sunt: nec quos, extra illum in theatro concitati vulgi plausum, sedatus probare lector possit.* At Terentium ita libi hac in re moderatum esse dicit, ut in hoc quoque non minus quàm in cæteris quæ commemorauit, præstitisse omnibus videatur. Facetiarum enim duo esse genera: unum in re, alterum in verbo esse positiu. Sed multo id venustius & grauius esse quod re tractetur: acutum nonnunquam & elegans esse quod in verbo.

est, sed frigidum tamen plerumque esse, & facillimè in scurrilitatem delabi, si quis sibi in eo non moderetur. Terentium igitur, crebrum in priori genere, in posteriori parcum: contrà, Plautum, in illo rarum, in hoc frequentissimum. Atque hinc factum esse ut rudi fortasse populo & spectatori (quippe qui scurra sapius quàm poeta delectentur) falsior sit Plautus visus: peritis certe auribus & sapienti lectori nihil Terentio festiuius videri debere. Plauti quæ lepida dicta sint, placere semel posse: Terentij, quo magis inspiciantur, eo venustiora apparere. Risum per læpe illum mouere, sed & cachinnum: nunquam cachinnum Terentium. Denique in Plauto dicacitatem, in Terentio urbanitatem conspici maximam. Tandem verò ad testimonium illud Horatii (quem acerrimo inter poetas omnes iudicio dicit sibi videri) confugit.

Vide obsecro lector, vide, annon meritò tibi dixerim, habiturum te in hac Nauagerii sine Nauagerii epistola (eius enim esse, propemodum persuasum habeo) ubi considerare posses quò criticorum progredietur audacia, quum iudicium suum veteris alicuius scriptoris testimonio, tanquam præiudicio, fulcire se posse existimant. Sed cur non Ciceroni iudicio si non tantum quantum Horatiano, aliquid saltem tribuit? Hoc facere si velit, audiat illum hæc dicentem, tertio De oratore libro: *Equidem, quum audio socrum meam Læliam (facilius enim mulieres incorruptam antiquitatem conseruāt, quòd multorum sermonis expertes, ea tenent semper quæ prima didicerunt) eam sic audio ut Plautum mihi aut Næuium videar audire. Quid? an, si Plauti sermo Ciceroni displicuisset, in Læliæ tamen ore illi placere, & quidem ab eo laudari potuisset? An, si huius comici*

sermo

sermo laudatores multos non habuisset, Ælius Stolo. (siue Stilo) dicere ausus fuisset, Musas Plautino sermone loquuturas fuisse, si Latinè loqui vellent? Nónne & Varronem hoc Ælij Stolonis dictum commemorare puduisset? Vt de Quintiliano taceam, qui ita hoc refert vt assentiri se ostendat.

Ad sales autem quod attinet, vide vt omnino audacis illius critici sententiæ repugnet crisis Ciceroniana, De offic. lib. 1. *Duplex est omnino (inquit) iocandi genus: vnum, illiberale, petulans, flagitiosum, obscœnum: alterum, elegans, urbanum, ingeniosum, facetum: quo genere non modò Plautus noster, & Atticorum antiqua comœdia, sed etiam philosophorum Socraticorum libri referti sunt.* At hoc saltem non negabis, (dicet Nauagerius) multos eius iocos dicacitatem habere. Non negabo: nec ipse, vt opinor, Cicero negaturus fuit. Sed hoc fortasse adieci-
 set, se, quam oratori non permittat, poetæ comico libenter permittere. Nam illa ipsa antiqua Atticorum comœdia, quam illo iocandi genere urbano, eleganti, faceto abundare dicit, nónne & dicacitatem ac quam Græci *ῥωμολογία* appellant, alicubi admittit? Sed videndum est vt seruis aliisve personis vilibus potius quàm aliis illa tribuatur: quod à Plauto etiam vbique fortasse seruatum esse comperiemus. Et quoniam in antiquæ comœdiæ mentionem incidi, hoc addo, Plautum Græcam illam antiquitatem sua Latina nobis representare antiquitate: & quidem ita vt eum in quibusdam comœdiis sibi permisisse putem, vni eidemque multa ex multis veterum Atticorum comœdiis emblemata intexere: sed sic tamen vt suam magna ex parte posset dicere: at Terentium magis vni eidemque comico Græco in vna eademque comœdia se adstrinxisse.

Illud autem cachinni Plautini & risus Terentiani discrimen (dicit enim Plautum quidem persepe ritum, & sæpe cachinnum, at Terentium risum tantummodo, cachinnum nunquam mouere) tam ineptè in medium afferri videtur, vt vllò ipsum responso dignari pudeat. Sed quod ait, Plauto vñum facetiarum studiũ fuisse, eum nihil aliud propositum comico poetæ dididisse, quàm populo risum mouere: tantum à veritate abesse contendo, vt, quum maxima sit laus cùm aliorum verò comicorum poetarum, simul & iucunda & idonea dicere vitæ, maiorem hac in laude partem Plautus quàm Terentius capere dici possit.

Sed quid ego tam multa? Vnum hoc argumentum aduersus hunc criticum anticriticè proponere satis fuisset, Terentium sua ex Plautinis fabulis furta, omnis generis, passim obuia habere.

Nec vero ab ipsius Virgilij poematis manus suas, vel potius suas notas abstinuerunt critici. Nam hic eclogæ secundæ locus,

Torua leana lupum sequitur, lupus ipse capellam:

Florentem cytisum sequitur lasciuia capella.

Te Corydon, ô Alexi. Trahit sua quemque voluptas.

hic inquam locus quum nobis bellè se habere videatur, critici tamen in eo verba ista reprehenderunt, *trahit sua quemque voluptas*, teste Seruio. Notabatur à criticis (inquit) quòd hanc sententiam dederit rustico, supra carminis bucolici legem, aut possibilitatem. At ego facillimè Virgilium posse hîc defendi puto. quid enim loquitur hoc in loco Virgilianus rusticus, nisi quod prouerbiale est? quid autem magis vulgare, & infimo etiam vulgo conueniens, quàm proueria? & ea quidem præsertim quæ huius generis sunt. Quod quum ita sit, ab

his etiam dissentio qui poetas posteriores à prioribus
sententias huiusmodi mutuatos dicunt: & quidem de
hac ipsa hoc scribunt. nam quum Archilochus dixit,

Ἄλλ' ἄλλος ἄλλω καρδίῃ γίνεται,
vel,

Ἄλλος γὰρ ἄλλω καρδίῃ γίνεται,

eum respexisse ad HomERICA illa volunt,

Ἄλλος γάρ τ' ἄλλοισιν ἄλλῃ ἐπιτέρεται ἔργois.

Quasi verò talia cuilibet in mentem non veniant, &
Vlysses tantum aut alium ex proceribus dicere illud
decuerit, Ἄλλος γάρ τ' ἄλλοισιν ἄλλῃ ἐπιτέρεται ἔργois: ac non
vel Eumæo eius subulco tribui potuerit: quum nihil
dicatur quod experientia quotidiana passim non com-
probetur. Fateor alioqui esse quasdam sententias (ex
proverbialibus etiam) quæ vili personæ nequaquam
conueniant: adeo ut non immeritò dicatur apud comi-
cum admirabundè simul & indignabundè, *Etiā sen-
tentias loqueris carnis sex?* tanquam nec suo captui nec sue
conditioni conuenientia loqueretur. Idem autem so-
nare videntur interdum illa verba, *Sententias loqui,*
quod nobis ista, *Se fonder en raison*. Iam verò, non so-
lùm quædam sententiæ ratiores & grauiore (etiā si,
ut dixi, è proverbialium numero sint) talibus personis
tribui non possunt, sed etiam de triuialibus (ut ita lo-
quar) idem iudicandum existimo, si quidem illis aliquid
aut præfigatur aut subiungatur quod esse quodammo-
do philosophantis (ut etiam Plautus cômice hoc verbo
vitur) dici possit. Ac exemplo fortassis ille nobis locus
Homericus esse possit, *Odyssæa* libro 8. Nam illum qui-
dem versum,

Ἄλλος γάρ τ' ἄλλοισιν ἄλλῃ ἐπιτέρεται ἔργois,

non solum Vlyssæi (ut antea ostendi) sed eius etiam su-

bulco Eumæo, tribuere potuit Homerus, meo quidem iudicio: sed hunc quem illi præfigit de suo, eodem pertinentem, *οὐκ ἄγεεῖται*.

Αὐτὰρ ἐμοὶ τὰ φίλ' ἔοικε τὰ πειρητοὶ ἐν φρεσὶ ῥηκάν,

nonnisi præter decorum, vt opinor, tribuisset. Nam cogitare, diuinitus hoc fieri vt alia alium voluptas trahat, & quidem ipsis diis huius vel illius rei amorem menti nostræ indentibus, iam certè hoc sicut vltra prouerbium est, ita etiam vltra talis personæ captum esse videtur. Neque tamen is qui istum Homeri locum diligenter expendet, hunc esse illius sensum negabit. Hic enim faciendum est, mea quidem sententia, quod & in aliis quibusdam Homeri locis à me fieri solet, vt aliquid ex præcedentibus repetendo, ea inter se colligem quæ alioqui non satis coherere videri possent. Nam hic, quomodo versu isto, *Ἄλλος γάρ τ' ἄλλοισιν ἀνὴρ ἐπιτέρπεται ἔργῳ*, eius qui proximè præcedit afferri rationem dicemus, nisi eo quo ostendi vinculo superiori illum annexamus? perinde ac si ita scripsisset Homerus, (si exempli gratia aliquid *παρὰποιεῖν* vel potius *μεταποιεῖν* mihi licet, apud eum qui tam feliciter omnes suos versus *ἐποίησεν*, vt solus *ποιητὴς* titulum *κατ' ἐξοχὴν* obtinuerit) ita inquam posteriorem versum intelligendo, ac si Homerus eum hoc modo scriptum reliquisset,

Θεῖον γάρ τ' ἄλλω ἄλλοις τέρπεσθαι ἐπ' ἔργῳ.

vel suo illi versui, nihil immutato, adiecisset *οὐκ ἄγεεῖται*,

Ἄλλος γάρ τ' ἄλλοισιν ἀνὴρ ἐπιτέρπεται ἔργῳ,

οὐκ ἄγεεῖται.

Nam his verbis ad hoc significandum alibi eum vti, videmus. Verùm ad cæteras Virgilii criticas reprehensiones pergendi tempus est.

Reprehensus igitur à criticis fuit & hic locus octa-

ui Æneidos libri, de Hercule,

Vt bello egregias idem disiecerit vrbes,

Troiámque, OEchaliámque.

Hic enim Seruius, postquam dixit, Herculem Troiam euertisse, propter negatos sibi à Laomedonte equos diuino semine procreatos, & Hesione nuptias, quam à ceto liberauerat, necato Laomedonte: addit, *Sanè critici frustra culpant Virgilium, quòd præsentibus Troianis laudari introduxit Troiæ excidium.* Atque hæc Σπολογεύδιος subiungit, (ostendens se non abs re dixisse, frustra culpari ab illis Virgilium) *non respicientes quia hoc ratio fecit hymnorum: quibus aliquid subtrahere, sacrilegium est.* Iam verò & Tiberius Donatus reprehensionis huius meminit. Scribit enim, multos (non addens, criticos) Virgilium hoc loco reprehendere, quòd præsentibus Troianis triumphum actum de Troia non debuerit ponere. Verùm & ipse Virgilium defendit, & quidem eandem quam Seruius rationem afferens. *Quasi demum (inquit) in hominũ gratiã, diuorũ debeat veneratio mutilari. Hoc genere minueretur solennis illa laudatio eius diei cuius apud eos meritũ in maximo atque æterno honore fuerat cõstitutũ.* Sed non animaduertit Donatus se in proximè præcedentibus aliquid dixisse, quod retorqueri aduersus hanc defensionem posset. nam in hæc verba, *Troiámque OEchaliámque*, annotauit, has vrbes non fuisse solas, sed ex vniuerso numero sumptas (quem ille generalitatem vocat) vt ex his apparere posset quales vel quantæ fuissent ceteræ. Hoc (inquam) aduersus defensionem illam posse retorqueri videtur. Si enim quarundam vrbiũ nomina omittenda erant, cur non Troiam ex iis esse, & aliũ cuiuspiam potius mentionem facere volebat? Hoc etiam in loco libri Æneid. decimi fuisse notatũ

à criticis Virgilium scribit Seruius,

— *Ænea puppis*

Prima tenet, rostro Phrygios subuecta leones.

Admonet enim, criticos notauisse hinc poetam, quemadmodum sic citò dixerit potuisse naues *Æneæ* fieri. Sed addit, picturam hoc excusare: quam solam debere nos mutatam accipere. Dixerat autem in iis quæ nullo intervallo præcedunt, velle Virgilium pro iugo rostriû nauis fuisse: & leones singulos in singulis nauis partibus fuisse depictos.

Nec dubito quin de iisdem criticis intelligenda sint quæ scribit in librum eiusdem poematis tertium. Postquam enim hoc in loco,

Nam Polydorus ego. hinc confixum ferrea textit

Telorum seges, & iaculis increuit acutis,

verbum *increuit* exposuit reuiruit (de qua expositione vix assentiri illi possim) & addidit, illum traxisse hoc de historia Romana: (nam Romulum, cui tato augurio hastam de Auentino monte in Palatinum iecisse: quæ fixa fronduit & arborem fecit) & subiunxit, vituperabile enim esse, poetam aliquid fingere quod penitus à veritate discedat: sermonem hunc verbis istis finit, *Denique obicitur Virgilio de mutatione nauium in nymphas: & quod dicit, per aureum ramum ad inferos esse descendum. Tertium, cur Iris Didoni comam scuerit. Sed hoc purgatur* (inquit) *Euripidis exemplo, qui de Alceste hoc dixit, quum subiret sacrum mariti. Vbi de hoc primùm lectorem monebo: videri mihi pro denique potius ideòque aut aliud huiusmodi vocabulum esse scribendum. Vituperabile est* (inquit) *poetam aliquid fingere quod penitus à veritate discedat. Ideòque nonnulla Virgilio quæ sic ab eo ficta sunt, obliciuntur.*

Sed, siue criticorum siue Seruij sit illud ἀξιωμα, videamus an rationi consentaneum sit. Si enim pictoribus atque poetis *Quidlibet audendi semper fuit æqua potestas*, (quod Horatius ex antiquitate traxit: quum sit παλαιὸς οὗτος ὁ λόγος, ἀνευθύβους εἶναι πειντὸς καὶ ῥεαφέας) si verum est quod Naso canit, tanquam huc respiciens,

Exit in immensum fecunda licentia vatum,

Obligat historica nec sua verba fide:

si, inquam, vera hæc sunt, quomodo falsum illud non est, reprehensione in poeta dignum esse, fingere aliquid quod à veritate penitus discedat? Atqui verè hæc à se dici, infinitis propemodum exemplis probat idem Naso, quæ affert antequam ad illud epiphonema veniat. Quum enim dixisset,

Nec tamen ut testes mos est audire poetas.

Malueram verbis pondus abesse meis:
subiungit,

Per nos Scylla patri canos furata capillos,

Pabe premit rabidos inguinibusque canes.

Nos pedibus pennas dedimus, nos crinibus angues.

Victor Abantiades alite fertur equo.

Et versibus aliquot interiectis, eiusdem nauium in nymphas mutationis mentionem facit quæ à Virgilio canitur.

Protea quid referam, Thebanâque semina dentes?

Qui vomerent flammæ ore, fuisse boues?

Flere genis electra tuas, auriga, sorores?

Quaque rates fuerant, nunc maris esse deas?

Interim tamen illud Hesiodæum me non latet, vel potius illud Musarum dictum, apud Hesiodum,

Ἰδὲ μὲν ψεύδεα πολλὰ λέγειν ἐτόμωσιν ὀρθία. quod pro criticis (si ἀξιωμα illud eorum est) facere dici posset, si,

non ψεύδα πολλά, sed ψεύδα πάντα dictum esset.

At verò ille per aureum ramum ad inferos descensus vel eo nomine excusationem meretur, quòd ex iis sit quæ ἀληθεύουσιν, ficta esse constat.

Ad tertium illud quod Virgilio obiicitur venio, Cur Iris Didoni comam secuerit. Ac primùm mirari me dico, cur ratio quæratur, quum eam addiderit, ne à quoquam quæreretur. Canit enim,

*Nam quia nec fato, merita nec morte peribat,
Nondum illi flauum Proserpina vertice crinem
Abstulerat, Stygióque caput damnauerat Orco.*

Quibus addit,

*Ergo Iris croceis per cælum roscida pennis,
Mille trahens varios aduerso sole colores,
Denolat: & supra caput astitit, Hunc ego Diti
Sacrum iussa fero: téque isto corpere soluo.*

Iris enim híc tanquam vicariam Proserpinæ operam præstans describitur: & ex iis qui præcedunt versibus, nobis colligendum relinquitur, à Proserpina id quod alioqui more suo factura erat, factum iam non fuisse, — *quia nec fato, merita nec morte peribat*. Quòd si reprehensione dignus esset Virgilius, non minus certè Euripides, apud quem hæc Charon Apollini, in Alceſtide,

Πόλλ' αἰσὺν λέξας ἔδδ' ἐν πλείονι λάβοις.
Ἡ δ' οὐδ' αὖ γυνὴ χεῖρ' αἰσιν εἰς ἄδου δόμους.
Στείχω δ' ἐπ' αὐτὴν, ὥς κατάρξωμαι ξίφει.
Ἰερὸς γὰρ ὁ τοῦ πῶν χεῖρ' Ἰδαιὸς θεῶν
Ὅπου τὸ δ' ἔσχος κρατὸς ἀγνίσει τείχεα.

Critici ex aliis quæ multo minora, id est, minoris momenti, sunt, reprehendendi huius poetæ occasionem quæsiuerunt. Eorum vnum est, quòd duo epithe-

ta vni

ta vni rei alicubi dedisset. vel potius, dedisse illum dicerent. Nullo enim in loco, cuius quidem suspecta non sit lectio, hoc inuentum iri puto. Neque possum fidem Seruio adhibere, scribenti, quamuis apud Latinos vitiosum sit epitheta duo adhibere, hoc tamen fecisse Virgilium in paucis quibusdam versibus: sed hos emendatos fuisse. A quo enim emendatos fuisse dicemus? an à quopiam critico? Immo verò, nullum qui hac emendatione egeret, Virgilium reliquisse, ac potius Seruium in mendosa exemplaria incidisse existimo. Atque hoc posse colligi dico ex eo quod de isto versu scribit, qui est Ecloga I I I,

Lenta quibus torno facili superaddita vitis.

Ita enim de hoc versu scribit in illum locum tertij Æneidos, ac si Virgilius quidem *facilis* in eo scripsisset, sed ab emendatore seu ab emendatoribus *facili* substitutum esset. Nec verò aliud intelligere videtur, quum in illum ipsum Eclogæ tertiæ locum annotat, Donatum legere *facilis*: legi tamen & *facili*, ad excludenda duo epitheta. quoniam hoc in Latinitate est vitiosum. Atqui Pierius *facili* in omnibus vetustis codicibus legi testatur, præterquam in vno: in quo tamen esse non *facilis*, sed *fragilis*: quod epithetum viti minimè conuenit. Sic certè & de hoc libri Æneidos tertij loco,

— *lenis crepitans vocat auster in altum,*

scribit, duo epitheta posuisse vitiosè: & hoc tamen propè in decem versibus fecisse. Atqui dicit alibi (vt antea docui) versus illos in quibus hoc vitij erat, fuisse emendatos. Ac certè aliam hîc lectionem multi veteres habent libri (non tamen ex alicuius correctoris manu, sed potius ex ipsius Virgilii autographo, vt opinor, profectam) *lene crepitans*, vt producat posterior no-

minis *lene* syllaba, libertatem Græcorum, sicut & alibi, vsurpando. Verùm, etiam si *lenis* retineamus, cur Seruio duo esse epitheta volenti assentiamur? Quomodo *crepitans* esse epithetum dicemus, quum satis constet perinde esse ac si *crepitando* scripsisset? Itidem porro in illum locum libri secundi *Æneidos*, — *clypeique insigne decorum Induitur*, falsò credit videri alicui posse, duo hîc esse epitheta: non animaduertenti, *insigne* significare ornamentum. Sicui enim hoc videatur, quod inueniet nomen quocum duo illa iungat?

Quædam etiam afferuntur reprehensiones, quæ nō tam criticum quempiam quàm Virgiliomastigem olent. Quarum è numero est hæc, versus istius, qui in *Ecloga* secunda legitur,

Lac mihi non æstate nouum, non frigore defit.

Scribit enim Seruius, Virgiliomastigem, malè distinguentem hunc versum, vituperare: hoc modo, *Lac mihi non æstate nouū, non frigore: defit.* Id est, semper mihi deest. Verùm vt quosdam locos propter ambiguitatem dignos esse fateor qui culpentur (nam & Horatius vult eum qui Aristarchi partes susceperit, arguere quod ambigüe dictum sit) ita hunc ista reprehensione omnino indignum esse contendo: quoniam illo altero modo eum interpungere ineptum est.

M V N V S Latinorum non minus quàm Græcorum criticorum erat etiam, in librariorum fidem inquirere: &, si quos in locos menda inuexisse eorundem librariorum negligentia videbatur, de eorum emendatione ad suum tantummodo oraculum confugiendum esse, de illis se, non aliter quàm Sibyllinos sacerdotes de Sibylle verbis, consulendos arbitrabantur. Sicubi autem librarij inter se non consentiebant, sed locum aliquem ali

aliter scriptum reliquerant, vtra ex duabus vel quæ ex pluribus ἀκριβὲς & γνησία esset γαφῇ, pronuntiare, sui iuris esse aiebant.

Præsertim verò in ea quæ supposititia esse censebāt, seueram (sicut & Græci) censuram exercebant : sed hac quoque in parte iniquam interdum. Atque hoc cū de aliis locis posse dici videtur , tum verò de hoc Virgiliano, Æneid. libro vii,

*Ille vel intacta segetis per summa volaret
Gramina, nec teneras cursu lasisset aristas:
Vel mare per medium fluctu suspensa tumentis
Ferret iter, celeres nec tingeret æquore plantas.*

Hos enim versus olim quidam critici pro adulterinis seu nothis habuerunt, ideòque obelismo dignos iudicarunt: non alia de causa quàm quòd à grauitate huius poetæ abhorreere viderentur. Nec verò nostra etiam ætate defuerunt qui de illis versibus idem pronuntiarent. Sed rectè Pierius eos aduersus talia iudicia ὀβελίζειν eos volentium ab obelismo videtur asseruisse: qui postquam dixit se non esse nescium, aliquos esse vsque adeo naris supramodum emunctæ vt adulterinos hosce versus iudicent, quòd à grauitate Virgiliana videantur alieni, Sed valeant (inquit) tam seueri critici, quando in exempl. omnibus antiquis ea carmina reperiuntur. Neque hyperbolica ea lasciuiam indecora est, præsertim in virgine laudanda: quum tolcretur in Apollonio, in Polyphemi agilitate describenda. Hæc ille. Sed miror cur addat, Virgilium ex Apollonio mutuatum esse hunc locum, ac non potius ex Homero sumpsisse dicat: quum itidem apud Homerum vtramque laudem habeamus, at verò Apollonius posteriore fuerit contentus. Dicit enim Homerus,

Αἱ δ' ὅτε μὲν σκιρτῶει ἐπὶ ζείδωρον ἄρ' ἔχον,
 Ἄχρον ἐπ' ἀνθρείκων καρπὸν γέον, ἔδδ' ἡατέκλων.

Atque huic laudi aliam addens, subiungit,

Ἄλλ' ὅτε δὲ σκιρτῶει ἐπ' εὐρέα νῶτα θαλάσσης,
 Ἀ' χρον ὅππ' ῥηγμῖνος ἀλὸς πολιοῖο γέεσκον.

Extant autem hi versus Iliadis libro v. ubi loquitur de equabus regis Erichthonij. Atque ibi annotat Eustathius, esse hyperbolen ἀπαρμύνητον: sed hoc tamen tutā illam reddere, quòd ex Boreæ stirpe hæ equæ essent. Apollonius autem non solùm posteriori laude contentus fuit, quemadmodum dixi: sed nec tam magnam Polyphemo cam tribuit, quàm Homerus & Virgilius dant suis. Nam licet illum plantas tinxisse neget, de summis vestigiis id negare non audet. Argonauticῶν enim libro primo loquens de Polyphemo, quem Neptuno genitum scribit,

Κεῖνος ἀνὴρ ἐπὶ πόντου ὅππ' ἡλαυχοῖο γέεσκεν

Οἷδ' ματος, ἔδδ' ἡοὺς ἐάπειν πόδας· ἄλλ' ὅσον ἄχροις

Ἰ' χρεσι πεγγόμῃος διερχῇ πεφόρητο τελεύτῳ.

Sed Homeri saltem exemplo illam quoque priorem laudem Camillæ suæ dedit Maro: ideóque à gravitate Maroniana alienam illam critici dicere non poterant, quin & Homericæ consentaneam negarent. Hoc tamé est discriminis, quòd & Homerus & Apollonius loquuntur de re quæ facta erat ab iis de quibus agunt: at Maro videtur potius loqui de re quam Camilla facere potuisset, si libuisset, ob eam quæ præstabat agilitatem, quàm de re quam fecisset. Hoc autem si ita sit, potius hyperbole siue auxesis hyperbolica dici potest apud Maronem esse, quàm apud illos: quippe qui illud ut rem gestam narrant. Scio tamen Eustathium hyper-

bolen hîc constituere: & quidem ἀπαρχμύθητον, vti dixi. Sed quæ ita ὑπερβολικῶς dicuntur, simul etiam ποιητικῶς dici constat: magis tamen quum rem quampiam ab aliquo fieri posse dicunt, quàm quum de facta loquuntur.

Non fuit denique quòd critici eo nomine istum Maronis locum carperent. Verùm si in longa de criticis dissertatione, aliquid & mihi κριτικῶς loqui licet, ingenuè fatebor, mihi non placere quòd volatum cum cursu miscuerit. Quod neque ab Homero neque ab Apollonio factum fuit: ac, si fecissent, à me nihilo magis probaretur. Nam scio quidem, volare, hyperbolicè de illo dici qui cum incredibili quadam celeritate currit: sed hîc propriè loquendum, non autèm hyperbolæ verbum istud hyperbolicum admiscendum fuit, ne hoc illi noceret. Nam si illam volare potuisse nobis persuadere potest, quid cætera illa addere attinet? Scimus enim, ea quæ volant, ita superuolare segeti posse vt aristas non attingant. Esto tamen, non alienum hîc locum habere verbum *volaret*, cur statim volatus in cursum mutatur? Nam his,

Illa vel intactæ segetis per summa volaret

Gramina, subiungitur, *nec teneras cursu læsisset aristas*. Quid hac adiectione, nisi ad implendum versum, opus erat? præsertim quum cursum pro volatu accipere oporteat, vt, quod sequitur, cum eo quod præcedit consentiat. Verùm, vt de maiori adiectione, quæ tamen superuacanea esse & ipsa videtur, loquar, hæc verba, *nec teneras cursu læsisset aristas*, quid addere necesse erat? aut certè quid illud *intactæ* in præcedente versu agit? nōne omnino otiosum est?

Scimus enim posse alioqui illud *intacta* ita resolui, ut dicamus, perinde esse ac si scriptum esset, Illa vel per summa gramina segetis ita volasset, ut illa intacta maneret. Hæc autem summa segetis gramina in sequente versu aristas vocat: qua itidem repetitione quid erat opus? Nam si summa segetis gramina nihil aliud sint quàm aristæ, videbimur nobis audire, Illa per aristas volare potuisset, & tamen aristas non læsisset. Ut igitur nihil lectorem celem, non minus adiectio illorum verborum quæ voci *gramina* subiuncta sunt, me offendit, quàm verbum *volaret*. nam ita fortassis excusari possit (modò non sequatur *cursum*) ut existimetur sonare, Tanquam volans cucurrisset. vel, Ita cucurrisset ut volare videretur. aut, ut volanti similis esset. Dixi porrò, modò nō sequatur *cursum*: quoniam hoc fuerit alioqui, ei quod maius est subiungere quod est minus. Faciunt igitur hæc ut propemodum in mentem mihi veniat suspicari, Virgilium, hunc locum, sicut alios multos (de quorū nonnullis à me paulo pòst dicetur) imperfectum reliquisse, voci *gramina* nihil adiicientem: & alium quempiam, posteriorem hunc versum ita expleuisse. Hoc saltem affirmare ausim, suspectos esse nothæ *παρὰ πληρώσεως* nonnullos versus, qui non maiori cum ratione in suspicionem veniunt. Cæterum, si rem ita se habere credamus, hoc etiam credibile fuerit, eum initio tribus versibus suis illos quatuor Homeri includere voluisse: sed postea, quum parem suorum numerum esse maluisset, hunc secundum ita imperfectum reliquisse. Nisi potius verisimile est, illum expectasse dum ita primū versum immutaret ut secundi principio ad finiendam sententiam minimè opus esset. Ego certè, quamvis nec ὑπάρξει præstare quicquam eorum possim quæ Maro vel

ὅντιν' præstitisset, tamen quomodo in duos etiam versus quatuor illi Homerici contrahi possent inueni: sed in duos, qui licet ex Virgilij contexti verbis, à quatuor Virgilianis nihilominus longissimè absunt. Verùm, qualescunque sunt, huiusmodi sunt,

Non illa aut segetis teneras læsisset aristas,

Aut medio currens tinxisset in aquare plantas.

Hosce autem duos versus ex quatuor illis faciendi occasionem mihi suspicio illa præbuit: quam non tam *κρίτικῶς*; quàm *ὡς ἑλληνιστικῶς* proposui. Sed quum illa de re velim *ἐπέχειν*, at nolim de ista: non esse Virgilianum duo diuersa tempora in duobus eodem pertinentibus verbis iungere: atque ibi præsertim vbi numeri versus cum ad hoc non adigunt. Ideoque *volasset*, quod cum *læsisset* conueniat, scribendum esse contendo.

Ad alios autem nonnullos versus vt pergam, ex iis qui nothi à criticis existimati fuerunt: hic, qui ecloga primà extat,

Sæpe sinistra caua prædixit ab ilice cornix,

ex eorum numero est: & quidem à multis eum abesse exemplaribus constat.

Sed vix (vt opinor) satis valida ratione nixi veterum criticorum nonnulli versum hunc pro adulterino habuerunt. At certè nostri temporis critici cæcutite se omnino ostendissent, nisi versum hunc,

Quantum orbis totus gaudet cantante Sileno,

ex sexta ecloga summovissent. Nam multæ superioris temporis editiones & Italicæ & Gallicæ, præsertimque illæ quæ adiunctos commentarios habent, pro duobus versibus hos tres exhibent,

Nec tantum Rhodope miratur & Ismarus Orphea,

Nec tantum Phæbo gaudet Parnassia rupes,

Quantum orbis totus gaudet cantante Sileno.

Tam ineptus autem versus (qui tamen haud talis auctori suo videbatur) ad explendū hunc locum intrusus fuit, quum ei redditio deesse videretur. Quid quòd, non *orbis totus*, sed *omnis mundus* in plerisque illarum priorum quas dixi editionum legitur?

Verūm vt optimo iure extrusus ille versus fuit, ita etiam facile fuit extrudendum esse iudicare. quod de quibusdam aliis, qui tamen & ipsi *Ξένος δῶνοντα*, dici itidem non potest. Præsertim verò in quædam hemistichia suspicio hæc cadit, vt mox ostendam. Prius enim de aliis duobus dicam locis, ex quorum vno non quatuor aut quinque, sed vigintiduo versus summoti à Tucca & Varo dicuntur. Is est *Æn.* libro secundo, hoc principium habens,

Iāmque adeo super vnus eram, quum limina Veste

Servantem, & tacitam secreta in sede latentem.

Tyndarida aspicio.

hunc autem finem,

Extinxisse nefas tamen, & sumpsisse merentis

Laudabor pœnas. animūmque expleſſe iuuabit

Vltricis flammæ, & cineres satiasse meorum.

Non esse autem immeritò sublatos hinc istos versus scribit Seruius: quòd turpe sit viro forti contra fœminam irasci: & Helenam in domo Priami fuisse, contrarium sit illi rei quæ in sexto dicitur: quia in Deiphobi domo inuenta est, postquam ex summa arce vocauerat Græcos. Quinetiam addit, hæc Veneris verba, *Non tibi Tyndaridis facies inuisa Lacenæ*, ostendere, versus hinc esse sublatos. Hæc autem annotat in istum libri secūdi locum, ybi de Venere Æneæ in conspectum veniente dicitur, — *dextrâque prehensum Continuit.* Ibi enim scribit, Æneam

bit, Æneam à matre esse prehensum ea corporis parte qua Helenæ ictum minabatur, quæ in templo Vestæ stabat ornata. Quibus addit, *Vt enim in primo diximus, aliquos hinc versus constat esse sublato: nec immeritò.* Atque hîc eam quam dixi rationem affert. Necesse autem habuit lectorem de sublatis versibus admonere, quòd quum versus illos non legeret, mirari posset vnde istud ipse Seruius haberet, Helenam in templo Vestæ stetisse. In principio autem suorum in primum librum commentariorum (quod principium vocare Prolegomena possumus) tradit, Virgilium, scriptis iam Bucolicis & Georgicis, ab Augusto rogatum Æneidem annorum vndecim spatio scripsisse: sed nec emendasse, nec edidisse: ideòque morientem præcepisse incendi. Sed Augustum, ne tantum opus periret, Tuccam & Varum hac lege iussisse emendare, vt superuacanea dederent, nihil tamen adderent. Atque hinc fieri vt semipleni eius versus inueniantur. vt, *Hîc currus fuit.* Hęc quidem Seruius nos decet: at ex Io. Pierio Valeriano discimus (quod satis mirari non possum) duo illa & viginti carmina in nullo eorum quos versauerit veterû codicum extare: quamuis à nonnullis impressoribus ea publicata essent. Sed Donatum ita ea dissimulasse, vt sententiæ continuationem longè aliter quàm alij acceperit. Ea quippe de causa Æneam dextra prehensum à matre contentum esse, ne ipse sibi (quòd in extrema illa rerum desperatione plerique fecerant) mortem conscisceret. Atque hîc ipsamet illius grammatici verba legere est operæpretium, & in iis animaduertere quomodo ita sensum duorum illorum versuum, quorum prioris initium est, *Deseruere omnes desessi:* ita connectere cum sensu horû voluerit, *Quum mihi se non ante*

oculis tam clara, videndam Obtulit: & sequentium: vt manifestum sit eum conatum esse illorum vigintiduum versuum detractiōem dissimulare. Eo autem afferam illa libentius, quòd in nulla earum huius narratoris editionum quæ quidem in manus meas venerunt, extare sciam: sicut nec alia quamplurima quæ ex eodem afferuntur: adeo vt vix, eiusdem esse, aliquis persuadere sibi possit. Dixit (inquit) omnes deseruisse quod agebant: quum defenderent domum Priami, & id frustra facerent. Ipse quomodo recesserit dicit: ne videatur etiam ipse operis labore fatigatus recessisse. Deinde veniens ad ipsorum Virgilii verborum paraphrasticam expositionē, eorum inquam quæ hi duo versus complectūtur,

Deseruere omnes defessi, & corpora saltu

Ad terram misere, aut ignibus agra dedere,

Quum mihi se, non antè oculis tam clara, videndam

Obtulit, & pura per noctem in luce refulsit

Alma parens. &, paucis interiectis, dextrâque prehensum Continuit.

Omnes (inquit) laborando fessi, & sine aliqua utilitate certando debiles redditī, tædio aduersarum rerum morimur: & duplicem voluntaria mortis occasionem nacti quum altitudo non deesset, & incendia dominarentur, aut præcipites dederant sese, aut petierant flammās. Ne & ipse alterum facerem, aut (quod supererat tertium) hostis occideret remanentem: mater mea, non, vt facere solebat, dubia, aut incerta, sed manifestior veniens, me ab ipsis inefficacissimis actibus renouauit.

Vide quantum laboret hic enarrator, dum de illorum versuum detractiōe vult tacere: & frustra tamen (meo quidem iudicio) laboret. Sublationem enim illam patefaciunt non tantum illa Veneris verba, Non

tibi Tyndaridis facies inuisa Lacena, & quæ sequuntur (licet Seruius huius tantum loci argumento versus esse sublatos probet) verumetiam ista à quibus sui sermonis initium sumit Venus,

Nate, quis indomitas tantus dolor excitat iras?

Si enim tollantur illi duo & viginti versus, ex quorum numero sunt hi duo,

Exarsere ignes animo: subit ira cadentem

Vlscipi patriam, & sceleratas sumere pœnas:

quorsum illa Venus dixerit? Alioqui enim referri ea oporteret ad postrema ista,

Obstupui, subiit chari genitoris imago:

& quæ sequuntur. Atqui totus hic locus dolorem quidem, sed non qui indomitas iras excitet, testatur. Hæc autem quum ita sint, iterum dico, mirari me satis non posse quod à Pierio scribitur, *Duo illa & viginti carmina quæ detracta esse constat, in nullo ex iis veteribus codicibus quos versauimus habentur.* Quomodo enim tanta siue Tuccæ & Vari, siue aliorum aut criticorum, aut qui eorum fungerentur officio, esse potuit autoritas, vt eorum iudicium, potius quàm Virgilij, tot librarii sequerentur? I nunc, & fidei librariorum, ex quorum manu reliqui pariter scriptores ad nos peruenerunt, fidem habe.

Sed ne hîc quidem de istis criticis expostulandi finem faciam: verum & hoc addam, hanc audaciam autoritatem eorum apud me non parum imminuere. Audebo autem & de Augusto queri, qui in tam augustum Virgilij opus tantum iuris duorum hominum iudiciis concesserit, vt quæ superuacua viderentur, possent detrachere. Quidni verò, lector, etiam ad Franciscum Campanum, qui & ipse de hac tanta tanto poc-

tæ facta iniuria conquestus est, te remittam ? Id autem in doctissimo libello fecit quem Quæstionem Virgilianam inscripsit, per quam (vt ille ait, atque vt verum est) diligentissimus poeta negligentia, quam Tucca & Varus ac cæteri hætenus obiecerunt, absoluitur. In fine autem epistolæ ad Herculem Gonzagam, electum Mantuanum, (cui suum illud opusculum dicat) hæc scribit, *Tota igitur disputatio super duobus illis & viginti versibus est, qui iam inde ab ipsius poeta decessu à Tucca (vt aiunt) Varoque ex libro secundo sublati fuerunt: quoniam longè aliter eadem de re Deiphobi ore tradidisse libro sexto videatur. Quos non tantum nullo pacto deesse, sed omnino adesse posse ac debere, (contra non correctorum ipsorum modò, sed criticorum grammaticorumque omnium qui fuerunt post, doctiorumque multorum, qui solent interdum hæc animaduertere, opinionem ac iudicium) nos probare tentauimus. In hoc libello non legendo solum sed etiam relegendo, vel meo periculo, tempus & operam pone. Inuenies autem à me excusum vnà cum Iani Parrhasii libro De rebus per epistolam quæsitis.*

Idem porro correctores, Tucca & Varus, tanquam criticorum munus obeuntes, quatuor illos versus detraxerunt, à quibus Maro suam *Æneidem* exorsus erat: illos inquam quorum primus est, *Ille ego qui quondam gracili modulatus auena Carmen.* Ac testatur hoc Seruius quoque. postquam enim dixit, Augustum Tuccæ & Varo permisisse vt superflua demerent, nihil tamen addentes: *Vnde (inquit) & semiplenos eius inuenimus versiculos: vt, Hic currus fuit. Et aliquos detractos, vt in principio. nam ab armis non incepit: sed sic,*

*Ille ego, qui quondam gracili modulatus auena
Carmen: & egressus syluis, vicina coegi*

*Ut quamuis auido parerent arua colono,
(Gratum opus agricolis:) at nunc horrentia*

Martis

Arma virumque cano.

Deinde illorum duorum & viginti, qui itidem è libro secundo exempti ab illis fuerunt, mentionem facit: atque hîc quidem neque de horum neque de illorum detractiōe iudicium suum interponit: at suis in librū secundum commentariis, vbi ad locum illum venit, se Tuccæ & Varo assentiri ostendit, vt antea ostendi. Pierius (libet enim, antequam meam de hac quoque sublatione sententiam proferam, quænam eius sit, declarare: præsertim quum *ἡρώδης* & eum fuisse censeam, vt quidem propriè vocabulum hoc sonare docui) postquam negauit vllum se antiquum exemplar inuenisse, vbi principium *Æneidos* à quatuor illis versibus sumeretur: verum separatim in codicibus aliquot præscriptos haberi dixit: in plerisque verò, iisque antiquioribus, ne inueniri quidem: addit, *Sed fuerint sanè Tuccæ Varique censura sublati: eo tamen consilio fuerunt à Virgilio præpositi, vt legerentur.* Quinetiam ostendit, eum in aliis etiam operibus idem non incuriosè factitasse: dum in Bucolicis Eclogarum, quas prius edidisset, mentionem facit: vt in *Daphnide*,

Hæc nos, Formosum Corydon ardebat Alexin:

Hæc eadem docuit, Cuium pecus? an Melibœi?

Et quum Georgicon libris finem imponeret, Bucolica à se scripta citauit,

Carmina, qui lusi pastorum, audaxque iuuenta

Tityre ce cecini patula sub tegmine fagi.

Et, necui de nomine quoque ambigendum esset, id in carmine curauit inferendum,

Illo Virgilium me tempore dulcis alebat Parthenope. Nam, nisi ea fuisset cura, (inquit) satis erat dixisse, *Illo me tempore dulcis alebat Parthenope.* Ita enim in Castigationum Pierii editionibus legitur: quum tamen ille aut scripserit, aut scribere debuerit, *Illo Parthenope me tempore dulcis alebat.* Illis autem adiicit, Pari ratione visum esse huic poetæ tertium hunc ingenii felicissimi conatum duobus illis prioribus adnectere: ut vnum quasi corpus insolubili vinculo colligatum, cum nominis sui æternitate, à furacitatis iniuria, quæ tunc nimium impudenter in aliorum labores grassabatur, incolume seruetur. Sed, quamuis hæc ita sint, visum esse posteritati, confirmata iam tanti poetæ fama, in Tuccæ Varique sententiam descendere: adeo ut bona hominum pars *ARMA VIRVM QVE* *CANO*, Æneidos principium agnoscant: eo potissimum argumento, quod citaturus Persius Virgilianam Æneida, dixerit, *Arma virum, nonne hoc spumosum.* Quodque Valerius Martialis, *Protinus Italiam concepit, & Arma virumque.* Quod Sextus Propertius, *Qui nunc Æneæ Troiani suscitât arma.* Quinetiam multa illos præter hæc ex aliorum poetarum tam Græcorum quàm Latinorum parodia afferre dicit: ut Virgilium in exordiando non tam veteres imitatum ostendant, quàm alios imitatores habuisse. Quibus hæc adiicit, *Sedenim fuerit ea Persij sententia: intellexerit, illud Æneidos esse principium Valerius Martialis: censuerint eos versus quatuor tollendos Augusti Octauiani temporibus eruditi viri: magis tamen ego vnius Virgilij iudicium aestimarim, quàm criticorum omnium censuras quantumlibet acres. Estque diligenter animaduertendum quod subiungit, quum is præferim, ex eruditorum præceptis, non sumum ex*

fulgore, sed ex fumo dare lucem cogitauerit. Neque his contentus, adiicit, Adde quòd versus illi à Persio & Martiale citati, non sunt idonei qui tale esse principium induent. Sextum verò Propertium quis non videt, dum scriberet, Qui NVNC Æneæ Troiani suscitât arma, ad coniunctum illud Virgilianum carmen respexisse: quod iisdem penè verbis est, At NVNC horrentia Martis Arma virumque cano. Hæc ille: qui verba illa (quæ diligenter esse obseruanda monui) de danda luce ex fumo, & non contrà, ex Horatio sumpsit. is enim in sua Arte poetica, postquam huic poematis principio,

Fortunam Priami cantabo & nobile bellum,

(de quo querit quid dignum hiatu tanto hic promissor ferre possit: additque, fore vt parturiant montes, & mus ridiculus nascatur) opposuit hoc Odyssæ initium,

Dic mihi Musa virum, captæ post tempora Troiæ

Qui mores hominum multorum vidit & vrbes:

*adiicit de hoc poeta (is autem est Homerus) eum non cogitare dare fumum ex fulgore, sed lucem ex fumo. Sed malè vetera scholia locum hunc exponunt, quum fumum esse sensum obscurum tradunt: at fulgorem & lucem, narrationem splendidam. Vt dicat Horatius, bonum poetam res difficiles & obscuras aperire suo carmine, nō etiam apertam materiam obscurare circumlocutione superflua: quod contrà fieri ab ignaris poetis. Immo verò ad obscuritatem non respicit Horatius, quum fumum dicit, nec vicissim ad perspicuitatem, fulgoris siue lucis appellatione: (quum de his non agatur) sed fumum ex fulgore dare illum ait, cuius operis *πικρὸς ὡς ὄσπερ* (vt loquitur Pindarus) ea consequuntur quæ illi fulgori siue splendori minimè respondent, verum fumus sunt potius quàm fulgor.*

Quinetiam exponemus non malè fulgorem res splendidas & magnificas: fumum, res humiles, abiectas, & viles, atque adeo vanas. Quamobrem in eo quod de principio illo à criticis reiecto scribit Pierius, decuisse id poetam illum qui non fumum ex fulgore, sed ex fumo dare lucem cogitaret, respexisse illum putabimus ad subitum illum ascensum Virgilianorum versuum à rebus non minus quàm verbis tenuibus ad res graues, verbàque pariter grauias, & heroici carminis maiestate digna. Nam ab hoc quarti versus posteriori hemistichio incipere illum ascensum meritò dixerimus: *at nunc horrentia Martis*. Cuius saltem hemistichii rationem correctores illos habere debuisse dico: quum talis sit hæc antithesis, vt simul præcedentia Virgilij poemata ab hoc separet, & huic magnificentissimum & heroicæ maiestati conuenientissimum det principium. Nec verò deerunt (vt opinor) qui mihi assentientur, suspicanti, Virgilium talè hoc principium fecisse de industria, vt exemptile esse non posset: quum prima ipsius operis verba cum fine illius principii ita cohererent, vt altera quarti versus pars essent, atque hic ab agricolis incipiens, in Martem desineret. Ac ne hoc quidem crediderim, illum nullam dedita opera agrorum mentionem fecisse, sed *κατὰ τὸ πρῶτον* ita præcedentem sententiam clausisse. Poterat enim alioqui in tertio versu ita illam claudere, vt antithesis ab initio quarti versus inciperet: hoc modo (si mihi cum bona lectoris venia, mearum exercitationum lusibus Virgilianum licet hemistichium aptare)

Nunc castra anteferens aruis, horrentia Martis

Arma virumque cano. &c.

vt verba hæc, *Nunc castra anteferens aruis*, illorum loco essent,

Gratum opus agricolis, at nunc.

Poterat hoc etiam vel simili modo,

Nunc lituo mutans calamos, horrentia Martis

Arma virumque cano.

Quidni verò & ita?

Carminē Virgilius mutato horrentia Martis

Arma virumque cano.

Tantum abest enim ut propter præcedentem vocem *carmen*, hic debeat eadem aures offendere, ubi scripsi, *carminē Virgilius mutato*: ut contrà repetitio hæc non parum gratiæ habere videatur. Nec verò, mutationem carminis profiteri, ab hoc alienum loco est, quum prius illud carmen gracili auena se modulatum esse dicat. Quod autem nomen suum inferentem illum facio, ea in re exemplum illius qui paulo antè allatus fuit versus, sequor. Addam & hanc formam,

Maius opus moueo. cantare horrentia Martis

Arma, virumque, iuuat, Troiæ qui primus ab oris Ital.

Vbi verbum *iuuat* longius traiectum non est quàm poetarum consuetudo permittat. Siquis tamen pauca immutare malit, ita scribat,

Maius opus moueo. nunc canto horrentia Martis

Arma, virumque illum Troiæ qui primus ab oris Ital.

Sed quoniam hic ponebam *virumque illum*, & sequitur tamen, *multum ille & terris iactatus & alto*, hic ille in antè mutabam. Quinetiam vltèrius exercitationem illam produxi: & fingere mihi cœpi versum qui principium esset *Æneidis*, (nullo alio eum præcedente) & eadem illa Virgilij verba *horrentia Martis* includeret.

Primum quidem ita,

Musarum nunc imperiis horrentia Martis

Arma virumque cano.

Deinde hoc pacto,

Nunc animus cantare mihi est horrentia Martis

Arma, virumque illum, Troie qui pr.&c.

Postremò sic, absque particula *nunc*: (quam tamen pos-
siturus fuisse videtur Virgilius, vel non præcedente
illa de qua diximus antithesi, aliave simili)

Me novus ardor agit cantare horrentia Martis

Arma, virumque illum, Tr.

Non his tamen modis variaturum fuisse Maronem
hoc principium, si ita visum fuisset, sed aliis, & multo
pluribus, ac tantum se dignis quantum hi indigni sunt,
& ipse dico, & mecum dicturos omnes scio. At quum
nihilominus principium illud eo quem habemus mo-
do potius quam alio vlllo scribendum censuisset, ego
neque Tuccæ & Vari neque aliorum criticorum iis as-
sentientium iudicio assentiri possum.

Sed hoc quoque (antequam hinc discedam) in quæ-
stionem vocare libet: an quatuor illi versus, vel potius
tres illi versus, & prius quarti hemistichium (nam de
posteriori nulla huiusmodi dubitatio relinquitur)
principium Æneidis appellari possint; & quo alioqui
titulo insigniri debeant. Ad me quidem certè quod at-
tinet, ad prius illud quod respondeam in promptu ha-
beo: sed quod ad posterius, non item. Nam principium
esse & nego & pernego, quum nihil ad Æneidem per-
tineant: sed quo alio ornari titulo debeant, ipse quoque
dubito: nisi fortè Præludium aliquis nominari posse
dicat: & (antequam quæstio est soluta) sibi non

A D illam venio quorundam versuum *ὁ δὲ πλὴν ὅ-
σῳ*, quam critici tanquam notham reiecerunt. Quum
enim constet Virgilium imperfectos reliquisse multos
versus, fuerunt qui plures etiam quàm quos videmus,

tales ab eo relictos existimauerint, sed illos à nonnullis iam olim fuisse expletos. Quòd si alibi vsquam, hìc certè acie iudicium requiritur, ad discernenda quæ spuria sunt à germanis. Nam & vetera exemplaria suspicionem alicubi augent, in quibus pars postrema versus quæ aliunde etiam suspecta esse posset, desideratur. Alicubi tamen nonnulla tam appositè versum claudunt, vt, licet in quibusdam codicibus desiderentur, γῆνοια habenda videantur. Exemplum huius rei habemus in principio libri Æneidos sexti,

— tu quoque magnam

Partem opere in tanto, fineret dolor, Icare haberes.

nam duo illa verba, *Icare haberes*, à codicibus aliquot abesse testatur Pierius: sed suum interponens (quo valebat) iudicium, Siue Virgilius (inquit) siue alius quispian versum absoluerit, nihil mihi videtur eo fine dici potuisse accommodatius Hæc ille: sed quantumuis aliquid loco sit accommodatum, eleganter etiam, & (si res postulet) grauius dictum: multum tamen auctoritatis amittit, quum ab alio quàm à Virgilio profectum, idèòque minimè γῆνοιος censetur.

At verò de hoc loco, qui est Æneid. lib. I I I,

Quid puer Ascanius? superatne & rescitur aura?

Quem tibi iam Troia.

scribit, versum hunc imperfectum, in antiquis aliquot codicibus absolutum legi, sed candore haudquaquam Virgiliano. In nonnullis enim ita scriptum esse,

Quem tibi iam Troia obsessa est enixa Creüsa.

in aliquot aliis ita legi,

Quem tibi iam Troia peperit fumante Creüsa.

Nec verò contentus eo quod dixerat, versum hunc minimè Virgiliano candore esse absolutum: etiam ridi-

culum esse addit vtrumque horum quæ ad absoluen-
 dum versum fuerunt adiecta: simul verò admonet, plu-
 rimùm aliena manu tale supplementum esse additum:
 atque id cerni posse in Mediceo codice, & aliquot aliis.
 Seruium quidem certè imperfectum versum illum suis
 in exemplaribus inuenisse constat: quum hemistichiũ
 esse dicat, nec in sensu plenum. esse autem & alia duo
 talia. *Aliqua hemistichia in Virgilio* (inquit Seruius) *tam*
sunt sensu immutata (sed pro *immutata* scribo *imminuta*,
 vt in sequentibus docebo) ostendit autem hoc hemi-
 stichium, *Concessere deũm*. Verùm, vt de iis quæ po-
 stea de hoc hemistichio ab eodem scribuntur, ferri iu-
 diciũ possit, altius hic repetatur locus necesse est. Hęc
 igitur sunt fluuii Tiberini verba ad Æneam, cui in
 somnis apparebat,

O sate gente deũm, Troianam ex hostibus urbem

Qui reuehis nobis, aternâque Pergama seruas:

Expectate solo Laurenti, aruísque Latinis.

Hic tibi certa domus, certi (ne absiste) penates.

Neu belli terrere minis. tumor omnis & iræ

Concessere deũm.

Lámque tibi (ne vana putes hæc fingere somnum)

Littoreis ingens inuenta sub ilicibus sus,

Triginta capitum fœtus enixa iacebit.

In hunc igitur locum postquam annotauit Seruius,
 aliqua esse apud Virgilium hemistichia tam sensu im-
 minuta (vt apud eum scribendum esse contendo) quàm
 verbis: & hoc ipsum hemistichium in exemplum at-
 tulit: rationem addit. Nos enim intelligere non posse,
 quieuissẽ omnem tumorem & iram deorum, quum
 & adhuc inimica sit Iuno, & ad Troianorum perniciẽ
 ad dantur alia numina: vt Furia, vt Iuturna. *Vnde* (inquit)

mirè quidam conclusit hunc versum : dicens,

Concessere deum profugis noua mœnia Teucris.

Quod supplementum examinans, addit, Si quidem ita accipiatur, vt dicat Teucros constituere ciuitatem, nec ea numina quæ irata sunt, vetare : nihil fore contrarium. nam & ipsam Iunonem hoc non negare, *non dabitur regnis (esto) prohibere Latinis, Atque immota manet fatis Lauinia coniux.* Atque hunc sensum, etiamsi detrahatur subauditio, posse accipi à superioribus : vt sit, *tumor omnis & iræ Concessere deum, vt Hic tibi certa domus, certi penates.* Hactenus ille. cuius in hac posteriori parte mentem lectori minus in his versato conabor explicare, simulque meum iudicium interponam. Subauditionem igitur ab eo vocari puto illam ὅτι πλὴν, supplementum illud, *profugis noua mœnia Teucris.* & hoc sibi velle, nos hæc ipsa posse ex superioribus intelligere: dummodo non aliter illa poetæ verba accipiamus quàm si verba ista, *Hic tibi certa, domus certi penates,* non præcederent, sed sequerentur. Quinetiam videmus, particulam *vt* ab illo addi : cui addenda esset & vocula *sit.* hoc modo, *Tumor omnis & iræ deum concessere vt sit tibi hic certa domus, certi penates.* Perinde ac si diceret, Non tanta est deorum ira, non adeo efferbuit, quin hoc tibi ab illa concessum sit. Sed ego tamen Seruio assentiri hîc non possum, cùm aliis de causis, tum verò quòd nimis violentum videatur, illa quæ inter præcedentia leguntur, ad sequentia reuocare. At de illo versus supplemento assensorem me habet. Aprissimè enim cum illo præcedenti sermone, de certa domo & certis penatibus, conueniunt ista verba, *profugis noua mœnia Teucris.* Ac eundem quidem sensum in meo supplemento olim sequutus eram, quàm illud quod à Ser-

uio affertur, nondum vidissem. Hæc enim ad explendū
 versum addideram, *sedes habitare petitas*. Quinetiā alte-
 ram istam *αὐτὰ πλῆρωσι* excogitaueram, *Laurentia mœnia*
fessis. Sed quum idem sit trium istorum versuum sensus,

Concessere deūm profugis noua mœnia Teucris:

αὐτὰ πλῆρωσι &, *Laurentia mœnia*

Concessere deūm sedes habitare petitas:

&,

Concessere deūm Laurentia mœnia fessis,

illam tamen primā *αὐτὰ πλῆρωσι* postquam apud Ser-
 uium vidi, duabus meis longè anteferre cœpi. At verò
 Tiberius Donatus, nullius supplementi mentionem fa-
 ciens, illum qui se prima fronte offert sensum sequitur:
 non animaduertens quod à Seruio rectè animaduer-
 sum est, esse quæ huic sententiæ apertè repugnēt. Hæc
 enim verba, *tumor omnis & iræ Cōcessere deūm*, ita expo-
 nit (quantum quidē vulgatis editionibus adhiberi fides
 potest) *in lenitatē plenissimā versum est quod animorum tu-*
moribus ferebant numina, & in omnē placiditatē illorum du-
rata dudum iracūdia commutata est: perindeque cessit felici-
rati tuæ quidquid solebat esse contrariū. Vbi proindeque scri-
 bendum est, aut perinde pro proinde accipiendum: vt cer-
 tē quidam vtrumque illud habere vsum existimant.

Sed & illi loco, *quod animorū tumoribus ferebāt numina,*
 mendum subesse & ferebant in fouebant mutari debere
 arbitror. Taceo de *timoribus* quod illic scriptum est:
 quum manifestus sit ille error. Sed me admonent hæc
 emendationes vt de illo etiam Seruii loco à me correcto
 aliquid (sicut promisi) dicam. Quū igitur ita scriptū sit
 apud Seruium, *Aliqua hemistichia in Virgilio tam sunt sen-*
su immutata quàm verbis, ego immutata substituendum
 esse dico. Ac meam emendationem vel ex alio eiusdem

loco confirmari posse existimo: hoc videlicet, in librū tertium, *Hemistichium nec in sensu plenum*. Quibus addit, *sunt autem duo talia. Ut hoc, Concessere deū. Quem quidam ita compleuit, — profugis noua moenia Tencris*. Citat autem in illud libri tertij hemistichium, *Quem tibi iam Troia*. quod sequitur versum illum, *Quid puer Ascanius? superatne & voscitur aura?* Atque hoc animaduertendum est, quum illud alterum hemistichium negat itidem in sensu plenum esse, intelligere verbum *Concessere* eo quo dictum est sensu, non autem pro Abscessere. alioqui enim perfecta esset sententia.

Critici, quorum plerique vt acri iudicio, ita etiam suspicaci ingenio fuerunt, idem & de quibusdam aliis versibus suspicati sunt: eos videlicet non ab ipso Virgilio, sed ab alio quopiam fuisse absolutos: adeo vt nec Polyphemo quam apud Virgilium habebat fistulam relinquere voluerint. Nam quum legamus apud Maronem *Æneidos lib. i i i*, de Polyphemo,

Lanigera comitantur oues: ea sola voluptas:

Solamēnque mali, de collo fistula pendet.

quum (inquam) quæ passim occurrunt editiones hanc lectionem exhibeant, fuerunt tamen qui hæc verba, *de collo fistula pendet*, pro supposititiis habuerint. Quinetiā totum versum inter adulterinos quidam retulerunt. Sed Seruius, sicut & Tiberius Donatus, prius fultē hemistichium apertē agnoscit. Nā Seruius in hæc verba, *Solamēnq; mali*, annotat, hinc esse illud Quintiliani, *Magnū cecitatis solatium est habere rem videntium*. Tib. autē Donatus (vt quidē eius verba ex veteribus libris afferūtur,) *Voluptatē ex animalibus habui* (inquit) *quā videret: cecatus verò, pecorū suorū cōmodo orbatatē proprij luminis solabatur*. Nulla autē vel ab hoc vel ab illo fistula mentio.

Quòd si meum & hîc interponere iudicium licet, vix vlla est vllius versus *ἡ πρώτη* de qua criticis assentiri potius velim. Aut enim valde fallor, aut non satis grauitati Virgilianę conuenit illa de fistula adiectio, bucolico carmine potius digna. Ac persuadere mihi vix possum, eos qui admittere locum illum non potuerunt, cuius initium est, *Ille vel intacta segetis per summa volaret Gramina* (vt à Virgiliana grauitate alienum) illam fistulę mentionem admisisse. Ad me quidem certerè quod attinet, tam faciles fuisse aio qui huic dare locum voluerunt, quàm difficiles qui illis quatuor versibus denegarunt.

Alii sunt versus qui ex hemistichiis facti eadem adiectionis audacia existimantur: verùm mihi nunc vltra Polyphemi fistulam pergere in animo non est: sed tantum hoc addere, non rectè à quibusdam interpungi hunc locum, hoc modo,

*Lanigeræ comitantur oues: ea sola voluptas,
Solamenque mali, de collo fistula pender.*

perinde nimirum ac si vtrumque de fistula diceretur. quod nos credere non permittit illud pronomen *ea*. Potius enim Maro scripsisset, si ad fistulam referre vtrumque voluisset, — *Et sola voluptas Sol. m. de collo fist. pender.*

Q V V M autem dixerim antea, criticorum partes fuisse etiam in librariorum fidem inquirere, & locorum in quibus suspectam illam haberent, emendationem (id est, ius eos emendandi) sibi vindicasse: in super de iis quę alii aliter scripta reliquissent, ferre iudicium voluisse, vtra ex duabus lectionibus, vel quę ex pluribus *γνώσις* esset scriptura, pronuntiādo: quum (inquam) hæc in superioribus proposuerim, non immeritò eorum

rum exempla lector à me hîc expectabit. Sed quoniam non pauca exhibere illi potest Schediasma meû de delectu in diuersis apud Virgilium lectionibus adhibendo: (quod Virgilii posteriori editioni meæ subiunxi) illuc eum remittendum censui. Videbit certè non semper ab illis esse seruata quam tamen seruandum propono ibi regulam: vt vbique consideremus, num quod in aliqua lectione est incommodi, aliquo maiore commodo siue excusetur, siue compensetur.

Quum tamen ne hîc quidem de illis omnino tacere statuerim, ab hoc quod primum in mentem venit, initium sumam: quasdam lectiones siue scripturas (vt & Græci grammatici *ῥαφὴ* dicunt) vna tantùm litera, & multum tamen, quod ad sensum attinet, inter se differre. Hanc autem parua simul & magnam scripturæ diuersitatem habemus in quodam versu cuius paulo antè facta fuit mentio. Nam vbi legebam, *tumor omnis & iræ Concessere deûm*, sciendum est, quædam exemplaria *timor* habere, & esse qui ea sequantur. Et tamen vix vsquam aptiorem quàm hîc locum habere *tumor* potest. Quo magis miror, Pierio non displicuisse *timor*: præsertim quum in omnibus quotquot habuerit antiquis codicibus, *tumor* scriptum fuisse fateatur: & addat, poetam, si ita scripsit, physicè hoc dixisse: quû effusa bile iecur intumescat, & inde oriatur excandescētia. Vnde dixisse Horatium, — *ve meû Feruens difficili bile tumet iecur*: atq; adeo ipsum Virgilium alibi, *tumida ex ira tunc corda residunt*. Et Ouidium de Meleagro, *tumida frendens Mauortius ira*. Quibus certè adiici exempla queunt non pauca, & quidem ex Græcis etiam scriptoribus: quos imitari hîc quoque voluisse Latinos verisimile est. Sed meus Thesaurus Græcæ lin-

quæ histe exemplis instructum reddet. Nam ibi inuenies in verbo οἰδᾶν siue οἰδαῖω (licet illud multo sit vsitatius) hunc versum Homeri, ex Iliad libro 1, Ἀλλὰ μὲν οἰδᾷ, ἔτι καὶ δῖν' ἥλω, ἑπὶ πόρ' ἐκείνων Μήσομεν. quæ Cicero ita vertit, Córque meum penitus turgescit tristibus iris. Itidémque οἰδᾶν in illo ipso significato quem οἰδᾶν, μὲν habere in illo Homeri loco videmus. Sed & οἰδᾶν actiua significatione ibidem habes, ex eodem poeta, pro Tumefacio: id est, Facio vt aliquis ira intumescat. Denique & compositum διοιδᾶν, ex Herodoto, neutrius seu neutralis verbi vsum habens, pro eo quod est Intumesco ira, seu Turgesco ira. Quorum exempla ibi videnda tibi relinquo: potissimúmque eum locum vbi οἰδᾶν, καὶ πένθηματα ita dictum mihi videri aio vt à Virgilio, *intumescere bella*. Hæc autem quum ita sint, quis dubitat quin *tumor* scribendum potius fuerit: & quidem quum etiam aptè cum illo nomine *iræ* iungatur, horum autè vtrumque rei de qua agitur optimè quadret. Sed tamè vir ille qui multis in locis excellentis critici laudem meruit, ratione quæ parui momenti est adductus, alteram lectionem sibi non displicere profitetur. Non aliud enim ad eam retinendam eum mouet, quàm quòd Iuno, ea tot quæ euentura erant metuens, veterisque memor belli, tantas exciuerat turbas. Atqui ego vel hanc aduersus id quod affert sufficere obiectionem puto, quòd non dicit Virgilius *deæ*, sed *deúm*. Vide lector quàm digna veterano (vt ita dicam) critico interdum sit res, ex duabus scripturis quæ vnica alioqui littera differunt, eam quæ conueniat loco eligere.

Videmus porrò, ad nonnullos eorum locorum in quibus hanc vocum similitudinem exemplaria habent, non vnum tantùm eruditum virum, sed plerosque non

fatis iudicii attulisse. Atque hoc videre est in isto libri

Æneidos IIII,

Egregiam verò laudem & spolia ampla refertis

Tūque puérque tuus, magnum & memorabile numen,

Vna dolo diuūm si femina victa duorum est.

Verum enim hīc inueniri quod dixi, & ipsum videlicet & cum eo plerosque eruditos viros deceptos fuisse *ἐν τῷ κριτῇ*: (quum nimirum *ἐν τῷ κριτῇ* veram lectionē à falsa oporteret *ἀλλὰ κριτῇ*) apparet ex iis quæ Pierius scribit. Fatetur enim esse codices aliquot manuscriptos, in quibus *nomen* legatur: quod etiam vulgata quædam exemplaria receperint: sed addit, *numen* eruditis placere, quod etiam in Mediceo prius scriptum fuerat. At ecce nihilominus duo quæ horum eruditorum (quibus ille assentitur) sententiam refellent. Vnum, quòd verbum *refertis* vtrique membro commune, cum Latinitatis tamen venia iungi posteriori non possit. Nam illud quidem *Refertis egregiam laudem & ampla spolia*, Latini-ssimè dici constat: at verò *Refertis magnum & memorabile numen*, an quisquā, qui se Latinè loqui profiteatur, vel mussare audeat? Alterum quod eorum sententiam refutat, est hoc, quòd alibi itidem *memorabile nomen* eo sensu dicat Virgilius,

—nanque etsi nullum *memorabile nomen*

Feminea in pœna est.

Non ignoro interim, ad priorem illam obiectionem quod attinet, ita quempiam ei responsurum, vt necesse neget esse, hoc quoque posterius membrum verbo *refertis* iungere: quòd extrinsecus posse *ἰνὰ τὸν αἰῶνα* dicat verbum est & pronomen *vestrum*: vt intelligamus, *Magnum & memorabile numen vestrum est*. (nam conueniret quidem & verbum *habetis*: sed ego talis subauditionis

exemplū desidero) ideóque hīc impeditum esse quodammodo orationis cursum, at non illic, ἀνταποκρίνομαι.

Ex hoc διαφορῶν γειγῶν genere quædam sunt à Donato animaduersæ, quæ latuisse Seruium videntur. vt Æneid. x i, de Arunte & Camilla,

*Qua se cunque furens medio tulit agmine virgo,
Hac Aruns subit, & tacitus vestigia lustrat:*

*Qua victrix redit illa, pedémque ex hoste reportat,
Hac iuuenis furtim celeres detorquet habenas:*

Hos aditus, iámque hos aditus, omnémque pererrat

Vndiq; circuitum, & certam quatit improbus hastam.

In penultimi enim versus posteriori loco Donatus legit *abitus*. quāuis hæc lectio ex vno tantum codice à Pierio afferatur: qui ea diligentiam eius ostendi ait, vt non prius adire velit, quàm præuiderit qua sit etiam abeundum. Vbi quod diligentiam vocat, videtur potius debuisse prudentiam appellare. Addit verò, & Donatum *abitus* agnoscere: sed de Camilla dictum intelligere: quippe qui scribat, *Quacunque abibat, vel quacunque habebat transitum, & quoscunque illa circuitus obibat, obseruabat iste, opperiens causam qua posset circumuenire fortio rem.* At Seruius hunc in versum nihil annotat, minimè (opinor) si vocem *abitus* in posteriori eius parte inuenisset, eius expositionem prætermisurus. Neque tamen ita exposuisset vt Donatus, meo quidem iudicio: sed alteri illi sensui acquieuisset: nisi quòd non diligentiam sed prudentiam ostendi ea voce dixisset.

In quibusdam verò locis, sensu eodem manente, videndum est tantummodo vtrum vocabulum aut magis proprium aut significantius sit. vt Æneid. vii i, & Caco filicem concutiente, & impellente, quæ spelunca dorso insurgebat,

— *impulsu quo maximus insonat aether:*

quum in aliis codicibus scriptum sit *intonat*.

In prima autem eiusdem Caci mentione, vbi eius spelunca describitur, quum exemplaria quædam habeant, *facies quam dira tenebat*, in aliis est *tegebat*: & licet Pierius receptum magis esse dicat *tenebat*, mihi tamen magis placet *tegebat*.

Nonnullæ autem sunt scripturæ huius generis, in quibus vnus tantum literæ mutatio magnam nouitatem affert, non quod ad sententiam sed quod ad vocem attinet. Cuius rei luculentum exemplum in isto hemistichio habemus, quod extat circa finem libri tertij *Æneidos*, de excacatione Polyphemi,

— *Et telo lumen terebramus acuto.*

Affertur enim & alia lectio,

— *Et telo lumen tenebramus acuto.*

Vbi quis ex his duabus lectionibus priorem eligendam esse, ob illius verbi insolentiâ, statim nō pronuntiet? At Tib. Donatus tamen lectionem hanc sequitur. Nam hæc eius afferuntur verba, *Quod ait, Acuto telo tenebramus, celeritatem facti voluit demonstrare. In hoc enim consilium consistebat effectus, ne mora facientium Et dolor vulneris quamuis grauitèr dormientem excitarèt. Hoc loco nonnulli terebramus tradūr: sed quum terebratio habeat moram, quæ fuit inimica facientibus, melius est vt telo acuto, vno ictu videatur cacatus*. Hæc ille: in quibus ratione tueri vult lectionem quæ ridicula propemodum videri posset, nisi Seruius mentionem eius faceret. Sed ita facit tamen vt se probare non ostendat. In illa enim verba, *Vnâ vndique circum Fundimur*, annotat, Secūdm̃ Homerū, qui dicit alios eum tenuisse, alios obcæcasse oculum acuto fuste obuſto. Nam secundum istum sensum

multi *terebramus* accipiunt : alii *tenebramus* legunt. Mirum est autem Seruium (nam de Donato non idem dixerim) loci Homerici mentionem non facere, & vel eius autoritate alteram illam lectionem non reiicere. Nisi fortè illa verba, (vt alia multis in locis multa) interciderunt. A Pierio certè Homeri versus rectè nouæ illi lectioni opponuntur :

— ἐγὼ δ' ἐφύεσθην ἀερθεῖς

Δίνεον, ὡς ὅτε πῆς τρυπῶ δόρυ νῆιον ἀνὴρ

Τρυπάνω, οἱ δὲ τ' ἐνερθεν ὑποσείουσιν ἱμάντι,

Ἀψάμχοι ἐκάρπεθε.

In quibus (inquit) non tantum ait terebratum lumen conto acuto vstulatōque, ex igne statim in oculum adacto, Vlyssē superne calcante, loro inferne aduoluto, cuius capita socii alternantes vtrinque traherent : (quod sine longa mora fieri non potuit) verumetiam artificis qui nauale aliquod lignum terebra perforet, similitudine vtitur.

Hæc ille : ac rectè quidem illi lectioni Donati istum Homeri locum, quem constat Virgilium sequi, opponit : sed malè (ne cum illo fallatur etiam lector) ad Vlyssis socios ea refert quæ de nauis fabricatoribus ab Homero dicuntur. Putat enim verba illa, οἱ δὲ τ' ἐνερθεν ὑποσείουσιν ἱμάντι, Ἀψάμχοι ἐκάρπεθε, de sociis Vlyssis esse intelligenda, quum de iis dicantur qui lignum illud terebratrem adiuvant. Hoc autem in errorem eum induxit, quòd ea quæ comparationi adhærent, & eius pars sunt, ab ea separauit. nam hæc sunt vltima eius verba, τὸ δὲ τῷ χειρὶ ἑμμένεσ ἀεί. Atque hæc sequitur ista redditio, ὧς πὸς ἐν ὀφθαλμῷ περικέα μεχλὸν ἐλόντες Δινέομεν. Fecit autem hic error vt alium in ipsius poetæ verbis admitteret, omittēdo particulam δ' post ὧς. Legit enim, Δίνεον, ὡς ὅτε

πὶς εἶ. &c. quum post Δίειον ponenda sit stigma τελεία, & scribendum deinde, ὡς δ' ὅτε πὶς εἶ. Quid? nihilne Vlyssis focii cum in illo præclaro facinore adiuvant? Immo verò: sed hoc in præcedentibus dictum fuit, Οἱ μὲν μοχλὸν ἐλόντες ἐλάϊον ὀξύ ἐπ' ἄκρῳ Ὀφθαλμῷ ἐνέριζον. quibus subiunguntur illa, ἐγὼ δ' ἐρύσσειν ἀερεῖς Δίειον.

Verum, ut ad illud diuersarum lectionum genus reuertar, in quibus vnica litera totam diuersitatem facit, sunt etiam nonnullæ quæ quum à plerisque contemnantur, aut etiam reiiciantur, à lectore quem natura *κριτικὸν* reddiderit examinatæ, non parui ponderis esse iudicabuntur. Ac dignam profectò quæ in hoc numero ponatur, cenleo eam quæ in hunc versum affer-

At furiis Caci mens effera.

hic enim pro *furiis* nobis exhibetur veterum librario-
rum manu exaratum *furis*. quod vocabulum vnica & ipsum litera differre ab altero dici potest: quum, si vnâ ei addas, omnino idem futurum sit. Sed quis prima fronte illud *furiis* huic *furis* non anteferat? At testatur tamen Pierius, exemplaria pleraq; vetusta habere *furis*. Additque, hoc vocabulo longè maximam exprimi ignominiam. Neque enim ignorasse Virgilium quàm seuerè olim apud veteres furtum puniri solitum esset.

Ibi verò præsertim acre alicuius critici iudicium requiritur, vbi duæ lectiones propemodum contrariæ, aut certè omnino tales, se offerunt. Ideòque istud de hoc posse dici loco videtur, *Æneid. xi*, vbi Aunus Camillam his verbis compellat,

— quid tam egregium, si femina forti
Fidis equo? dimitte fugam, & te cominus aquo
Mecum crede solo: pugnaq; accinge pedestri:

Jam nosces ventosa ferat cui gloria fraudem.
 Ex aliis enim exemplaribus non *fraudem* sed *laudem* habemus. Ac Seruius ubi hæc verba nobis proposuit, — *ventosa ferat cui gloria fraudem*, ista scribit, *Hæc est vera & antiqua lectio. ut sit sensus, Pedes congregare: iam cognosces cui inanis iactantia afferat pœnam. Nam fraudem veteres pœnam vocabant: ut etiam in antiquo cognoscitur iure.* Contrà autem Tiberius Donatus eos sequitur codices qui *laudem* nobis exhibent: locum hunc ita *Ἐπειράζων*, *Experiundo cognosces quis debeat iure meritoque laudari.* Quæ tam diuersæ duorum grammaticorum sententiæ faciunt ut Pierius hæreat, & vtra potior sit, aliorum arbitrio relinquat. Ego illum hæsisse hîc miror, ac non considerasse, primùm quidem non parui ponderis esse nobis debere Seruij de antiquitate huius lectionis testimonium: deinde verò ex hac idoneum sensum posse statim elici, quum alteram nihil aliud excuset quàm epithetum *ventosa*. quòd alioqui gloria laudem ferre non dicatur, sicut nec laus gloriam. Ac ne de hoc quidem assentiri illi possum, quòd non tantùm hîc Seruii & Tib. Donati (quos opinatissimos grammaticos vocat) sed alibi quoque ita mentionem facit, ut eodem loco se illos habere, eodémque honore dignari, ostendat. Quamvis enim publicatis Seruii commentariis longè præstent alii qui & magis integri & multo pleniores sunt (qui ante aliquot annos officinæ meæ oblati fuerunt) tamen inter illa quæ apud Seruium in istis etiam editionibus typographicis & illa quæ apud Tib. Donatum in veteribus quoque libris leguntur, tantum propemodum quantum inter *αἰόσια* & *χάλκεα* apud Homerum arma interest. Vel huius certè loci quàm frigida est eius expositio! *Experiundo* (inquit) *cognosces* quis

quis debeat iure meritóque laudari. Immo verò cum verbis hisce aut similibus conueniret,

Iam nosces cuinam sint præmia debita laudis.

Sed quamuis Pierius illa tantum verba afferat Donati locum illum exponentis, in vulgatis tamen editionibus hæc adiecta illis sunt, *¶ quis per inanem iactantiam velit esse quod non est.* At, meo iudicio, si quis ex illa lectione sensus eliciendus est, hic demum ille est, (quoniam non dicitur simpliciter, *cui gloria ferat laudem*: sed, *ventosa gloria*) Experieris quis laudem ex ventosa gloriatione reportet. Vel, Quis sit cui soleat cedere laudi ventosa gloriatio & iactantia. Vel, Cui suæ ventosæ gloriationis laudabilis sit exitus. Magis tamen mihi, volenti *laudem* scribere, placeret *quam*: hoc modo, — *ventosa ferat quam gloria laudem.* id est, Quæ laus, siue quod laudis genus ventosam istam gloriationem soleat comitari. vel, soleat consequi. At verò alteram scripturam (quam amplectendam censeo) quæ *fraudem* non *laudem* nobis exhibet, si *αὐτὸς ἐξ ἑαυτοῦ* oportet, aptè hoc factum iri puto hoc modo, Experieris iam cui perniciosum sit ita ventosè & inaniter gloriari. vel, cui perniciosum sit, ita magnificè de se sentire, atque id ventosa & gloriabunda iactantia præ se ferre.

S E D à diuersis veterum librorum lectionibus, quarum delectum habere criticorum erat, ad eas veniendum esset, quarum ipsi simet critici, aut alii, criticorum auctoritatem & ius sibi vindicantes (ac præsertim grammatici) autores fuerunt: nisi hac de re meum illud Schediasma meæ editioni Virgilianæ subiunctum satisfacere tibi posset. Ibi enim quid Urbanus quidam, quid Carminius & Probus hac in parte ausi sint, declaratur.

Nominatim verò epitheta alicubi quosdam mutare ausos esse, memini me legere. Variare certè & in illis exemplaria videmus: sed ita ut alicubi parui referat utrum è duobus vel quod è pluribus eligas: alibi cōtrā. Parui enim refert in hoc versu, libri vndecimi *Æneidos*,

Dant sonitum rauci per stagna loquacia cycni,
retineasne epithetum istud *loquacia* (quod & Servius agnoscit) an in *sonantia*, an etiam in *liquentia* mutes: (quamvis sit cur hæc, ac præsertim istud postremum minus probare quàm illud debeamus) at verò *Æneid.* IIII, non immeritò fortasse dubitetur an *legifera Cereris*, an *frugifera* scribendum sit. quoniam alicui loco hoc, alicui illud melius posse convenire certum est. Idèoque in talibus etiam exemplarium diffidiis materiam sibi paratam habet criticus.

Neque verò & locos difficiles, præsertimque ambiguos, interpungere, suarum etiam partium critici nō censebant: quum Tucca & Varus huius interpunctionis autores citentur,

Quam mihi quum dederis cumulatam, morte relinquam.
De qua tamen interpunctione nunquam me sibi assensorem habebunt. Nec verò criticos hanc quoque provinciam cepisse mirum est, quum, ut mala interpunctio locum aliquem omnino depravare potest, quod ad sensum attinet, ita etiam bona substituta eum suæ integritati restituat: atque ut ex mala multæ lites oriuntur, sic etiam à bona ei succedente componantur. Sed nonnūquam ipsi etiam Servio (nam de Donato minus miror) contigit, locos qui rectè se habebant, vulgarem interpunctionem sequendo, ea mutata corrumpere. Cuius rei insigne habemus exemplum *Æneidos* libro VI. Nam quum hæc sit vulgaris (ut ita dicam) lectio,

—neque te Phœbi cortina fefellit,

Dux Anchisiade: nec me deus æquore merfit:
Seruius locum hunc ita distinctum vult legi,

—neque te Phœbi cortina fefellit,

Dux Anchisiade, nec me. deus æquore merfit.

Scribit enim. NEC ME: hîc distinguendum: ne sit contrarium. nam eum somnus deiecit. Quanquam alij frustra dicant quòd credebat Phorbantem: quum extinctis diuinandi sit concessa licentia: & nunc iam sciat somnum fuisse. Vbi quum dicit, ne sit contrarium, intelligit, Ne contraria veritati sit responsio. Subiungit enim, Nam eum somnus deiecit. perinde ac si, quum è numero deorum sit Somnus, non potuerit verè dicere Palinurus, — nec me deus æquore merfit. Atqui considerandum erat quod ipse Palinurus addit, Nanque gubernaculum multa vi forte reuulsum, Cui d. h. c. cursûsque regebam, Præcipitans traxi mecum. Ita enim loquens, ostendit se aliud deum, aliud casum esse existimare. quem casum indicat vocula forte. Casum autem à deo, siue ab eo. quod decreto diuino factum sit, & quod Homerus *ὁ δὲ θεὸς* contigisse diceret, distingui ab hoc poeta & à quibusdam aliis, nec non à Cicerone, quis inficiabitur? Cognoui autem, & illum Virgilianæ quæstionis iudicem, cuius antea fuit à me facta mentio, mihi assentiri: scribentem, insulsam & ineptam Palinuri responsionem futuram fuisse, si Æneæ interroganti quis deorum cum sibi & suis eripuisset, respondiisset, Eripuit deus. Non aliter quàm si interroganti, Quis homo te percussit? respondeatur, Homo. ac non potius, Socrates, vel Alcibiades, vel Callias. Aut certè hoc responsum detur, Non homo, sed asinus. Sic enim & solœcisnius fieri existimatur, quum responsum ab interrogante dissentit. Quinetiam

falli Seruium ostendit in eo quod putat, omnibus qui defuncti sunt diuinandi donum esse concessum. neque enim Virgilium omnes defunctorum animas diuinantes inducere, sed paucas tantum, quæ purgatæ iam essent, lætæque iam tenerent arua: quod Anchisæ animæ apud eum contingere. Atque adeo Donatum, quum dicit, cognouisse Palinurum vim illam esse diuinā, sed quis deus fuisset, ignorasse, quod Phorbantem tantum vidisset: satis ostendere, Palinurum non diuinasse, contra quàm Seruius opinetur.

Considera igitur lector quàm multæ controuersiæ ex peruersa interpunctione interdum oriantur, & quàm multa absurda eam consequantur.

Sed alium etiam libet depromere locum, ad quem omnes (quos quidem legerim) enarratores, ranquam ad lapidem de-industria pedibus suis obiectum impegerunt: non quod præposterè posita esset interpunctio, sed quod, quum tota illa oratio nullam posceret, apposita esset tamen, & illos sistere se vbi minimè oportebat adigeret. Sequentem igitur locum accuratè expende. — *Et egressus syluis, vicina coegi Vt quamuis auido parerent arua colono.* Nam quum post *coegi* editiones quæ meam præcesserunt habeant hypostigmen, non cæteri tantum enarratores, sed etiam Sebastianus Corradus, vir diligentissimus pariter, & doctissimus, dum *vicina* non iungunt cum *arua*, sed intelligunt, *Coegi vicina*, vt ea cogendo, efficere vt arua parerent colono: significationem dant verbo *coegi* à mente poetæ alienā, quidam verò & nouam: & se tamen impeditos hære animaduertunt. Nam Augustinus Dathus & alii volūt, Virgilium, his verbis, *vicina coegi*, intellexisse, collegisse & in præcepta redegissee atque in artem quæ erāt vicina

syluis. id est georgica. Ac multę sunt veteres editiones (ex illis præsertim quę adiunctos habent commentarios) tam Gallicę quàm Italicę, in quibus hæc ita leguntur, etiam parentheses notis incluso tertio versu,

— & egressus syluis, vicina coegi:

(Vt quamvis auido parerent arua colono)

Gratum opus agricolis.

Quorsum autem hęc notas illas ponebant? Quòd hæc, *gratum opus agricolis*, per appositionem dici putarent de illis tantum verbis, *vicina coegi*: hoc modo, *In præcepta redegi vicina syluis, id est georgica, opus gratum agricolis: ut arua parerent ex præceptis meis colono*. Ac ne ista quidem cõtenti expositione erant: sed addebant & hanc, *Vt pote qui scirem quòd quamvis arua parerent colono auido, tamen opus esset gratum agricolis*. Quinetiam tertia hæc verborum ordinatio afferebatur, *Ille ego qui modulatus sum quondam gracili auena, coegi carmen, etiam vicina syluis, gratum opus agricolis, egressus syluis, ideo ut arua parerent*. &c. Vide lector ut locus hic crux fuerit non solum infinitis lectoribus, sed quamplurimis etiam enarratoribus fixa. Nam (quod valde mireris) etiam Sebastianus Corradus (vir & doctissimus & diligentissimus) hoc in loco multum se fatigat, neque tamen ex eo se expedire potest. Quòd si negarem, idem mihi quoque aliquando vsuvenisse, verax non essem. Sed quum in mea huius poetę editione, ad hunc locum venissem, & viderem impositam mihi esse necessitatem, locum hunc magis seriò quam antea vnquam examinandi, tandem apud me cogitare cœpi, Quid si stulti alicuius librarii manu adscripta fuit verbo *coegi* illa interpunctionis nota? Vix igitur à me expuncta fuit, quum tenebras in lucem commutatas vidi. Nam libertate, quam illa mihi eripiebat,

sumpta, iunxi præcedens *vicina* cum sequente *arua*: quippe cui scire linguam Latinā permittere ut diceretur, Coegi arua ut parerent, pro eo quod est Coegi arua parere. Simul autem recordatus sum alius loci eiusdem poetæ, in quo hyperbole simili, vel potius eadem, sub alio tamen verbo, utitur. Legimus enim Georg. libro primo, de agricola, Imperare aruis.

Et qui, proficisso quæ suscitatur aequore terga,

Rursus in obliquum verso perrumpit aratro,

Exercetque frequens tellurem, atque imperat aruis.

Arua enim quibus imperat agricola, illi parent, quamvis auido, id est quantumvis auido: eius auiditatem quantumlibet magnam expleant. Quinetiam alibi eodem sensu dicit segetem votis auari agricolæ respondere: inter illa quæ non multo ante præcedunt,

Illam seges demum votis respondet auari

Agricolæ, bis quæ solem, bis frigora sensit.

Est denique & aliud malum, magis etiam præcedente alicubi periculosum, & minus tamen illo cognitum plerisque eorum qui veterum scriptorum libri medicum calamum adhibuerunt. Nec certe quisquis criticus (ὁσαυτὲ καὶ μετὰ εἰδέναι) ullam eius mentionem fecit, quum tamen nullum sit quod criticam solertiam criticumque iudicium potius debeat implorare. Verum huic malo poetica magis quam orationis solutæ scripta sunt obnoxia. Quòdnam huic est nomen? Nescio an metathesin ausim dicere, addendo, mendosam: quum metathesin transpositionem quidem siue traiectionem sonare, sed aliis de rebus dici constet. Ordinis quidem certè est perturbatio, quocunque alio nomine illam appellare libeat. Huius autem ut exempla representem, ab eo ipso quem habemus poeta discedendum

non fuerit. Sed vno tamen contentus ero, cuius & in mea editione admonui. Quum igitur omnium castigatorum siue correctorum, omnium enarratorum, omnium typographicorum exemplarium consensu ita legatur hic libri decimi Æneidos locus,

*Ac velut ille canum morsu de montibus altis
Actus aper, multos Vesulus quem pinifer annos
Defendit, multosque palus Laurentia, sylua
Pastus arundinea, postquam inter retia ventum est,
Substitit, infremuitque ferox, & inhorruit armos:
Nec cuiquam irasci propiusve accedere virtus,
Sed iaculis tutisque procul clamoribus instant:
Haud aliter, iustæ quibus est Mezentius ire,
Non ulli est animus stricto concurrere ferro:
Missilibus longè & vasto clamore lacessunt.
Ille autem impavidus partes cunctatur in omnes,
Dentibus infrendens, & tergo decutit hastas.*

Quum inquam non alius vsquam horum versuum ordo inueniatur (quod quidem sciam) non dubito tamen quin eorum hunc potius esse ordinem debere facturus sit mecum quicumque diligenter locum expendit.

*Nec cuiquam irasci propiusve accedere virtus,
Sed iaculis tutisque procul clamoribus instant:
Ille autem impavidus partes cunctatur in omnes,
Dentibus infrendens, & tergo decutit hastas:
Haud aliter iustæ quibus est Mezentius ire,
Non ulli est animus stricto concurrere ferro:
Missilibus longè & vasto clamore lacessunt.*

Hos enim duos versus, *Ille autem imp. p. cunct. in omnes, Dentibus infr. & tergo dec. hastas,* quis neget apro potius quàm Mezentio, conuenire? Ac parum certè abest

quin quod amplius est dicam: eos tam malè Mezentio, quàm bene apro conuenientes esse. Nec verò dubito quin ob duos hosce versus potissimum locus hic tantum negotii quibusdam grammaticis exhibuerit, vt eum in numero duodecim obscurorum posuerint. Quid enim alioqui habet propter quod illis debeat ad numerari?

S E D, dum quid criticorum cura præ cæteris dignum sit quæro, vnum quod præcipuè hanc curam mereri videtur, omitto. Quidnam verò illud est? Latinitatis integritas. Nihil enim criticos magis decere, magisque iuris illorum esse existimo, quàm eos in locos in quibus integra Latinitas non sit, suo illo censorio iure vti. At ecce tamen, in hac sui officii parte dormitasse mihi videntur. Cuius rei exempla in illo Schediasmate quod posteriori meæ Virgilio editioni adiunxi videnda tibi videndi cupido relinquo. Sed duo illis addam, quorum vnum est ex libro Æneidos primo. ibi enim legimus,

*Cui mater media sese tulit obuia sylua,
Virginis os habitumque gerens & virginis arma
Spartana.*

nec vlla (quod sciam) alia lectio affertur: quum tamen constet, Latinæ linguæ consuetudinem polcere vt dicatur, Illa tulit se ei obuiam, vel Ille tulit se ei obuium. Eodémque modo, Dedit se obuiam, vel obuium. Quomodo igitur hæc, *Cui mater sese tulit obuia*, à Latinitate non discedere dicemus? Nam ineptum (meo quidem iudicio) fuerit, illud *obuia* à verbo *tulit* separare: hoc modo, Cui mater obuia (id est, veniens obuiam) tulit se. Quid enim hoc est, aut vbi lectum? *Ferre se alicui.* Non video certè quod ex hoc loco pateat effugium, nisi vt dicamus, *tulit se* dictum esse pro Obtulit. Sed

quamuis

quamvis simplicibus pro compositis vrantur poetæ, esse tamen nonnulla constat quorum talis usus nimium insolens & durus esset: nec dubito quin hoc in numero ponendum sit istud. Potius igitur crediderim Virgilium scripsisse,

Cui mater media sese obtulit obuia sylva:

sed quod ab eadem syllaba duæ contiguæ voces, *obtulit* & *obuia*, initium haberent, vel cum Latinitatis periculo (si quidem id præuidebatur) *obtulit* in *tulit* mutatum fuisse. Ego tamen duriorē παράχρησιν esse non dixerim quæ duo contigua vocabula ab eadem syllaba inchoat, quàm sit ea quæ eadem claudit. Atqui huius cum alia quamplurima exempla apud hunc poetam habemus, tum verò istud, *Fama, malum*, Æn. 1111.

Alterum exemplum peto ex Æneid. libro XI, *Talis se sata Nocte tulit*. Nam si *Talem se sata Nocte tulit*, scribendum esse dixerò, hoc ex aliis locis facile euicturus mihi videor.

Ad hunc porro sermonem pertinet & illa in verbis sibi respondentibus temporis disparitas, de qua antea dixi. Verum, quum hinc de iisagam quæ à librariis non autem à poeta aduersus Latinitatem (si tamē non fallor) peccata sunt, credibile tamē est criticos in ea potius inquisiuisse quæ ipsummet poetam hac in parte peccasse crederent. Ex iis autem est quod vocatum fuit Solæcophanes: atque id longè latèque extenditur, contrà quàm vulgus grammaticorū putat, dum non aliud esse aiunt quàm quod alio nomine ἀλλοίωσιν vocant: quum in adiectiua voce mutatur genus substantiux. Veluti quum dicitur, *Præneste sub ipsa*. Item, *Centauro inuehitur magna*. Quibus simile est apud Terentium, *In Eunuchum suam*. Immo verò (vt dixi) longè latèque patet hæc appellatio,

& ad ea omnia pertinet quæ solæca φαίεσθαι possunt, etiam si non sint. Nam vel hoc ipsum quod modò dixi, Vulgus putant, & aiunt, est solæcophanes. Sed aliqua ita esse σολεικοφανῆ sciendum est, ut quodammodo καὶ ὑποκορισμὸν ita dicantur, quum solæca vocari posse videantur. Exemplum autem fortasse satis aptum fuerit locus ille, *Urbem quam statuo vestra est*. At vocatur antiptosis, dicit aliquis. Esto: sed quid vetat quin aliqua etiam antiptoses solæcismum oleant? Quod si de vlla dici potest, de hac certè maximè: meo quidem iudicio. Sedenim poetam aduersus criticos defendere possumus, antiptosin huic loco subesse & quidquam solæcophanes habere negantes. Quomodo igitur illum accusandi casum qui sedem casus nominandi occupat, aduersus illos tuebimur? Minimo certè negotio. tantummodo enim posita post verbum *statuo* interrogationis notula silentium illis imponet. Totus enim locus est hic, *Æn* lib. primo,

*Seu vos Hesperiam magnam Saturniæque arua,
Sive Erycis fines regemque optatis Acesten,
Auxilio tutos dimittam, opibusque iuuabo.
Vultis & his mecum pariter considerare regnis?
Urbem quam statuo? vestra est. subducite naues.*

ut, repetito verbo ex præcedente versu, intelligamus. Vultis urbem quam statuo? vestra est. Hoc (inquam, responso, criticos omnes ἐπιτιμῆσαι poterimus. At si cum Donato respondeamus, mutato verborum ordine scribendum esse, *Quam statuo urbem vestra est*, nos cum nostro Donato illorum sannis exponemus.

Quinetiam acyrologia non tantam quidem, sed non parvam & ipsa Latinæ linguæ alicubi facit iniuriam: ideoque non mirum si quos ob eam locos critici siue

apud hunc poetam, siue apud alios reprehenderint. Apud hunc quidem certè duræ acyrologiæ seu catachreses paucae sunt: & vix vllæ fortasse quæ veniã impetrare non possint. Nam illa verbi *Sperare* acyrolexia, quæ durioribus videri posset annumeranda, quamuis duobus in locis inueniatur, fortasse tamen vni eorum aliud verbum adhibuerat (de quo meam aliquanto post audies coniecturam) at in altero, non tantùm imitatione Græci ἐλπίζειν, sed aliter etiam posse illam excusari, ibidem docebo.

Ad alia autem exempla vt veniam, tantum abest vt quum *caper* vocatur *Vir gregis*, id ab vllō critico reprehendi meritò possit, vt contrà laudari lepida hæc audacia debeat: præsertim quum in ea Theocritũ sequutus sit, apud quem πάγω dicitur eodem modo τῶν αἰγῶν ἀνερ. Sic verò quum de apibus audis,

Magnanimósque duces, totiúsque ordine gentis

Mores & studia & populos & praelia dicam:

quum audis de iisdem non solùm illud *duces*, sed & *reges*: quinetiam *ingentes animos*: necnon *vulgus* & *plebem*, & siqua sunt huiusmodi: non acyrologias, sed audaces metaphoras, festiuas tamen, vocare ea debes.

Neque tamen negauerim, quibusdam locis aliam subesse acyrologiam, siue acyrolexiam (nam vtroque vocabulo, potius tamen illo, Græci improprium sermone appellarunt) cuius audaciam non perinde audacter nec libenter imitaturus sim. Talis autem est illa, libro v, & *tenuēs Teucrũm res eripe leto*.

Sed nõne ad hoc caput tria quæ reprehēdit Cornutus in Virgilio verba referre possumus? Referenda sunt sanè, si ea etiam quæ non satis significantia sunt, aut nõ satis graua, impropriis annumerare oportet. Quod

tamen propter duo illorum tantummodo à me dicitur, *Vexare & fflandatus*. Tertium enim *Squalens* non ob hanc causam reprehenditur, sed vt contrarium ei quem Virgilius dedit vsum habens. Quod ita si esset, quid magis improprie dictum inueniri posset? Libet igitur eos etiam locos, addita cuique sua critica censura, commemorare: simulque, ad vnamquamque quid respōsum fuerit, referre: & quod addi posse videbitur, adiicere. Cornutus igitur (teste Gellio) & cum eo alii quidam grammatici, haud sanè indocti neque ignobiles, qui commentaria in Virgilium scripserunt, eum reprehenderūt quasi incuriosè & abiectè verbo vexare vsum esset in his Eclogæ sextæ versibus,

Candida succinctam latrantibus inguina monstris

Dulichias vexasse rates, & gurgite in alto

Ah timidos nautas canibus lacerasse marinis.

Rationes autem afferuntur hæ: *Vexasse* verbum esse leue, & tenuis ac parui incommodi: ideoque tantæ atrocitati non congruere, quum homines repentè à bellua immanissima rapti laniatique sint. Quibus Gellius ita respondet, vt dicat, *Vexasse*, verbum graue esse: atque id factum videri ab eo quod est *Vehere*: in quo inesse iam vim quandam alieni arbitrii: quum sui potens nō sit qui vehitur. *Vexare* autem, quod ex eo inclinatum est, vi atque motu vehementiore esse: quoniam qui fertur & raptatur, quique huc atque illuc distrahitur, is *Vexari* proprie dicitur. Sic *Taxare* pressius crebriusque est quàm *Tangere*, à quo inclinatum esse constat. Sic *Iactare*, multo fusius largiùsque est quàm *Iacere*: & *Quassare* quàm *Quatere* grauius violentiùsque est. Deinde, ad verbum *Vexare* reuertens, *Non igitur* (inquit) *quia vulgò dici solet vexatum esse quem fumo, aut vento,*

aut pulvere : propterea debet vis vera atque natura verbi deperire, quæ à veteribus conseruata est. Atque adeo exempla duo, vnum ex M. Catone, alterum ex M. Tullio affert. Hæc ille: inter quæ illud miror, Vexare, factum videri ab eo quod est Vehere: quasi verò hac de re dubitatio vlla, aut vllum verbum, vnde alioqui factum dici possit, relinquatur. Quod autem scribit, cum qui vehitur, sui potentem non esse: (id est, in alienam quodammodo potestatem transisse) verum quidem est (quum & ab equo, & à curru non audiente habenas, vt idem poeta loquitur, & à nauigio auferri quis possit: quod *ἐκ πέρας* & *παρὰ πέρας* Græci dicunt) sed alterum quonititur argumentum, longè, meo quidem iudicio, est validius. Sed firmitus tamen quàm hoc quoque, argumentum sunt illa duo quæ affert exempla: quibus certè alia ex Ciccone præsertim addere possumus. Apud quem Asconius illi de verbo Vexare obiectioni occurrere & ipse videtur voluisse. Nam quum Cic. in Verrem or. II, scripssisset, de Sicilia loquens, *Quam iste per triennium ita vexauit ac perdidit, vt ea restitui in antiquum statum nullo modo possit*, annotat, verbo Vexauit ingentem calamitatem significari: quum & ipse suprâ dixisset, *Populata, vexata, funditus eversa prouincia*. Quinetiam loci huius Virgiliani testimonio vtitur, si bene memini. Et sanè ex eo quod hac de voce annotat, tanquam obiectioni (vti dixi) occurrens, suspicari possumus, cum quoque animaduertisse, alium suo seculo eius vsum esse, pro eo tantum quod aliter diceretur, Molestiam exhibere. Sed in hac Latinitatis iam tum inclinatione (vt ita loquar) prudentius se Asconius quàm Cornutus gessit. Atque huic istud quoque responderi à Gellio potuisse existimo, videndum esse, in huiusmodi alicuius vocabuli repre-

hensione, an aliud eo aptius adhiberi potuerit. Atqui, si cò deueniamus vt aliud huic Virgiliano loco conuenientius inueniendum sit, vereor ne diu multúmque quærentes, oleum atque operam perdiderimus: etiam si non iubeamur inuenire quod tale sit vt syllabarum quantitate alteri omnino respondeat. Nec verò dubito (vt hanc quoque critico dignam quæstionem adiiciã) quin Virgilio in mentem venerit ita scribere, *Dulichias quassasse rates*, (præsertim quum alibi etiam hoc verbo ita vtatur) sed *quassasse πειχέτας* iudicasse. Denique, quàm significans esse iudicaret verbum Vexare hic poeta, ex eo etiam apparet quòd huic versui primi suæ Æneidos libri adhibendum id censuerit,

At bello audacis populi vexatus & armis.

Secunda reprehensio, est nominis *illaudati*, in hoc libri Georgican tertii principio,

*Cetera, quæ vacuas tenuissent carmina mentes,
Omnia iam vulgata. quis aut Eurysthea durum
Aut illaudati nescit Busiridis aras?*

Nam *illaudati* parum idoneum esse verbum dicebant, neque satis esse ad faciendam scelerati hominis detestationem, qui, quòd hospites omnium gentium immolare solitus fuit, non laude indignus, sed detrectatione execrationeque totius generis humani dignus esset. At Virgilium duobus defendit modis Gellius: quorum prior est, neminem tam efferis esse moribus, quin faciat aut dicat nonnunquam aliquid quod laudari queat: sed eum qui omni in re atque omni tempore laude omni vacat, *illaudatum* esse, omniúmque pessimum ac deterri- mum: sicut omnis culpæ priuatio inculpatum facit: inculpatus autē instar est absolutæ virtutis. *Illaudatum* igitur quoque, finem esse extremæ malitiæ. Itaq;

Homerum non virtutibus appellandis sed vitiis detrahendis laudare ampliter solere. Quibus exempla subiungit ex hoc poeta, cum alia, tum verò ἀμύμων, & οὐκ ἄξιον τε. Epicurum quoque simili modo maximam voluptatem, detractionem priuationemque omnis doloris definisse. Eadem denique ratione eundem Virgiliū *inamabilem* dixisse Stygiam paludem. Nam sicut *illaudatum* κατὰ *laudis* ἔρεπον, ita *inamabilem* κατὰ *amoris* ἔρεπον detestatum esse.

Altero autem modo posse illud epithetum defendi: quòd Laudare prisca lingua sonaret Nominare, appellareque: & sic in actionibus ciuilibus laudari id dicitur quod est nominari. Illaudatum igitur esse quasi Illaudabilem, & innominabilem: qui neque mentione aut memoria vlla dignus, neque vnquam nominandus est: sicuti quondam à communi concilio Asiæ decretum est vti nomen eius qui templum Dianę Ephesię incenderat, nequis vllò in tempore nominaret. Hactenus Gellius: quē minimè quòd Virgilius respexit animaduertisse arbitror. Neque enim dubium mihi est quin Busridis mentionem faciens, recordatus fuerit laudationis eius ab Isocrate contra omnium expectationem scriptæ, & illo epitheto taxare hanc voluerit. perinde ac si dixisset, Busridis malè laudati. id est, falsò laudati. Quinetiam, si Illaudabilis exponatur, non minus eodem respexisse dici poterit. Quod tamen si non admittatur, & Gellium potius sequi oporteat, ego meliorem esse defensionem illam iudico (sicut & simplicior est) qua simile esse dicitur illi *Inamabilis*. Verum, quoniam ibi additum est etiam *tristi* (nam legitur, *tristiquè palus inamabilis vnda*) aliud potius exemplum debuerat afferre. Esse autem hoc poterat, ex libro Georg. II, Mi-

scueruntque herbas, & non innoxia verba. quum intelligi velit, non solum non noxia, sed etiam nocentissima, seu perniciosissima. Aut certe istud, *Æneid. viii,* — *non te rationis egentem Lernaus turba caput circumstetit anguis.* Quæ figura (qua minus dicimus, plus cogitamus) malè passim apud Seruium Liptotes appellatur: quum à λέιπω non dicatur λειπότης, sed λιτότης à λιτός, vt docui in meo De abusu Græcæ linguæ libello.

Verum ad tertiam transire reprehensionem tempus est, quæ superioribus maior est: quoniã de voce *Squalens* agitur, quam non satis significantem esse, aut non satis grauitatis habere, non dicunt, sed contrarium vsum ei datum esse. Versus igitur in quo vocabulum illud culpat, est hic, libro *Æneid. x,*

Per tunicam squalentem auro latus haurit apertum.

Tanquam si non conuenerit dicere (inquit ille) *auro squalentem*: quoniam nitoribus splendoribúsq; auri squaloris illuies sit contraria. Sed hunc quoque locum defendens, scribit, poetam copiam densitatémque auri in squamarum speciem intexti significare. Squalere enim dictum esse à squamarum crebritate asperitatéque, quæ in serpentium pisciúmq; coriis visuntur. Affertque duos huius poetæ locos, in quorum vno dicitur pellis ahenis in plumam squamis auro conferta tegere equum: in altero autem alius, indutus thoracem rutilum, ahenis squamis horrere. Affert verò & hunc Accii locum, *Eius serpentis squama squalido auro & purpura prætecta.* Atque his tandem verbis hanc suam defensionem claudit, *Quidquid igitur nimis inculcatum oblitumque aliqua re erat, vt incuteret visentibus, facie noua, horrorem, id squalere dicebatur. Sic in corporibus incultis squamosisque alta congerie sordium, squalor appellabatur.*

Cuius

Cuius significationis multo assiduóque usu totum id verbum ita contaminatum est, ut iam squalere de re alia nulla quàm de solis inquinamentis dici cæperit. Quibus à Gellio rectè defendi Virgilius videtur: sed illi vix assentiri vsquequaque ausim de eo quod scribit super verbo Squalere: videlicet, Squalere solitum dici quidquid nimis inculcatum obsitumque aliqua re erat, ita ut noua sua facie horrorem visentibus incuteret. Generalius enim de eo dictum existimo quod valde obductum & obsitum aliqua re esset, ac minimè superficiei tenus. Alioqui certè illam quoque tunicam, auro squalentem, incussisse horrorem dicendum esset.

Cæterum, ad primam illam Cornuti reprehensionem quod attinet, verbum Vexare, atrocitati quæ ibi describitur, minimè respondere dicentis: ei similem dicere possumus eam quæ *durum* de Eurystheo dictum in vno eorum quos attuli locorum, improbat, & mutandum in *dirum* contendit. Huius autem morositatis (si morosam reprehensionem ita vocare licet) meminit Pierius.

QVID? nōne & quæ ambigüe dicta erunt, notabit criticus? Id faciet certè, si Horatiani Aristarchi exemplum sequi velit. Sed non multi (ut opinor) loci apud hunc poetam hac de causa notandi occurrerent. Nam nec Seruio quibusdam in locis habenda fides, amphiboliam iis subesse dicenti. Ex iis est hic, *Æneid. 1,*

*Ducit Amazonidum lunatis agmina peltis
Penthesilea furens, mediisque in millibus ardet,
Aurea subnectens exerta cingula mamma,
Bellatrix: audetque viris concurrere virgo.*

Neque enim recipi potest quod in hunc locum scribit: amphibolon hîc esse, vtrum ipsa aurea, an aurea cingula. Ineptè enim illis duobus quæ de Penthesilea dicun-

tur, *furens, & bellatrix*, intermisceretur *aurea*. Fallitur autem & in exemplo quod affert in iis quæ proximè addit, *Sciendum tamen, plerumque amphiboliam metri ratione dissolui. ut — Aurea composuit sponda Dido. Aurea enim si ad spondam referas, non stat versus*. Nam locus cuius ille hîc mentionem facit, est hic, *Æneidos libro primo,*

*Quum venit, aulæis iam se regina superbis
Aurea composuit sponda, mediâmq; locauit.*

Vbi *aurea* nihilo magis ad reginam, quàm illic ad *Penthesileam* referri constat: sed cum *sponda* iungi, ut fiat *synæresis*: qualis sit in voce *ἄρσεν*, cuius illa significationem habet. Sed & *Seruius* hîc cum *sponda* iungi posse fatetur. Quod certè suspectum alterum illum locum reddit: ut alia multa vel ex tali repugnantia meritò suspecta redduntur. Quòd si verum istud esset hoc in loco, vel alibi (ut certè verum alicubi est) *amphiboliam metri ratione dissolui*, falsò certè *amphibolos loquutus* ibi diceretur poeta, quicumque is esset.

Iam verò & quædam affert tanquam ambigüè dicta, quæ tamen in soluta etiam oratione eodem dici modo possent. Sic *Georg. IIII, de apibus,*

*Illis ira modum supra est: læsæque venenum
Morsibus inspirant, & spicula ceca relinquunt,
Affixæ venis: animasque in vulnere ponunt.*

Hîc enim ab illo scholiaste annotatur, *Vulnere, non suo, sed à se illato*. Et addit esse hîc *amphiboliam*, ut quum *Turni iniuria* matrem admonuisse dicitur, quam inferebat, non quam inferebant validiores. Sed eiusdem usus nominis, *Vulnus* nos minimè admonuit in hunc secundum *Æneidos* locum,

— quorum Iphitus, &uo

Iam grauior, Pelias & vulnere tardus Vlyssis.

Nam hîc quoque vulnus Vlyssis intelligamus necesse est, ab illo illatum, non acceptum. Verum autem esse quod dixi, solutam quoque orationem talem genitiuorum vsum admittere, exemplis ostendi potest: præsertimque Salustii, qui metum Pompeii eodem dixit modo, de Pompeio, non qui metuebat, sed qui metuebatur. Atque adeo ipse Seruius, qui absque amphibolia Virgilium ita loqui non potuisse existimat, nihilôque magis appellare Turni iniuriam, eam quam inferebat, quàm quæ ei inferebatur: interim ex Salustio citat dictū similiter, *Iniuria validiorum*, de ea quam inferebant validiores. Neque tamen inficiari velim, tam in carmine quàm in soluta oratione interdum loqui ita non licere: ne amphibolia, quæ lectori negotium exhibeat, subsit. At de hoc versu libri *Æn.* I,

Nec latuere doli fratrem Iunonis & iræ,
quid dicemus: nōne hîc ambiguè loquutum esse poetam, si alibi vsquam, mihi, cum aliis, fatendum est? Immo verò de alio quouis potius quàm de hoc istud fatear. Quid ita? quoniam poterat poeta (quod animaduersum non fuisse miror) mutato tantum ordine verborum scribere,

Nec fratrem latuere doli Iunonis & iræ.
si quidem accusatiuum *fratrem* ab auditore aut lectore cum illo genitiuo iungi noluisset.

SED & ob eam quæ perissologia vocatur, culpati fuerunt loci nonnulli. Verum, quum vulgo pro perissologia exemplis, *Ore loquutus*, itidémque *Ore effatus*: & *Mutatus faciem & ora*: aliâque his similia soleant afferri: sciendum est alia esse maioris perissologiae genera, quæ tota hemistichia interdum occupat: de qua

aliud erit dicendi tempus. Hoc tantum addam, locum esse apud eundem poetam, qui quum multo etiam longioris quam dixi perissologia à multis accusetur, habet etiam à quibus defendatur. Is est hic, *Æneid.* 1,

Quem si fata virum servant, si voscitur aura

Ætheria, nec adhuc crudelibus occubat umbris.

Quod verò ad eos attinet locos qui vulgò inter perissologia exempla referuntur, nonnulli sunt qui contrà ex hoc numero eximendi putantur. Nam ubi dicit Virgilius, *nec bello maior & armis*, negat. Servius iterationem esse: quòd bellum habeat etiam consilium: arma autem, tantum in ipso actu sint. Sed hanc distinctionem subtiliorem esse quam verioremi dico. Maiore tamen ratione hæc excusatio videri potest niti quam ea qua illud *Ore loquutus* defendit. Negat enim esse perissologiam: quoniam secundum Homerum exploratores, quæ volunt, plerunque nutu significant. Quid? si hoc opponi iis potest qui perissologiam esse illud volunt, cur non & antea ubi ab eodem poeta dicitur *Ore effata*, opponerebat? At ecce contrà, hoc loco *ore* abundare factus est: si tamen ab vno eodemque scriptum fuit utrumque. Multa enim per Seruii commentarios sparsa legimus quæ nihilo magis illius sunt quam eius à quo leguntur: nonnulla certè quæ aliquem posteriorem etiam eo scripsisse necesse est.

Ad hoc quoque animum attendebant diligenter critici, an scriptores sibi constarent: & quamvis circa rem potius quam verba animaduertendum id sit, tamè & in iis quæ ad sermonem pertinent poetas nonnunquam reprehenderunt, quòd in aliquo eorum à seipsis dissiderent. Sic profectò culpatus fuit Flaccus quòd hepar siue iccur duobus quidem tribusve locis, iræ, alibi

autem, libidinis sedem fecerit. Nam decimatertia odes libri primi hoc est initium,

Quum tu Lydia Telephi

Cervicem roseam, cerea Telephi

Laudas brachia : va, meum

Fervens difficili bile tumet iecur.

Et satyra nona libri primi legimus,

— meum iecur vrere bilis.

quum alibi tamen plerisque in locis ita de iecore loquatur, tanquam libidinis sedes sit, seu fomes. Scribit enim, ode xx v', libri i, *Quum tibi flagrans amor & Cupido Sæviet circa iecur ulcerosum*. Itidemque in epistola ad Lollium, quæ est libri prioris secunda, hunc versum habemus, *Non ancilla tuum iecur ulceret ulla, puérve.*

Vt autem à seipso, sic etiam à philosophis dissentit, quum iram in iecore, non libidinem, siue amorem, collocat: nominatimque à Platone, qui τὸ ὀργιστικὸν siue τὸ θυμειδὲς, in corde, sicut τὸ ἐπιθυμητικὸν in hepate constituit. Ac ne Tityi quidem supplicium nos de hoc iecoris officio (si loquendum ita est) dubitare finit. Quum enim veteres in poeticis fabulis puniri quemque notarent ea parte qua peccasset, sic Tityum, τὸν κακῶς ἐπιθυμήντα, εἰς τὸ ἥπρ' κολάζει dicebant. id est, Tityum, qui prava cupiditate accensus fuisset, in iecore supplicii dolorem sentire. Perinde quasi extra omnem controversiam apud ipsum etiam vulgus esse deberet, improbam illam Tityi cupiditatem domicilium in iecore habuisse.

Quinetiam, sicut iecur, libidinis, & cor, iræ, ita etiam caput, facultatis ratiocinatricis (quam Græci τὸ λογιστικὸν vocant) sedes à multis eorundem veterum existimatum

M. iii.



fuit : sed ratiocinatricis facultatis domicilium non ita controuersia carere dici potest vt reliqua duo : quum de his non multorum tantum philosophorum, sed poetarum etiam testimonium habeamus : præsertim tamẽ quod ad cor attinet. Nam testimonia si de hoc profrenda essent, sumi initium ab Homero posset : à quo, *ceu fonte perenni, Vatum Pieriis ora rigantur aquis.* Huc enim pertinet illud, οἰδάνεταί κραδίη χόλω, quod ex illo habuisti antea. Sed interdum etiam θυμὸν, interdum ἔηθος vel ἔηθεια, interdum φρένας (tanquam κραδίη synonyma vsurpās) iræ domicilia facit : & non tantum χόλον, sed & μένος, aut θυμὸν (quod Latini poetæ Animos hîc interpretarentur, vt altero illo in loco Animum) dicere solet : quum eius apud Latinos æmulo copia hæc denegata sit : qui alioqui *corda tumida ex ira* dixit, optimè illud, οἰδάνεταί κραδίη χόλω, repræsentans. At verò posteriores Homero poetas, potius quàm ipsum Homerum, ita de iecore vt dictum fuit loqui, obseruatum est. Inter quorum testimonia omittendum non est hoc illius quem mihi veteris Græcorum lyrae studiosi debent,

Ταῦβι δὲ, καί με τύπτει

Μέσον ἡπὶ, ὡς τῶρ οἶστρος.

Id est (loquitur autem de Cupidine)

Statimque tendit illum,

Ferit & mihi sagitta

Medium iecur, quasi æstrum.

vt quidem in adolescentia sum interpretatus, eodem quo & Græcos versiculos edidi tempore.

Verum (vt ad Flaccum nostrum reuertamur) quomodo eum aduersus morosum ac tetricum quempiam criticum hîc defendemus? Aptæ (meo quidem iudicio) fuerit defensio, si respondeamus, eum potius qui non

diuersa solum sed contraria etiam loquitur, sibi non constare dici: at Flaccum illud quidem, sed non & hoc facere. Quod si tamen & contraria de re huiusmodi loqueretur, sua se libertate (id est poetica) tueri fortasse posset: & dicere, hac se videntem, de re eadem interdum quidem φιλοσοφῶν, nonnunquam verò ἰδιωτῶν verba facere. Vt raccam, Iuuenalem quoque iccori iram assignasse, Satyra prima,

Quid referam, quanta siccum iccor ardeat ira?

NEC VERO aduersus verba tantum sed aduersus ipsas etiam res quibus illa seruebant, criticos suam seueritatem distrinxisse videmus. Huius enim poetæ œconomiam carpebant, illius ataxiam reprehēdebant, alius in suis fictionibus inconcinnitatem & incohærentiam damnabant: alium non seruare decorum, alium sibi non constare dicebant. Reliquas enim reprehensiones omitto: quæ certè haud ita multæ sunt, quum sub illis verbis plurimæ comprehendantur.

Quamuis autem œconomix tantum mentionem hic fecerim, non sum nescius tamen proœconomiam quoq; apud Seruium aliquot locis legi: sed quod proœconomiam vocauit (si quidem ita scripsit) non video quid obster quominus œconomiam appellemus: sicut ὁ Διοσκυδῆς interdum nominare licet quod alius ὁ Διοσκυδῆς dixerit. In hunc enim locum libri primi Æneidos,

Et iam finis erat, quum Iuppiter aethere summo

Despiciens mare veliuolum, terrasque iacentes,

Littorâque, & latos populos, sic vertice cæli

Constitit, & Libyæ defixit lumina regnis.

scribit, pulchram esse proœconomiam, id est dispositionem carminis. Vituperabile enim futurum fuisse, si ex abrupto transitum faceret. Bene autem hunc fecisse,

inducendo Iouem & de rebus humanis cogitantem, & Africam respicientem, ad quam venerunt Troiani. Vnde (inquit) *honestus color est, vt Venus adeat Iouem, timens ne Romana fata Carthagini concedant.* Hic (inquã) non video quid vetare possit quominus œconomiam vocemus quod proœconomiam dixit: præsertim quum œconomia circa talia versari apud hunc ipsum enarratorẽ videamus. Nam in hos versus libri Æneidos vltimi,

*Hic mentem Æneæ genitrix pulcherrima mist,
Iret vt ad muros, vrbique aduerteret agmen
Ocios, & subita turbaret clade Latinos :*

admonet, bona vsum esse œconomia, vt diceret, instigat tu numinis profectum esse Æneam ad ciuitatis excidium. Incongruum enim futurum fuisse, illum bello occupatum, per se tale cepisse consilium. Hæc ille: quod & hoc fortassis addere debuit, simul etiam imitationem Homeri id à Virgilio fingi: perinde ac si verba illa audiremus, *καὶ οἱ θεὸς ἐμβαλεῖ θυμῷ.* Sic autem in hunc versum eiusdem libri,

Cingitur ipse furens certatim in prælia Turnus, annotat, ad œconomiam hæc pertinere, Turnum idcirco cum mora armari, & intecto capite circa aciem incidere, admonentem singulos, vt à Lauinia possit videri & vt sit maior causa dimicandi, dum sponsæ placere contendit. Quinetiam alicubi hæc duo copulat, œconomiam & rei futuræ præparationem. Quod si œconomia inest præparatio, non video quid proœconomia potius quàm simpliciter œconomiam dicere necessarium fuerit. Scio tamen alicubi vtrumque ita poni vt non eundem vsum habere videri possit. Nam in hunc locum eiusdem libri,

Semianimi lapsoque superuenit, & pede collo

scribit, esse velut proœconomiam, vt non cum suo interimat gladio, ne agnoscat quôd Metisci est : & iam nunc suum requirat. Quo facto perire poterat sequens fracti gladii œconomia. Hîc enim lectorem primo aspectu proœconomiam ab œconomia distingui existimaturum præuideo : quasi videlicet proœconomia sit ad œconomiam præparatio. Verùm si ipsa œconomia est iam præparatio, (vt modò ostendi) quæ ista ad præparationem præparatio esset ? Potius igitur dixerim œconomiam fracti gladii vocari, figmentum de fracto gladio œconomîe præcedenti consentaneum: quasi quis dicat τὸ δὲ ἐκείνης τῆς οἰκονομίας, vel potius, ἀπολούτως ἐκείνη τῇ οἰκονομίᾳ οἰκονομηθὲν πλάσμα.

Denique & apud Ælium Donatum œconomîæ tantùm, non etiam proœconomîæ, locis aliquot mentionem habemus : quum tamen œconomia velut præparari sequentibus locum, itidem intelligat. Sic enim in hunc Eunuchi locum,

*Sed heus tu, purgón' ego me de istac Thaidi
 Quòd eam me amare suspicatur?.*

docet nos, œconomiam esse ad litem futuram inter militem & Thaidem. Sic etiam obseruari vult à nobis in his verbis Andriæ, Actus secundi scena tertia, *Vide quòd me inducas*, bonam esse œconomiam, vt mox iustè Dauo succenseat Pamphilus. Sed sub generali œconomia tales œconomîæ, tanquam οἰκονομίματα quædam, comprehenduntur. De illa autem intelligenda arbitror quæ scribit in principium scenæ primæ actus tertii Andriæ. *Simul in hac scena id agit poeta vt ad nuptias faciendas magis accendatur Simo.* Et quædam industria, quæ-

dam velut casu eueniunt: vt nunc suspicio senis. In multis enim œconomia comicorum poetarum ita se habet, vt casu putet spectator euenisse quod consilio scriptorum factum sit.

Verùm, siue œconomia tantùm siue proœconomie quoque appellatio tributa huic poetarum officio fuerit, amplam certè criticis exercendæ suæ censuræ materiam præbere potuit. Atque, vt ad meum Virgilium reuertar, scimus, libri noni principium reprehensum fuisse, quasi circa œconomiam in eo peccaretur. Enarrator enim, postquam dixit, singula hoc in libro esse mutata, quòd & aliæ personæ, & alia loca sint, & aliud negotium incipiatur: (ab Ænea enim transire ad Turnum, à Tuscia ad Ardeam, à petitione auxiliorum ad bellum) addit, *Quem transitum quidam culpant, nescientes Virgilium prudenter iunxisse superioribus negotiis sequentia, per illam particulam, Atque ea diuersa penitus dum parte geruntur. scilicet, dum offeruntur arma, dum dantur auxilia.* Quibus adiiicit, formatum esse istum librum ad illud Homeri vbi dicit per noctem egressos esse Diomedem & Vlysses, quum capto Dolone castra penetrauerunt, nam partem maximam & œconomia & negotiorum inde habere. Ac, ne dubitemus quin reprehensio illa ad œconomiam respiciat, idem in hunc libri primi locum,

Et iam finis erat, quum Iuppiter aethere summo

Despiciens mare veliuolum, terrasque iacentes,

postquam pulchram hinc esse proœconomiam annotauit: & contra vituperabile futurum fuisse si ex abrupto transitum faceret: subiungit, *quod in nono fecit, Atque ea diuersa p. dum p. geruntur.* Quam rem tamen ibi quoque scribit excusari: sed mendosa esse verba, quæ illam excusationem continent, videntur.

Tum verò potissimum quum ab Homericæ œcono-

mia recessit, reprehensesores minimè defuisse credibile est. Id autem cum alibi fecit, tum *Æneid. xii*, ipso etiam Seruio teste. in hunc enim vltimi illius libri *Æneidos* versum, qui de Tolumnio augure scriptus est,

Dixit, & aduersos telum contorsit in hostes,

Procurrens : ab Homeri œconomia hoc loco recessisse admonet. Illum enim inducere Mineruam persuadentem Pandaro vt iacto in Menelaum telo fœdera dissipet : at Virgilium dicere, ipsum augurem telum sponte torsisse, & occidisse vnum de nouem fratribus. Hoc autem pertinere ad œconomiam. quoniam necesse erat vt fratres ex vnus morte commoti bellum mouerent. Si enim vilis quispiam interisset, potuisse fortassis eius mortem ob fœderis religionem contemni.

Quòd si Virgilius alicubi vltro ab Homeri œconomia discessit, quàm credibile est quod Macrobius, criticum agens, de eo scribit, laborasse ad rei nouæ partum, vbi rerum necessitas ab eo exegit dispositionem inchoandi belli quam Homerus non habuerit? Nec verò laborasse tantum dicit, sed hunc laborem parum felicè sibi videri ostendit. Ceruum enim fortuito saucium fecisse causam tumultus. Sed quum hoc vidisset leue, nimisque puerile, dolorem auxisse agrestium, vt impetus eorum sufficeret ad bellum. Sed nec seruos Latini, & maximè stabulo regio curantes (ita enim ibi more antiquo loquutus est) atque ideo quid fœderis à Latino cum Troianis ictum esset, ex muneribus equorum & currus iugalis, scientes, bellum generi deorum oportuisse inferre. *Quid igitur?* (inquit) *dearum maxima deducitur è cælo, & maxima furiarum de Tartaris asciscitur. Sparguntur angues velut in scena parturientes furorem.* *Re-*
N. ii.

gina non solum de penetralibus reuerentiæ matronalis educitur, sed & per urbem mediam cogitur facere discursus. Nec hoc contenta, sylvas petit, accitis reliquis matribus in societatem furoris. Bacchatur chorus quondam pudicus, & orgia insana celebrantur. Atque hunc locum verbis istis concludit, *Quid plura? maluisssem Maronem & in hac parte apud autorem suum, vel apud quemlibet Græcorum alium, quod sequeretur habuisse.* Hæc ille: ad quæ respondebo vbi de iis agam qui decorum non rite ab hoc poeta vbiq; seruatum esse dixerunt.

Vt autem de ataxia interim aliquid dicam, primum quidem eutaxiam, quæ ei contraria est (id est bonum ordinem) sub œconomix appellatione, si latè hæc accipiat, comprehendere posse non nego: sed tamen ab œconomia separari etiam posse dico, quatenus considerabimus posse in figmentis talem esse œkonomiã, vt illa inter se non discrepent quidem, sed non tamen aptis sint locis disposita. Qui enim faciet quod scribit Horatius,

Atque ita mentitur, sic veris falsa remiscet,

Primo ne medium, medio ne discrepet imum,

œconomix certè leges, at non protinus & eutaxiæ seruauerit. At cui curæ simul fuerit ille eiusdem poetæ lucidus ordo, & ad huius normam sua œconomica (vt ita loquar) figmenta disposuerit, vtriusque leges seruasse dici poterit. Exiguam autem vel nullam reprehensionis materiam hac in parte criticis reliquisse videri potest Virgilius, si verum est quod vetera in Horatiū scholia tradunt, in hunc eius locum,

Ordinis hæc virtus erit, & venus (aut ego fallor)

Vt iam nunc dicat iam nunc debentia dici:

Pleraque differat, & præsens in tempus omittat.

inquam) verum est quod illa hunc in locum scribunt, Virgilium ordinem his præceptis consentaneum servasse. Ostendit (inquiunt) quo ordine componendus sit sensus (quod vocabulum apud me suspitione non caret) videlicet, ut ex iis quæ primò dicenda sunt, quædam dicat, quædam differat pro præsentibus, ut ea postea per repetitionem commemoret: ut Virgilius primùm describit qualiter Æneas ad Didonem venit, & prætermittit suos casus, & excidium Troiæ: quæ tamen postea satis declarat. Et rursus in hæc verba, Pleraque differat, scribunt, ita Virgilium in nono libro, quum in Italia iam esset Æneas, narrare quomodo fabricatæ fuerint naues, quibus ex Illo nauigauit: quum in tertio id tacuisset.

Sed quum & alia multa ad eutaxiæ observationem requirantur, & variè de nonnullis quæ quis ad eam pertinere existimabit, possit iudicari, ne hac quidè in parte criticos suam reprehensoriam linguam à Virgilii carminibus abstinuisse crediderim. Argumento est autem quòd ipsum Æneidos limen carpere quosdam non puerit, tanquam ordinem præposterum habens. priore enim loco arma, posteriore virum poni: sed de viro tamen prius quàm de armis dici. Quasi verò hæc coniuncta non essent, & perinde non esset ac si dixisset, se canere arma viri illius qui primus ab oris Tr. &c.

At verò inconcinnitatem & incohærentiam in suis fictionibus siue figmētis (vna enim fictio plura figmēta potest includere) non habet illud poema de quo Horatianū illud meritò dicitur, *sibi convenientia fingere*; nec non illud, *primo medium, medio imum non discrepare*. Quinetiam eius autorem semper ante oculos istud habuisse præceptum, quamuis aliud poematis genus scriberet,

lent: vt intelligeremus, Qui referret ore te tantum virum. Sed non dubium est quin explodenda eorum sit sententia. Iis quidem certè potius subscriberem qui tamen legebant. De qua lectione melius quàm de superiore iudicasse Pierius videtur. scribit enim, orationem affectus & amoris plenam fore, vt dicat, se, tamen si summopere concupiscat filium ex Ænea suscipere: nolle tamen, nisi patri futurus sit similis suo. Totaque in eo est vt ostendat, se regnum, opes, famam, omnia denique vni Æneæ posthabuisse: quo si potiri non liceat, eius imaginem saltem assiduè contemplari possit. Ac tandem ad illos quorum antè meminì reprehensores veniens, *Quas Verò (inquit) impudicitia voluptatisque notas interpretes huic inurunt, à Virgiliana sententia mihi videntur aliena.*

Sed poscere hic locus videtur vt ad Macrobiana illa quæ antea retuli, ad posteriorem saltem eorum partem, respondeam. Manifestum est enim, quum dicat, inter cætera, reginam Amatam de penetralibus reuerentiæ matronalis educi, iudicasse, minimè seruatum à Virgilio fuisse decorum. Hi sunt igitur Virgilii, de Amata versus,

His vbi nequicquam dictis experta Latinum

Contra stare videt: penitusque in viscera lapsam

Serpentis furiale malum, totamque pererrat:

Tum verò infelix, ingentibus excita monstis,

Immensam sine more furit lymphata per urbem.

Quid? quum cam bacchari non dicat nisi hæc præfatus, an de penetralibus matronalis pudoris educere illā dicendus est, ac non potius describere quomodo viperea illa monstra cam inde exturbauerint? Fateor enim, quamuis multa iam narrasset quæ nos ad exitum hunc expectandum

expectandum præparare poterant (inter quæ præcipuū fortasse illud est, *Vipeream inspirans animam*: præsertim si animam non de anhelitu dici sed vulgarem vsum habere velimus, & animam hanc in illam immigrasse, humana expulsa, intelligamus) tamen si verbis istis, *His ubi nequicquam dictis experta Latinum Contra stare videt*, subiunxisset, illam bacchari, non interiectis illis, *penitusque in visc. laps. Serp. f. malum*, & cæteris: aliquam fortasse sui reprehendendi materiam nobis dedisse videri posset. Quomodo enim verisimile fuisset, modestam & omnibus modis honestam matronam, atque adeo generositate quæ maiestate regia digna esset, præditam, ad bacchationem prorupisse? Ne igitur hac de re fidem ipsi denegemus, ad illud audiendum simul & credendū præparat, iis quæ velut præfatur. Quid dico, ad illud audiendum simul & credendum? addo etiam, commiserandum pariter & excusandum. Nam licet magna sint quæ dicit, illud furiale serpentis malum in viscera penetrasse, tandèmq; per totum eius corpus sparsum esse, postmodo illam ingentibus monstris accensam & stimulatam, talia fecisse: tamen his etiam maiora cogitanda nobis relinquit: ac fortasse non tam reginam illam quàm monstrum aliquod eius præferens faciem nos vult imaginari. Simul verò, quanta sit diuina aduersus mortales potentia, & quàm sit illam infensam habere periculosum, ostendit. Tantum abest denique vt de Virgilio, tanquam decorum in huius reginæ persona non seruante, conqueri debuerit, vt contrà magnam illius hac de re curam & sollicitudinem laudare debuerit: quæ fecit vt primo furialis illius mali impetui resistentem illam introduxerit. Scribit enim,

Ac dum primalues vdo sublapsa veneno

*Pertentat sensus, atque ossibus implicat ignem,
Nec dum animus toto percepit pectore flammam:
Mollius & solito matrum de more loquuta est.*

Quinetiam in sequentibus hæc ab illo dicuntur, tanquam auditoris aut lectoris obiectioni, quæ Macrobianæ similis esset, iterum occurrere volente,

*Talem inter Sylvas, inter deserta ferarum,
Reginam Alecto stimulis agit undique Bacchi.*

Iam verò, si huius in reginæ persona decorum non seruasse dici posset Virgilius, hanc ob bacchationem: certè & circa Didonem eodem peccasse modo dicendus esset. Non enim contentus de illa scripsisse,

*Vritur infelix Dido, totâque vagatur
Urbe furens, qualis coniecta cerua sagitta,
Quam procul incautam nemora inter Cressia fixit
Pastor agens telis:*

non ita magno post interuallo scribit & hæc de eadem, quum Fama illi iam furenti retulisset, classem armari, & nauigationem parari,

*Sauit inops animi, totâque incensa per urbem
Bacchatur: qualis commotis excita sacris
Thyas, ubi audito stimulant trieterica Baccho
Orgia, nocturnusque vocat clamore Citharon.*

Illius denique furorem eodem in libro tantum esse dicit ut eum cum Penthei & cum Orestis furore compareret. Postquam enim dixit,

— agit ipse furentem

*In somnis ferus Æneas: sempérque relinqui
Sola sibi, semper longam incommitata videtur
Ire viam, & Tyrios deserta quarere terra:*

ad illas comparationes veniens, addit,

Eumenidum veluti demens videt agmina Pentheus,

Et solem geminum, & duplices se ostendere Thebas:

Aut Agamemnonius scenis agitatus Orestes,

Armatam facibus matrem & serpentibus atris

Quum fugit, ultricésque sedent in limine Diræ.

An igitur & de Didone male mereri hunc poetam dicemus, & ab eius pudore, honestate atque adeo maiestate, abhorrétia scribere? Nequaquam: sed Didonem primum quidem omnino ab illa quæ fuerat mutatam, deinde verò & furore correptam imaginabimur: sub hoc autem furore velut descriptam breuiter amoris vim nobis repræsentabimus, & eam quoque meritò, vim maiorem appellabimus. Alioqui certè & de duobus illis, Pêtheo & Oreste, multo etiam magis de Aiace, male meriti essent poetæ qui eorum furorem (quamuis aliunde ortum) descripserunt.

Quid? annon & de ipsa Iunone male meritis dici posset noster hic poeta, quòd eam à prudentia non tantum diuina, sed humana quoque, multo etiam magis à diuina maiestate sua aliena loquentem faciat? & quidè eodem loco vbi Alectûs auxilium implorat, à qua mox ipsam Amatam in tantum agi furorem videmus. Nam Iuno simulatque sermonè suum finiuit, Alecto luctificam ab infernis tenebris ciet. In illo autem sermone audimus eam illi etiam rei, quam tamen ad exitum tandem perducere necesse fateatur esse, obstacula quarentem: audimus, tanquam de suo gradu seipsam deiicere non dubitet, ad preces se indignas, vt auxilium impetret, confugientem. Sed nequaquam tamen hîc vllam Iunoni iniuriâ facere poetam nostrum dicemus, verum, eius etiam exemplo, quomodo ira in furorem erumpēs transuersos nos rapiat, nostrique obliuisci nos cogat, ostendere.

Ad Amatam autem simulque ad Macrobiū ut regrediar, tum demum ei à poeta iniuriā fieri dicere Macrobius potuisset, quum à generali bacchantium descriptione ad specialem descendere eum vidisset: quoniam fœda multa in memoriā nobis reuocare necesse habuisset, quæ bacchatione illa comprehendī constat. Nyctelia quidem certè Bacchi orgia non ob aliud quàm ob turpitudinem Romanos admittere noluisse legimus.

Q V O D si alibi vsquam, in comparationibus certè decori à poetis ratio habenda est. Nam ut hæ præcipuū poeseos sunt ornamentum, ita etiam præcipua earum cura esse illis debet: id est, eorum quæ circa eas debent obseruari. Plerumque enim non absque difficultate ornatus ille poemati adsciscitur: adeo ut hîc quoq; dicere possimus ἀληθείην Græcorum prouerbium, χαλεπὰ (siue δυσχερῆ) τὰ καλὰ. Multa nanque circa comparationem peccari possunt: sed est nihilominus & quod illi deesse cum venia possit. Excusantur enim quæ alicubi claudicant comparationes (ut vulgo loquimur) id est, non vsquequaque congruunt, & rei ad quam referuntur non omni ex parte respondent. quòd necesse non existimetur (ut à Græcis etiam dictum fuit) ὅλας διόλου συμβιβάζειν οὐκ οὐκ τοῖς ὑποκειμένοις πράγμασι, siue ὅλας διόλου αὐτοῖς κολλᾶται. Verum ubi aduersus decori leges peccatur, haud scio an veniæ locus esse possit. Quædam tamē non hoc sed illo nomine apud nostrum illū poetam reprehenduntur, quas falsò reprehēdi puto: quædā hoc nomine non culpantur, quas culpa non carere puto. Ex iis igitur quæ eam ob causā improbātur, est ista libri primi

*Qualis in Eurota ripis aut peringa Cynthi
Exercet Diana ibores: quam mille sequuta*

Hinc atque hinc glomerantur Oreades: illa pharetram.

Fert humero, gradiensque deas supereminet omnes.

Latona tacitum pertentant gaudia pectus.

Cui comparationi subiungitur hæc redditio,

Talis erat Dido, talem se lata ferebat

Per medios, instans operi, regnisque futuris.

Illam autem comparationem isti duo proximè præcedunt versus,

Regina ad templum forma pulcherrima Dido

Incessit, magna iuuenum stipante caterua.

Nam fuisse improbatam, ex ipso etiam Seruio discimus: qui hæc in verba, *stipante caterua*, annotat, *Ad hoc tantum sequens pertinet comparatio. quam vituperant multi, nescientes, exempla, vel parabolas vel comparationes assumptas* (sic enim apud eum scriptum est, in vulgatis editionibus: quum tamen, ita scribendo, distinguere comparationes videatur ab iis quæ à Græcis parabolæ fuerunt appellatæ) *non semper usquequaque congruere: sed interdum omni parte, interdum aliqua conuenire.* Vbi etiam suspecta librariorum fides esse possit. vt enim minimè necesse est, comparationes omni ex parte conuenire, ita etiam nequaquam satis est, ex aliqua tantum congruere, quæcunque illa sit: sed ea sit præcipua oportet, & ita vt cæteræ sint eius velut appendices. Sic certè in ea de qua nunc agitur, annotat ipsemet, verba hæc, *exerces Diana choros*, ad comparationem non pertinere, sed esse poeticæ descriptionis euagationem. Quod tamen non de his tantum verbis intelligendum est, sed de iis quoque cum quibus hæc coherent. Nam comparatio his etiam (vt opinor) includi verbis potuisset,

Qualis in Eurotæ ripis Diana pharetram

Fert humero, gradiensque deas supereminet omnes.

His autem comprehendere verbis quod præcipuum in ista comparatione est, apparet ex redditione, in qua dicitur, — *talem se lata ferebat Per medios*. Hæc enim illis respondent, gradiensque deas supereminet omnes. Si igitur ita scripsisset,

*Qualis in Eurota ripis aut per iuga Cynthi
Exercet Diana choros, succincta pharetra:*

Quam circa in magnum glomerantur Oreades orbem.
Si (inquam) ita scripsisset, *Qualis in Eur. rip. aut p. iuga C. Exer. D. choros, succincta pharetra* (vel accincta) *Quam circa in mag.glom. Or. orbem* : & his contentus, redditionem istam subiunxisset,

*Talis erat Dido, talem se lata ferebat
Per medios,*

verba ista, *talem se lata ferebat Per medios*, non inveniunt quò propriè referrentur, ideòque multo minus gratiæ haberent.

Atque ut apud Virgilium, sic & apud Homerum, quædam in comparatione videmus poni, quibus nihil respondet ἐν τῇ ἀποδοῖ. Sic enim Iliad. λ, ea parabole cuius est principium, — ὦσσι τε δαφνοῖσι γῶες ὄρεσφι Ἀμφ' ἑλάφῳ κεραὶν βεβληµένον, ὄντ' ἔβαλ' ἀνὴρ Ἴω σπὸ νευρῆς, ita clauditur, — γῶες μὲν τε διέτρεσαν, αὐτὰρ ὁ δάπτει, quum tamen absque his verbis, αὐτὰρ ὁ δάπτει, plena futura fuerit. Sic verò fuit observatum hoc in loco libri β, eiusdem poematis,

Ἡυτε ἔθρεα εἰσι μελισσῶν ἀδινάων,
Πέτρης ἐκ γλαφυρῆς αἰεὶ νέον ἐρχοµένων,
Βοτρυδὸν δὲ πέπνται ἔω' ἀνθεσιν εἰαυνοῖσιν·

Αἱ μὲν τ' ἐνθα ἄλγισ πεπνύσθαι, αἱ δὲ τε ἐνθα·

pro superuacaneo haberi posse quartum versum, quum nihil sit in redditione quod illi versui respondeat : sed nec addi potuerit quod illi responderet. Nam apes qui-

dem, ex vna eadēque egressæ petra, sparsim floribus inuolitant: at Græci contrà (quod etiam obseruandum est) è diuersis tentoriis & nauibus profecti, ad vnum eundēque locum, forum videlicet, tendebant. Possem tamen (meo quidem iudicio) vtcunque defendere Homerum, id est, contendere, verum illum non esse superuacaneum, si dicerem, eum in illo respexisse ad diuersa fori loca in quæ se recipiebant.

Sed nōne operæpretium fuerit in exemplum afferre ipsum etiam ipsius Homeri locum quem Virgilius hîc est imitatus, vel potius (ex parte saltem) interpretatus? Fuerit, mea quidem sentētia. Audi igitur, ex Od. libro ζ

Οἷν δ' Ἄρπευς εἴσι κατ' οὔρεος ἰοχέαιρα,
 Ἡ κατὰ Τηύγετον ὤμιμκετον, ἢ Ερύμανθον,
 Τερπομένη χάωρσι καὶ ὠκείης ἐλάφοισι,
 Τῇ δὲ ἅμα νύμφαι, κοῦραι Διὸς αἰγιόχοιο,
 Ἀχαιοὶ παῖδες. (γέγηθε δὲ τε φρένα Λητώ)
 Πασάων δ' ὑπὲρ ἥγε κέρη' ἔχει, ἠδὲ μέτωπα.
 Ρεῖα δ' ἀειγνώτη πέλεται χαλαρὰ δὲ τε πᾶσι.
 ὧς ἔγ' ἀμειπόλοισι μετέπρεπε παρ' ἑνὸς ἀδμῆς.

Confidera hîc, totam anaphoram vno versu comprehendî, quum in septem versus distenta sit comparatio. Sed non tamē cum qualibet parte congruit anaphora, siue antapodosis (sicut & redditionem vocauî) verum cum præcipua: illa videlicet, Πασάων δ' ὑπὲρ ἥγε κέρη' ἔχει, ἠδὲ μέτωπα. eodem modo quo apud Latinum poetam, hæc quæ sunt comparationis applicatio (si & ita loquî licet) *Talis erat Dido, talem se lata ferebat Per medios*, ad illam potissimum partem respicere manifestum est, *gradiē (que deas supereminet omnes)*. Cæterum, vt Virgilius multo breuior in sua comparatione esse poterat (quem admodum paulo antè ostendi) & his versibus esse con-

tentus, pauca quædam immutando,

*Qualis in Eurota ripis, aut per iuga Cynthi
Exercet Diana choros, succincta pharetra,
Quam circa in magnum glomerantur Oreades orbem:
Sed tamen una deas gradiens supereminet omnes:
Talis erat Dido, talem se leta ferebat*

Per medios:

ita certè Homero sufficere poterant isti, in quibus aliqua est, sed parua, mutatio,

Οἴη δ' Ἀρτεμις εἴσι κατ' οὐρεος ἰοχέουσα,
Τερπιδῶν καὶ Ὠρυσι καὶ Ὠκείης ἐλάφοισι,
Σὺν πολλαῖς νύμφασι. (γένηθε δὲ τε φρένα Λητώ)
Πασάων δ' ὕψος ἦγε κέρη ἔχει ἠδὲ μέτωπα·
Ὡς ἦγ' ἀμειπόλοισι μετέπρεπε παρθένος ἀδμῆς.

Sic autem octo ad quinque reducuntur. nam in locum horum omnium, τῇ δὲ ἅμα νύμφαι, κοῦραι Διὸς αἰγιόχοιο, Ἀρτέμιδος καὶ Ὠρυσι καὶ Ὠκείης ἐλάφοισι, substituo ista tantum, Σὺν πολλαῖς νύμφασι. Necesse est porro aliquam nymp harum mentionem præcedere, ut ista verba, Πασάων δ' ὕψος ἦγε κέρη ἔχει ἠδὲ μέτωπα, habeant quò referantur. Illum autem versum, Ρῆα δ' ἀειγνάτη πέλειται, καλὰ δὲ τε πᾶσι, sicut hîc omisit, ita etiam à Marone omitti videmus: qui tamen à præcedenti pendere existimari potest: perinde ac si dicere, illam ex eo quòd ita cæteris superemineat, facilè ab illis posse dignosci. Alioqui, si hoc hemistichium, & posterius, καλὰ δὲ τε πᾶσι, ad idem genus κέλους referretur, promptius erat Homero, dicere,

Ρῆα δ' ἀειγνάτη, εἰ καὶ καλὰ εἰσὶν ἅπαντα.

Cæterum animaduerte interim lector quantum gratiæ & venustatis decedat comparationibus, quum eo quo ostendi modo sunt contractæ, & suis illis velut auctari nudatæ. Hac enim in re τὸ κρίναι δυνάμιν obiter exercuit.

cuisse nequaquam te pœnitebit.

Verùm, vt hunc sermonem missum faciam (cuius occasionem præbuit ille Seruii locus, in quo aut inconsideratè loquutus est, aut librarius peccauit) & de reprehensoribus eius de qua agitur comparationis pergam verba facere: ex iis profectò quæ attuli verbis, colligere possumus, enarratorem illum existimasse, non alia de causa reprehensam fuisse hanc comparationem, quàm quòd non omni ex parte congrueret. At ego potius crediderim, ideo fuisse qui illam carperent, quòd etiam præter decorum adhibitam iudicarent. nihil enim iuuenum cateruam cum magna virginum, & quidem nympharum, turba, Dianam circumstantium, commune habere. Donatus autem, tanquam non satis reginam illà decere ille iuuenum comitatus videri posset, scribit, *Et quia regina, id est procuratrix negotij publici, & quia ad templum accedebat, meretur excusationem, quòd publicè mulier iuuenis se viris admisceret. religio enim & necessitas impellebant.* Hæc quidem ille: sed aliud hoc tempore illo de loco non pronuntiabo, quàm istud: si propter non seruatum decorum notatus fuit, esse tamè quos iustius ea ipsa de causa simus reprehensuri.

Nam (vt ad eos quos dixi veniam) ego, qui alioqui Virgilio pro viribus aduersus plerosque criticos patrocinor, si criticus essem, mea censoria virgula tres comparationes tanquam decorum non seruantes, notarem. Earum vna est libro VII,

*Ceu quondam torto volitans sub verbere turbo,
Quem pueri magno in gyro vacua atria circum
Intenti ludo exercent: ille actus habena
Curuatis fertur spatii: stupet inscia turba,
Impubésque manus, mirata volubile buxum.*

Dant animos plagæ.

Utitur autem hac comparatione, de Amata (cuius facta modò fuit mentio) loquens, quæ bacchantium more vagari incipiebat. Ideoque verbis illis hæc annectit,

— *non cursu segnior illo*

Per medias urbes agitur populósque feroces.

Quinetiam præcedunt comparationem illam duo isti versus, de eadem,

Tum verò infelix ingentibus excita monstribus

Immensam sine more furit lymphata per urbem.

Meo enim iudicio (siquis tamen ei locus esse hîc potest) in re tanta tamque miserabili comparatio à re ludicra petenda non erat: quod nomen ludo etiam (præsertimque puerili) dare, cum omnium, ut spero, lectorum venia mihi licebit.

Sed erunt fortasse qui Virgilium à me reprehendi non posse existimabunt, quin eadem opera Tibullum carpam, utpote eadem omnino comparatione usum. Sed fallentur illi. *πᾶν γὰρ τοῦ αἰῶνος*, tam probo illam apud Tibullum, quàm apud Maronem improbo. Nam Tibullus curis amatoris eam accommodat, & duobus versibus complectitur. Suam enim elegiam ab hisce duobus exorsus,

Asper eram, & bene dissidium me ferre loquebar:

At mihi nunc longè gloria fortis abest:

subiungit istos,

Nanque agor ut per plana citus sola verberare turbo,

Quem celer assueta versat ab arte puer.

Altera comparatio est quæ celebrem formicarum mentionem facit, Æn. IIII. Postquam enim dixit,

Tum verò Teucri incumbunt, & litore celsas

Deducunt toto naues: natat vincta carina:

*Frondentésque ferunt remos, & robora sylvis
Infabricata, fuga studio.*

Migrantes cernas, totaque ex urbe ruentes:

hanc comparationem subtexit,

*Ac veluti ingentem formicæ farris aceruum
Quum populant, hyemis memores, tectoque reponunt,
It nigrum campis agmen, prædâque per herbas
Conuectant calle angusto. pars grandia trudent
Obnixæ frumenta humeris: pars agmina cogunt,
Castigantque moras: opere omnis semita feruet.*

Tertia, quæ ut apud illum præcedit (est enim primo in libro) ita præcedere hîc potuit, est ea quæ apud itidem sedulitatem & gnauitatem laudat. Vbi enim de Tyriis urbem ædificantibus hosce versus cecinit,

*Instant ardentes Tyrij, pars, ducere muros,
Molirique arcem, & manibus subuoluere saxa:
Pars, aptare locum tecto, & concludere sulco.
Iura magistratûsque legunt, sanctumque senatum.*

*Hîc portus alij effodiunt, hîc alta theatris
Fundamenta locant alij: immanésque columnas
Rupibus excidunt, scenis decora alta futuris.*

hos de apibus per comparationem illis annectit: quorum postremi tres leguntur & Georg. libro IIII,

*Qualis apes æstate noua per florea rura
Exercet sub sole labor, quum gentis adultos
Educunt fœtus, aut quum liquentia mella
Stipant, & dulci distendunt nectare cellas:
Aut onera accipiunt venientum, aut agmine facto
Ignaum fucos pecus à præsepibus arcent.
Feruēt opus, redolentque thymo fragrantia mella.*

Ego in vtraque comparatione naturam horum animalium, vel potius animalculorum, prouidam, indu-

stiriam, sedulam, gnauam, laboriosam optimè describi fateor, & sedulitatis ac laboriosæ (vt ita dicam) alacritatis ergo eas conuenire loco haud inficior: sed præter decorum tamen has quoque adhibitas censeo: quòd tam magnis tam parua componantur, vt eius vocabulo utar. Et verò, si excusatione sibi opus esse putauit quum parua magnis compararet (quod tamen reprehensioni minus est obnoxium) quanto magis, verba inuertendo, vtendum ea hîc fuerat? vt, sicut dixerat Georg. IIII,

Non aliter (si parua licet componere magnis)
ita hîc diceret,

Non aliter (si magna licet componere paruis)
Sed haud scio tamen an vel excusatio hæc adiecta tueri aduersus illos accusatores Maronem nostrum potuisset. Minus enim (vti dixi) reprehensioni est obnoxium, sicut & minus odiosum, parua magnis cõparare, quàm à magnis ad parua per comparisonem descendere. Audimus itaque magis patienter de apibus, *Magnanimosque duces, totiûsque ordine gentis Mores & studia & populos & prælia dicam*, & cætera huiusmodi, quorum te memini: quàm veris veri exercitus ducibus, aut quicunque sedulo & gnauiter prouinciæ alicui à se susceptæ incumbunt, ex comparatione cum apibus aliquam, nõ dicam magnanimitatis, sed vel sedulitatis & philoponiæ laudem inueniri, aut potius (quum dubium sit an laus ex ea possit crescere) quæri. Iam verò, si non perinde conceditur magna paruis vt parua magnis componere, quid quum à maximis ad minima descenditur? Ridiculum enim est quod à Seruio (tanquam obiectioni huiusmodi occurrere volente, vt opinor) affertur, comparisonem cum formicis (poterat autem & de comparatione cum apibus idem dicere) ad studium, non ad

personas, respicere. Nam quis hoc nescit? an putauit ille Virgilium in vilius tam amentis manus venturum ut cum talibus (id est talium virorum) personis personas talium animalculorum ab eo conferri existimaret? si tamen & his personas licet tribuere.

Obiiciet fortasse quispiam, & apes & formicas (& has quidem præcipuè) imitandas nobis non à poetis solum sed ab aliis etiam scriptoribus proponi. Hoc ego non inficior, quum adhuc memoriæ Horatiani saltem de formica versus hæreant: verum, ut hominibus illa proponere exempla licet, & eos emendandi ac modo non pudefaciendi causa, ad imitationem illorum animalculorum, id est, vigilantie, diligentie, sedulitatis eorum, remittere: ita homines vnde contra cæteri exempla talium rerum petere possunt, sic laudare ut cum illis animalculis comparare contenti simus, haud licere arbitror. Ac ne istud quidem pro hoc facere loco dici potest, quod magna hominum multitudo, *μὲν μὲν* aliquubi vocetur: (cui loquendi generi habet noster sermo quod respondeat) & Theocritus eodem modo *μὲν μὲν* dixerit. Neque enim de quauis, sed potius de cõferta vilium præsertim hominum turba hoc dicitur. Ut igitur locum hunc concludam, & liberè loqui pergam, tutius facturus fuisse mihi videtur Virgilius, si illam cum Cyclopibus comparisonem quã suis Georgicis inseruit, *Æneidi* suę reseruasset: nec suas apes, sed vel Tyrios, urbem ædificantes, vel *Æneæ* socios, magna & laboriosa alacritate, magno studio, magna cum sedulitate nauigationem suam accelerâtes, Cyclopibus illis comparasset. Sed quidni experiamur quàm bellè locis istis comparatio hæc aptaretur? Obstabat (dicer aliquis) ille versus,

Non aliter (si parua licet componere magnis)
 Immo verò ego, etiam quomodoi stud quidquid est
 obstaculi, remoueri possit, docebo. Sed prius illos Geor-
 gicorum versus audiamus. Postquam igitur varia na-
 turæ apum prouidæ, gnauæ, laboriosæ, nobis exempla
 proposuit, ac tandem dixit feruere opus, & fragrantia
 mella thymo redolere, ab apibus ad Cyclopes (tanquam
 à muscis ad elephantos) ascendit: hoc modo,

*Ac veluti lentis Cyclopes fulmina massis
 Quum properant, alii taurinis follibus auras
 Accipiunt redduntque: alii stridentia tingunt
 Æra lacu: gemit impositis incudibus Ætna:
 Illi inter sese magna vi brachia tollunt
 In numerum, versantque tenaci forcipe ferrum.*

Deinde ad redditionem comparationis, siue anaphorā,
 venit, illam quam dixi excusationem præfatus,

*Non aliter (si parua licet componere magnis)
 Cecropias innatus apes amor urget habendi,
 Munere quanque suo.*

Hinc (inquam) ad illum primi Æneidos locum apud
 quidem vel ipso Virgilio, si reuiuiscat, assentiente) trā-
 latum iri existimo Cyclopes vnà cum sua Ætna, qui-
 bus illic apes miserè terrentur. Quod si fiat, tunc totū
 locum ita oportebit *περὶ αὐτῶν*, vel potius *περὶ τῆς αὐτῶν*,

*Miratur molem Æneas, magalia quondam:
 Miratur portas, strepitumque & strata viarum.
 Ac veluti lentis Cyclopes fulmina massis
 Quum prop. alij taur. foll. auras
 Accip. redd. alij strid. tingunt
 Æra lacu: g. impos. incud. Ætna:
 Illi inter sese magna vi br. tollunt
 In num. vers. tenaci forcipe ferrum:*

*Haud secus arduos Tyrii, pars ducere muros,
Molirique arcem. &c.*

Vide quàm facilè huic loco, tanquam sibi debito, versus illi inferantur: nulla deinde alia mutatione facta, quàm illius hemistichij,

Instant arduos Tyrii;

in hoc,

Haud secus arduos Tyrii.

Nec verò minus aptè, sed aptius etiam fortasse, illa Æneæ exclamatio versibus iis qui de Tyriis scripti sunt, subiungetur, quàm subiungebatur illis qui de apibus scripti erant. hoc videlicet modo,

Non secus arduos Tyrii, pars ducere muros,

Molirique arcem, & manibus subuoluere saxa:

Pars, aptare locum tecto, & concludere sulco.

Iura magistratúsque legunt, sanctúmque senatum.

Híc portus alij effodiunt: híc alta theatris

Fundamenta locant alij: immanésque columnas

Rupibus excidunt, senis decora alta futuris.

O fortunati, quorum iam mœnia surgunt, Æneas ait.

Quòd si tamen quis illos Cyclopes, vnà cum Ætna, loco suo mouere velle, & in apum sedem intrudere, putet esse τὰ ἀλύντα χυεῖν: at certè, apes híc relinquens, non minus híc præfatiunculam, quæ simul excusatiuncula sit, adhibeat. id est (quemadmodum antea docui) sicut ibi dixit,

— si parua licet componere magnis,
ita híc dicat vicissim,

— si magna licet componere paruis.

Sed hæc verba non sine magna mutatione inferentur: inquires. Immo verò, cum vnus tantùm epitheti, & quidem Virgiliani, adiectione: hoc pacto,

Qualis apes (si parua licet componere magnis)

Hyblaas æstate noua per florea rura

Exercet sub sole labor.

Sed quid altero illo faciemus loco, vbi Troianorum sedulitas & ad laborem alacritas esse talis dicitur qualis est formicarum? an hunc in locum Cyclopes illos vnâ cum sua Ætna ἀναπράσους ποιεῖν. malemus? Nisi potius ἀναμολέειν dicere debui. ad eam enim rem μολοῖς opus est, & quidem plurimis. Hoc si faciemus, non dubium est quin Troianis gratificaturi simus. Nostrum igitur est videre ab vtris gratiam inire. malimus, à Tyriisne, an à Troianis, qui hîc Teuceri vocantur. Sed quum maior his fieri iniuria videatur, ob eorum cōparationem cum formicis, quàm illis: quippe qui non itidem cum formicis, sed cum apibus conferuntur: (quarum fortasse corpuscula tanto formicarum corpusculis maiora dici possunt, quanto pygmæorum minora quàm hominum sunt corpora) his potius opitulandum censeo. Quid quòd Accio etiam & Ennio rem gratam faciemus, quum hîc cōparationem Virgilianam alii itidem Virgilianæ, quasi Virgilium Virgilio, commutabimus. Nam quum Accius de Indis dixisset,

It nigrum campis agmen:—

Ennius eadem de elephantis verba vsurpans, itidē dixit,

It nigrum campis agmen.

At Virgilius, tanquam illis non per parodiam sed per ludibrium abuti volens, ab elephantis ad formicas transfert:

It nigrum campis agmen, prædâque per herbas

Conuectant calle angusto.

Quod quum ita sit, quâ commutatio illa fieri queat videamus. Paruo certè negotio fiet, si post versum illū,

Migrantes

Migrantes cernas, totâque ex vrbe ruentes:
scribamus hos versus,

Ac veluti lentis cyclopes fulmina massis
Quum properant, ad finem vsque comparationis: loco
illorum, Ac veluti ingentem formicæ farris aceruum Quum
populant, & sequentium, qui hinc pendent.

Hoc tamen si facere nolimus, eandem saltem quam
altero illo in loco præfari veniam oportebit. Sed quo-
modo aptam verbis illis *πρὸς τὴν* siue *πρὸς τὴν* dabimus?

Ita,

Migrantes cernas, totâque ex vrbe ruentes.

Haud aliter (si magna licet componere parvis)

Æstate ingentem formicæ farris aceruum

Quum populant, hyemis memores. &c.

In his mutationem vnicam, vnicam etiam adiectionē
(vltra illam hemistichij *πρὸς τὴν*) inuenies. Hæc autem
est vocis *æstate*: quæ eo magis conuenit, quòd velut an-
tithefin quâdam ad illud, *hyemis memores*, habere videri
potest.

H V I C ego sermoni, qui me iam per vnus pagellæ
spatium detinet, finem imponere cupiebam, quum
ecce mihi aliam remoram. id est, alium scrupulum, qui
me remoratur. Quum enim attentius hoc comparatio-
nis principium considerauissem,

Ac veluti ingentem formicæ farris aceruum

Quum populant,

animaduerti, esse eiusmodi vt lectorem alicuius reddi-
tionis expectatione suspensum teneret. Ac fecerūt certē
cū alii eiusdem poetæ loci vt mihi facilius istud per-
suaderē, tum ille ipse qui est Georg. quarto, vbi cyclopes
cum apibus (an potius, apes cum cyclopibus?) comparā-
tur. Ibi enim, quum simile sit cōparationis principiū,

Ac veluti lentis cyclopes fulmina massis

Quum properant,

habemus hanc antapodofin,

Non aliter (si parua licet componere magnis)

Cecropias innatus apes amor urget habendi.

Atque hîc recordatus sum, mihi olim suspectum eadē de re locum fuisse: simulque in memoriam mihi rediit quæ tum temporis (quum essem audacior) ad explendum illum, non vt redditionis Virgilianæ verba, sed vt sententiam tantum diuinare conans, fingere ausus erā. Primus igitur hic conatus fuit,

Non aliter, Teucris studiis concordibus ardent

Accelerare fugam.

Secundus conatus fuit hic,

Non aliter, Teucris studium simul omnibus vnum,

Approperare fugam

Tertius autem, iste,

Non aliter, Teucris labor omnibus vnus & vna

Festinare fugam cura est.

Quartus, hic,

Non aliter, Teucris opus vnum est, vna cupido,

Accelerare fugam.

Quintus, iste,

Non aliter, Teucris labor omnis & omnibus acer,

Approperare fugam.

Sed (malum) vt multos versus imperfectos ipsemet Virgilius reliquit, ita & mihi (vt ἐν τοῖς ἀτελείαις quàm ἐν τοῖς εὐτελείαις facilius est τὰ ὅμοια ἐκείνῳ πᾶσι χεῖν) imperfectū relinquere posteriorem contigit. Siue autem Virgilii mentem coniectura sum assequutus, siue ea alia fuit, hoc certè mihi nemo eripiet, aut illum non inchoasse suam comparisonem ab his verbis, *Ac veluti*, aut il-

li redditionem aliquam vel adiecisse, vel adiicere in animo habuisse. Cæterum, quoniam fugæ mentio apud ipsum poetam præcessit, siquem repetitio huius nominis offendit (quâvis id longiusculo intervallo præcesserit) ei *fugam in viam* mutare per me licet. Scio autem idem mihi timendum esse & de duobus versibus, in quorum vno *studiis*, in altero *studium* vsurpavi: sed quamvis vnius tantum vocis repetitio facilius veniam impetrare possit quàm duarum (quæ alioqui exemplis nec ipsa caret) tamen & optio vnius è cæteris tribus versibus illi à me datur.

Sed ecce, dum hæc scribo, & posteriorem illius redditionis versum à me relinqui imperfectum queror, venit in mentem quomodo integrum dare possim. Verum & prioris verba muto: hoc modo,

Haud secus omni instant operi Troiana iuventus,

Vt cursum accelerent, & diuûm iussa facestant.

Habes autem in hoc posteriore *et dicitur*: quod tibi in lectione Virgilii versato nouum esse non debebit.

A T redditioni tantopere illaborandum non erat, (dicit quispiam) quum ea carere locus hic posset. Immo verò istud mihi persuadere nullo modo queam, quum voces illas *Ac veluti*, vel *Ac velut*, orationem suspendere, nemo mihi (vt opinor) sit inficiaturus. Sic certè non in eo tantum quem ex quarto Georgicorum deprompsi loco, sed alibi etiam suam illas habere antapodosis videmus. Nec verò longè abeundum est, vt exemplum inueniamus. nam ille ipse Æneidos quartus liber, cui talis redditio post voces illas deest, aliû paulo post exhibet locum in quo eadem illæ eam habent. Hi enim ibi versus leguntur,

Ac veluti annosam valido quum robore quercum

*Alpini boreæ nunc hinc nunc flatibus illinc
 Eruere inter se certant : it stridor, & altè
 Consternunt terram concusso stipite frondes:
 Ipsa hæret scopulis, & quantum vertice ad auras
 Ætherias, tantum radice in tartara tendit:
 Haud secus, assiduus hinc atque hinc vocibus heros
 Tunditur, & magno persentit pectore curas:
 Mens immota manet, lacrymæ voluuntur inanes.*

• Quid? an, si nullam hîc redditionem haberemus, locû
 ea posse carere, ac non pendere sententiam diceremus?
 Atqui, si antapodosis sequutura non fuisset, cur non
 potius, particula *Ac* omiſſa,

Annoſam veluti valido quum robore quercum
 dixisset? Obseruandum est porro in illa redditione (cur
 enim de hoc obiter non admoneam?) tertium hûc eius
 versum, *Mens immota manet, lacrymæ voluuntur inanes,*
 respondere iis quæ de quercu dixit, ipsam hærerẽ sco-
 pulis, & tantum radice in tartara tendere, quantum
 vertice ad auras: quamuis concusso stipite altè conster-
 nant terram frondes.

Sed vel vnus huius poematis liber, qui vltimus est,
 satis sufficere taliû exemplorum potest. Ibi enim habes

*Ac velut Edoni boreæ quum spiritus alto
 Insonat Ægeo, sequiturque ad litora fluctus,
 Qua venti incubuere, fugam dant nubila cælo:
 Sic Turno, quacunque viam secat. &c.*

Hoc item, adhibita redditioni eadem particula, sed ita
 vt sit traiecta,

*Ac veluti, montis saxum de vertice præceps
 Quum ruit, auulsam vento. &c.*

nam hæc non longo sequuntur interuallo,

— disiecta per agmina Turnus

Sic urbis ruit ad muros. &c.

Hoc quoque,

*Ac velut ingenti Sila, summôve Taburno
Quum duo conuersis inimica in praelia tauri
Frontibus incurrunt. &c.*

hîc enim itidem ista vides ἀνταποδότης,

Haud aliter Tros Æneas & Daunius heros

Concurrunt clypeis : ingens fragor æthera complet.

Eodem libro denique, duabus comparationibus eodē pertinentibus, (quarum vna alteri subiuncta est) & principium ab iisdem verbis habentibus, vides vnicam redditionem dari. Postquam enim dixit,

Ac velut immissi diuersis partibus ignes

Arentem in syluam & virgulta sonantia lauro,

Aut ubi decursu rapido de montibus altis

Dant sonitum spumosi amnes, & in æquora currunt

Quisque suum populatus iter:

addit,

— non segnius ambo

Æneas Turnusque ruunt per praelia: nunc nunc

Fluctuat ira intus. &c.

At enim superuacaneum videri posset, tot exemplorum autoritate niti (quum aliunde etiam satis notum sit, vocem istam Velut, seu Veluti, voculæ Ac, quæ inchoatiua est, iunctam, orationem suspensam, vti dixi, tenere) si vnica illa comparatio cui suam antapodosin dedi, an antapodotos inueniretur: sed vnus saltem recordor loci qui etiam obiici mihi potest. Is est libro secundo;

Ac veluti, summis antiquam in montibus ornum

Quum ferro accisam crebrisque bipennibus instant

Eruere agricolæ certatim: illa usque minatur,

Q. iii.

*Et tremefacta comam concusso vertice nutat:
Vulneribus donec paulatim euicta, supremum
Congemuit, traxitque iugis auulsa ruinam.*

Neque enim quod proximè sequitur, redditionē habet:
quum Æneas, suam narrationem prosequens, dicat,

*Descendo, ac ducente deo, flammam inter & hostes
Expeditior. dant tela locum, flammæque recedunt.*

At hoc mihi eripiet nemo, vel redditionem isti quoque loco deesse, vel eo quo paulo post dicam modo mutandum primum versum esse. Vero quidem certè ab simile non est, Virgilium, sicut versus quosdam qui integri non erant reliquit, morte præuentus, ita etiam quosdam locos imperfectos reliquisse. Siquis me tamen roget ut huic quoque antapodosin comminiscar, sicut alteri sum commentus, Virgilianis hisce respondebo verbis, *Non opis est nostra. nec non istis, Non omni possumus omnes.*

Sed quid si aliud utrique horum locorum auxilium inueniam? nonne & ita tuo, lector, desiderio satisfecerit. Ipse saltem me illi satisfecisse existimabo. Tu igitur me autore facito ut particulam ac expungas, & ordinem verborum mutato, primum illum versum ita legas,

Antiquam veluti summis in montibus ornum.

Tunc autem post præcedentem versum *πλεῖστα* stigmata ponenda non erit: quoniam comparatio illa præcedentibus erit annexa. hoc modo,

Tum verò omne mihi visum considerare in ignes

Ilium, & ex imo verti Neptunia Troia:

Antiquam veluti summis in montibus ornum

Quum ferro accisam crebrisque bipennibus instant

Eruere agricola certatim. &c.

Nec verò plus negotii altero in loco fuerit. nam parum

& in eo facienda erit mutatio : hoc pacto,

Migrantes cernas, totâque ex Urbe ruentes:

Ingentem veluti formica farris aceruum

Quum populant.&c.

Atque hoc quum faciemus, alios eiusdem locos imitabimur, ubi cōparationi vocabulum illud adhibetur, nō præcedente particula *ac* : & quum præcedentibus annexa sit comparatio, eius redditionem nequaquam expectare debemus. Ex illis autem locis est hic, libro quarto, de Didone,

— *semperque relinqui*

Sola sibi, semper longam incomitata videtur

Ire viam, & Tyrios deserta querere terra:

Eumenidum veluti demens videt agmina

Pentheus,

Et solem geminum & duplices se ostendere Thebas.

Necnon iste, libro secundo,

Excutor somno, & summi fastigia tecti

Ascensu supero, atque arrectis auribus asto:

In segetem veluti quum flamma furentibus austris

Incidit, aut rapidus montano flumine torrens

Sternit agros, sternit sata lata boûmque labores,

Præcipitesque trahit sylvas : stupet inscius alto

Accipiens sonitum saxi de vertice pastor.

Nam vox veluti fertur ad verbum stupet: perinde ac si ita dictum esset,

Excutor somno, & summi fastigia tecti

Ascensu supero, atque arrectis auribus asto:

Vt stupet excelsæ saxi de vertice pastor

Ad flammæ sonitum, si fortè furentibus austris

Incidit in segetem.

Cæterum, quoniam aliqui sunt loci in quibus quum

codem quo hîc modo comparatio præcedentibus annecti, ideóque redditione carere posset, Virgilius tamen adiecit, postquam non *Veluti* sed *Ac veluti* dixit: crediderim, cum in iis de quibus dictum est locis, & aliis (siqui sunt similes) redditionem omisisse, quòd præuideret posse ita mutari à se primum versum ut ostendat, si fortè nihil redditioni aptum in mentem veniret.

S E D, ut ad illum tandem redeam sermonem de comparationibus in quibus decorum minimè seruatum fuit, vel potius, quæ præter decorum adhibitæ fuerunt non ignoro esse & alias quæ fortasse aliquid humilius aut, si nō ταπεινότερον, saltem μικροτερότερον, offerunt, quam nonnulli lectores expectent. Nec dubito quin futuri sint qui istud dici posse de hoc loco existiment.

Aeneid. VIII,

*Inde ubi prima quies medio iam noctis abactæ
Curriculo expulerat somnum: ceu fœmina, primæ
Cui tolerare colo vitam tenuique Minerva,
Impositum cinerem & sopitos suscitât ignes:
Noctem addens operi: famulasque ad lumina longæ
Exercet penso, castum ut seruare cubile
Coniugis, & possit paruos educere natos:
Haud secus ignipotens, nec tempore segnior illo,
Mollibus è stratis opera ad fabrilia surgit.*

Nec dubium mihi est quin eodem in numero possint fieri aliqui hunc eiusdem locum, ex libro XII,

*Nigra velut magnas domini quum diuitis ades
Peruolat & pennis alta atria lustrat hirundo,
Tabula parua legens, nidisque loquacibus escas:
Et nunc porticibus vacuis, nunc humida circum
Stagna sonat: similis medios Iuturna per hostes
Fertur equus, rapidèque volans obit omnia curvis*

At ego aduersus huius pariter & illius comparationis reprehensores patrocinium pro Virgilio suscipere, nēdum eas velim reprehendere : sic tamen vt illius potius quàm huius reprehensores veniam mereri fatear . Sed quid si hanc comparationem , non tanquam aliquid nimis humile habentem carpat aliquis, verùm quòd in ea duo nimis diuersi volatus inter se conferantur ? Ego certè hyperboles tantam esse licentiam respondebo, vt hoc posse excusare videatur.

Denique non de aliis (quarum quidem recorder) comparationibus meam cēsuram experietur Virgilius, quàm de duabus illis de quibus disserui. Sed ecce, quum isti sermoni de comparationibus quas contra decorum adhibitas esse existimo, finem velim imponere, retinet me quidam metus, ne, si mea censura vexet Virgilium, Homerū autem nō attingat, hoc tanquā magis *αλέκτω* quàm *μυσκάω* facere videar. quare muscam aduersus Homericā non minus quàm aduersus apes & formicas Virgilianas criticum agam : id est, critici personam sustinebo: aut critici officium vsurpabo. Absit enim vt eum me esse putem qui de huius vel illius versibus criticè pronuntiare possim.

Ceterū eo libentius mea (qualiscunque est) censura Homeri muscam vexabit , quòd propemodum subeat vereri ne Homerica ad muscæ audaciam describendam audacia nostrum Maronem ad illas de quibus dictum est cōparationes audacem reddiderit. si tamē ita de iis loqui licet qui magna paruis composuerūt (quod descendere esse videtur) ac non potius audacia est in componendo magna paruis: quod ascensum quodammodo habet. Sed prodeat tandem prodeat Homerus cum sua musca, quidquid sit quod vel à me vel ab aliis

ea de comparatione iudicari debet. Audi igitur eius ex
libro Iliados ꝑ versus,

Ως φάτο. γήθησεν δὲ θεὰ γλαυκῶπις Ἀθήνη,
Ὅτι ῥά οἱ πᾶμωρῶτα θεῶν ἠρήσατο πάντων.
Ἐν δὲ εἶλε ὅμοιοι καὶ ἐν γούνασιν ἔθηκε·
Καὶ οἱ μῆνις θάρσος ἐπὶ στήθεσιν ἐνήκεν,
Ἦ τε καὶ ἐργολύη μάλα τῷ χροὸς ἀνδρομέοιο,
Ἰσχανάα δακέειν· λαρόν δέ οἱ αἶμ' ἀνθρώπου.
Τοίου μιν θάρσους πλήσεν φρένας ὁμιμελαίνας.

Quem locum ita ex tempore & in ipso typographica
officinæ strepitu sum interpretatus,

*Dixit : Et ad verba hæc exultans cæsia Pallas,
Atrides ipsam quod primam in vota vocasset,
Indidit illiúsque humeris genibúsque vigorem:
Atque illi intrepidam mentem in præcordia misit,
Est qualis muscæ, quæ nostro à corpore pulsa,
Acrior ad morsum est, dulcedine capta cruoris.
Tanta dea subiit mittente audacia pectus.*

Is autem qui adeo audax à Minerua est redditus ,
Menelaus : adeo audax, inquam , vt ne musca quidem
eo audacior dici posset. Quæ nescio quo vultu à te le-
gentur , à me quidem certe sine risu scribi nequeunt:
quo vel inuitus hanc comparationem excipio, & omnes
omnium criticorum obelos effugisse valde miror. At
muscæ, omnium animalium est audacissimum, καὶ
ἀναλογία. id est, si proportio spectetur. Esto: sed quæ
inter muscæ & militis fortissimi audaciam analogia
esse potest? Deinde, quis scit an, quod aliunde fugata,
statim redit, ex audacia hoc ac non ex obliuione pro-
ficiscatur? Neque enim absimile vero est, id ex eo potius
fieri quod adeo sit obliuiosa vt quum se fugatam non
meminerit, statim reuertatur. Quid si verò, credere, vel

tantillum memoria illi inesse, ineptire est?

Sed quocunque se res habeat modo, id quod muscæ tribuit ῥάπτος; Homerus, malè redditum fuit Vis, ab eo qui versus illos ita reddidit,

Atque illi muscæ vim intra præcordia misit,

Quæ quamvis de pelle viri sit sæpe repulsa,

Assultat morsura tamen.

Vim certè meritò dixisset, (quisquis ille est) si ab Homero βίη dictum fuisset : sed maiorem etiam sui reprehendēdi materiam Homerus nobis præbuisset. Verùm, quum ille interpretres vocem Latinam quæ Græcæ ῥάπτος respondet, suo aptare versui non posset, (ut opinor) ad illam confugit. Nec verò & mihi negotium exhibuisse inficior interpretationem illius nominis ῥάπτος : quum sonare audaciam constet, sed *audacia* tantùm ingrediatur commodè hoc versuum genus, non etiam cæteri casus : & tamen hoc vnum habeant vocabulum Latini quod omnino respōdeat. Nam esse quidem & quod fiduciam illi appellant, haud inficior, sed hîc significare quod postea dictum fuit ῥάπτος, extra controuersiam est. Ac etiam si illa quoque voce vti liceret, at nihilo commodius hos versus eam ingredi quàm alteram, satis notum est. Quòd si ad periphrasin quis veniat, vix de muscæ Audax pectus, vix etiam Audacem vel intrepidam mentem dicere audeat : quod à me tamen dictum fuit. At Eobanus Hessus quomodo in huius loci interpretatione se gessit? Aliter quàm quisquam suspicari posset. nulla enim ab eo muscæ fit mentio. Quod ego tamen nunc primum cognoui, quum scire perciperem quomodo hos versus interpretatus esset. Ita igitur ille,

Hu animo letata hilari fuit innuba Pallas,

Se primum ante alios, sua numina prima Vocari

*Mox genua atque humeros Menelai robore fulsit
Præcipuo, audacique animum virtute replevit,
Humani cohibens affectus corporis omnes
Parte bona, prudens inserta audacia, diuæ
Ingenio leni & placido.*

Hic certè nescias vtrum magis mirari oporteat: an quòd ita sui autoris muscam dedignatus sit vt nullam prorsus mentionem eius fecerit: an quòd ænigmatica quædam in eius locum substituerit. Sed ad ipsum Homerum redeo, cuius comparationē illam eo magis est cur miremur, quòd eum ipsum quem cum musca confert, quod ad audaciam attinet, cum leone in eodē libro, tum in præcedentibus, tum in sequentibus, compareret. Tribus enim in locis hoc facit: quorum vnus est hic,

Ως δ' ὅτε τις τε λέων ὀρεσίπροφος, ἀλλὰ πεποιθώς,
βοσκομένης ἀγέλης βοῶν ἀρπάσῃ ἥ τις ἀείσῃ,
τῆς δ' ἐξ αὐχέν' ἑαξελabὼν κραττοῖσιν ὀδῶσι,
πρωτοὶ ἔπειτα δὲ θ' ἅμα καὶ ἔγχεα πάντα λαφύσσει
δηρὸν ἀμφὶ δὲ τόνγε κύνας τ' ἄνδρες τε νομῆες
πολλὰ μάλ' ἰύζουσιν ὑπόπρεθεν, εἰ δ' ἐθέλουσιν
ἄντιον ἐλθέμεναι. μάλιστα γὰρ χλωρόν δέος αἰρεῖ.
Ως τῶν οὔπινι θυμὸς ἐνὶ στήθεσσι ντόλμα
ἄντιον ἐλθέμεναι. Μενελάου κυδαλίμοιο.

Vide quantam nobis ante oculos ponere voluerit Menelai audaciam, quum illum leoni compareret aduersus quem omnes sint inaudaces. Sed in gratiam lectorum non satis ἐλλυισθέντων, Eobani Hefsi interpretationem proferre non pigebit.

*Qualis ab aerio digressus vertice montis
In stabula alta leo furit, aut pascentia letis
In campis armenta bouum pro viribus audax*

*Inuadit: primúmque ingentis corpora tauri
Aggreditur, toto cum sanguine viscera pascens
Dilaniat, canibus latrantibus, vndique circum
Concursante manu pastorum: non tamen ausi
Aut conferre manum, aut propius consistere: verùm
Iam non audaces animos timor occupat ingens.
Sic nemo Menelae tibi Lyciùmve Phrygiùmve
Audebat conferre manum.*

Sed in posteriore parte omittit illa verba, Πολλὰ μάλ' ἰύζουσι, ἅπ' οὐδεν: quorum tamen pulchram vel ipse Virgilius ei suppeditabat in alia quadam comparatione. interpretationem: & quidem talem vt vel verbum verbo posset reddere. Canit enim libro x, de apro,

*Nec cuiquam irasci propius (ve accedere virtus:
Sed iaculis tutisque procul clamoribus instant.*

Hunc enim locum imitans, dicere hîc poterat,
*Sed propius canibus non est accedere virtus,
Non pastori ulli: tantùm clamoribus instant.*

Illud etiam quod de ipso leone dicitur, pro viribus audax, multi non ita accipient fortasse vt ipse accipi voluit: potiùsque ita scribendum (meo quidem iudicio) fuerat,

— aut pascencia letis

*Armenta in campis, tantis pro viribus audax,
Inuadit.*

Quid quòd in duobus eiusdem libri locis, iterum leoni illum, etiam in ferendis retro vestigiis, comparat? Canit enim,

Ἐβροταλιζόμενος, ὥς τε λῆς ἢ ὑγνέφος,
Οἱ ῥα κύες τε καὶ ἄνδρες ἀπὸ σταθμοῖο δῖανται.
Ἐλχοσι καὶ φωνῇ.

Et circa finem eiusdem libri,

— ἔδ' ἀπίσσει βολὴν ἀγὰρὸς Μενέλαος·
 Βῆ δ' ἰέναι, ὥς τις τε λείαν ἀπὸ μεσσύλοιο,
 Οἷετ' ἐπεὶ ἄρ' κε κάμῃσι κύναι τ' ἄνδρες τ' ἔρεζίζων,
 Οἷτε μιν οὐκ εἴωσι βοᾶν ἐκ πύαρ ἑλέσθαι,
 Πάννυχαι ἐργήσουντες. &c.

Hoc quoque addo, vix esse vllum totius poematis
 librum in quem plures & sua grauitate aut etiam ma-
 iestate digniores audaciæ comparationes congesse-
 rit. Nam vel hac quid sublimius fingi potest?

Οὐτ' οὐδ' πορδαίλιος πᾶσαν μέλιος, ἔτε λέοντος,
 Οὐτε σιὸς κέλευται ὀλοσφρονος, ἔτε μέγιστος
 Θυμὸς ἐνὶ στήθεσσι φέει. Δένει βλεμναίνῃ,
 Ὅσον Πάνθη. ἦες εὐμμελίας φρονέουσιν.

Quos versus idem ille interpres ita Latinos fecit,

nec pectore pardus.

*Tam ferus est, vis magnanimi non tanta leonis,
 Nec suis indomiti: quos & furor efferat, & vis
 Toruos esse facit: quantum se Euphorbus ab hoste
 Arte ferox iactat.*

Sed multum de sua vi amittit illa comparatio, ita enim
 interpretando, & non vtendo vna eadēque voce de
 tribus illis feris animalibus: sicut vnam apud Homerum
 communem illis habemus. Vt omittam, velut dissipari
 quod apud Homerum tanquam confertum est. Vidē-
 dum igitur annon, vt pressior erit sermo, sic etiam fir-
 tura sit res expressior, ita principium illud vertendo,

*Tanta leonihaud est, haud tanta ferocia pardo,
 Haud tanta est apro.*

*Vel ita, Haud animos adeo pardus vel leo vel feroces,
 Haud gerit hostem.*

Quidni verò & hīc audaciæ appellatione, adiecto e-

etiam epitheto, vtemur? Id autem hoc fieri modo poterit,

Haud adeo effrænis cuiquam est audacia pardo,

Haud tanta est apro, haud ulli est tanta leoni.

Scio me in meo Thesaurο Græcæ linguæ aliis etiam modis significantissimum hoc vocabulum μένος interpretatum esse: verum non omnes huic conuenire loco possunt.

Sed quorsum, in mentione illius cum musca comparationis, aliarum tot, quæ Homericæ itidem sunt, mentionem facio? Nimirum vt eadem opera Homerum cum Homero in vnus eiusdémque rei descriptione comparem, & multitudine comparationum eius, quæ vt μεγαλοδρεπείς, ita etiam sunt decentes, vnā, sicut μικροδρεπῆ, ita & indecentem, opprimam.

Euge, Homere, euge: vnico de musca versu longi sermonis pariter & risus materiam mihi præbuiisti. Hic autem risus non dubito quin hodie mihi cum aliis quamplurimis sit communis. Ad superiorum autem ætatum homines quod attinet, vnus certè eorum qui intermedio seculo vixerunt, Lucianus, magni etiam encomii muscæ materiam tuo illo ex versu arripuit. Eum enim tanquam oraculum quoddam nobis proponens, velut pro fundamento illius encomii substravit: & interim tamen te tacitè subsannans (vt dignam scilicet mercedē tibi auctori suo persolueret) illius audaciæ quam muscæ tribuis auspiciis ad scriptionem illam factus est audax. Simul verò tua tam asymmetros & tam à decoro abhorrens comparatio poetæ Latino, tui æmulo, licentiæ in hoc genere non tantæ quidem sed magnæ tamen exemplum præbuit. Ac mirum ni hæc verba in ioculari prouerbium abeant, HOMERICA

MVSCA AVDACIOR. Verùm Palladis aduersus te *μῆνιν* vereor, cuius beneficium ita extollere simul & eleuare volueris. Sed quis mihi *μυροόβλυ* dabit, vt ea tuam muscam à memoria mea procul abigam, minimeque ex ea elephantem etiam fecisse dicar?

EST poetis interdum sua quædam in scribendo lasciuiia, quæ decoro repugnat: ac præsertim si poematibus adhibetur quorum non serium modò sed graue etiam sit argumentum. Quamuis autem Naso hoc laborare vitio iudicandus sit potius quàm Maro, (quum Nasonis fuerit, ingenio suo indulgere malle quàm tēpere) non defuerunt tamē qui & Maronem hoc nomine alicubi reprehenderint: & eo vsque ventum est vt etiam mutata fuerit cuiusdam versus eius scriptura, qua corrigere sibi videbantur quam sibi fingeant lasciuiam. Nam quum scripsisset *Æncid.* 1111, de Didone,

Cui pharetra ex auro, crines nodantur in aurum,

Aurea purpuream subnectit fibula vestem:

illi, *Cui pharetra ex humero*, scribendum censuerunt. Atqui considerandum illis erat, lasciuiam non esse in describēdo ornatu quem habuisse illam verisimile esse & quem decuisse illam habere certum est: quum Dido (vt etiam Pierius obseruauit) pulcherrima tunc esse studuerit, vt *Æneæ* placeret: ideòque ornatissima & quammaxime diuite habitu processerit: quinetiam cuius muliebri hoc lasciuiæ poeticæ genus (si tamen in hîc quoque loquendum est) mirificè conueniat. Cuius verò dare huic loco veniam recusant, quum alii eius poetæ minus ea digno illam non denegent? Legimus enim libro septimo,

Aurea pectoribus demissa monilia pendunt:

Tecti auro, fuluum mandunt sub dentibus aurum.

Et in octauo,

*Aurea casaries illis, atque aurea vestis.
Virgatis lucent sagulis: tum lactea colla
Auro innectuntur.*

Quinetiam in vndecimo,

*Aureus ex humeris sonat arcus, & aurea vati
Cassida: tum croceam chlamydé mq; sinúsque crepantes
Carbaseos fuluo in nodum collegerat auro.*

Ideo autem Nasonianam esse habitam hanc figuram ait, quòd apud eum legamus,

*Aureus axis erat, temo aureus, aurea summa
Curuatura rota.*

& tamen Ovidium sequi volenti scribendum fore potius ex humero quàm ex auro, in eo de quo agitur Maronis loco: quoniam de Atalanta canit ille,

Crinis erat simplex, nodum collectus in unum.

Ex humero pendens resonabat eburnea laqueo

Telorum custos.

Sed valeant (inquit) cum suo tam acri iudicio tamque emundis naribus pulchelli isti critici: nos lectionem hanc, Cui pharetra ex auro, antiquorum penè omnium codicum testimonio corroboramus. Tandem verò Donati etiam & Probi autoritate lectionem hanc confirmat.

Iam verò & qui illos de Camilla versus, quorum initium est, *Illa vel intacta segetis per summa volaret Gramina*, tanquam à Maronis gravitate atque adeo maiestate alienos reprehenderunt, (vt docui pagina huius libri XLIII) necnon alio (lo quibus à me circa eundem locum dictum fuit) eadem de causa culpant, nonne decorum ab eo nequaquam seruari existimarunt?

Quinetiam ij qui versus illos in quibus virum foeminae, Aeneam Helenae, irascentem facit, ex eius poemata-

te detrahere ausi sunt, in hanc partem eum peccasse iudicarunt. Sed hac de re paulo post à me dicetur, vbi de iis qui illum repugnantia alicubi scripsisse dixerunt sermo erit.

Inuenti sunt denique & qui rationem decori eum alicubi habuisse negarint, in iis quæ personas loquentes introducit. Quem in errorem proclives posteriores eo poetas fuisse scimus, sed tamen ita vt & ipsi nimium præcipiti iudicio nonnunquam huius erroris damnati fuerint.

EX IIS autem qui Maronem alicubi non constare sibi dixerunt, Tuccam & Varum fuisse dicere possumus: si quidem verum est quod à Seruio scribitur, ideo detractos ab illis fuisse versus ex secundo libro (eorum autem duorum & viginti mentio à me facta fuit pag. XLVII & XLIX) quoniam in iis scribebatur, Helenam in domo Priami fuisse : quod contrarium erat ei quod in sexto traditur, in domo Deiphobi inuentam fuisse, postquam summa ex arce Græcos vocauerat. Sunt porro ij sexti libri versus, quorum principium

— nihil ô tibi amice relictum est:

Omnia Deiphobo soluisti & funeris umbris.

Sed me fata mea & scelus exitiale Læna

His misere malis.

Sed, vt antea, ita nunc quoq; hortator tibi sum vt super hac quæstione illam quæstionem Virgilianam conlutas. Eius enim autor primùm quidem ostendit, tantum abesse vt, illi vigintiduo versus è libro secundo tolli ab ipsis deberent, vt potius qui in sexto repugnare his videntur, expungendi essent: si quidem hos vel illos expungi necesse foret. Quum enim Virgilius nihilo magis sextum quàm secundum emendarit, potius, in sexto

quàm in secundo commissum fuisse errorem (siquis commissus fuit) debere nos suspicari, ex eo quòd cæteri poetæ ea minimè tradiderint quæ de Helena à Deiphobo in sexto dicuntur: contrà autem, quæ Æneas in secundo ait, cum iis quæ tradita sunt ab aliis, planè consentiant. Quinetiam addit, illos decem & octo versus posse ex sexto eximi, & fore ut oratio illis exemptis nihilominus cohæreat, nihilque prorsus deficiat aut desideretur. Sed tandem, neutros versus detrahendos fuisse, vel esse, ostendit: aitque concludi debere, Virgilium non esse sibi contrarium, sed Æneæ Deiphobum. personam enim cum persona, non ipsum poetam secum componi. Æneam autem ipsum hac in parte, verum, falsum contrà Deiphobum dicere. Talia tamen illum qualia sentiret, etiam loqui: ita ut constet à poeta ideo esse posita, quia quum introduceretur Deiphobus, personæ seruiendum fuit illius qui veritatem rei ignorans, talia non suspicari modò sed credere facile poterat (nisi fortè fallere illum ac mentiri potius velimus) non autem ideo ut pro veris illa nos accipiamus.

Et hæc quidem, aliæque, aduersus eos qui illorum locorum repugnantiam obiciunt. Quoniam autem aliâ quoque Seruius rationem affert ob quam detracti versus illi fuerint, quòd videlicet viro forti turpe sit irasci foeminæ (quæ reprehensio eum decori non seruati appetè accusat) illi ad hoc etiam quod respondeat suppedit: & ita quidem ut dicat, inter cætera, & probet, vel taxandum poetam non esse, si Æneam paulo etiam longius quàm fortis ac sapientis viri cogitata ratio postulasset, progressum induxit, & ferocem animo iuuenem, & pio dolore ac iustissima iracundia ad expetendas crudelissimi ac luctuosissimi patriæ excidii poenas excitatū

atque inflammatum: aut totum quartū librum esse delendum, in quo non iam iræ, sed cupiditatum eiusmodi quarum incontinentia multo sit turpior, intemperantiorem introducit.

S E D, ut de locis qui repugnantia accusantur, pergam differere, nonnullos temere accusatos esse constat, ab iis qui ignorarent quatenus poetæ contraria sibi ipsi dicere liceret. Legimus enim apud Platonem, libro De legibus quarto, in Atheniensis hospitis persona, Cliniā alloquentis, Παλαὸς μῦθος, ὃ νομοθέτα, ὑπὸ τῇ ἡμῶν αὐτῶν αἰεὶ λεγόμενός ἐστι, καὶ τοῖς ἄλλοις πᾶσι ξυνομιθεγμένος, ὅτι ποιητὴς, ὁπότεν ἐν τῷ περὶ τοῦ μούσης κατὰ τὴν πόλιν ἐμφῶν ὅτιν, οἷον δὲ χρυσὴ τις τὸ ὅτιον εἶναι τοῖς ἄλλοις καὶ τῇ τέχνῃ οὐσι, μιμήσεως, ἀναγκάζεται, εἰς αἰτίας δαίμονας ἀνθρώπους ποιεῖν Ἀπατερόνους, ἐν αὐτῇ λέγειν αὐτῷ πλάκας· οἷον δὲ οὐδ' εἰ ταῦτα οὐτ' εἰ θάπερ ἀληθὴ τῶν λεγομένων. Vbi μῦθον non pro fabula sed pro sermone accipiendum puto: veluti quum, ὅτι ἐμὸς οὗτος ὁ μῦθος, dicitur. Totum autem hūc locum sic interpreto, *Vetus est sermo, ὁ legislator, qui est nobis ipsis est in ore, et ab aliis omnibus est comprobatus, poetam, quum in musæ tripodē sedet, non esse mentis compotem, sed, tanquam fontem quendam, ut, quod superuenit, sine ullo obstaculo fluat permittere: ac, quum ars ipsius sit imitatio, cogi, dum homines contrariis affectibus præditos introducit, sæpenumero sibi met ipsi contraria dicere. Quod quum ita sit, non mirum est si Virgilius (ut sub eius nomine de aliis etiam dicam) modò tanquam Epicureus, modò velut Stoicus loqui credatur: neque est quòd cum propterea dissidere à seipso dicamus. Huc autem pertinet quod à Servio scribitur in hunc locum libri Æneidos decimi,*

*Stat sua cuique dies, breue et irreparabile tempus
Omnibus est ævis:*

poetas pro qualitate negotiorum sectis philosophorum
viti, nec se vnquam vni adstringere, nisi quorum hoc
propositum sit: vt fecit Lucretius, qui Epicureos tan-
tùm sequutus est. Quum autem inter sectas contrariæ
sint opiniones, hinc fieri vt in vno eodémque poeta cō-
traria nonnulla inueniantur, non ex ipsius vitio, sed ex
discordia sectarum. Atque hoc loci istius & alijs qui ei
contrarius est, exemplis cōfirmat. Nam quum in quar-
to de Didone dixisset,

Nam quia nec fato, merita nec morte peribat,

Sed misera ante diem

hoc in libro ista illis repugnantia loquitur,

Stat sua cuique dies.

Sed illic ex Epicureorum sententia (inquit) loquutus e-
rat, qui casibus omnia concedunt: hîc Stoicos sequitur,
qui fatorum statuta seruari dicunt.

HÆC quidem ille: sed cur excusandus hîc est Vir-
gilius, quum ne digna quidem sit talis accusatio quæ
audiatur? Ego quidem certè, quum alioqui fatear, obie-
ctioni eorum qui repugnantia aut saltem dissentanea
loqui poetam quempiam clamant, ita posse interdum
occurri, vt diuersis in locis diuersas philosophorū sen-
tentias sequutus esse dicatur: inter eos de quibus nunc
agitur, ne vllam quidem repugnantia vmbra velim
agnoscere. Eo autem libentius quæstionem hanc non
tractabo solùm, sed pertractabo, quòd ex iis quæ dicam
multæ super alijs multis eiusmodi locis quæstiones ea-
dem opera solui poterunt. Vt igitur omittam, à nullo
poeta & frequentiore & magis honorificam summæ
fati seu fatorum potestatis mentionem fieri potuisse,
ideoque non esse verisimile, vnum relinquere versum
voluisse qui alijs tam multis posset opponi, ne ipsa qui-

dem verba vllam repugnantiaē suspicionem, si attentè considerentur, dico afferre : aut, si repugnantia sit loquutus, idem Homero eadem in re contigisse. Sicut enim dixit de Didone, *quia fato non peribat*, ita Homerus aliquem ὑπὲρ μοῖραν ad orcum deuenire.

Nam quia nec fato, merita nec morte peribat, inquit. Quid porro aliud est, Non peribat fato, quàm, ὑπὲρ μοῖραν peribat? Sic autem Homerus Iliad. libro v, loquitur,

Μὴ γὰρ ὑπὲρ μοῖραν δδωκεν αἶδδς εἰσαφίκηαι.

Atqui canit alibi idem Virgilius,

*Stat sua cuique dies: breue & irreparabile tempus
Omnibus est æui.*

Itidem Homero obiicietur, ab illo cani eiusdem poematis libro ζ,

Μοῖραν δ' ἔτινα φημὶ πεφυγμένον ἔμμεναι ἀνδρῶν.

vbi etiam μοῖρας appellationem poni videmus (quum illic fati potentiam Virgilius describat, non posita tamē eius appellatione) ita vt illud ὑπὲρ μοῖραν contrarium illi quod hīc dicit, esse videatur. Quomodo enim aliquis ab eo dici potest ad orcum deuenire ὑπὲρ μοῖραν, id est præter fatum, si omnes ideo illuc deueniunt, quia nemini effugere μοῖραν datur? Ac tantum certè abest vt μοῖρα sit euitabilis, vt etiam μοῖραν ἀναπλήσει à poetis dicatur qui mortem obiit, vt Latine Fatum vel fata implere, vel fata ætatis suæ, aut fatales annos. Hīc respondendum, μοῖραν interdum ἀπὸ τῆς τύχης (id est, fatum à fortuna) distingui: & ad μοῖραν quidem quod attinet, seu τῆς μοῖρας θεσµόν, id est, fati legem, à nemine euitari posse mortem (atque hoc est quod poeticè dicitur, Omnes lege fati, seu fatali, teneri) sed fortunam & mortis tempus & mortis genus aliud quàm quod fatale erat, non;

nunquam hominibus dare. Ac genus quidem mortis aliud dat, quum quis morte non naturali sed violenta interit, & ea tamen eiusmodi vt fortuita vocari posse videatur. Aliud verò tempus mortis fortuna dare dici potest, quum alicui talem mortem antè immittit quàm fata eum mori permetterent, suum naturæ curriculum relinquendo. Atque hinc sunt illa, apud poetas præsertim, *Accersere fatum*, *Accelerare fatum*, vel *præuerrere*. Item, *Abrumpere fatum*. Seneca autem dixit etiam, *Abrumpere sua fata*, in Hercule OEtæo,

Natum relinques, fatâque abrumpes tua?

Vbi fatorum appellatione fatalia vitæ stamina intellexisse existimatur. Interdū etiam additur qui ablatiuus vocatur casus, declarans quo id modo aut quo instrumento fiat: veluti quum dicitur, *Accersere sibi fatum ferro*. Sic à L. Floro quoque dictum fuit, *Præcipere fata veneno*. Illis autem opponitur, *Fatum* seu potius *fata*, aut *Fatales annos implere* (quod Tibullo est *Fatales annos explere*) eodem modo quo Græci *μοῖραν ἀναπλήσαι* dicunt. Sed & cum adiectione ab Ouidio dictum fuit, *Fata etatis suæ implere*. Opponitur illis & *Fato cedere*, seu *concedere*. Item, *Fato fungi*: & *Ad fatum venire* seu *ad fatum suum*. Ac sicut *Fato cedere*, ita etiam *Natura cedere* dicitur. Sed quum illorum, *Accersere fatum*, *Accelerare fatum*, vel *præuerrere*, & reliquorum huiusmodi, ab Homericis poematibus, tāquam fonte, materia sumpta dici queat, libet, ad præcipuum illum locum, in quo ἰπὲρ μοῖραν legimus, accedere, & cum diligenter expendendum proponere. Is igitur extat Iliados libro 2, vbi Neptunus Æneam his compellat verbis,

Αἰεΐα, τίς σ' ὦδε θεῶν ἀπείοντα κελείει

Ἄπ' Ἀχιλλῆος πολεμίζειν ἡδὲ μάχουσαι,

S. iiii.



Ὅς σὺ ἄμα κρείσσων καὶ φίλτερος ἀθανάτοισιν.

• Ἀλλ' ἀναχωρῆσαι ὅτε κεν συμβλήσται αὐτοῖς,

Μὴ καὶ ὑπὲρ μοῖραν δόμον αἰῶδος εἰσαφίκηται.

Vbi Eobanus illum postremum versum ita reddidit,
—ne sorte maligna Prauenias magni tibi debita tempora
fati, Ante diem moriens. Sed totius loci interpretationē
ex eo dare tibi libet. Audi igitur.

—quis te deus, inquit,

Impulit, Ænea, quò congregdereris Achilli,

Tam valido ? cui sis bonitate & viribus impar,

Qui superis etiam te longè est charior ipsis.

Sed tibi magnanimus quoties occurret Achilles,

Ne steteris, fuge, cede viro: ne sorte maligna

Prauenias magni tibi debita tempora fati,

Ante diem moriens.

Qua tamen interpretatione cōtentus non ero, sed hanc
meam, vt breuiorem, ita etiam magis Homeri ver-
bis adstrictam, tibi adiiciam.

Quis deus, Ænea, malè sanum hortatur Achilli

Nunc conferre manum ? longè quum viribus ille

Te superet, quum cœlitibus sit charior ille?

Immo, si occurras, retro vestigia ferto,

Ne, præter fatum, Ditis nigra atria visas.

Quod autem hîc ὑπὲρ μοῖραν, alibi ὑπὲρ μόρον dixit, & qui-
dem in duobus contiguis versibus, illis verbis vtens.
Operæpretium autem fuerit & locum illum, ad ea quæ
dixi, intelligenda, considerare. Audimus igitur non
procul à principio libri primi Odysseæ dicentem hæc
cæteris diis Iouem,

Ὡ πόποι, οἷν δὴ καὶ θεοὺς ἔροτοὶ ἀπώανται.

Ἐξ ἡμέων γὰρ φασὶ καὶ ἐμῶν οἱ δὲ θεοὶ αἰπὴ

Σφῆσιν ἀπαθάλισιν ὑπὲρ μόρον ἄλλ' ἔχουσι.

Ὡς καὶ

Ὡς καὶ νῦν Αἴγιστος ὑπὲρ μύρον, Ἀτρεΐδαο
 Γῆμ' ἄλοχον μνηστῆρ', τὸν δ' ἔκτανε νοστήσῃτα·
 Εἰδὼς αἰσυνὴν ὀλεθρον· ἐπεὶ πρὸς οἱ εἴπομεν ἡμεῖς,
 Ἐρμείας πέμψαντες, εὐσκοπον, ἀργειφόντιν,
 Μῆτ' αὐτὸν κλείειν, μήτε μνᾶσθαι ἄκοιτιν.
 Ἐκ γὰρ Ορέστας τίσις ἔσεται Ἀτρεΐδαο,
 Ὅππότε' ἀν' ἡβήσῃ· ἰε καὶ ἥς ἰμείρεται αἴης.
 Ὡς ἔφαθ' Ἐρμείας, δμ' οὐ φρένας Αἴγιστοιο
 Πῆθ' ἀγαθὰ φρονέων· νῦν δ' ἀθρόα πάντ' ἀπέπεισι.

Quos versus ita reddidit Simon Lemnius,
 O di, quàm seuè mortales numina primùm
 Incusant, causásque sibi fontémque malorum
 E nobis pendere putant, atque aspera rerum,
 Quæ veniunt : sua quum pereant ob facta scelesti,
 Ac præter fatum cumulent sibi corde dolores,
 Atque infanda sua malefacta libidine tentent.
 Testis & Ægisthus, qui præter fata maritam
 Atridæ duxit magno cum crimine sponsam,
 Aduectóque viro traiecit corpora ferro,
 Haud fati ignarus, pœnæque ob facta necémque.
 Nanque Atlantiaden cœli demissimus arce
 Mercurium, letho qui quondam strauerat Argum,
 Vt cadem Ægisthus fugiat, prædicere iussum:
 Né veneci mittat regem, neu ducere sponsam
 Audeat Atridæ, scelerato cedat amore.
 Exorietur enim Pelopeius vltor Orestes,
 Vt primùm florens teneris pubescet ab annis
 Ora puer primam signans intonsa iuuentam,
 Imperiúmque patris, sedémque orásque requiret
 Argolicas hæres, magnóque incensus amore
 Iam patriæ terræ, regnum sibi poscet auitum.
 Sic Atlantiades, at non aut pectora dictis

*Ægisti, aut potuit crudelem auertere mentem,
 Vilia exhortans, ergo pro crimine pœnas
 Nunc dedit ille suo, & pœna sibi fata peregit.*

Hæc Lemnii est interpretatio tam insignis loci: de qua vel ob prolixitatem molesta aliud quàm hoc non dicâ, nullû versum minus venia dignum mihi videri, quàm postremum: quum quod ab Homero negatur, id ipse in versu illo dicat, his verbis, *& pœna sibi fata peregit.* Negatur (inquam) istud ab Homero, itidémque ab ipso, quum versu quinto dicit, *Ac præter fatum cumulenti sibi corde dolores.* Sed & hoc miror, quàm vel vmbram fatorum subesse his verbis iudicauerit, — *νῦν δ' ἄθροα πάντ' ἀπέναν.* Hæc igitur faciunt vt hîc quoque frustra vicariam interpretis operam quæsiuerim: quû nihilominus, quem subterfugisse me credebam laborem, subeundû mihi esse videam. Neque tamẽ eo defunctoriẽ omnino & leui brachio defungar, sed quâtulum temporis meo penso suffurari potero, totum id bona fide illi impendâ.

Te igitur ad audiendam illam quoque meam interpretationẽ vocabam, quû inueni quod mihi serupulum iniiceret. Sed ecce illum iam euulsam. accede igitur: neque verò, tanquam auditor tantû, sed etiam tanquã criticus futurus, (quum ampla & hîc critices sit materia, & in media dissertatione de criticis & de critica facultate verferis) non minus attentum animum quàm attentam aurem præbe.

*Proh, quo humana omnes maculat gens crimine diuos.
 Nam mala tot nobis hæc imputat: in mala quamuis
 Ex scelere ipsa suo, fatum quoque præter, agatur.
 Nunc adeo Atridæ est Ægisti ducere nuptam
 Præter fatum ausus, redeuntem & tradere letho.*

*Præscius exitij. siquidem Cyllenius illum
 Nostris præmonuit verbis ne vellet Atriden
 Tollere, neu thalami vellet consorte potiri.
 Addidit, Ultorem venturum illius Orestem,
 Quum iam puberibus patriam remeasset in annis.
 Ægisthum hæc noster monuit Cyllenius: at non
 Consilio illius mentem est inflexus amico.
 Contigit ergo illi cumulatè nunc dare pœnas.*

Habes igitur meam quoque versuum illorum interpretationem: quæ saltem haud molesta itidem ob prolixitatem esse poterit. Multis autem facturum me rem gratam puto, si ea etiam quæ Eustathius hunc in locum scribit interpretatus fuero: quum minimè vulgaria sint, nec *οἷος* (vt opinor) ab eo allata, sed ex aliquibus vetustissimis commētariis deprompta: quum etiam (quod præcipuum est) ad solutionem eius in qua versamur quæstionis multum faciant. Homerus Iouem (inquit) facit adducentem in disceptationem philosophicum theorema, an ærumnæ & calamitates fato hominibus contingant: an præter fatum, ex peruersis illorum moribus eueniant. Soluit autem ipsum per quandam antiparastasin, adminiculo particulæ Etiam: dicens, non vniuersaliter & absque distinctione accusandum esse calamitatum ipsum fatum: sed respondendum, quasdam earum à Ioue, id est, à fato, quasdam à corruptis eorum moribus proficisci. Nam Hippolytus quidem iniuste à Venere malis fuit affectus: & Hercules immeritò multas ærumnas pertulit, quum Iunonis ira illum persequeretur & exagitaret: & Bellerophontes, quum senecta ætate ex atra bili ad insaniam redactus esset: & Euchenor, apud Troiam moriens, quòd alioqui & domi interire morbo necesse illi esset: & Vlysses, in suis erroribus, in-

finitis malis conflictatus: & siqui alij hoc in numero
 ponendi sunt, illis improbitas & naturæ peruersitas
 malorum causa non fuit. Sed si Ægisthus, Mercurio
 interdicente illi ne Agamemnonem interficiat, & vxor
 eius suam faciat, ei non est dicto audiens, atque
 interficitur: & Vlyssis socij pereunt, postquam Solis
 boues, pastum (quod vetitum illis erat) sibi fecerunt:
 & Achilles, quum posset apud Phthiam commorari, &
 diu ibi viuere, veniens Troiam, moritur: & Alexan-
 der, OEnones thalamum aspernatus, rapta Helena,
 multa aduersa perfert: & Elpenor, vino grauatus, ca-
 dit & ceruicem frangit: hi mala patiuntur ἐξ οἰκείας ἀπα-
 ραλίας. Hæc ille. Vbi, quod de particula καὶ dicit, ea que-
 stionem illam solui, apertius fuerit si eam cum his ver-
 bis ἐπὲρ μόρον iungi intelligamus. (quod sequens, ita ver-
 ti, *in mala quamuis Ex scelere ipsa suo, fatum quoque præter,*
agatur) Alioqui possit & cum σφῆσιν ἀτάσθαλίῃσιν (quo-
 niam illa longiusculè sunt remota) intelligi iuncta, co-
 dem manente sensu. Est verò & hoc considerandum,
 in iis quæ proponit exemplis, non videri cōuenire om-
 nibus vt ἀτάσθαλίαι scelus aut scelera, siue sceleratam vi-
 tam interpretemur. Quid enim? an ἀτάσθαλίαν vocabi-
 mus in Elpenore, ad ebrietatem vsque potare? Is pro-
 fectò qui hoc dicerent, nationes quædam & πανδημὶ &
 fortasse (si necesse foret) παντραπιᾶ etiam repugnarent:
 ipsique adeo Græci, ex quorum largis computationibus
 & Græcari & Pergræcari orta sunt, si reuiuiscerent, illud
 negarent ac pernegarent: quum ne ipsi quidem Lapi-
 thæ, ob illud suum adeo ebriosum & ob ebriositatem
 sanguinolentum conuiuium, ἀτάσθαλοι (quod sciam)
 fuerint vocati. Quid igitur de vocabulo illo dicendū
 est? A me apud ipsum quidem Homerum, redditum

fuit Scelus, quum etiam ad versus illius numeros accō-
modata esset hæc interpretatio: sed apud ipsum scho-
lasten verti etiam Improbitatem & naturæ peruersita-
tem: necnon Peruersos mores, item Corruptos mores:
(addere autem poteram & deprauatos: vt à Cicerone
hæc coniunguntur) verum vbi de Elpenore etiam di-
citur, tantum ad ebrietatem aut ebriositatem eius re-
spiciendo, vecordem quandam intemperantiam (for-
tasse & flagitiosam) eo significari crediderim.

Cæterum ne hoc quidem silentio prætereundum
est, quod ab eodem enarratore obiter eundem in locū
annotatur, Iouem & fatum idem esse, atque id ex mul-
tis locis liquere. Conuenit enim cum philosophorum
quorundam, & Panætii nominatim, sententia: necnon
Senecæ, inter Latinos: qui de Iouis nominibus loquēs,
Hunc eundem (inquit) *& fatum si dixeris, non mentieris.*
Nam quum fatum nihil aliud sit quàm series implexa cau-
sarum, ille est prima omnium causa, ex qua cetera pendent.
Poterant autem Ioui ex eo etiam (meo quidem iudicio)
appellationem illam tribuere quòd in fato quoque su-
premā in res humanas potestatem agnoscebant. Quòd
si verè dictum illud fuit, — *Omnisque potestas Impatiēs*
confortis erit, quomodo de suprema illa potestate verè
non diceretur?

Hactenus de fato, iuxta quorundam etiam philo-
sophorum sententiam: sed magis tamen iuxta vsita-
tam plurimis scriptoribus, ac præsertim poetis, loquē-
di consuetudinem. Fuerunt verò & qui fatum istud;
physicum, id est naturale, vocauerunt, & quendam
εἰρὸν, seu quandam seriem & velut concatenationem
càusarum naturalium, esse dixerunt, quæ vi sibi ingeni-
ta certum & eundem (si nullum interueniat obstaculū

effectum habent. Quid quòd Chrysippus fato dari posse naturæ etiam appellationem existimauit? Et sanè, qui in isto Ciceronis loco, *Sed ut, siquid mihi humanitus accidisset (multa autem impendere videntur præter naturam etiam, præterq; fatum) huius diei vocem, testem reipubl. relinquerem meæ perpetuæ erga se voluntatis: qui, inquam, hoc in loco contendet, fatum & naturam duo esse* *ἔρος, & ποῦς, ὁποῦ* posita (hæc enim est vera lectio apud Gellium: quam & habet noua editio, cui meæ Noctes Parisinæ sunt adiectæ) pro eo facient quæ modò dicta sunt. Ac quamuis aliter etiam intelligi posse verba illa scribat Gellius, (de qua expositione ab illo dissentio, ut alibi ostendam) tamen dubium esse negat quin violentam & inopinatam mortem innuere Cicero voluerit, quæ rectè censetur præter naturam accidere. Atque his addit, idem Virgilium de fato quod Ciceronem sensisse: quum de Elisa dixit,

Nam quia nec fato, merita nec morte peribat:

tanquam in faciendo fine vitæ, ea quæ violenta sunt, non videantur è fato proficisci. Quinetiam adiicit, Ciceronem verba Demosthenis idem ferè significantia de natura atque fato sequutū videri. Putat enim, quod dicit Demosthenes *τῆς εἰμαρμένης καὶ τὸν αὐτόματον θάνατον*, id Ciceronem fatum atque naturam appellasse. Atque adeo *αὐτόματον* per se vtrumque putat comprehendere. dicit enim esse naturalē & fatalem mortem, quæ nulla extrinsecus vi coacta venit. Ego tamen malim, ad melius exprimendam vim Græci vocabuli, dicere Sponte naturæ venientem. Sed ut malo, hîc quidem, Sponte naturæ venientem quàm Naturalem appellare, ita etiam Sponte fati venientem dicere vix ausim. Ac quavis in hoc Platoniciæ pro Socrate Apologiæ loco, qui

illi Demosthenico similis est, ἀπὸ τοῦ αὐτομάτου ἂν ὑμῶν
 τοῦτο ἐγένετο, ἐμὲ λελθάναι δὴ, non dubitem his ad interpre-
 tandum vti verbis, *Hoc sponte naturæ vobis contigisset, ut*
morerer: aut istis, Ipsa natura (q. d. Ipsa naturæ lex. vel,
 ipsa naturæ conditio) *mortem meam sponte sua vobis at-*
tulisset: tamen αὐτομάτου θάνατον nolim etiam Spontaneā
 mortem dicere: ne cum ἐκούσιος & αὐθάρπτος θάνατος con-
 fundam, vt à quibusdam (quos monitus non sequēris)
 factum est. Nam hæc mortem eam quæ à Latinis vo-
 luntaria dicitur, sonant: quam qui & spontaneam vo-
 carit, Tacitum se imitari non immeritò dixerit, quum
 finem vitæ sponte impleuisse dicat eum qui volunta-
 ria morte obiit: ei opponens illum qui fato finem vite
 impleuit. Quod alioqui cum iis quæ diximus conuenit.
 nam vt fato, ita etiam natura finem vitæ impleuit qui
 nec voluntaria nec violenta morte interiit. Sed cur na-
 turalis & fatalis mors, simul etiam voluntaria vocari nō
 potest? quoniam (si satyrographi versum hac de re πα-
 ρωδῶν mihi licet) *Multi annis lassi, satiatus nemo recedit.*

Hæc quum ita sint (libuit autem ea quam dixi de
 causa in huius quæstionis tractatione diutius immorari)
 meritò explodentur illorum Virgilij locorum tanquā
 repugnantium accusatores. Nam vel hoc considerare
 debuerant, ipsummet sui expositorem esse, quum non
 contentus dixisse,

Nam quia nec fato merita nec morte peribat,

Sed misera ante diem, subitoque accensa dolore.

Quod perinde est ac si scripsisset,

Nam quia non sati, naturæ aut lege peribat.

Aut ita,

Nanque accersito quoniam miseranda peribat Fato.

Nec tantummodo *Accersere* aut *accersire fatum*, sed & *Accelerare* ac *præuerrere* dicebant, vt antea docui. Iam verò & *prodiga vitæ* dici poterat Dido : ideóque non malè fortasse de illa scriptum & ita fuisset,

Nanque suæ infelix esset quòd prodiga vitæ.
Sic enim de Cornelio Gallo Naso,

Sanguinis atque animæ prodige Galle tuæ:
quum & ante illum dixisset Flaccus, — *animæque magnæ Prodigum Paulum.*

Quòd si quis audire malit quomodo Virgilius Virgilianè locum hunc mutare potuerit, audiat hæc quoque,

Nam quòd erat Dido (vitam lucémque perosa)
Proiectura animam insontem.

Legimus enim libro sexto,

Proxima deinde tenent mæsti loca, qui sibi lethum
Insontes peperere manu, lucémque perosi
Proiecere animas.

Quis tamen & præcedentibus illis modis mutatum locum, Virgilio non placitum fuisse, dicere potest?

Ne illud quidem dictum inexamiatum prætereundum est, — *merita nec morte peribat.* (ad quod respiciens, *insontem* adieci, quum dixi *Proiectura animam insontem*) perinde enim est ac si illos Homeri versus sequens aliquis, diceret, nec morte quam ob suam ἀταλίας mereri dici posset. Quod contrà de Ænea meritò fortasse dictum fuisset, si illa imprecantia (si imprecatoria dicere non licet) Didonis verba pondus habuissent,

Spero equidem mediis (siquid pia numina possunt)
Supplicia hausurum scopulis.

Quis enim mortem illam vocari meritam debere, ac
ἀπίχεται ἢ ἀταλίας (& nominatim ἢ ἀπίαιας) esse negauisset?

gauisset? Ei certè qui hoc inficiaretur, ne hoc quidem pro vero habendum esset,

Præbuit Æneas & causam mortis & enssem:

Ipsa sua Dido concidit vsa manu.

Caterùm illa quæ imprecantia esse dixi verba, scio quidem imprecationis formam non habere, sed hanc sub alia quam habent regi dico.

DE iniuria quæ Virgilio ab illis accusatoribus facta fuit, satis questus supérque, ad alios eius locos transire in animo habebam: quum recordatus sum & iniuriæ quam Homero fieri animaduerti paulo antè, dum eius huc pertinentem locum, cuius vti testimonio volebā, quærerem. Ideo autem de ea quoque verba faciā, quòd eius mentio ad præcedentem de fato sermonem pertineat. Quamuis enim mors fortuita à fatali (vt dixi) distinguatur, tantum abest vt fortuitam appellet Homerus mortem aliquam, vt ne fortunæ quidem vsquam meminerit: at eum tamen qui antea citatus fuit eius versum, vbi de iis qui ad oreum præter fatum deueniunt, loquitur, ita nobis exponit interpretes vt fortis mentionē simul faciat. Quum enim Homerus dixerit tantummodo,

Μὴ γὰρ ὑπὲρ μοῖρας δόρυ δ' ἰδὸς εἶσα βίην ηἶ,

ille verba hæc omnibus istis reddit (si tamen hoc vocari debet reddere)

— ne sorte maligna

Præuenias magni tibi debita tempora fati,

Ante diem moriens.

Vbi alioqui non male fato sors maligna opponi videri posset, (quòd fatalis mors fortuitæ nonnunquam opponatur, vt dictum fuit) si interpreti plus ipso sapere autore, aut alio quàm illū modo sapere liceret. Verùm licet

excusaretur ille locus, alii sunt ei similes, qui eandem excusationem non admitterent. Ex eorum numero est hic, de Aiace, post descriptionem impetus & violentiæ apri, cum quo eum comparat,

*Talis erat magni Telamonis filius Ajax,
Per Troas per & arma ruens hostilia, circum
Qui stabant Patrocle tuum generose cadaver:
Rapturi, & patriæ (si sic fortuna tulisset)
Laturi decus eximium.*

Nihil enim est apud Homerum quod verbis istis respondeat, aut quidquam vel affine illis habeat: quum hi sint Homeri versus,

Ὡς ὅς Τελαμῶνος ἀγαυῷ παῖδιμος Αἴας,
Πᾶσα μελίσσάωνος Τρώων ἐκέλευσε φάλαγγας,
Οἱ δ' ἔτι Πάτροκλον βέβαλτο, φέρον δὲ μάλιστα
Ἄστυ ποτὶ σφίτερον ἐρύει, καὶ κῦδος ἀείδει.

in his autem nullam omnino fortunæ mentionem faciens, hæc dicat (si bene sum interpretatus)

*Sic Ajax, claro clarus Telamone creatus,
Discursans, facile disiecta dat agmina Troum,
Queis Patroclus erat circumdatus, & quibus ingens
Spes erat urbē usque hunc magna cum laude vehendi.*

At sunt & alii plerique loci in quibus hoc ipsum Homero affingit. Et sanè in hoc qui non longo interuallo præcedit, illud videre est,

— vocatos Huc age siste duces Danaum, quos
cunque licebit,
Aut sors obtulerit.

Nam τῷ χῳς ne hîc quidem vlla est apud Homerum mentio, neque aliud legitur quod verbis istis, *Aut sors obtulerit*, respondeat. Sed non ut τῷ χῳ à suis poematibus: Homerus, ita & Virgilius fortunam à suis exclusit: im-

mo verò cum fato etiam coniungere illam alicubi non dubitavit. Legimus enim libro V I I I,

Me pulsum patria, pelagique extrema sequentem,

Fortuna omnipotens & ineluctabile fatum

His posuere locis.

Sed quæri posse scio, atque adeo non defuturos qui quærant annon Homerus aliam vocem habeat qua id significet quod Latini fortunam vocarunt: (de qua Iu-
uenalis,

Nullum numen abest, si sit prudentia, sed nos

Te facimus fortuna deam, cælique locamus:

vel, alteram sequendo lectionem,

Nullum numen habes, si sit prudentia.)

sed hac de re in meis Homericæ editionis Græcolatinæ prolegomenis, (non illa fauente, sed Deo) dicturus sum. Vereor enim ne si hîc in istam disceptationem ingressus fuero, nimium longè ab huius operis argumento euagatus esse dicar, & eo magis veniam mihi dare lectores grauentur, quòd iam illa in fatum digressionem grauis illis fuerim. Longam enim fuisse fateor, sic tamen vt pedem ab ea referre difficile mihi non fuerit: at si in illius *Ἀναπορίστας* penetralia ingressus essem, & philosophorum de eo sententias coaceruare, deinde inter se conciliare conatus essem, non solum molestior multo ipsis fuisset, sed ex illis penetralibus fortasse nihilo magis quàm ex Charontis cymba referre pedè potuissem. Nam si illi qui inter philosophos se præ aliis sophos (hac præsertim in parte) ostenderunt, Stoici inquam, adeo inconstanter & repugnanter de eo loquuntur, vt quærendum sit;

Idem eadem de fato horam durántne loquentes?
si multa etiam differunt de illo adeo implicite & intri-

catè vt λογίαι Apollinem imitari velle videantur, quid hîc miseri eorum siue auditores siue lectores agemus? an, quum adeo in illis eorum locis qui integri & pleni sunt, laboremus, hoc labore non contenti, fragmenta etiam nescio quæ diu conquisita, & mendis tamē (quod ad pleraque attinet) obsita, illis adiiciemus? Ecce enim (exempli gratia) Chrysippeam fati definitionem, *δύναμις πνευματική, τάξει τῆ παντὸς διοικητική*. En (inquam) Chrysippeam, qualem inuenimus, fati definitionem: quæ sonat, *Vis [vel potentia] spiritualis, quæ ordine vniuersitatem hanc gubernare valet*. Sed si aliquis hîc dixerit *ἄξιον* potius quàm *ἄξει* scribendum esse, quid habebit quod de *πνευματική* dicat? quomodo fatum *πνευματικόν* esse cogitabit? aut quid *πνευματικόν* in fato imaginabitur? Chrysippus tamen ita scripsit scilicet. Quid? an vel cum e definitione quam Gellius illi describit, aliquid habet commune? Verum ad Zenonem veniamus. Illi est *δύναμις κινήτικὴ τῆ ὕλης ἢ τῶν αὐτῶν αἰσθητῶν*, id est, *Vis (seu potentia) quæ materiam secundum eadem & eodem pacto mouere valet*. Quibus adiecisse fertur, *ὡς ἂν μὴ διαφύγοι* (ita enim, si diis placet, permittit loqui Græcæ linguæ consuetudo) *καὶ θεωροῖται ὡς φύσιν καλῆν*, id est, *quam nihil refert an etiam Providentiam & Naturam dicas*. Eodémq; modo Theophrasto *ἢ εἰμῶδον* est *ἢ ἐκείνου φύσις*, id est, *Est autem est natura vniuscuiusque*. Sed quid si, ubi te diu multumque in his verbis, & frustra tamen, torseris, dicam, Theophrastum videri potius scripsisse, *εἰμῶδον ὅτι, ἢ ἐκείνου φύσις*, non præfixo articulo: ex qua tam parua mutatione longè alius & magis rationi consentaneus sensus elicitur. Iam verò & bonus ille vir Chrysippus, in omnes se versans partes, ad inueniendam fati definitionem, fertur etiam dixisse, *εἰμῶδον* esse λόγον ἀπὸ τοῦ ὡς

cat, fuerunt alij qui potius fatum ex stellis pendere dixerunt: iuxta quorum sententiam dicendum contrà fuisset, πὺ εἰρηδύειν εἶναι ὁ πλὸν τ' ἀγέρων, id est, fatum esse arma stellarum: quasi eo propugnante fiat vt suum ille ius & imperium in res humanas obtineant. O quæ tot κρίσις ἀφ' αὐτῶν νέεα possit.

Ab hisigitur ad poetas nostros (in quos κρίσις exercere posse, satis superque etiam τοῖς κρίσις τῶν ποιῶν esse debet) refugiamus: & illos quidem de fato ita vt antea disserui plerunque loqui fateamur: sed nonnunquam tamen latius fati fines extendere, & omnia quæ eueniūt, quantumuis & præter omnium opinionem, & præter ipsas naturæ leges eueniant, fato includere. Quinetiam, perinde interdum loqui de fato, vt quemadmodum prouerbiali dicto iactatur, ἀνάγκη ἔδ' οἱ θεοὶ μάχονται, id est, Necessitati ne dii quidem aduersantur: ita etiam fato, tanquam maximæ omnium necessitati (vnde à Marone ineluctabile appellatur) ipsos quoque deos subiiciant. Obiiciet hîc aliquis, Quomodo rationi consentaneum est, si ipsemet Iupiter est fatum, (vnde ὑπὲρ θεῶν alicubi idem Homero valere quod ὑπὲρ μοῖρας videmus) vt fato subiectus dicatur? Ego verò tanto magis τὸ ἀμάχητον ἢ μοῖρας, id est, vim illam fati ineluctabilem & insuperabilem, declarare eos voluisse arbitror, quasi, ad eam superandam, ipsum Iouem à seipso dissidere & αὐτὸν ἐαυτῷ μάχεσθαι necesse futurum sit. Maro quidem certè quàm verè fatum ineluctabile appellet, cum alibi tum hoc libri decimi loco ostendit, vbi Iouem ita loquentem introducit,

Stat sua cuique dies. breue & irreparabile tempus.

Omnibus est vitæ: sed famam extendere factis,

Hoc virtutis opus. Trois sub mœnibus altis

Tot nati cecidere deum: quin occidit unā

Sarpedon, mea progenies: etiam sua Turnum

Fata vocant, metasque dati peruenit ad æui.

Vbi, ad metas dati æui peruenit, est id ipsum quod μοῖρα ἀνέπλησε, vel μοῖραν βίοτιο ἀνέπλησε, dixissent Græci poetæ.

Quidam verò & τὸ μοιρίδιον ἀναπλήσαι, vel τὸ μοιρίδιον ἔξοιον, in soluta etiam oratione ποιητικώτερον dixerunt. Quine-

tiam εἰς τὸ χεῖρὸν ἀπέρχεσθαι dictus ille fuit qui ad dati æui metas tēdebat. Est autem hīc quoque suum Homerum imitatus Maro, cuius hos versus audimus Iliad. π, ex ipsius itidem Iouis ore,

ὦ μοι ἔγωγε, ὅτε μοι Σαρπηδόνα φίλτατον ἀνδρῶν

Μοῖρ' ἔπειτ' ἀπὸ Πατρόκλοιο Μενοιτιάδαο δαμνέω.

Διχρὰ δέ μοι κραδίη μέμονε φρεσὶν, ὀρμάωνι

ἢ μιν ζῶντι ἐόντι μάχης ἀπο δακρυόεσσης

Θείῳ ἀναρπάξας Λυκίης ἐν πτόνι δῆμα,

ἢ ἤδη ἔπειτ' ἔχρσι Μενοιτιάδαο δαμάσσω.

Quos Eobanus ita vertit,

Heu quid agam Juno? vocat en Sarpedona fatum,

Quo mihi non alius natorum charior extat.

En vocat ad mortem fatum crudele ferendam

Sub manibus Patrocle tuis. nunc ergo vacillat

Ancipiti sensu mihi mens, & pectore toto

Addubito, num subtractum pugnae atque labori

Eripiam, regnisque suis patriæque remittam:

An patiar fragilis deponere munera vitæ,

Sub manibus Patrocle tuis.

Quorum etiam versuum ut hanc breuiorem & fidelio-rem interpretationem tibi darem, à me propemodum inuito (quòd properandum ad alia esset) obtinui:

Hei mihi, quòd cunctos supra Sarpedona charum

Fata volunt manibus Patrocli occumbere morti.

*Iámque animi pendens agito, Sarpedona, pugnae
Ereptum, Lyciæ sistámne feracibus aruis,
Anne Menætiadæ sub dextra iam dabo letho.*

Cæterùm vt hîc videmus dubitantem Iouem an debeat Sarpedonem *Σπὸ δ' αὖχης ἀναπτάζεις*, ita in eodẽ Æneidos libro videmus Iunonem à Ioue contendere vt Turnum pugnae subducatur. Sed quantum velit hac in re fatum de suo iure cedere, ipse Iupiter postea exponit, his verbis,

*Si mora præsentis lethi, tempúsque caduco
Oratur iuueni, méque hoc ita ponere sentis,
Tolle fuga Turnum, atque instantibus eripe fatis.
Hactenus indulgissè vacat : sin alior istis
Sub precibus Venia vlla latet, totúmque moueri
Mutari ve putas bellum, spes pascis inanes.*

At verò apud Homerum Iuno ipsi Ioni irascitur, tanquam volenti, *ὅτ' αὖ τὸ Σπὸ δ' αὖχης ἀναπτάζεις τ' Σαρπηδόνα* fatum multo plus de suo iure remittere.

SED, vt tandem ad Scruium redeam, is in hunc libri primilocum,

*— ô qui res hominúmque deúmque
Alternis regis imperiis, & fulmine terres,*

poetam nunc secundum Stoicos loqui nos admonet: quia secundum hos dii humana curant: alibi tamen secundum Epicureos verba facere, poetica vtentem licetia.

Eodem modo in istos eiusdem libri versus,

*Dij tibi, (si qua pios respectant numina, siquid
Vsq̃uam iustitia est) & mens sibi conscia recti,
Præmia digna ferant:*

secundum Stoicos dici ista docet. hos enim existimare virtutem esse pro præmio. Quod quum dicit, *sequi se ostendit quam habemus lectionem, — siquid Vsq̃uam iustitia*

iustitia est. Cogitavi tamen aliquando, fieri posse ut à Virgilio scriptum fuerit *iustitia*: & intelligendum sit, Siquid usquam est iustitia, & siquid est usquam mens sibi recti conscia. Id est, si quo hæc loco usquam habentur. Tunc autem notis parenthesis includenda verba quoque ista fuerint, --- *mens sibi conscia recti.* Alterum illum sensum interim non reiicio, qui vulgari lectioni consentaneus est: ac cum eo convenit etiam hic versus,

Ipsa etenim virtus sibi met pulcherrima merces.

Sed pauci huic Stoicorum doctrinæ acquiescunt: adeo ut verè dictum sit istud,

--- *quis enim virtutem amplectitur ipsam,*

Premia si tollas?

Verùm, ut à Stoicis ad Epicureos transeamus, hos sequi existimatus fuit idem poeta, & in hoc libri quinti loco,

Salve sancte parens iterum, salвете recepti

Nequidquam cineres, animæq; umbræq; paterna.

Epicureos enim omnia cum corpore perire existimavisse.

Sic autem & de iis quæ ad physicam philosophiam spectant, diversè interdum, fortasse & contrariè loqui comperientur poetæ, dum aliam alius philosophi aut aliorum philosophorum sententiam sequuntur. Ad nostrum certè Virgilium quod attinet, idem enarrator, in hæc eius verba libri primi, *tuæque animam hanc effundere dextra*, scribit, ita eum loquutum esse, secundum eorum opinionem qui dicunt sanguinem esse animam. Atque hos sequutum esse itidem ubi dixit, *Purpuream vomit ille animam.* Alio autem loco, quum iis assentiretur qui animam spiritum esse

volunt, scripſiſſe, *atque in ventos vita receſſit*. Clau-
dunt autem hæc verba quartum *Æneidos* librum: vbi
poſtquam ſcripſit idem per vitam hęc animam ſigni-
ficari: addit, dicendo *in ventos*, aut eos ſequi qui ani-
mam aerem eſſe aiunt: (vt intelligamus, in materiam
ſuam rediſſe) aut eos qui tradūt animam perire cum
corpore.

Multa autem ſunt alij loci in quibus phyſicè Vir-
gilium loqui, lectorem monet: in quorū tamen non-
nullis cum nihil ad phyſiologiam pertineſ cogitaſſe
crediderim. Nam in hunc qui eſt initio libri decimi,
de dijs à Ioue ſidereā in ſedē cōuocatis, *Conſidunt teſti-*
bipatientibus, annotat, phyſicè dictum *bipatientibus*, quia
cœlū patet ab ortu & occaſu. Sed nō video quid ni-
tius poetā non aliò reſpexiſſe dicere debeamus, quā
vbi ſcribit, *— portis bipatēribus adſunt*: vt ex ipſo met, *teſti-*
bipatientibus, quorū portę ſunt bipatentes, exponamus.

Quum item dicitur ab hoc poeta de *Ænea*, *— ille*
Iouis monitis immota tenebat Lumina, illum ad morem qui
à natura hominibus inſitus eſt reſpicere putat. quip-
pe qui ſcribit, *Phyſicum enim eſt vt qualitatem animi ex*
oculorum aut corporis ſtabilitate aut mobilitate noſcamus. Sed
hanc obſervationem non ſemper veram comperiri
conſtat: & fieri poſſe vt aliquis, cuius animus ſuo in
propoſito ſtabilis ſit & firmus, lumina tamen immo-
ta, dum alium loquentem & diſſuadere volentem au-
dit, non teneat. Quid ſi verò *immota lumina* non ſim-
pliciter ad ſtatum hominis cuius animus in profun-
dam cogitationem defixus, paritèrque in terram de-
fixi ſimulque immoti ſint oculi, referamus, ſed *immoti*
intelligamus etiam quæ à terra in quam defixa erant
mouere, & ad Didonem intuendam nollet attollere.

Quod

Quod ab eodem poeta dicitur de geminis Somni
portis in fine libri Æncidos sexti,

Sunt geminae Somni portae: quarum altera fertur

Cornea, qua veris facilis datur exitus umbris:

Alterae, candenti perfecta nitens elephanto:

ad physiologiam itidem refert. per corneam enim
portam oculos significari ait, qui & cornei sunt colo-
ris, & duriores cæteris membris: unde fieri ut frigus
non sentiât: per eburneam verò portam os indicari,
à dentibus. Et scimus (inquit) quia quæ loquimur,
falsa esse possunt: ea autem quæ videmus, sine dubio
vera sunt. Verùm & aliam expositionem affert.

Denique & in hac descriptione, quæ est libro VIII,

Insula Sicanium iuxta latus Æoliæmque

Erigitur Liparen, fumantibus ardua saxis:

physiologiam constituit. nam scribit, physiologiam
esse cur Vulcanus in his locis officinam habere singa-
tur inter Ætnam & Liparen: scilicet propter ignem
& ventos, quæ apta sunt fabris. Sed possumus fortasse
de hac descriptione aliisque huiusmodi simplicius
etiam dicere, in iis poetam fictione quæ naturali ra-
tioni consentanea sit uti: ut quum Ovidius Famem
in lapidoso agro inuentam esse scribit. Quidquid
autem de illa Virgilij fictione dixerimus, qua Vulca-
no officina sua inter Ætnam & Liparen Æoliam
assignatur, idem & de hac meritò dixerimus qua Mi-
senus tubicen fingitur Æoli filius (unde *Misenum*
Æolidem legimus) quia constat sonum omnem ex
vento creari, ut & idem enarrator annotat. Eodém-
que pertinet & quod in hunc ultimi libri versum,
Attulit hunc illi cæcis terroribus aura Commistum clamorem,
scribit, Naturale enim esse ut à qua parte ventus flat,

inde clamor audiatur. Quum autem hoc ita sit naturale vt minimè tamen sit ex alicuius causæ naturalis secreto petatum, sed potius aliquid vulgo etiam ex quotidiana obseruatione notum (vnde & pastorem dicentem audimus, *Partem aliquam venti diuûm referatis ad aures*) dicere, poetam & hic φυσιολογεῖν, minus, vt opinor, tolerabile, quàm in illa quæ ex viii. libro allata est descriptione, tolerabile fuerit.

Quinetiam in vno eodémque versu vnam rem secundum phycicos, alteram secundum mathematicos ab eo dici existimat: in hoc videlicet,

O pater, ô hominum diuûmque æterna potestas.

Diuûm enim potestatem esse, quia ipse est æther, qui elementorum possidet principatum: hominum verò quia bona Iouis irradiatio honores hominibus tribuit. Æternam autem potestatem adiecisse, propter aliorum numinum discretionem: quòd legamus & Apollinem deposuisse diuinam potestatem, & Herculem ac Liberum patrem non semper deos fuisse. Sed cur non, simpliciore expositione contenti, non aliud valere hæc verba, quàm illa, *hominum rex atque deorum* (quæ Homericis respōdent, ἀναξ ἀνδρῶν τε θεῶν τε) dicamus? & quid aliud iurauerit, ut, ὅς τις ἐσθ' ἄνθρωπος

Multos alioqui esse constat locos in quibus ita physiologicè loquuntur poetæ (quemadmodum Homerus in plerisque) vt quum alibi aliter de vna eodémque re loquantur, sibi repugnare videri possint. Sed criticorum fuerit (qui verè critici sint, minimè quæ ἀρίτως iudicent) considerare vtrum in idiota persona, ex communi sensu, an in persona alicuius φυσιολογουῦτος poeta verba faciat. Atque hic enarratoris Arati recordor, scribentis, hunc poetam volentem

poema

poëma suum esse non φυσικόν solum, sed & poeticum. (non ποιητικόν tamē simpliciter, verum cum adiectione ποιητικόν πως dicit) fabulosa etiam quæ poetarum propria sunt, admiscere. Idem, hunc in locum,

Ἀλλ' ἄρα καὶ πρὸς κείνο θυτήριον ἀρχαίη νύξ,

Ἀνδρόφρον κλαίουσα πόνον, χερμαῖνος ἔθηκεν

Εἰναλλου μέγα σῆμα, &c. tradit hæc ab eo μυθικῶς simul & φυσικῶς scribi. Sed in vetusto quodam exēplari legitur, φησί τι μυθικόν ὑπερβαῖον φυσικότητος. Quinetiam non multo post, πολλάκις γὰρ καὶ τὸ πάλιν εἰς τὸ φυσικόν μυθικεύεται. Denique est etiam aliquid apud hunc poetam quod geometricè & astronomicè ab eo dici ait.

Non malè autem conueniūt hæc istius scholiastæ, scribētis aliqua dici ab Arato μυθικῶς simul & φυσικῶς, cum iis quæ & à Seruio de quibusdam Virgilij locis annotantur, cum in illis poeticè simul & philosophicè loqui. Nihil enim magis poeticè dici existimandum est quàm quod fabulosè dicitur.

Fateor tamen, multo latius illius vocabuli significationem apud hūc enarratorem patere, & multis in locis monere nos, Virgiliū poeticè loquutū esse, ubi non tam ad τὸ μυθικόν, quàm ad alia, quæ itidem poetica sunt, respexit: atque adeo alicubi pro eo quod scribit Poeticè loquutum illum esse, non malè fortasse dicturum fuisse, Poetica licentia vsum esse, vel, Figuratè loquutum esse. Nam in hunc libri sexti locum,

-- quàm vellent æthere in alto

Nunc & pauperiem & duros perferre labores, legimus, Quod autem ait, Æthere in alto, poeticè dictum est. æther enim superius est: sed nostrum habitaculum, ætherem vocauit, inferorum comparatione. Quid autem aliud hic

poeticè quàm Poetica licentia, sonare dicemus? in qua porro alia re licentiam hanc quàm in abusu illius vocabuli constitui ab eo dicemus? Sic autem non multo ante, ubi ab hoc poeta scribitur, *Infantumque animæ flentes in limine primo*, hoc poeticè itidem dictum esse tradit. & addit, Ploratum, tantum lacrymarum esse Planctum, tantum vocum: Fletum ad vtrunque pertinere: sed poetas hæc plerunque cōfundere. Quibus postremis verbis ostendit, quum Poeticè dictum esse scripsit, perinde esse ac si Poetica licentia, qua confundere multa permittitur, dictum illud esse scripsisset. Ac nequa restet dubitatio de eo quod modò dixi, ab eo, scribēte aliquid poeticè dictum esse, ad poeticum abusum plerisque in locis respici, afferā quendam locum, in quo postquā Abusiue scripsit, ei addit More poetico. Is est in primum *Æneidos*, ubi legimus, -- *donec regina sacerdos Marte grauis geminā partu dabit illa prolem*. nam *Regina* ab eo exponitur Regis filia: & additur, abusiue hoc dici more poetico. Aliudque eiusdem abusus affert exemplum.

Magis autem mirum videri possit quod alicubi *Poeticè & Secundum publicam opinionem* coniungit: ubi vereor ne ipsemet, qui poetici abusus mentionem aliquoties facit, non sine abusu loqui existimāndus sit. Nam in hunc locum, -- *cælo cæsa sepe refixa Transcurrunt, crinēque volantia sidera ducunt*, scribit, cum hoc poeticè dixisse, secundum publicam opinionem: quoniam, vt Lucretius dicit, ventus altiora petens ætherium ignem secum torquet, qui imitatur stellas cadentes. Sed hoc de loco, deq; alio simili qui Georg. libro primo legitur, in sequentibus dicam.

Contrà autem, ea quæ poeticè dicta sunt, ab iis quæ

quæ philosophicè, distinguit: quum hunc in locum,
Noctes atque dies patet atri ianua Ditis:

*Sed renocare gradum, superâsq; euadere ad auras,
 Hoc opus, hic labor est,*

scribit, aut poeticè dictum istud esse, aut secundum philosophorum altam scientiam: qui deprehenderūt bene uiuentium animas ad superiores circulos, id est, ad originem suam, redire: malè uiuentium verò, diutius in his permorari corporibus, permutatione diuersa, & esse apud inferos semper. Quomodo igitur hîc *poeticè dictum* exponemus? Non malè (meo quidem iudicio) si Poetica fictione, siue Poetico figmento, significari dixerimus. Quæ expositio si quidè huic conueniet loco, certè & isti conueniet, vbi eundem poetam de animabus dicentem, --- *aliæ panduntur inanes Suspense ad ventros*, poeticè quidem loqui de purgatione animarum ait, tangere tamen quod & philosophi dicunt. Aut enim in terra purgari quæ nimis oppressæ sordibus fuerint, &c. Pro mea autem expositione facit quod ab eodem scribitur in alium eiusdem libri locum, qui non longo intervallo præcedit, eum philosophiæ miscere figmenta poetica. Sed addit, ostendere etiâ tam quod est vulgare, quàm quod continet veritas & ratio naturalis. Vbi probo quidem quod dicit, veritate & ratione naturali contineri ea quæ philosophica sint: at non item probare possum, id quod fictione poetica dicitur, ab eo quod vulgare est non distingui: quum vulgare ab eo vocari existimem id quod iuxta vulgarem opinionem dicitur.

Alicubi secundum poeticum morem loqui Virgilium dicere mauult. vt quum in hunc primum

libri decimi versum,

Panditur interea domus omnipotentis olympi,
annotat, *Secundum poeticum morem hoc dicit, Factus est*
dies. Vbi perinde esse acsi Secundum fictionem
poeticam dixisset, ex iis quæ proximè subiungit li-
quet, Quia dicunt poeta matutino tempore aperiri cælum,
noctu verò claudi. Unde est illud, Ante diem clauso componet
vesper olympo. Sic porro & in aliis descriptionibus sua
poetas habere figmenta scimus.

Atque hæc quum ita sint, & quum aliter atque ali-
ter eadem loquens de re poeta, loqui poeticè dici
possit, non mirum est si diuersis diuersa locis, & in-
terdum ferè cōtraria aut etiam planè contraria vnus
& idem loquatur: neque in criticorum reprehensio-
nem hac solùm de causa cadere debet. Quum autem
verum sit quod antea ex enarratore illo est à me an-
notatum, quum inter sectas cōtrariæ sint opiniones,
hinc fieri vt in vno eodémq; poeta contraria non-
nulla inueniãtur, non ex ipsius vitio sed ex discordia
sectarum: non minus verum esse sciendum est, hanc
locorum repugnantiam in iis quæ è fabulis sumpta
sunt cerni. Nec verò istud ratione caret. quum enim
nihil tam sit poeticum, aut saltem nihil magis, quàm
το μυσικόν, vbi magis locum habere poeticam licetiam
par est? Potius tamen alij ab alijs dissident, quàm ali-
quis à seipso in ijs quæ ad fabulas pertinent. Vnde
idem enarrator in hunc libri sexti locum,

--- *sedet aternùmque sedebit Infelix Theseus,*
scribit, *Contra opinionem* (fortasse autem, *Contra publicam*
opinionem, scribendum est.) nam fertur ab Hercule esse
liberatus: quo tempore illum ita abstraxit vt illic corporis eius re-
linqueret partem. Quibus adiicit, Frequenter enim variant
fabulas

fabulas poetæ. & in exemplum affert quæ de Hippolyto à Virgilio, quæ item ab Horatio scribuntur. Virgilium enim, liberatum ab inferis dicere: at Horatium contrà, — neque enim Diana pudicum Liberat Hippolytum. Verùm & vnum eundemque poetam diuersas diuersis locis fabulas, aut etiã contrarias, de eadem persona posse scribere, saluo (vt ita dicã) decoro poetico, (præsertim vbi non eadem loquēs persona introducitur) extra controuersiam est. Quod fortasse responderi potest ijs qui illa de Theseo verba cum ijs quæ præcesserūt pugnare scribunt. Siquidem non procul ab huius sexti libri principio mentionem Thesei fieri vidimus inter illos qui ex inferis gradum reuocarint. Sed posse & aliter defendi Virgilium, ostendam vbi quam ex Higino Aulus Gellius affert reprehensionem commemorabo.

Nec tamen hæc sola quæ poetis licere dixi ipsos defendunt aduersus eos qui sibi repugnantia loqui interdum illos queruntur: sed interdum quidem eos idiotarũ more, nonnunquã autem philosophicè de vna eademq; re verba facere dicendũ est. Adde quòd quum non minus impios quàm pios, non minus à virtute alienos, quàm virtutis studiosos, in suis poematis loquentes introducant, (quò etiam extendi illa Platonis verba dici possunt) non mirum nec reprehensione dignum est si contraria super eadem re ex illorum ore audiamus. Iam verò vna etiam eademque persona, ira percita, aut alia perturbatione correpta, ijs quæ dixerit omni perturbatione carens, repugnantia plerunque loquitur. Atque hinc fit vt vnus poetæ locos inter se committere, & vnum ad alterius correctionē adhibere possimus: vt bellè nos

docet Plutarchus; quum (exempli gratia) isti Sophoclis versiculo,

Τὸ κέρδος ἡδὺ, καὶ ἀπὸ ψευδῶν εἶη, (nisi scribendum ἔη)

hunc eiusdem opponit,

Οὐκ ἐξ ἄγρουσι καρπὸν οἱ ψευδεῖς λόγιοι.

Itidemque ubi cum his Euripideis,

Πολλᾷσι μορφαῖς οἱ θεοὶ σοφισμάτῳ

Σφάλλουσιν ἡμᾶς, κρείττονες πεφυκότες (qui cum illo

versu Ouidiano conueniunt, *Ludit in humanis diuina potentia rebus*) committit istum, qui Euripideus itidem est,

Εἰ θεοὶ τίδ' ὄψι φαῦλον, οὐκ εἰσὶ θεοί.

Sic etiam hisce Menandri,

Ἀ' πανθ' ὅσα ζῇ τὸν ἥλιον βλέπει

Τὸν κοινὸν ἡμῖν, δοῦλα τῷτ' ἐσ' ἡδονῆς.

(id est, *Quaecumque viuunt, cum quibus nobis iubar*

Commune solis, his voluptas imperat)

opponit istum, qui itidem est Menandreus,

Ὅνειςδος ἀχρὸς βίος ὁμῶς, καὶ ἡδὺς ἦ,

id est, *Probrosa turpis vita, sit dulcis licet.*

Quinetiam ab vno eodemque poeta & vno eodemque in loco nonnulla ita dicuntur, vt hæc ab illis dissidentem sententiam habeant. Id autem fit aliquando quidem quum personam vnā inducit poeta quæ alterius dictum corrigat (cuius rei pulcherrima tragici potissimum exempla suggerunt) interdum verò quum vnus & idem vel iræ vel alij animi morbo ita moderatur vt ad se redire dici possit, minimèque sequi deteriora, quum videat (vt ait illa apud Nasonem) meliora probetque. Quum enim is cui hoc contingit, μετανοῶσα dicendus sit, & sub hoc verbo mutationem τῆ νοῦ, id est mentis, intelligamus, non

non mirum est si cum mente oratio quoque mutetur.

Tum verò præsertim diuersa de vna eadēque re dici à poeta necesse est quum diuersas personas loquentes introducit: quum à probo (exempli gratia) ad improbum, aut vicissim, & quum ab idiota ad hominem literatum, aut etiam doctum, venit.

QVONIAM porro ex præcedētibus intelligimus multa poetis concedi, variāmque illorum esse licentiam; critici est, antequam vllum reprehēdere locum aggrediatur, quid ad defendendum aut saltem excusandum poetam afferri possit præuidere. Nam (vt de iis taceam quæ in sermone excusari debent, quum figuratè loqui illis concedatur, variæ autem figuræ sint: quum acyrologiæ etiam & catachreses nec non multa ex Græci sermonis imitatione petita illis permittantur) ad res ipsas quod attinet, considerandum est multa καὶ τὸ σιωπώμενον à nobis debere intelligi non secus ac dicta, siue pro dictis haberi: vt ad ea, tanquam præcedentia, ea referamus quæ postea dicuntur, miramini nobis futura. Sic certè apud Homerum multa mirari contingeret, nisi ad ea quæ καὶ τὸ σιωπώμενον intelligimus, referenda esse sciremus. In Virgilio autem non obseruantes hoc quidam, reprehendere etiam quosdam locos ausi sunt. Sed reprehensione ipsimet digni erant, qui quæstionem seu dubitationem de re quam nobis cogitandam seu imaginandam reliquisset, mouebant. Atque hîc occurrunt illa vltimi libri Æneidos verba, *Nudato capite*: de quibus talem quæstionem fuisse motam, ex Seruio discimus. Sanè queritur (inquit) quemadmodum *Nudato dixerit*,

quum eum *suprà* nusquam tecto induxerit capite. Ad quam quæstionem Seruij respōsio mihi non satisfacit. scribit enim, *Nudatum* esse quidquid fuit antè cooper- tum: *Nudum* verò, quod tectum antè non fuerat. Ideoque aut *Nudato* pro *Nudo* accipiendum, vt sit pro nomine participium: aut dicendum, tectum eum habuisse caput quum in campum descendit. Atqui breuius & melius respondere poterat, ridiculam esse hanc quæstionem, quia vel ex eo quod dicit *nudato*, nobis indicat fuisse antea coopertum. Vt interim omittam, non assensuros illi esse lectores, *Nudum* non posse dici nisi quod tectum antea non fuerat.

Cæterum, nō parui referre vt animaduertatur, quæ *τὸ σωπρόμυον* intelligi debeāt, vel inde apparet, quod interdum aliquo eorum non animaduerso, decorum non seruasse videri queat poeta, qui tamen id accuratè seruauerit. Nihil autem reprehensione magis dignum existimarunt critici, quàm illud: & nihil tamen est cuius obseruatio maiorem cautionem requirat. Seruius *τὸ ὀρέπον* aliquoties appellat: sūntque loci in quibus nos id seruari admonet. vt quum *Æneid. xii*, dicitur, -- *simul agmine densō Antæúsque* *Ἀνέσθηςque* *ruunt*, scribit, *Seruauit τὸ ὀρέπον*. necesse enim erat vt vulnerato duce multi cū eo in castra re- mearent. Alicubi verò addit & Latinā vocē *Decorū*, ad Græcæ expositionem. vt quum in hæc verba libri *ix*, *Tandem ductores, audita cæde suorum, Conueniunt Teu-* *cri*, annotat, *Servat τὸ ὀρέπον*, id est *decorum* (nisi fortè hanc expositionem supposititiā esse credendū est) *ne presentibus ducibus Turnus tot strages fecisse videatur*. Sed & quum in librum quintum, ea quæ de Eurytione à poeta dicuntur, defendit aduersus quosdam repre- hensores,

henfores, ibi de seruato decoro agi videtur. Veniens enim ad hūc versum, de columba fixa ab Eurytione,

Decidit ex animis, vitamque reliquit in astris.

Aeris: postquam in hæc verba, *in astris aeris*, annotauit, unde sumpserat vitam: vt, *Hinc hominū pecudumq; genus, vitæq; volantum*: addit, totum hunc locum ab Homero esse sumptum. Vnde inanem esse vituperationem Æneæ, quòd suspenderit auem maternam. Nam & rem esse translatam simpliciter: & quamcunque suspendisset auem, futurum fuisse vt in hanc vituperationem incideret. nullam enim auem consecratione carere, quum singulæ aues numinibus sint consecratæ. Quibus addit, *Quanquam Urbanus dicat, matrem citius potuisse placari*. Vbi vtitur voce quæ præcedentibus aduersari quodammodo videtur: quum tamen ista Urbani verba magis etiam defendant Virgilium. Caterùm & proximè sequentem locum à Virgiliomastigæ reprehensum tradit. nam in hunc versum,

Ostentans artem pariter arcumque sonantem,
scribit, Virgiliomastigem in hoc culpare Virgilium. artem enim in vacuo aere ostendere non potuisse. Sed ipse aliquid & in huius loci defensionem affert: quum adiicit, *Quanquam dicant periti, posse ex ipso sagittariorum gestu artis peritiā indicari*. Quòd si dignus reprehensione & hic esset locus, non tam aduersus decorum peccasse, (vt de proximè præcedenti quidā iudicarunt) quàm fictione rationi minimè consentanea vsus esse dicendus foret.

IAM verò & nonnulla sunt quæ per anticipationem à poeta dici qui non animaduertet, ignorantia illum accusabit. De illa autem loquor anticipationem,

cuius ipse mentionem facit Seruius in illa verba, --*por-
túsque require Velinos*. Nondum enim erat Velia (in-
quit) quo tempore Æneas ad Italiam venit: idcòque
anticipatio est. Sed addit, eà, si ex poetę persona fiat,
esse tolerabilem: sin per alium, vitiosissimam. Vbi in-
telligit, quę per alium fit qui ab ipso poeta loquens
introducitur: vt híc Virgilius Palinurum loquentem
inducit, & tamen eo nomine iam tum vtentē quod
Virgilij demum seculo, aut paulo ante, in vsu fuerit.
Hanc autem poeticam licentiam apud Gellium aut
ignorans, aut ignorare se simulans Higinus, ista Vir-
gilij verba, --*portúsque require Velinos*, acriter reprehen-
dit, vt in sequentibus ostendam.

Considerandum est porro poetam quempiam
legenti, istud etiam quod eodem pertinet, & de quo
ab eodem enarratore admonemur, poetas interdum
nomina alia pro aliis ex vicino petita vsurpare. Quā
certē licentiam præcedente maiorem esse, nemo (vt
opinor) mihi negauerit. Annotat autem illud in ista
libri primi Æneidos locum,

Hic iam tercentum totos regnabitur annos

Gente sub Hectorea.

postquam enim *Hectorea* exposuit *Troiana*, & addidit,
dicere debuisse, *Æneia*, subiūgit, poetas nomina ex
vicino vsurpare. Quod certē in alium eiusdem libri
versum apertius dicit, solere poetas nomina de pro-
uinciis vicinis vel personis vsurpare.

Nec minus venire nobis in mentem debet istud,
cuius idem nos non vno in loco admonet, poetam
secundum ritum Romanum, seu secundum consue-
tudinem Romanam, aut Romanum morem, loqui.
Sic in hunc versum libri vi,

Nec verò hæc sine sorte data sine iudice sedes,
 annotat, traxisse hoc ex more Romano. Causas enim
 non audiri solitas, nisi per sortem ordinatas: quum
 omnes quo tempore causæ agebantur conuenirent.
 Item in hunc libri eiusdem,

Ecce autem primi sub lumina solis & ortus

Sub pedibus mugire solum,

innuit posse hunc locum reprehendi ab eo qui igno-
 ret eum loquutum esse conuenienter ritui Romano.
 Vbi tamen videndum an eius stare sententiæ neces-
 se sit. Sic verò & in librum I x, vbi canit poeta,

Aenean acciri omnes populûsque patrêsq; Exposcunt,

annotat, illum transferre in Troianos Romanam
 consuetudinem, vt plerunque solet. Itidem in hæc
 eiusdem libri verba, -- *& iaculum intorquens emittit in*
auras, Principium pugne, Hoc (inquit) de Romana so-
 lennitate tractum est. Quibus subiungit quæ in bello
 indicendo fieri mos esset. Iam verò & prouinciæ
 suæ more loqui eum dicit alicubi: vt in hunc locum,
 -- *aëriam sed gurgite ab alto* *Urgeri volucrum raucarum ad*
litora nubem, scribit, eum secundum morem prouin-
 ciæ suæ loquutum, in qua bene canentes cycni, rau-
 ciores vocantur. Sic etiam in hunc versum libri
 Georg. primi, *Stinâque quæ currus à tergo torqueat imos,*
 admonet, currus dixisse propter morem prouinciæ
 suæ, in qua aratra habent rotas quibus iuuantur.

Nec verò ex consuetudine tantum Romana, aut
 vt (loquitur vno in loco) ex solennitate tantum Ro-
 mana nonnulla trahit, sed nonnunquam & ex Ro-
 mana historia. Atque adeo alicubi nos docet, morem
 eius esse, historiam miscere: id est, in fictione sua poe-
 tica simul ad historiam alludere.

Sicut autem critici fuerit hæc omnia quæ dicta sunt aliâque nonnulla quæ libertati seu licentiæ poeticæ permittuntur considerare, vt non temere poetam reprehendat: ita etiam eius fuerit perpendere an poeta suo loco ea seu libertate seu licentia vsus sit. Neque enim ea quæ locis quibusdam conuenit, aliis etiam omnibus conuenire existimâda fuerit. Exempli gratia, licet Virgilius plerisque locis secundum ritum seu morem Romanû loqui sibi concesserit, nequaquam id vbiq;e, nisi præter decorum, concedere potuit: ac est etiam fortasse aliquis vbi illum non satis criticè (vt ita dicam) id sibi permisisse, quispiam ex criticis dixerit.

Nec verò minus diligenter animaduertendum est vbi poeta licere sibi voluerit opinionem vulgi sequi: nam hoc non animaduersum fecit vt loci nonnulli immerentes reprehenderentur. Ex iis autem est quidam, in quo etiam mentionem Seruij facere necesse habeo: & quidem ita vt eius defensionem aduersus eos qui poetam carperent probem, sed eum quo in illa vtitur sermonem improbem. In hunc enim locum libri Georg. primi,

Sæpe etiam stellas vento impendente videbis

Præcipientes cælo labi,

scribit, eum sequi vulgi opinionem. nō enim omnia prudenter à poeta dicenda esse. At quis de hoc illi assentietur, non omnia prudenter à poeta dicenda esse? Imprudenter certè hoc prudenter scripsit: quum longè aliud sit, dicere quidpiam sequendo vulgi opinionem, quàm aliquid non prudenter dicere. Tolerabilius certè fuisset loquutus, si vocabulo Sapienter vsus foret. Nam illarum omnium rerum cognitio

quæ

quæ & à vulgi opinione disidet & captum ingenij ac iudicij eius superat, sapientia posse appellari videtur. Talia sunt ea physica quæ subiūgit. scribit enim, quòd videmus è cœlo stellas quasi labi, *ὑποπόλας* esse ignis ætherij, quæ fiunt quum vehementior ventus altiora conscenderit, & trahere exinde aliquas particulas cœperit, quæ simulant casum stellarum. Cæterum vt rectè alioqui dixerat illum opinionem vulgi sequutum esse, ita rectè & paulo post ab illo id ipsum dicitur in hæc verba, -- *Et bibit ingens Arcus. Sic certè & Propertius, Cæruleus pluuias cur bibit arcus aquas.* Quinetiam Tibullus de eodem,

Quamuis prætexens picta ferrugine cœlam

Venturam admittat imbrifer arcus aquam.

Præsertim verò Plauti locus istud confirmat, ex vulgi opinione dictum id esse. Legimus enim apud eum,

Ecce autem bibit arcus: pluet credo hercle hodie.

Verum ad illum de stellis cadentibus versum vt reuertar, cautius certè ea de re scripsisse videri potest Naso, quum ita ex vulgi opinione loquatur, vt simul falli ostendat. Scribit enim Metamorph. lib. 11,

At Phæthôn rutilos flamma populante capillos

Voluitur in præceps, longoque per aera tractu

Fertur: vt interdum de cœlo stella sereno

Et si non cecidit, potuit cecidisse videri.

Nec immeritò (vt opinor) hanc sermonis formam aliqd cōmune habere dixerim⁹ cū ista, *aut videt, aut vidisse putat*, in qua Virgilius Apolloniū Rhodiū est imitatus, vel potius interpretatus, scribentē, *ἢ ἴδεν, ἢ ἐδιδουσκεν ἰδεῖν.*

Vt porro idem eadem in re peccauit vel potius peccasse visus est hic poeta Æncidos quinto, ita & ibi in idem reprehensionis genus incidit. Ibi enim

postquam dixit,

*Nanque volans liquidis in nubibus arsit arundo,
Signauitq; viam flammis, tenuesq; recessit
Consumpta in ventos, addit,*

-- cælo ceu sæpe refixa.

Transcurrunt crimēq; volantia sidera ducunt.

Vbi mirari quis possit, illum enarratorem (quemadmodum antea dixi) scribere, illum hoc poeticè dixisse secundum publicam opinionem. Quid enim minus poeticè dictum videri potest quàm quod è medio & quidem è vulgi opinione (nam publicam opinionem hoc sensu & alibi dicit) sumptum est: Sed perinde esse puto acsi diceret, illum, poetarum libertate seu licentia vtentem, permittere sibi, vulgarem opinionem aut saltem sermonem sequi. Cæterum postquam dixit illum poeticè loquutum esse secundum publicam opinionem: addit, *Nam (vt Lucretius dicit) ventus altiora petens, ætherium ignem secum torquet, qui imitatur stellas cadentes.* Quas autem esse dicit ignis ætherij *ὑποπόλας*, Græci vocant etiam *ὑπερλόπτας ἀστέρας* & *ὑπερλόπτας*. Sic (inquit Seneca) *quæ transuersæ dicuntur stellæ & cadentes, præteruolant & secant aera.* Videmus porro & Lucretium eadem vsum esse loquendi libertate qua Virgilium, quum in secundo eius libro legamus,

Non cadere in terram stellas & sidera cernis?

Versus autem proximè præcedentes sunt hi,

Nocturnasq; faces cæli sublime volantes

• Nonne uides longos flammarum ducere tractus,

In quas cunq; dedit partes natura meatum?

Minimè autem iis assentior qui in hunc Lucretii locum, afferunt istum Virgilij, tanquam cum Lucretiano conuenientem,

--suadentē

--*suadentq; cadentia sidera somnos.*

Alio enim sensu (vt opinor) hîc cadere sidera dicuntur quàm ab ipsomet Virgilio, Georg. libro primo, *stellæ Præcipites cælolabi*. Nam vbi scribit, --*suadentque cadentia sidera somnos* (scribit autem initio libri secundi *Æneidis*) iam propè exactum esse noctis tempus indicat: sicut libro octauo, his verbis, *primisque cadentibus astris*. Vbi tamen & Seruius fallitur in eo quod putat posse *Cadentia* epitheton siderum esse. *Aut epitheton est siderum* (inquit) *quæ semper & oriuntur & occidunt: aut certè maiorem noctis partem vult esse transactam*. Imò quàm vera est posterior hæc expositio, tam est falsa illa prior. Sed & Tiberius Donatus (quod minus mirandum est) malè exponit. Fateor tamen posse etiam duram videri hanc siue audaciam siue licentiam qua dicantur cadere sidera quorum acies hebescere incipit & fulgor obscurari, sub auroram, quam iam sol aduentat. Alioqui certè de illis tanquam de sole loquutus videri posset.

Hoc verò aliud est reprehensionis genus, non bene ab hoc poeta dictum esse libro xii,

Tum Venus, indigno nati concussa dolore,

Dictamnium genitrix Cræta carpit ab Ida,

Puberibus caulem foliis & flore comantem

Purpureo.

Nam aduersus hæc verba Dioscoridis de dictamno testimoniū producitur, ex libri iii, capite xxxii, neque semen neque florem ferre dicentis. Verùm longè abeundum non erat, sed tantum vertendum (sicut vulgò loquimur) folium, vt aliud de alio dictamini genere testimonium audiremus, ex quo non minus defendi potest noster poeta, quàm ex altero accusari.

ut omittam posse alioqui dici Theophrastum sequi.

Quid quòd alia etiam affertur lectio, in qua istud plantæ nomen minimè comparet? Ea enim est huiusmodi,

Ipsa manu genitrix Cretæa carpit ab Ida.

quam lectionem mirum est adeo placere Donato ut altera reiecta hanc amplectatur, præsertim quum in reiicienda illa, ratione parum valida nitatur.

QV I D quòd fuerunt qui & quasdam interpretationes Virgilij carpere ausi sunt? Ex iis certè Valerium Probū esse videmus apud Aulum Gellium. Ad quem tamen Valerium antequam veniam, de iis dicam qui istud libri VI, *mæstámque Eriphylen* reprehenderunt: quasi poëta Homericum illud *συγερὴ τ' Εριφύλην*, interpretari volente, sed non bene interpretante. Legimus enim in illo sexto libro,

*His Phædræ Procrinque locis, mæstámque Eriphylen
Crudelis nati monstrantem vulnera, cernit.*

Vbi enarrator, *Viruperatur sanè Virgilius quòd mæstam dixerit quam stygeren* (vel potius *συγερὴν* Græca scriptura) *legit. id est nocentem. Nam mæsta est συγερή.* Ita enim in Parisina patris mei Roberti Stephani editione legitur: sed in quibusdam aliis secus. hæc enim verba, *Nam mæsta est συγερή*, (vbi pro *est*, scribendum non *est* suspicor, ut postea dicam) ab illis absunt: & vicissim subiunguntur nonnulla quæ abesse ab illa videmus. Totus enim ibi locus ita scriptus est, *Viruperatur sanè Virgilius* (solet autem ita loqui hic enarrator, potius quàm dicere *Reprehenditur*: & illo *sanè* in talibus locis mirum in modum gaudet) *quòd mæstam dixerit quam συγερὴν legit. id est nocentem. Apud enim Homerum est ἰδὼν συγερὴν τ' Εριφύλην. Immo verò odio dignam & inuisam.*

Nam

Nam *suſcō* est *Odio habeo*, & *Inuisus sum*. *Licet Mæsta* est à *Styge*. Sed vereor ne hæc omnia quæ illi editioni adiecta sunt, sint supposititia, quū & à Seruij breuitate sint aliena, & aliquid ex iis omnino sit falsum. quis enim vnquam legit aut vnquam lecturus est *suſcō*, quod *Inuisus sum* significet? Sic tamen legitur in edit. Veneta anni 1507, quæ Io. Baptistæ Egnatij præfationem habet: necnon in Basiliensi quæ prodiit anno 1561. At verò illam multo breuiorem scripturam habent cum aliæ nonnullæ *endocots*, quæ inter typographicas haberi possunt antiquæ, tum verò in alia quadam Veneta anni 1499, per Iacobum Zachon. nisi quòd vbi habet Parisina, *quam stygeren legit*, in ea est, *quam stygeren legit apud Homerum*. quæ certè aut adiecisse Seruium, aut subaudienda constat reliquisse. Sed nec editiones istæ quæ breuiorem illam scripturam habent, cum locum fideliter scriptum nobis exhibēt, vt opinor. Nam quis Seruium *suſcō* exposuisse *nocentem* credat? Et tamen hæc deprauatio in illis quoque est editionibus quæ eam quam attuli adiunctionem habent: eo etiam magis in ipsis miram quòd illa quæ sequuntur, expositioni illi repugnent. Ad alteram autem deprauationem quod attinet, quæ hæc editiones non habēt, quòd locus in quo est, ab iis absit, non dubium est, meo quidem iudicio, quin mihi de illius correctione omnes subscribere necesse sit: vt Seruium & paucioribus verbis hoc contentum loco fuisse & ita eum scripsisse dicamus, *Vituperatur sanè Virgilius quòd mæstā dixerit quam suſcō* legit (vel, *legit apud Homerum*) nam *mæsta non est suſcō*. Et de his quidem placuit lectorem admonere, tum, ne Seruiū, dum reprehendentiū hunc Virgilij locum

mentionem facit, in multo iustiore incidere reprehensionem permetterem : tum, vt quanta cum cautione multos huius enarratoris locos legere nos oporteret, vel huius ipsius exēplo ostenderem. Interim tamen nolim te, eos etiam qui apud illum suspicionem omni carere debent locos, suspectos habere: vt à quibusdam haberi video, idque hanc potissimum ob causam, quòd repertū esse quoddam vetus exemplar audiuerint, vbi multa longè aliter legantur. Talia enim illa non esse (licet non pauca quæ magni momenti sunt, vel plura in illo exemplari sint quam in typographicis editionibus, vel aliter scripta) vt tantam nobis suspicionem afferre debeant, in meis Schediasmatum variorum libris ostendo. Cæterum Homeri versus ex quo verba illa petita sunt, est hic, ex Odyss. libro λ,

Μαῖεσ' ἐν τε Κλυμῆν' ἐν τε Ἰδῶν, συγερῶ τ' Εὐρυπύλῳ.

Verum ne, dum Seruium defendo, ipsum defendere Virgilium obliuiscar, immeritò carpi apud Virgilium illud *mæstam* dico, quasi Homericum συγερῶ interpretari volentem, sed malè interpretantem. Cur enim illum id vocabulum Homeri συγερῶ interpretari voluisse dicemus, quum id facere minimè necesse habuerit? Cur enim illi hîc idem quod alibi non licuerit, in quibusdam Homeri locis ab eius tamē verbis aliqua ex parte discedere?

SED in eorum mentione qui aliquam Virgilij interpretationem criticè aut tanquam critici reprehenderunt, tacendus non est Valerius Probus, à quo carpète illam insignem alioqui Didonis cum Diana comparisonem, inter cætera verbi γέγηθε interpretatio reprehenditur. Scribit enim Gellius, ex Probi

censura,

cenfura, Homericam quidem Latonam gaudium gaudere genuinum & intimum, atque in ipfo pene- trali cordis & animi vicens: at Virgilianæ Latonæ gaudia eſſe pigra & leuia & cunctantia, & quaſi in ſummo pectore ſupernantia.

Verùm, quum & alia (vti dixi) in comparatione illa reprehendat idem cenſor, audiendus eſt ipſe Gel- lius, quænam ea ſint narrans, libri noni capite nono. Poſtquam igitur quædam de ratione vertendi imi- tandique inſignes ſententias, allatis etiam exemplis è Virgilio, diſſeruit, *Et quoniam* (inquit) *de transferendis ſententiis loquor, memini auდიsse me ex Valerij Probi diſcipulis, docti hominis & in intelligēdis penſitandisque veteribus ſcriptis bene callidi, ſolitum eum dicere, nihil quidquam tam improſperè Virgilium ex Homero vertiſſe, quàm verſus hos amœniſſimos, quos de Nauſicæa Homerus fecit,*

Οἱ δὲ τὸν Ἀρτεμὶς εἶσι κατ' ἑρεος ἰοχέυεσσι.

Ἡ κατὰ τὸν Ἰάκον, &c.

Vbi obſerua, laudem Valerio Probo tribui, quæ ſi verè illi tribuitur, verè profectò critici nomine di- gnus fuit. Quod enim critici eſſe officium potius di- cemus quàm hoc? hoc inquam, vetera ſcripta callidè penſitare? Sed ad illam cenſuram veniamus. Primum omnium (inquit) diuerſum eſſe dicebat Probus, quòd apud Homerum quidem virgo Nauſicæa, ludibunda inter familiares puellas in locis ſolis, rectè atque commodè confertur cum Diana venante in iugis montium inter agreſtes deas: at Virgilium ne- quaquam rem conueniētem feciſſe: quoniam Dido in vrbe media ingrediens inter Tyrios principes, cultu atque inceſſu ſerio, inſtās operi (ſicut ipſe ait) regniquæ futuris, nihil eius ſimilitudinis ca- pere poſſet quæ luſibus atque venatibus Dianæ congruit. Deinde Homerum ſtudia atque oblectamēta in venando Dianæ honeſtè.

ap̄teque dicere: *Virgilium autem, quum de venatu dea nihil dixisset, introducere tamen ferentem pharetram in humero, velut onus & sarcinam.* Hæc ille: ad quæ antequam respondeam, te monebo, pro illis, *Primum omnium diuersum esse dicebat Probus, ista legi in quibusdā veteribus, Primum omnium id visum esse dicebant Probo.* quam lectionē sicut alias plerasque, ex multis vetustis codicibus sumptas, & à vulgatis non parum discrepantes, habet illa editio quæ ante biennium prodiit cum meis Parisiensibus in illas Noctes Atticas Noctibus. Neque tamen negauerim, alteram quoque illam posse tolerabilem videri: sed ita vt tolerabiliorem futurā fuisse dicendum sit, si post hæc verba, *quòd apud Homerum quidem virgo Nausicaa ludib. &c.* continuata orationis forma, scriptum esset, *apud Virgilium autem Dido in vrbe media ingrediens inter Tyr. princ.* Verùm, vt ad Probum reuertar, ad multa illius verba paucis responderi posse arbitror, si dicamus satis esse si comparatio in eo quod in illa præcipuum est & quidem eius præbet occasionem, conueniat: quoniam cætera velut appendices eius sunt tantummodo. Ac, quum hoc de ista Virgiliana posse dici, antea ostenderim, te vt eum locum in vna ex præcedentibus huius libri paginis legas (ea est autem potissimum 109) monuisse, satis habebō.

Immo verò nō satis id mihi erit, sed istud ὁμηρικόν, Virgilium loqui de regina, inter quam & illam νεάνισσα Nausicaam commune hoc erat, quòd ex amore τὰς νεοφρένας νεάζειν, & παίζειν, & modo non συμπτᾶν dici posset: quāuis interim externa omnia, vt suæ ætati, ita etiam regiæ maiestati, conuenientia haberet. Illa autem reprehensio de pharetra quam dat Dianæ, nulla venationis facta mētionē, perinde ac si onus & sarcinā ferentem

ferentem induceret, vereor ne videri etiam queat ridicula. Quis enim quærat cur Dianæ pharetra detur, nisi qui quæsiturus etiam sit cur Apollini cithara tribuatur?

Quinetiam aliam censuram aduersus vnum illius comparationis versum addere solebat Probus, vt idem ibidem refert. Pergens enim de illius discipulis loqui, (ex quorum relatione & superiora se habere dixerat) hæc adiicit, *Atque illud impensè Probum esse demiratum in Virgilio dicebant, quòd HomERICA quidem Ἀντὸς γαυδίον γαυδεατ γένυινον & ἰντὶμον, atque in ipso penetrati cordis & ἀνιμᾶς γιγὲς (siquidem non aliud est τὸ ἐνδὲ δὲ τὸ ἐπὲν Ἀντὸς) ipse autem, imitari hoc volens, gaudia fecerit pigra & leuia & cunctantia, & quasi in summo pectore super-nantia. Nescire enim sese quid significaret aliud Pertentant.* Hæc ille. Atego miror cur impensè miratus aut etiā demiratus sit Probus hanc Virgilij interpretationem: miror quibus argumentis probare se posse crediderit, talia esse illa gaudia quæ pectus pertentare dicuntur. Nam si verbum Tentare, ex quo esse Pertentare notum est, nihil vehementiæ haberet, quomodo ab Horatio (vt alia exempla omittam) de morbo non leui, sed vno eorum quos Latini Græcorum exemplo acutos vocarunt, dici potuisset? Scribit enim,

Si latus aut renes morbo tentantur acuto.

Quid quum verbum hoc illam epitaticam particulam assumit? Verùm & hoc videamus, an numerorum lege in eas angustias compulsus esset, vt hoc verbo, licet non satis apto, contentus esse deberet. Immo verò dicere alioqui poterat,

Latone tacitum peruadunt gaudia pectus.

Poterat & ita,

Latona in tacitum permanant gaudia pectus.

Poterat hoc quoque modo illud exprimere,

In tacitum penetrant Latona gaudia pectus.

Denique & ita loqui ei licebat,

Latona hinc tacita persentit gaudia mente.

Quòd si à me, cui fortasse multo magis quàm aliis
plerisque curta est supellex, in tot mutari formas
versus ille potest, quanto plures Virgilium ex suo tam
diuite penu deprompturum fuisse putamus, nisi co-
gnouisset primam illam habere unde omnibus satis-
facere deberet? Non video autem quomodo vsum
huius verbi reprehendere hîc potuerit Probus, nisi idè
& aliis duobus in locis fecerit: nimirum in hoc libri VII,

Ac dum prima lues vdo sublapsa veneno

Pertentat sensus, atque ossibus implicat ignem.

& isto Georg. primi,

N'onne vides ut tota tremor pertentet equorum

Corpora, si tantum notas odor attulit auras?

Sed, quoniam respondere posset Valerius Probus, se
non minus hoc in versu quàm in eo de quo agitur,
verbi istius vsum improbare: (nec certè mirum fuerit,
eum qui vno in loco voce quapiam abusus sit, in alio
quoque aut etiam in aliis idem facere) ex alio scripto-
re, qui & Virgilio est antiquior, & non parvæ autori-
tatis, exemplum vsum verbi illius afferam. Is est Lucre-
tius. nam primùm ad locum illum quem postremò
attuli quod attinet, apud eum verbum istud eidem
nomini iunctum habemus, libro VI. nam ut apud
Virgilium legimus, *tota tremor pertentet equorum Corpora.*
sic apud illum

Inde tremor terras grauitèr pertentat.

Iam ve-

rò & simplici verbo Tentare maiore inesse vim quàm

crediderit Probus, apparet ex hoc eiusdē poetæ loco,

Et quàm quæque magis cohibet res intus inane,

Tam magis his rebus penitus tentata labascit.

Subit porro vereri ne Probum illud etiam *tacitum* offenderit. At mihi tamē non absimile vero est, Virgilium ex Homero eius occasionem sumpsisse: apud quem aliter intellexerit illud *φρένα* quàm ipse Probus: quasi *ζέην δε φρένα* dictum ita esset vt alibi *εν θυμῳ χαῖρε*: eo videlicet in loco, *Εν θυμῳ γρηῦ χαῖρε, καὶ ἰχθεο*. His enim significatur quod Tibullus hoc pentametro dicit, *In tacito cohibe gaudia clausa sinu*. quamuis alioqui datiuī *θυμῳ* adiectio, non præfixa illa præpositione, alium quoque cum *χαῖρεν* etiam & *ζέην θέναι* vsum habere videatur: vt in meo Græcæ linguæ Thesauro propositis exemplis ostendi.

Cæterum Probus de eo etiā queri solitus erat, quòd Virgilius florem ipsius totius loci videretur omisisse, quia hunc Homeri versum exiguè sequutus esset,

Πᾶν δ' ἀεζνώμιν πέλεται καὶ λυδὲ τε πᾶσαι.

sed contra, hinc villo comparationis dispēdio potuisse omitti, docui itidem in iis quæ præcedunt: vt videbis, si ad paginam 112 regredi molestum non fuerit.

Enimvero istud quoque in Probi verbis confiderandum, dici ab eo, nihil tam improsperè Virgilium vertisse: quasi verò & aliis in locis illum non prosperè interpretandi munere functum esse constet. At ego contra aut nullum locum aut alios quosdam potius quàm hunc improsperè vertisse illum dico.

SUNT autem & alij loci Virgiliani, in quibus boni interpretis officio functum esse illum quidam negarunt. Ex iis est is in quo Pindari de natura & flagrantia montis Ætnæ carmen æmulari voluit: vt

loquitur apud Aulum Gellium Fauorinus: qui postquam de Virgilio inter alia & hoc dixit, eum, illa quæ perfecta expolitâque reliquit, & quibus sensus atque delectus sui manum supremam imposuit, omni poetica venustatis laude florere, sed quæ procrastinata sunt ab eo ut post recederentur, & absolui, quod mors præuerterit, nequiuerunt, nequaquam poetarum elegantissimi nomine atque iudicio digna esse (itaque morbo oppressum, quum aduentare mortem videret, petiuisse orauisseque à suis amicissimis impensè ut Æneida, quam nondum satis elimasset, abolerent: vel adolerent, ut habet illa editio cui meæ Noctes Parisinæ sunt adiunctæ) adiicit, *In iis autem quæ videntur retractari & corrigi debuisse, is maximè locus est qui de monte Ætna factus est. Nam quum Pindari, veteris poeta, carmen quod de natura atque flagrantia montis eius compositum est, emulari vellet, eiusmodi sententias & verba molitus est, ut Pindaro quoque ipso, qui nimis opima pinguique esse facundia existimatus est, insolentior hoc quidem in loco tumidiôrque sit.* Antequam autem ulterius pergam, monendum lectorem puto, in illa quam dixi noua editione non *sensus* sed *census* scriptum esse, vbi eorum quæ Virgilius perfecta expolitâque reliquit, fit mentio. Quæ noua lectio quamuis fronte prima videri mendosa possit, si quis tamen in isto nomine *census*, ad verbum illud *recenserentur*, quod non longo interuallo sequitur, respiciat, non aspernanda, (ne dicam alteri præferenda) videbitur. Ut verò ad Fauorini sermonem redeam, *Atque uti vosmetipsos* (inquit) *eius quod dico arbitros faciam, carmen Pindari quod est super monte Ætna, quantum mihi memoria est dicam.* Cui sermoni ipsius locum Pindari subiungit, ab his verbis initium sumēs,

Τὰς ἐρδύοντα μὴ ἀπλά-

τε πρὸς ἀγνόηται

ἐν μυχῶν παγαί.

Ac postquam totum locum protulit, *Audite nunc.* (inquit) *Virgilij versus: quos inchoasse eum verius dixerim quàm fecisse.* Portus ab accessu ventorum immotus, &c. Criticum autem, ubi sequentia adiecit, agens, *Iam principio* (inquit) *Pindarus veritati magis obsequutus, id dixit quod res erat, quòdque illic usu veniebat, quòdque oculis videbatur, interdum fumare Aetnam, noctu flammigare: Virgilius autem, dum in strepitu sonitùque verborum conquirendo laborat, utrunque tempus, nulla discretione facta, confundit.* Ac cætera persequens, & in illis non minus critica censura libertate (ut ita loquar) uti volens, addit, *Atque ille Græcos quidem imitatus, fontes ignis eructare, & fluere amnes fumi, & flammarum fulua & tortuosa volumina in plagas maris ferre, quasi quosdam igneos amnes, luculentè dixit: at hic noster, atram nubem turbine piceo & fauilla fumantem, πόρον καπνοῦ ἀΐδοντα interpretari volens, crassè & immodicè congescit: globos quoque flammarum, quod ille κρουνοὺς dixerat, duriter & ἀκρόεως transtulit.* Ad sequentia pergens, simulque reprehensionem suam continuas, subiungit, *Item, quod ait, sidera lambit, vacanter hoc etiam accumulavit & inaniter.* Quinetiam dixisse illum refert Gellius, id quoque inenarrabile esse & propemodum insensibile, quòd nubem atram fumare dixit turbine piceo & fauilla candente. Fumare enim non solere neque atra esse quæ sunt candentia. Nisi si candenti dixit peruvulgatè & impropriè pro feruenti fauilla, non pro ignea & relucente. Nam candens scilicet est à candore dictum, nō à calore. Ac, nequa pars huius loci irreprehensa relinquatur, adiicitur ex eodè Favorino, quòd saxa & scopulos eructari & erigi, eisdemque ipsos

statim liquefieri & gemere atque glomerari sub auras
dixit hic poeta, hoc nec à Pindaro scriptum esse, nec
vnquam fando auditum: & omnium quæ monstra
dicuntur (nisi *monstrosa* potius quàm *monstra* scriben-
dum est) esse monstruosissimum.

Eandem verò censuram iisdem ac totidem fere
verbis apud Macrobiū legimus, eam sibi, eadem
impudentiā qua & alios plerosque Gellij locos, ad-
scribentem. nihilo enim magis Fauorini quàm Gel-
lij vllam mentionem facit. Quo autem plures accusa-
tores habuit hic locus, eo magis operæpretium fuerit
& aliquem eius defensorem inueniri. Quid si verò
iam inuētus est? Immò ne dubitandum quidem esse
hac de re dicent omnes qui Iouiani Pontani dialo-
gum, quem inscripsit Antonium, legerint. Quæ igitur
ad Virgilij defensionem ab eo afferuntur, nec pi-
gebit nec pudebit adscribere: &, si qua insuper ad
eam facientia in mentem mihi venient, illis adicere.
Primum igitur dicit, Virgilium ipsum præ se ferre,
id consilij sibi non fuisse vt vellet pro assumpta &
quodammodo destinata materia describere: nec rei
causas exquirere, vt à Claudiano exquiruntur: nec
spumantis materiæ flumina velle ostendere, vt vo-
luit Pindarus: sed quū describere portum Æneæ ore
cœpisset, dixissetque ab aduentu ventorum immo-
tum, & ingētem ipsum quidem, subiunxisse rem ma-
ximè admirabilem, adeoque monstruosam, cuius Æ-
neas ipse memor factus esset, vt à portus descriptione,
rei ipsius miraculo auerteretur. Hoc est sermonis il-
lius principium: quem antequam vltius persequar,
ipsum Virgilij locum totum afferam,

Portus ab accessu ventorum immotus, & ingens

*Ipse, sed horrificis iuxta tonat Aetna ruinis.
Interdumq, atram prorumpit ad aethera nubem,
Turbine fumantem piceo & candente favilla:
Attollitq, globos flammarum, & sidera lambit.
Interdum scopulos auulsi que viscera montis
Erigit eructans, liquefactaque saxa sub auras
Cum gemitu glomerat, fundoque exæstuat imo.*

Ipse (inquit) portus, ingens quidem, hoc est, nauium plurimarum capax: sed auditu, sed visu mirabile est, Aetnam montem terrificis iuxta ruinis tonare. Qua commotus admiratione, atque à portu auersus, in illa explicanda primùm ab auditu cœpit. Atque hîc artificiosi poetæ prudens consiliû apparet, quòd in admirabili re enarrâda tractum se admiratione ipsa, ab initio statim ostendit. Quum enim nulli corporum videantur conflictus, è quibus soni fiunt, esse tamen audire non sonitum modò sed tonitrum ex horrificis montis eius ruinis. Et aliquanto pòst, Dehinc, inquit, quuñ auditui satisfecisset, trásit ad visum, aliquanto longius (nisi dicendum fuit diutius) in parte hac immoratus, vt per hunc sensum rem admirabiliorem redderet: quòd videndo quàm audiendo apparere plura soleant. Deinde, ad illud respondet de quo inter alia queritur Fauorinus, Virgiliû vtrunque tempus, diei videlicet & noctis, nulla discretionis facta, confudisse. eum enim dicit, vt audiëntium animos magis ac magis rei miraculo afficeret, non secreuisse ea quæ noctu quæve interdum videntur, Pindari exemplo: sed dixisse *interdum*; id est, nunc hoc, nunc illud.

Ad illud autem Fauorini, (quod tamen Gellio ascribit, haud scio qua de causa) perperam dictum esse

nubem atram fumare turbine piceo & fauilla candente, ita respondet vt neget animaduersum ab illo esse antiquissimum & Latinissimū loquēdi morem, Virgilio etiam familiarissimum. neque enim dixisse, *fumantem candente fauilla*: sed, *nubem candente fauilla*: vt dicitur Puella forma adeo venusta: &, Magno vir ingenio: &, quod in loco maximè simili legitur, *Ipse Quirinali lituo paruaq; sedebat Succinctus trabea*. Sicut enim ibi non *succinctus quirinali lituo*, sed *succinctus parua trabea*, Quirinalēmq; tenens seu gestans lituum: sic neque hīc dici *fumantem fauilla candente*, sed *fumantem turbine piceo*, & emittentem seu spargentem atque efflantem simul candentem fauillam. Expressisse enim quod fieri sæpiissime in aere videmus, vt è nigerrimis nubibus post tonitrum erumpant fulgura & coruscationes, videatūque interdum cœlum dehiscere flammāsque euomere: ac dici non posse quàm sibi vndique constet in similitudine eorum quæ fiunt in aere.

Antonium autem refert solitum eos irridere qui Virgilium dicerent voluisse montis Ætnę flagrantia ad Pindari imitationem exequi, eosque & cæcutire & delirare censuisse: nec Fauorinum sed Fabarinum vocasse, cūmq; naso suspendere. Pindarum enim ad fontium, fluminum, fluctuum similitudinem, rem omnem exequi: at Virgilium, nulla huiusmodi similitudine vsum, rebus ipsis inhærere, & quàm potest & Æneæ narrantis dignitas patitur, verbis explicare, ab ipso igne & à nubibus, & ab iis quæ in aere fiunt non recedentem. Et Pindarum quidem solum fluxum & scaturiginē habere quam in aquis imitetur: at Virgilium omnia pro materia próque suscepta explicatione à rebus ipsis non aliunde sibi ducenda atque ostendenda

ostendenda assumere. Ait denique videri Virgilium, posse parum hac in parte Pindarum probauisse, quid se totum ad amnes, ad fluctus, ad scaturiginem vertit, eructationem ipsam, quæque inter erumpendum eructandumque contingerent, inexpressè leuiterque attigerit, nec monstrum illud suum tum auditu tum visu mirabile plenè absoluerit. Affert verò & aliù huius poetæ eadem de re locum,

Vidimus vndantem ruptis fornacibus A Etnam

Flammarumque globos liquefactaque voluere saxa.

Atque hæc cum istis confert,

Interdum scopulos auulsaque viscera montis

Erigit eructans, liquefactaque saxa sub auras

Cum gemitu glomerat.

Prudentissimè omnia, inquit. nam *interdum*, quia non semper. & *cum gemitu*, quia tanta ebullitio & pugna illa intra cauernas, ventorumque ac cõcepti ignis violentus ac præceps exitus, absque ingenti fragore fieri nequit. Et *erigit eructans*, quia ruptis caminis ac velut effractis claustris, igne, vento, vaporibus, quæcunque obuiam facta sunt, in altum tolluntur. Et quum dicit *glomerat*, ostendit pugnam confligentium corporum: (quò tamen à poeta in verbo illo respici, nescio an ei sit assentiendum) & quum dicit *viscera*, & *liquefacta*, & *auulsa*, designare tum ingentissimam vim ventorum, tum quòd ignis est excoquere ac liquefacere lapides: tum quòd materia ipsa monte continetur, atque illic generatur. Dixerat autem aliquanto antè, Pindaro quidem dare posse veniam lyricum carmen: at Virgilio implendam fuisse tubam illam heroicam. quod ab eo ita factum esse, vt monstrum Pindaricum per tonitrum, ruinas, turbinem, picem, candentem fauil-

lam, erectos scopulos, auulsa viscera, saxa liquefacta sub auras, ad sidera vsque intonet, & aures, oculos, animosque admiratione simul atque horrore compleat. Et ad verba illa veniens,

-sed horrificis iuxta tonat Aetna ruinis,

eum coepisse à tonitru dicit, in quo Pindarus obmutescit: *ὁ γὰρ πῶς Ἀνὰ πύλας τοῦ βάρβαρου ἰδὲ μὲν ἄνθρωπον*

Atque hîc ad illam Fauorini reprehensionem reuertens, de eo quòd tempus vtrûque nulla discretione facta confuderit, eum id fecisse ait, tum vt rem admirabiliorem redderet, tum vt qualis res ipsa esset exprimeret. Neque enim noctu solum illos flamarum globos cerni, sed etiâ interdiu, quoties & aer est nubilus, & cacumen montis exanhelatis incendij fumigationibus caligat atque offunditur.

Ad illud autem quod obijci possit eum omisisse, fluere videlicet liquecentem illam materiam mare versus, ita respondet, vt dicat, primùm nec mare versus semper fluere (nam & sæpenumero in mediterranea elabi) deinde quòd quum dixisset, *sub auras glomerat*, visum illi esse, quodcunque adderetur, minus futurum: vt profectò minus est mirum fluere decidentem illam liquefactamque materiâ, quàm ex imis terræ visceribus ad auras maiore quàm exprimi possit impetu ferri. Itaque hoc omisso, vel potius despecto ac repudiato, concludere, *fundoque exæstuat imo*: relinquentem, in audientium animis, quæ non cernerentur, cum admiratione cogitanda, atque, qui intus æstus, quæ ruinæ, quanta etiam certamina, ex ijs quæ oculis obijcerentur, æstimanda.

De isto autem hemistichio, & *sidera lambit*, quod Fauorinus vacanter & inaniter accumulasse illû pronuntiavit,

nuntiauit, scribit, eum hæc addidisse, vt, quò ultra prodiret non haberet. Et alibi, exuperantiam esse ait poetarum propriam, quæ vix alij cuiquam loco magis quàm isti conuenire possit.

Cætera apud eum videnda relinquam, (& nominatim ea quibus Virgilium tanquam nimis hoc loco tumidum iure accusari negat) & meam de ista defensione sententiã proferens, hoc primùm dicam, illam Virgilianorum versuum reprehensionem, tanquam Pindari versus malè interpretantium, meritò reprehendi: quum minimè illis propositum fuisse eos interpretari, sed tãtùm aliquid eorum imitari, non solum sit credibile sed planè credendum sit: ideòque hîc eodem defendi modo possit quo & antea defendendum aiebam de eo quòd mœstam Eriphylen dixit, quum Homerus *εὐφύλην* Eriφύλην dixisset. Hoc deinde addam, hunc defensorem non debuisse (meo quidem iudicio) negare posse dici *fumantem candente fauilla*, sed concedere ita dictũ esse, simulque contendere, ita loqui eum potuisse: &, si qua hîc acyrologia vti sibi permiserit, eã potius in vocabulo *fauilla* quàm in *candente* esse. Neque tamen interim inficiari velim, dici posse *nubem candente fauilla*: sed crediderim, hunc poetam, si ablatiuo ita vti voluisset, potius hæc verba præpositurum quàm postpositurum fuisse: & dicturum, *-nubem candente fauilla, Turbine quæ fumat piceo*. Verùm, si Pontano concederem, ita Virgilio patrocinandum esse, at certè alium locum ab eo in exemplum afferri debuisse dicerem quàm istum,

Ipse Quirinali lituo paruaque sedebat

Succinctus trabea,

Quamuis enim ea huius loci expositio quam affert,

autoritate Gellij nitatur, minimè tamen necesse videri ad eam confugere, vt ipsum aduersus Higinum defendat, ostendam in sequentibus.

PRIVS autem alia, quæ idem Higinus, criticè, aut saltem criticum agens, in eodem poeta notauit, proponenda simul & examinanda sunt. Scribit igitur idem Noctium Atticarum autor, libri decimi capite decimosexto, reprehendi ab Higinio Virgiliû de eo quod in libro VI. legimus, de Palinuro apud inferos petente ab Ænea vt suû corpus requirat, & sepeliendum curet. Ibi enim eum hæc dicere,

*Eripe me his inuicte malis: aut tu mihi terram
In iyce (nanque potes) portûsque require Velinos.*

Quærit enim quomodo Palinurus aut nouisse, aut nominare potuerit portus Velinos, & Æneas ex eo nomine locum inuenire: quum Velia oppidû, à quo portum qui in eo loco est Velinû dixit, Seruio Tullio regnante Romæ post annum amplius sexcentissimum quàm Æneas in Italiam venit, conditû in agro Lucano & eo nomine sit appellatum. Ex iis enim qui ab Harpalo Cyri regis præfecto ex terra Phocide fugati sunt, alios Veliam, alios Massiliam condidisse.

Inscitissimè igitur (inquit) petit vt Æneas portum Velinum requirat, quum id nomen eo tempore fuerit nusquam gentium.

Quinetiam occurrès illi quod pro Virgilio respondendum esse videbatur, fatetur quidem poetas quædam *κατὰ πρόληψιν* historiæ (quam vocari anticipatiōnem, antea docui) dicere ex sua persona solere quæ facta ipsi postea scire potuerint: atque hoc illis cōcedi: sicut Virgilium sciuisse de Lauino oppido & de colonia Chalcidensi (atque hinc - *Lauinâque venit Littora*, item *Chalcidicâque leuis tandem super astitit arce*, dixisse)

se) *sed Palinurus qui potuit* (inquit) *scire ea quæ post annos sexcentos facta sunt?* Quibus addit & aliud quod afferri posse ab aliquo Virgilij defensore videbatur: *Nisi quis* (inquit) *eum diuinasse apud inferos putat, perinde ut animæ defunctorum solent.* Verùm & huic defensionì ita occurrit, *Sed & si ita accipias* (quanquam non ita dicitur) *AENEAS tamen, qui non diuinabat, quo pacto potuit requirere portum Velinum, cui nomen tunc, sicuti diximus, nullum fuit?* Hæc ille: qui tamen hoc Virgilio per imprudentiam excidisse videtur arbitratus esse, non autem ignorantia errasse, quum dicat se existimare, illum, nisi mors occupasset, correcturum fuisse.

Nunc, an Iouiani Pontani defensio huic accusationi ἰσχυρὸς dici possit, videndum est. Is postquam dixit, Iulium Higinum sibi non videri æquum, qui Virgilium accuset quòd littus Velinum ex ore Palinuri dixerit, quum Veliam Seruio Tullo regnante conditam fuisse tradat, sexcentesimo post Aeneæ aduentum in Italiam anno, aut etiam amplius: ac si poetis permissum non sit quædam etiam ad sua tempora in carmine referre, ut locorum, ut fluminum nomina, ut armorum genera: addit, *Dicat mihi velim Higinus cur non etiam accusat Virgilium, quòd AENEAM, qui Troianus esset, Latine loquentem inducat.* Et multa huiusmodi permittenda poetis esse dicit, in quæ ipsos incidere, etiam volentes, non rerum ignorantia deceptos. Hæc ille: inter quæ unum est quod illi fortasse multi non concesserint, non minus licuisse Virgilio nomen usurpare quod sua, non autem eius quem loquentem inducit ætate in usu esset, quàm AENEAS Latinum sermonem tribuere, quum tamen Troianus esset. fieri enim potest ut quispiam alia etiam quàm sua lingua

utatur: at verò ut aliena lingua utens, locum aliquem eo nomine quod nondum ipsi impositum sit appellet, id verò quod fieri potest:

Sed quoniam Higino à quibusdam hoc obijcitur, tanquam absurdè dictū, nullum nomen eo quo ista contigisse narrantur tēpore, huic portui fuisse: quum necesse fuerit Palinuro, ad locum indicandum, aliquod ei nomen dare: videndum ne mendosè scripta sint apud Gellium ista, *quo pacto potuit requirere portum Velinum, cui nomen tunc, sicuti diximus, nullum usquam fuit?* & scribi debeat, *cui nomen id tunc.* & hæc verba, *nullum usquam fuit*, perinde sint intelligenda ac si dictū esset, Non fuit usquam. Higinum enim non aliud quàm quod antea dixerat, dicere & hic voluisse, ostendunt illa, *sicuti diximus.*

Quod autem ab Higino ad Virgilij defensionem affertur (cui tamen defensionem quid possit obijci ostendit) de Palinuri apud inferos diuinatione, perinde ut animæ defunctorum diuinare solent, non fuisse ab eo excogitatum, sed ab aliis iam allatum, ex eo credibile est quòd à Seruio quoque eius sit mentio. Postquam enim dixit, Veliam tempore quo Æneas ad Italiam venit, nondum fuisse: ideòque esse anticipationem: addit, *Quanquam alij ad diuinantis scientiam referunt, quasi ab umbra dictum, cui præcognitum erat, id nomen per posteros illi imponendum.* Quinetiam adiicit, *Ergo portus Velinos, id est, vocandos aliquando Velinos.* Sed in mentem Seruio non venit, sicut Higino, quod huic defensionem potest opponi: nimirum, quomodo Æneas, qui non itidem diuinabat, portum Velinum potuerit requirere. Ad quam aduersariam quæstionem non male fortasse respondebit qui dicet debere à nobis κατὰ τὸ σιω-

τὸ σιωπώμενον intelligi, Æneam Palinurum interrogasse. quinam illi portus essent quos Velinos appellabat. Esse enim & alia multa quæ nisi κατὰ τὸ σιωπώμενον à nobis intelligantur, miraturi & reprehensuri simus, antea monui.

Verùm (vt tandem aliquid noui afferam, quo & Higino respōdeam & Virgilio patrociner) cur non, poeticæ fictionis licētia, fingere ei licuerit, id nomen, quod recens aut saltem penè recens erat, vetus fuisse? Hoc enim si admittatur, ne anticipationem quidem allegare necesse erit: ad quā alioqui non dubito quin sit confugiendum: quamuis & huic aliquid Higinius opponat. Sed animaduertere debuit, poetæ duobus modis anticipatione vti, nonnunquam in persona sua, interdum & in eius persona quem loquentem inducunt. Quum autem dicat in hunc locū Seruius, illam quidem, esse tolerabilem: at hanc, vitiosam: ego, quam vitiosam vocat, durā tantummodo dicendam esse, ausim contendere.

Hvīc loco alium subiungit Higinius, quē itidem correcturum fuisse Virgilium, nisi mors occupasset, existimat. Nam quum Thesea inter eos nominasset, qui ad inferos adissent ac redissent, dixissetque,

-quid Thesea, magnum

Quid memorem Alciden? & mi genus ab Ioue summo est:
postea tamen inferre,

-sedet æternūmque sedebit Infelix Theseus.

Et tanquam existimans repugnantia eum loqui, *Quī fieri potest* (inquit) *vt æternūm apud inferos sedeat, quem supra cum illis nominat qui descenderint illuc, atque inde rursum euaserint? Præsertim quum ita sit fabula de Theseo, atque si (ita enim scribendum, non atque sic, vt in superioris tem-*

poris editionibus legitur) *Hercules eum euellerit è petra,
& in lucem ad superos reduxerit.*

Atqui Theseus (vt in eodē illo dialogo idem Pontanus scribit, ad hanc objectionem respondens) viuens Herculem ad inferos est sequutus: inde autem Herculis ipsius præsidio euasit, vt est in fabulis. Post mortem verò, quum anima eius ad inferos delata esset, nunquam ad viuentes rediit, sed propter filium iniustè occisum, sedet illic, atque æternùm sedebit, iniquissimam Hippolyti mortem infelicitè deplo-
rans. Rectè igitur & antè viuum rediisse ab inferis ait (vnde argumentandi locū AENEAS cepit) & post inter eos qui mortui essent enumerat. Neque enim hæc sibi aduersantur. Haftenus ille: à quo fortasse dicet aliquis afferri & istud debuisse, ita AENEAS facere mentionem Thesei inter eos qui ad inferos ierint atque inde redierint, vt tamen ex eius verbis reditus illius minimè colligi possit: multo etiam minus ex verbis Sibyllæ: quum dicat,

-facilis descensus Auernei,

Noctes atque dies patet atri ianua Ditis:

Sed reuocare gradum, superasque euadere ad auras,

Hoc opus, hic labor est.

Accertè, quamuis passim legamus, Theseum ab Hercule esse liberatum, quum ad rapiendā Proserpinam cum Pirithoo profectus, vnà etiam cum eo comprehensus & vinctus fuisset: Seruius tamen (tanquā hoc dissimulans) non aliud scribit, quàm Theseū rapiendæ Proserpinæ causa ad inferos cum Pirithoo venisse, & illic retentum pœnas luere. vnde scriptum est ab eodem poeta, *-sedet æternùmque sedebit Infelix Theseus.* Et vbi ad eum huius sexti libri locū venit in quo verba

verba illa habentur, *sedet, æter. &c. contra opinionem* (scribo autem *publicam opinionem, aut vulgarem opinionem*) dictum hoc esse tradit: quod feratur ab Hercule esse liberatus, quo tempore ita eum abstraxit ut illic corporis eius partem relinqueret. In illum autem præcedentem locum, *Quid Thesea?* annotarat etiam, durum esse exemplum: ideoque in eo non esse immoratum. Et addit, *Dicit autem inferos debere patere pietati, qui patuerunt infanda cupienti.* Vocari igitur ab eo *durum exemplum* puto quod est odiosum.

Quinetiam aliud fortasse nobis Virgilium defendere volentibus, patere effugium aliquis existimet: nimirum ut dicamus, eundem poetam diuersas eadem de re fabulas (sicut & in præcedentibus admonui) diuersis in locis sequi. Atque huic patrocinio patrocinantem fortasse Seruium habere possemus: quamuis, ubi poetas frequenter fabulas variare scribit, de ea quæ apud diuersos poetas est variatione loquatur. Sed parum tutum hic istud effugium esse crediderim: præsertim quum in vno eodemque huius poematis libro variare poetam nostrum dicendum esset.

Denique sunt qui alia via hinc effugere volentes, culpam in librarium contulerint, & *Thesea* pro *Terea* scripsisse dixerint. Horum autem in numero est vir, ut magni nominis, ita etiam magnæ eruditionis, Ioannes Brodæus: sic tamen ut hoc timidè quodammodo dicere videatur.

Nunc ad tertium & vltimum veniendum est locum, in quem eiusdem Higini censuram ibidem habemus. *Idem* (inquit Gellius) *his versibus errasse Virgilium dicit,*

Eruct ille Argos Agamemnoniâsque Mycenæ,

Ipsumque Æaciden, genus armipotentis Achilli,

Vltus auos Troia, templa & temerata Minervæ.

Et qua in re, vel potius quibus in rebus, errasse illum existimauerit, adiicit. *Cōfudit* (inquit) *& personas diuersas & tempora. nam neque eodem tempore, neque per eosdem homines cum Achæis & cum Pyrrho bellatum est. Pyrrhus enim, quem dicit Æaciden, de Epiro in Italiam transgressus, cum Romanis depugnauit aduersus Manium Curium, in eo bello ducem. Argium autem bellum, id est Achaicum, multis post annis à L. Mummiō imperatore gestum est. Quod si eidem credere volumus, vnum verum eximemus, vt hunc locum censuræ seu reprehensionis eximere possimus. Potest igitur* (inquit) *medius eximi versus, qui de Pyrrho importune immixtus est: quem Virgilius procul-dubio exempturus fuit.*

At verò idē cuius & suprà mentio facta fuit, Pontanus, hanc censuram refellens, hunc reprehensorem reprehendit, primū quod de Pyrrho non de Perse rege dictum illud putet: quum non victus sit à populo Romano Pyrrhus, neque regnum Epirotarū Pyrrho viuentē captum sit, atque in prouinciā redactum: sed Perse, qui à Paulo ductus est ante triumphum: quo capto Macedoniāque spoliato, Æacidarum imperium finem habuit: ita vt, hoc superato, regnōque Æacidarū deletō, populus Romanus Troiæ ruinas vltus videri potuerit. Deinde, quod non animaduertit, induci à Virgilio Anchisen nequaquam singulos referentem qui ab Ænea originem ducturi essent, sed quosdam tantū: neque tempus ordinēve seruari: quippe quum de Cæsare atque Pompeio prius quàm de Fabio Marcello & Scipionibus mentionē faciat. Satis enim habuisse Anchisen, quibusdam

busdam nominatis, quibusdam vero à rebus quas gesturi erant significatis, spe atque gaudio futurae stirpis AENEAM implere. Ideoque, quum dicit,

Ille triumphata Capitolia ad alta Corintho

Victor aget currus caesis insignis Achivis,

iure posse videri MUMIUM, qui Achaicus cognominatus est, quique Corinthum sustulit, significare: post verò, quum addit, *Eruet ille Argos Agamemnonisque Mycenae*, alium significare. atque hunc esse Paulum, qui Persen vicit, regnumque Aecidarum subuertit. Tandemque sermonem istum hisce verbis claudit, *Quaquam autem Paulus neque Argos euerit neque Mycenae*, hoc tamen, ut AENEAM soletur, ab Anchisa dicitur, cuius ipsius posteri euersuri essent Argos, siue Achaicum (quae arx videbatur Achaeorum, quorum principes aduersus Troianos coniurauerant) siue Thessalicum, quando ducum Thessaliae virtus in eo bello plurimum enituerit, & Mycenae, Agamemnonis patriam, qui fuit Graecorum ac belli dux. Hæc ille: qui malè in Gellium quoque tanquam Higino suffragantem inuehitur: quum ne innuat quidem quid sibi de illa Higini reprehensione iudicandum videatur. Cæterum omittendum non est, admoneri nos à Seruio, subaudiendū esse ille, cum his verbis, *Ipsūque AEaciden*. Pyrrhum enim, quem AEaciden dicit, à Curio & Fabricio victum esse, ferentem Tarentinis auxiliū: at verò Quintum Metellum & Mummiū Argos & Mycenae vicisse. Ac Seruio ad stipulantes quidā non tantum ille subaudiendum hinc putarint, sed ille alius.

His porro Higini reprehensionibus addēda est vna eiusdē, de epitheto vna eiusdē, de epitheto quod in vno eorū qui allati sunt locorū habemus: quā à Gellio prætermisā esse miror, quū apud Pomponiū Sabinū

ea legamus. Sed vereor ne ille Higini metem non satis intellexerit. nam legimus apud Sabinum, *Higinus hunc locum reprehendit quod dixerit magnum, & paulo post dicat, -sedet aeternumque sedebit.* Et addit, Alexandrum legere, *-magnum Quid memorem Alciden:* quia alibi dicit, *Is magnum Alciden contra stetit.* Atqui non carpit apud Gellium Higinus illum Virgilij versum ob istud epithetum, sed alia (ut videre est) de causa. Neque, verò si epithetum *magnum* ad *Alciden* retulit (ut cum hoc nomine non cum altero apud Gellium iungi videmus, & ut iungendum censuisse Alexandrum scribit Sabinus) fuit cur illud carperet. Fortasse igitur memoria lapsus Sabinus Higinio reprehensionem adscribit quæ aliis cuiuspiam est. Quocunque autem modo se res habeat, necesse est apud eum post hæc verba, *sedet aeternumque sedebit*, addi ista, *Infelix Theseus.* nam eundem & magnū & infelicem vocare, minimè consentaneum rationi videtur. Fuisse porro controuersiam de hoc epitheto *magnum*, utri addendum nomini esset, ex ipso etiam Seruio discimus. Nam, *magnum Quid memorem Alciden*, melius distingui scribit: licet quidam legant, *Thesea magnum*, ut epithetum ei dent qui per se non est magnus. nam Herculem & sine epitheto *magnum* intelligi. *Sed melius est (inquit) magnum dare Herculi quàm sacrilego.*

Ex his quoque apparet quàm periculosum sit ei qui critici (qualem esse debere ostendi) nomine dignus non sit, criticum velle agere: & quàm multis interdum reprehensionibus reprehensiones *νετινοῦ* aliquis *ἀνεπίτρος* iudicantis possint esse obnoxia.

SED ut ab his locis, in quibus Gellius indefensum Virgilium aduersus Higinum relinquit, ad alium veniam

niam in quo se defenforem eius constituit, & de quo verba me facturū promisi, audiamus quæ libri quinti capite octauo scribit. Id caput ab hisce duobus verbis initium habet,

Ipsē Quirinali lituo paruaque sedebat

Succinctus trabea, laeuâque ancile gerebat.

Quibus hæc subiungit, In his versibus errasse Virgilium Higinus scripsit, tanquam non animaduertit deesse aliquid hisce verbis, *Ipsē Quirinali lituo*. Nam si nihil (inquit) deesse animaduertimus, videtur ita dictum ut fiat *lituo & trabea succinctus*. quod est (inquit) absurdissimum. Quippe quum lituus sit virga brevis, in parte qua robustior est, incurua, qua augures utuntur, quoniam modo *lituo succinctus* videri potest? Sed Gellius ipsummet Higinum parum animaduertisse ait, hoc ita esse dictum ut pleraque per defectionem dici solent. veluti quum dicitur, *Marcus Cicero, homo magna eleuentia: & quasi, Roscius, histrio summa venustate*. Non enim plenum hoc ac perfectum esse, sed tamen pro pleno atque perfecto audiri: sicut & istud eiusdem poetæ *Victorem Buten immami corpore*. id est, corpus immane habentem. Itemque alibi,

In medium geminos immami pondere castus Proiecit.

Ac similiter,

-domus sanie dapibusque cruentis

Intus opaca, ingens.

Sic igitur hoc quoque videri dictum debere, *Picus quirinali lituo erat*, sicuti dicimus, *Statua grandi capite erat*. Nam *Est, & Erat, & Fuit*, plerunque abesse cum elegantia, sine detrimento sententiæ.

At ego & malè hîc accusari ab Higinio Virgilium & malè à Gellio defendi aio. ita enim (meo qui-

dem iudicio) defendendus potius erat, vt diceretur potuisse ita loqui, *succinctus lituo & trabea*. quod plerunque vnum participium aut verbum duobus nominibus iungatur: vni quidem, seruata proprietate: alteri autem, eam non item seruando, sed potius *à vobis*. Neque tamen ignoro (sed potius miror) illum inter doctissimos doctissimū Adrianum Turnebum scribere itidem, *Ipse Quirinali lituo* sibi videri ita dictū vt dicimus Hominem præstanti sapientia, quum significare volumus eum qui præstantem sapientiam habeat: vt Quirinali lituo, sit Quirinalem lituum habens. Fatetur tamen, istud aliquanto insolentius minusq; consuetū esse: sed addit, à cōsuetudine nō raro recedere poetas solere, & hoc ipso decus & ornamentum suo carmini quærere. At ego nō solum aliquanto insolentius, sed nimis insolens esse istud aio: & credere exemplo, addere etiam propemodum audeo. Contrā autem illius quod dixi, nimirum vnum participium aut verbum duobus nominibus iungi: vni quidem, ita vt retineatur proprietas, alteri autē, eam non item retinendo: illius inquam vsus siue participij siue verbi, exempla suppetunt plurima: quorum vt recordemur, reuocare in memoriā debemus quod à grammaticis zeugma appellatur.

Iam verò, ex iis quos Gell. affert in exemplū locis, tertiū præcedentibus similem esse, nequaquam concesserim. Nam in his, *Buren immanni corpore, & Cæstus immanni pondere*, ablatiuum audimus quem nec soluta oratio refugit: at, *Domus sanie dapibúsque cruentis*, nimium nouè insolentérque non illic solum sed in carmine etiam diceretur, ab eo qui significare vellet domum quæ saniem & dapes cruentas haberet. Ac profectò, si aliud

si aliud ex hoc loco effugium non pateret, dicerem potius suspectam mihi esse eius lectionem, & scribendum videri, *domus sanie dapibusque cruenta*: sed aliud se offert, quod minimè tam audax tamque periculosum est. Hos enim ablatiuos referre possumus (meo quidè iudicio) ad nomen *opaca*, vt participij Opacata fungatur vice: & intelligamus, saniem ac dapes cruentas domum tenebrosam reddidisse. Quæ enim atra sunt, & eum in quo posita sunt locū, atrum quodammodo videntur reddere. Saniem autem atrii coloris esse, cum aliunde scimus, tum verò ipsemet poeta statim post *sanguine atro* dicens, nō aliud quàm quod saniem dixerat, intellexisse existimatur.

Locvs autem hic me admonet vt de aliis etiam nonnullis verba faciam, quibus itidem peregrinam quandam (vt ita loquar) Latinitatem & criticorum reprehensionibus obnoxiam, subesse, dicamus necesse est, si quosdam grammaticos atque adeo nonnullos ex ipsis etiam enarratoribus sequi velimus. Quo in numero quauis ponendæ sint multæ Nonij Marcelli expositiones (de quibus alius erit dicendi locus) ponendæ & quædam Tiberij Donati (quibus & aliquot Probi atque Asperi, nec non Urbani, Carminij, & quorundam aliorum enarratorum, adijci possent) contentus ero tamen nonnullis earum quas apud ipsummet Seruium obseruauī, & quas nōdum à quouam reprehensas cōperi. Apud ipsummet Seruium inquam, quem alioqui plerunque *νεττιλω* quandam in alios enarratores exercere censuram videmus: ac minimè *ἀνείπας* illam quidè interdum. Sed neminem & sapius & iustius ab eo reprehensum fuisse puto quàm Tiberium Donatum: quippe qui alicubi non-

nulla repugnantia etiam quantitati syllabica in mediū affert. Tale est quod de voce *littus* scribit, in istud hemistichium, libri *Æn.* 11, *—iacet ingens littore truncus,* hic vocem *littus* significare locum ante aras, à litando dictum. Quam eius sententiam Seruius referens, merito ratione carere tradit: quum à Litando necesse sit breuem esse syllabam *li*: ita vt stare verius non possit. Sic verò & in istum locum libri viii,

Haud procul inde citæ Æternum in diuersa quadrigæ

Distulerant, Donatum contra metrum sentire admonet, quum *citæ* exponit diuisæ. nam *citus*, quum diuisum significat, syllabam longam habere. Sed hæc tamen duo ἀμαρτήματα, siue duo ἀρροήματα quantitatibus syllabicæ, magis venia possint videri digna quàm alia quædam: ex quibus est, quod pro *exilio* scribit *exilio*, in isto versu, quem habet finis libri secundi,

Collectam exilio pubem, miserabile vulgus.

Quomodo enim ignosci huic ignorationi queat, *Illū* primam syllabam productam habere? Digna est, aut etiam dignior quæ eodem in numero ponatur, quædam eius in hunc locum commentatio, quæ à Seruio refertur. Quum enim legamus libro iii,

—vna vndique circum

Fundimur, & telo lumen terebramus acuto,

Ingens, quod torua solum sub fronte latebat,

Argolici clypei aut Phæbeæ lampadis instar:

Et tandem læti soc. &c. ille (Donatus inquam) latebat ausus est late patebat exponere. Aliquid noui iam attulerat, quum *terebramus* in *tenebramus* mutandum censuerat: sed hoc fortasse risum tantum mouere debebat: at cui post risum non etiā bilem alterū illud moueat? Atqui non leguntur hæc verba in typographicis commen-

commentariorum Donati editionibus, nec in suo veteri codice ea inuenit Pierius. Quid tum? Sicut alia plurima quæ Donatus scripsit, in iis quæ extant exemplaribus non leguntur, (vt taceam tam multas in tam multis locos ἐλλείψεις) ita, hoc non legi, minimè mirandum est: præsertim quum non absimile vero sit, aliquem, honori illius grammatici consulere volentem, ea verba detraxisse. Vtunque certè se res habeat, nequaquam credibile est, Seruium tale quidquā ausurum fuisse fingere apud eos qui mendacij statim conuincere illum poterant. Adde quòd alia multa apud eum absurda faciunt vt hoc etiam, quantumuis absurdum, alienum ab eo videri non possit. Iam verò & hoc non parum ad fidem huius rei nobis faciendam valere debet, quòd in alium etiam eiusdè libri locum Seruius hanc expositionem ex Donato affert: in versum videlicet 535, cuius initium est *Ipsè later*.

Quæ quum ita sint, aliorum quæ vt à Donato indoctè dicta (etiamsi non adeo absurdè vt quæ modò cōmemorauimus) ita à Seruio doctè & criticè reprehensa fuerunt, mentionem non faciam: nec eorum quæ in aliis enarratoribus, tanquam criticus & censor, reicit: sed ad quasdam ipsiusmet commentationes (vt sum pollicitus) veniam, quæ & ipsæ peregrinam illam quam dixi Latinitatem inuehere videntur. Initium autem à loco sumā, de quo fortasse pauciores quàm de aliis mihi assentientes habebō. Is est hic, *Æneid.* libro x,

Ter conatus vtrunque viam, ter maxima Iuno

Continuit, iuuenemque animi miserata repressit.

Hic enim ille, *Animi miserata*, pro *Animo miserata*, inquit. Nam figuratè loquutus est, sicut, *O prestans animi*, pro,

animo: & Illius rei, pro, Illare. At ego Virgiliū *animi* quidem scripsisse, sed hoc genitiuo ablatiui loco vsum non esse dico. non enim *animi* cum *miserata* iunxisse, sed *animi* cum ellipsi Græca dixisse, per quam subaudiendum *eveng* relinquitur. Atque adeo Latinitatem hoc posse tolerare nego, vt dicatur, Miserari aliquem *animi*, vel *mentis*, ad significandū, Miserari aliquē *animo*, vel *mente*: siue, in *animo*, aut in *mente*. Vt omitterem, fore pleonasticam illam genitiui *animi* adiectionem, si ita intelligatur. Contrā autem, si iuuenem propter suum animum *miserata* esse dicatur, optimè id cum paulo antè præcedente versu conueniet,

Hæc memorans, animo nunc huc, nunc fluctuat illuc.

Quod enim subiungitur, *iuuenemque animi miserata*, perinde erit ac si scriberet, *Miserata iuuenē tantarum animi fluctuationum causa.*

Neque verò Arusiani Messi adeo me mouet auctoritas vt cum eo aliter de hoc loco sentire possim. Scio enim illum in exemplis Virgilianarum eloquutionum, hoc inter alia proponere. Sed non satis magno iudicio quasdam Virgilio adiudicasse, vel ille ostendit locus in quo *furens animi* potius quàm *furens animis* recipit, libro v,

Nanque furens animi dum proram ad saxa suburger.

Contrā enim sequenda esse hîc ea exemplaria quæ *animis* nobis exhibent, cōuincit alter iste poetæ eiusdem versus,

Ecce, furens animis aderat Tirynthius.

nullo enim modo hîc *animi* admittere potest numerorum poeticorum lex, vt satis est manifestum vnicuique. Neque tamen ignoro, illum quoque in quē nunc inquirō longè doctissimum grammaticum,

itidem

itidem *furens animi* in illo altero versu legere: sed quod Arufiano Messo, idem & illi oppono. Quinetiâ cum hîc idem quod & aliis plerisque locis peccare dico, dum vnum eundemque locum in aliorum multorû exemplum affert, tanquam similium, quum tamen sint dissimiles. id est, non idem de his quod de illo dici possit. Ecce enim, *Furens animi*, figuratè (inquit) dixit: vt *Præstans animi iuuenis*. Sic etiam illic, *Animi miserata*, pro *Animo miserata* dictum esse ait: & figuratè loquutum, sicut *O præstans animi*, pro, animo. Iam verò & in hunc versum, libri Georg. IIII, *Immemor heu victusque animi respexit*, annotat, sic hoc loco dixisse, vt *O præstans animi*. At ego locum istum in aliorum omnium exemplum afferri posse nego: ac potius ita esse statuendum aio, esse hîc illam quam dixi Græcam ellipsin, itidemque vbi *Felix* vel *Infelix* eidem illi genitiuo iungitur: (veluti quum Dido dicitur *infelix animi*) eodemque modo vbi *animi miserata* legimus, si quidem mea illa expositio admittitur: pro qua & illud *infelix animi* facere dici potest. consentanea enim sunt, existimare aliquem esse infelicem animi, & eum miserari animi. At verò, quum audimus *victus animi*, Græci quidem sermonis esse pariter imitationem dixerim, sed qua tamē aliud in eo imitemur. Quid verò illud est: is nimirum genitiuus quem verbo *νικῶμαι* vel potius *νικτῶμαι*, iungere illi consueuerunt: vt quum *ὀργῆς νικτῶμαι* (sicut & *νικτῶναι εἶναι*) dicunt: & *ἐρωτος νικτῶμαι*, vel *ἰμέγου*. quo vocabulo non malè fortasse hîc illud *animi* interpretabimur: vt perinde sit acsi diceret, Quum non posset cupiditati suæ moderari. Neque tamen contendo, de omnibus locis vbi poetæ vtuntur genitiuo *animi* vice ablatiui (veluti vbi *præceps ani-*

mi ab hoc ipso poeta dicitur) vel hoc vel illud responderi posse: sed aliquid aliud sequutos esse in eorum usu fateor: qui quomodo Seruum de eo quod notau excusare possit non video. Hoc vnum addam, in dubium à me vocari quod ab eodem grammatico scribitur in illum locū, *O præstans animi iuuenis*, & *Præstans virium*, & *Præstans viribus dici*. quiddam enim sibi in usu huius genitiui, quod non & in aliorum, permisisse poetas existimo.

In hac autem genitiui mentione, in memoriā mihi venit quod apud eundem grammaticum de participij *Perosus* cum illa constructione legitur, sed à paucis (vt opinor) admittitur. Nam hæc in verba, libri v 1, *-lucémque perosi Proiecere animas*, annotat, figuratè dictū esse *lucem perosi*: quum *Perosus illius* dicatur. Atqui si figuratè *lucem perosi* dixit, figuratum esse apud eum dicemus & *Exosus Troianos*, necnō *Exosum bella*. Ex eo certè quod de illa participij *Perosus* constructione scribit, colligere possumus fuisse quosdā ex recētoribus scriptoribus qui eandē huic participio quā & τῶ *Pertæsus* constructionē darent: atque hoc Seruio imposuisse. Nam & alibi animaduerti illum quædam ad sermonem Latinum pertinentia pro nouis habere, quòd à sui seculi hominibus aliter dicerentur. Legimus certè *Perosus* cum eadē constructione apud Nasonem quoque, vbi *Exilium longum perosus* dicit, & *Arma perosus*: necnon apud Lucanum. Sed & in soluta oratione apud Liuiū & alios accusatiuū illi dari videmus. Atq; adeo ipse Virgilius alibi quoque hunc illi dat casum, vbi canit, *-penitus modo non genus omne perosi Fæmineum*. Verū & ibi idem enarrator admonet iterum, eum esse loquutū figuratè: nihil addēs. Sed ex iis quæ in alterum illum annotat locum, discimus figu-

ratum sermonem ideo esse dixisse quòd talis cōstru-
ctio illi participio data esset.

SE D alij sunt loci in quibus idē grammaticus dum
Latinitatem Virgilij suo modo examinat, & timens
ne Virgilius de abusu alicuius vocabuli possit accusa-
ri, remedium huic periculo querit, ipsemet accusandi
sui amplam materiam præbet. Tale est quod in hunc
libri II locum legimus,

*Sanguine placastis ventos & virgine cæsa,
Quum primum Iliacas Danaï venistis ad oras:
Sanguine querendi reditus.*

Scribit enim, *Quum primum*, hîc distinguendū est: quia
& semel ad Troiam ventū est, & antequam ad eam
veniretur, de Iphigenia est sacrificatū. Hæc ille: quasi
verò, quum dicitur *Quum primum* (vel potius *Quumpri-
mum* coniunctè) hoc factum fuit, ad secundā vicem respi-
ciatur qua idem factū fuerit, (perinde ac si *quum primò*
diceretur) & ita inter vnam & alterā vicem discrimen
statuatur. Interim verò nō facilè intelligi potest qua-
le sit quod huic malo aut saltem periculo (vti dixi) re-
mediū inuenisse sibi videtur. In multis certè locis ad
idem remediū confugit, ad nouam inquā distinctio-
nem: & quidē in nonnullis nimiū subtiliter & cōtra
ipsius poetæ mentē ab eo excogitari videtur. Sed mul-
to tamen magis in cōminiscendis nouis quorūdam
locorum distinctionibus peccat Tiberius Donatus.

Ex duabus lectionibus interdū vnā esse ostēdit quā
sine periculo sequi nō possumus. vt in hunc locū libri
III, *saniēq; expersa nataret Limna*, hāc fuisse verā lectio-
nem scribit. si enim *aspersa* legerimus, futurum esse vt
tapinosis & hyperbole iungantur. Et Pierius tamen
hoc non illud vocabulum in omnibus quos viderit
antiquis codicibus fuisse affirmat.

Quinetiam maius periculum vnus ex duabus lectionibus esse ostendit, in istum locum libri v,

*Corneabina ferunt præfixa hastilia ferro,
Pars leues humero pharetras: it pectore summo
Flexilis obtorti per collum circulus auri.*

Nam hîc, allatis hîcce verbis, *it pectore summo*, addit, *Sic legendum est: ne sit solæcismus*. Ex quibus verbis apparet & aliam fuisse lectionem, quæcunque ea fuerit. Ad hanc enim quod attinet,

- & pectore summo

Flexilis obtorti per collum it circulus auri,

nihilo magis vllum solæcismum quàm alteram illam habere constat.

EST verò & critica audacia alicubi aduersus ipsum vsus, partim sermonem, partim in res ipsas reprehendendo. Nonnulla enim notat, quæ cum abusuè dixisse scribit, siue vsurpatiuè, aut κατὰ χρισινῶς. Atque adeo alicubi contrarium dedisse vsus quibusdam vocabulis ait: vt in hoc Æneidos libri x i i loco, *aut corpora saltu Subiiciunt in equos*, postquam *Subiiciunt in equos* exposuit *Super equos iaciunt*, addit, *Sed propriè non est loquutus: magis que contrariè. nam Subycere est aliquid Subter iacere*. Alia autem ratione dicit de verbo *Prænatate*, esse contrariè dictum, in isto versu, *Lethæumque, domos placidas qui prænatat, amnem*. Exponit enim præterfluit: & addit, *Contrariè dictum est. nam non natant aque, sed nos in ipsis natamus*. Enniû igitur (inquit) sequutus est: qui ait, *- fluctusque natantes*.

Affectatè eû loqui, scribit etiam alicubi, vt in hunc locum libri i x,

*Princeps ardentem coniecit lampada Turnus,
Et flammam affixit lateri.*

Nam

Nam hîc annotat eum affectatè loquutum esse. debuisse enim dicere Affixit aut facem, aut malleolum, non flammam.

Nouè item eum loqui, alicubi dicentem audimus. Veluti vbi apud Virgiliû legimus de naui, *excussa magistro*, cû nouè ita loquutû esse de naui scribit, de qua fuerat magister excussus. Sic in hoc versu, *Quid puer Ascanius superârne, & vescitur aura?* postquam *superat* exposuit Viuit, adiicit, *Sanè nouè dictum, & caret exemplo, vt pauca in Virgilio.*

VT autem maior, ita rarior apud eum est altera reprehensio, id est, alterum reprehensionis genus: id inquam quo non sermo reprehenditur, sed aliquid in re ipsa quæ tractatur: quum alioqui soleat contrà aduersus reprehensores eû hac quoq; in parte (& quidem magis etiâ quàm in altera) defendere: vt in multis quos ex eo attuli locis videre est. Sed interdum sui, id est suarum partium, (quû defensoris partes suscepisse dici queat) obliuisci videtur. Ecce enim, quum in versum 188 libri Æneidos vndecimi in quo *fulgentibus armis* legimus (*Ter circum accensos cincti fulgentibus armis Decurrere rogos*) annotet, *Frustra hoc epitheton notant critici, quasi circumeuntes rogos alia arma habere debuerint:* tamen contrà eum non patrocínio destituit ab alio accusatum, sed ipsemet accusat, eadem omnino de re, & quidem in loco qui non solum eodem in libro habetur, sed præcedenti valde est vicinus. Vbi enim legimus,

Iam verò in tectis prædiuitis vrbe Latini

Præcipuus fragor, & longè pars maxima luctus,
hæc scribit de epitheto *prædiuitis*, dignissima quæ attentè considerentur, *More Græco epitheton incongruum*

huic loco posuit. Nam hoc de nostro poeta fateri, quid aliud quam eum accusare est? Sed ita (dicet aliquis) accusatur, ut simul excusetur: quum id more Græcorum facere dicatur. Quid autem est illud, more Græco? annon more Homérico? aut saltem Græcorum more, sumpto ab illis ex Homero? Nam quis non videt passim apud Homerum eadem epitheta, etiam in iis locis quorum argumentum est eiusmodi ut ab illis omnino abhorreere dici possint? Neque enim pro loco & pro re de qua agitur, epitheta personis tribuit, sed eadem ubique illis dat, etiam si laus quam illa inclusam habent, à re quam describit planè sit aliena. Huius autem rei exempla in sequentibus afferam: simulque tantum abesse ut Virgilius idem circa epithetorum usum peccet, ut contra nulla de re magis quam de illis aptè collocandis sollicitus fuisse videatur.

Sed & quavis multa pro Virgilij defensione alicubi afferat Seruius aduersus criticas quorundam reprehensiones eorum quæ præter decorum ab illo dici videntur, aut præter id quod rationi est consentaneum, ipsemet tamen & hac in parte nonnunquam eius est accusator. Loquor autem de talibus reprehensionibus quales sunt hæ quas ex aliis affert, in hunc libri decimi locum,

At Iouis interea monitis Mezentius ardens

Succedit pugna, Teucrosque inuadit ouantes.

In hos enim versus quærit, quum nouerimus sacrilegum esse Mezentium, Iouem etiam adhortatum esse alios deos ut à bello desisterent, & dixisse, *rex Iuppiter omnibus idem*: quomodo procedat, *At Iouis interea monitis Mez.* &c. ac respondet, primò, Iouem iustitiæ fauere, non partibus. quod si est, (inquit) iure Mezentium

tium

tium in locum Turni facit venire: vt iustum prælium inueniatur, nec vna sit pars à ducibus destituta. Deinde alij obiectioni occurrens, *Quod autem* (inquit) *dicitur, Sacilegum Iupiter admonere non debuit: non admonet vt vincat, sed vt possit perire.* Denique & ad terciã obiectionem veniens, *Illud etiam* (inquit) *frustra queritur, quemadmodum numini sacrilegus obtemperare potuerit: quum Regentium non aperte Iupiter moneat, sed ei inijciat tale desiderium.* Sic etiam in hos de Turno & Tiberi versus, qui nonum librum claudunt,

Tum demum præcepit saltu sese omnibus armis

In fluium dedit: ille suo cum gurgite flauo

Accepit venientem, ac mollibus extulit undis,

Et lætum socijs abluta cæde remisit:

in hos inquam versus reprehensionem quãdam criticam aut saltem quæstionem proponit, sed eam simul soluit. *Sanè querunt multi* (inquit) *quum Tiberis AENEÆ faueat, cur liberauerit Turnum.* Sed soluitur ista ratione. *nam ob hoc Turnum dicit esse liberatum vt maior AENEÆ gloria seruaretur.* Sed quum ei aduersus istas & alias quasdam huiusmodi obiectiones patrocinetur, alicubi contrà talia quædam illi obijcit. Quinetiam hunc locum libri xi,

Ue vocem interea superis in sedibus Opim,

Vnam ex virginibus socijs sacræque cæterua,

Compellabat, & has tristes Lauinia voces

Ore dabat,

ita accusat idem enarrator, vt dicat, licet particula *Interea* negotia semper præteritis futura coniungat, tamen abruptum esse & vituperabilem transitum. Quinetiam addit, habere tales transitus & in superioribus libris, & in sequenti præcipuè, vbi Iuppiter appellat

Iunonem. Sed alibi tamen ex persona Asinij Pollionis alios transitus laudat, quibus eadem illa particula Interea est adhibita. Nam in hunc locum libri XI,

Aurora interea miseris mortalibus almam

Extulerat lucem, referens opera atque labores:

Iam pater Aeneas, iam curuo in littore Tarchon

Constituere pyras:

hanc Asinij Pollionis observationem, quæ nobis obseruatu dignissima est, affert. Asinius Pollio (inquit) dicit ubique Virgilium in diei descriptione sermonem aliquem ponere aptum præsentibus rebus. ut hoc loco, quia funerum & sepulturarum res agitur, dixit *Extulerat*. Item in quarto, quia est navigaturus Aeneas, & relicturus Didonem, dicit, Tithoni croceum linquens aurora cubile. quod licet superfluum sit, in multis tamen locis inuenitur. Verum in aliis editionibus post verbum *Extulerat*, hæc leguntur, Nam & *Efferre est ad sepulturam ferre*. Terentius, *Effertur, imus*. Sed (quod cum bona Asinij Pollionis venia dictum sit) huic observationi eius repugnant alij loci, aut saltem alius locus, ubi eadem voce eodem utitur modo Virgilius, quum tamen non itidem funerum & sepulturarum res agatur.

Ab Asinio autem Pollione ad Seruium ut reuertar, hunc rarò ita criticum agere aduersus poetam suum comperiemus, in iis præsertim quæ ad artificium & œconomiam pertinet: quinetiam ab HomERICA discedere illum nos alicubi admonet, & cur id faciat rationem reddit. Nam in hos de Tolumnio augure

Dixit, & aduersos telum contorsit in hostes,

Procurrrens: sonitum dat stridula cornus, & auras

Certa secat:

in hos

in hos inquam versus annotat, eum hîc ab Homeri œconomia recessisse. Illum enim inducere Mineruâ persuadentem Pandaro vt iacto in Menelaum telum fœdera dissipet: hîc verò dicere, ipsum augurê telum spôte torfisse, & occidisse vnum de nouem fratribus. Atque hoc pertinere ad œconomiam. Fuisse enim necesse vt fratres ex vnius morte commoti bellum mouerent. Si enim vilis aliquis interiret, poterat eius mors ob fœderis religionē fortè contemni. Quinetiam alicubi eius inuentionem seu eius artificium οἰκονομικὸν Homericō non dubitat anteferre. Sic in calce libri ι x, vbi legimus,

—aëriam cœlo nam Iuppiter Irim

Demisit, germana haud molliâ iussa ferentem,

Ni Turnus cedat Teucrorum mœnibus altis.

hoc ab illo ferri de loco isto iudicium videmus, *Melius quàm Homerus hunc locum exequutus est. Saluo enim sensu vitauit & fabulosa & vilia. nam ille ipsas minas exequitur.*

Sed Macrobiū contrà longè Virgilium Homero postponere in quibusdam ad œconomiam pertinentibus videmus. Scribit enim (vt antea docui) hinc maximè liquere quid Virgilio contulerit Homerus, quòd vbi rerum necessitas exegit à Marone dispositionem inchoandi belli, quam non habuit Homerus (quippe qui Achillis iram exordium sibi fecerit, quæ decimo demum belli anno cōtigat) laborauit ad rei nouæ partum. Ceruum enim fortuito saucium fecisse causam tumultus. Sed vbi vidit hoc leue nimisque puerile, dolorem auxisse agrestium, vt impetus eorum sufficeret ad bellum. Cuius reprehensionis mentionem quidem & antea feci, sed non & eorum quæ Pontanus ad illam responderet. ea igitur hic

Ee. ij.

referam. Is certè nullam contrà belli inter Troianos Latinósque accommodatiorem excogitari potuisse causam dicit: quum nec Latini per id tempus mercaturam nauibus exercerent, nec Æneas piraticam, ita vt per causam prædocinij (hac enim voce vtitur) excitari bellum posset: & quum nullæ antecederent inimicitia, atque adeo Æneas eo consilio in Latinum littus descensionem fecisset vt in terra fato debita sedes profugis statueret. Itaque non belli, sed amicitia potius causas quæsiuisse, vt qui conciliare sibi finitimorum animos studeret, missis etiã oratoribus cum muneribus. Quibus subiungit, *Uidit acutissimus autor fortuitam causam, quam lippus cæcutiēsq; grammaticus quomodo videret?* Atque his adiicit, moris esse clarissimorū militum, non tantum piratarum, sæpius in cōtinentem descendere, carnis (vt ipsi loquuntur) faciendæ gratia: nec solū ex hostico, sed, vbi maior cogit inopia, etiam ex pacato pecora abigere: atque hinc fieri vt inter socios amicósque indignè multa committantur. Hanc occasionem, & quidē fortuitam, quum Æneas nihil minus quàm bellum quæreretur, nactus Virgilius, non armētalem aut aratorium bouem, sed regij villici ceruum atque in deliciis habitū, & agrestibus notū, vulnerat: quo facilius multitudo cogniticuris gratia ad tumultū concurreret: Troianósque, non tantum vt abactores, sed qui regias res violare ausi essent, armis vlceretur, atque è finibus pelleret. Et, quibusdam interiectis, *Quid aliud?* (inquit) *tanquam duos è diuerso mundi cardine spiritus, qui accensum ignem excitent, exuscitat. alteram è cælo delapsam deam, lunonem scilicet: alteram, furiarum maximam, erebo excitam, cogen-tem buccina populos, & duces vocantem in bella. Proque stipula*
subii-

subijcitur armata mulier, mater, regina: importuna quidem mulier, &c. Tandemque locum hunc istis verbis claudit, Cognouit admirabilissimam excogitatissimamque inuentionem Iuuenalis, quum dixit,

-caderent omnes à criminibus hydri,

Surda nihil gereret graue buccina.

At ego hîc inter accusatorem Macrobiû & defensorem Pontanum me neutrum quodammodo seruans, neque ineptam esse hanc Virgilij inuentionem dixerim, neque aliam tamen ea aptiorem & poematis Virgiliani maiestati cõuenientiore excogitari potuisse negauerim.

S E D, ut à Macrobio ad Seruium, & à vitiis quæ in ipsis rebus sunt ad ea quæ in sermone versantur, reuertar, à me certè paulo antè in mentione reprehensionis epithetorum omittendum non fuit quod ut vitiosum ab eodem carpitur, quum vitio tamen careat apud poetas Græcos: duo videlicet epitheta vni substantiuo iungere. Nam hunc in locum. libri Georg. iiii,

At liquidi fontes & stagna virentia musco

Adsint, & tenuis fugiens per gramina riuus,

admonet suspendendum esse *tenuis*, ne incipiant esse duo epitheta: quod apud Latinos constat esse vitiosum. Quinetiam hunc in versum,

Lenta quibus torno facili superaddita vitis,

scribit, Donatum *facilis* legere: sed legi tamen & torno *facili*: ad excludenda duo epitheta: quod est in Latinitate vitiosum, si sit *lenta facili vitis*. Vbi certè non minus in Seruio, quàm in Donato iudicium requiro, quòd de re minimè dubia dubitarint, vtram nimirum sequi potius lectionē oporteret. Nam etiam si

duo epitheta simul habere locum possent, quis non videt aptius multo *facili* iungi *torno*, quàm *facilis* *vitis* dici? Ego certè, si ab illa lectione, *torno facili*, discedendum esset, id potius Romanum exemplar sequerer in quo *fragilis* legi Pierius testatur: etiamsi id vnicum esse dicat in quo hæc scriptura extet, quum cætera omnia *torno facili* habeant. Quamuis autè hæc ita sint, tamen in hunc versum libri tertij Æneidos, — & *lenis crepitans* vocat *auster* in *altum*, scribit, duo illum epitheta vitiose posuisse. quinetiam addit, *Fecit autem hoc improprie propè in decem versibus*. vel (vt in aliis editionibus legitur) *Fecit autem hoc propè in decem versibus*. vel *propemodum*, absque illo aduerbio improprie. Sed huic reprehensioni (ad hunc quidem certè versum quod attinet) opponi duo possunt: primùm quidem, non videri habendum pro epitheto participium *crepitans*, quum perinde accipi queat acsi dictum esset, *Lenis auster* vocat *crepitando*, vel suo *crepitu*: deinde verò, aliam inueniri lectionem, *lene*. neminem autem negare posse quin & poeticè & eleganter dicatur *auster lene crepitans*: id est *leniter*. Quinetiam quum hic versus qui legitur non procul à fine libri ultimi,

— *infelix humero quum apparuit ingens* *Balteus*,

duo itidem epitheta eodem pertinentia habeat (malè enim in quibusdam exempl. *infelix* cum præcedentibus est iunctum) alia etiam extat lectio, videlicet *alto* pro illo *ingens*. Sed non absimile vero fuerit, hanc lectionem ab ijs inuectam qui bina epitheta vni dare nomini vitiosum existimabant. In eodem libro, ubi legimus,

AENEAS instat contrà, telumque coruscat
Ingens arboreum, & sæuo sic pectore fatur,

duo esse epitheta negat, *ingens* & *arboreum*: quasi intelligendum sit, *Aeneas ingens telum coruscat arboreū*. Verum ab illo dissentio, quum hîc non aptè proceritatis *Aeneæ* fieri mentio videatur, & ita, ad vitandum vnum vitiū, in aliud maius incurri. Cæterum & hoc in locis qui duo epitheta habent animaduertendum est, an vtrunque ex iis sit quæ perpetua seu propria vocantur, an contra vnum quidem sit proprium, seu perpetuum: alterum verò, temporarium. Sic in hoc versu libri *Æn. v. 11*,

Iam media nigra carpebat nocte quietem,
sequendo nonnullos peruetustos codices, duo talia esse epitheta dicemus: *nigra*, proprium, seu perpetuum: at *media*, temporarium. Affertur & hæc scriptura,

Iam media nigram carpebat nocte quietem.
Sed meritò (meo quidem iudicio) tertia hæc aliis duabus præferetur,

Iam mediam nigra carpebat nocte quietem.
Fortasse autem, vel ex his locis facere coniecturam licet, ex iis versibus huius poetæ qui epitheta habere bina dicuntur, quosdam esse de quorum lectione dubitari possit.

Ad alteram verò epithetorum reprehensionem (cuius paulo antè memini) quod attinet, eandem habemus & in istum locum libri *III*,

Talia monstrabat relegens errata retrorsum

Littora Achæmenides, comes infelicis Ulyssi.

in hæc enim duo verba, *infelicis Ulyssi*, annotat ille grammaticus, epitheton ad implendum versum esse positum, more Græco. Sed falsò hîc quoque Virgilium ab illo reprehendi, docebo ubi agam de hoc

more, quem Græcum vocat, & Homericum esse ostendendam.

Idem porro non in Virgilium tantum, verum & in alios poetas cenforem alicubi agit, præsertimque in iis quæ ad sermonem pertinent. Et quidem est quod & in Horatio, tãquam abusiue dictum, notet, sicut quædam apud Virgilium ea de causa notari ab eo docui. Sed vnus est locus vbi tam abusiue & improprie Horatiũ *viduus* dixisse scribit, quàm proprie Virgilium *viduasset*. Nam in ista Virgilij,

-tot ferro sæua dedisset.

Funera, tam multis viduasset ciuibus urbem, annotat, proprie *viduasset* dixisse, quia vrbs est generis fœminini: at Horatium abusiue & fatis incõgruè in genere masculino posuisse, dicentem, *-viduus phætrea Risit Apollo*. Sed ratione omnino caret hæc reprehensio, quum non minus vir dicatur viduus, quàm vidua dicitur mulier: licet non tam frequenter occurrat. Legimus certè cùm apud alios, tum verò apud Plautum, necnon apud Ouidium, libro De arte 1,

Quum iuuit viduos rapta Sabina viros.

Sic autem & apud Græcos, sicut mulier, *ἄνηρ*, ita vicissim vir dicitur *ἄνθρωπος*.

Nec verò nullæ aliorum enarratorum censurae aduersus hunc poetam extant: sed earum nonnullæ & ab ipso Seruio reiiciuntur. Quarum è numero est Donati quædam. nam in hunc locum libri xi,

-ὄψαμα ἰγὲς, ἰγὲντιον ἀρμῖς

Vir Troiane, quibus cælo te laudibus æquem?

admonet nos, frustra dici à Donato, hoc nomen *ἰγὲς* de iis esse quæ non recipiunt comparisonem: quia enim augmentum recipit, etiam comparari. Et

addit,

addit, alia esse illa nomina in quibus est dubitatio vtrum comparentur. vt est Perfectus (inquit) quod si velis comparare, incipit perfectus non esse perfectus. Sed quod pro confesso accipit Seruius, videlicet Ingens recipere augmentum, illi Donatus confiteri noluisse. Considerare tamen Donatus debuit, esse & alia, quæ quanuis natura sua incrementum admittere non videantur, cõparantur, sed raro. Ac tale est fortasse Immenſum, ex quo Immenſius. De illo quidem certè vocabulo Perfectus quod scribit Seruius, quãuis ratione niti dici queat, vſum nihilominus & iſtã admiſſiſſe comparationem videmus, & quidem in ſoluta etiam oratione. Quanto autem magis in carmine nomina quædam, contra naturã ſuam, id eſt contra ſignificationis ſuæ naturam, licebit comparare? quod etiam conſiderare Donatum oportuit. Cæterum hanc Virgilij à Donato reprehensionem non extare ſciendum eſt inter ea quæ in hunc locum eſt commentatus: ea quidem quæ ad nos peruenerunt, aut ſaltem quæ typographicæ editiones nobis exhibuerunt.

SIC VT autem cenſorum ſeu criticorum officio apud Virgilium alij etiam enarratores functi ſunt, ita & apud Horatium à longè doctiſſimo enarratore Porphyrione factum id fuiſſe animaduerti. Sed modeſtè ſe hac in re ſolet gerere. veluti quum hunc in locum,

Nec lenès ſomnos timor, aut cupido

Sordidus auſert,

annotat, Cupidinem hic non puto pro amore poſuiſſe, ſed pro cupiditate. Quare miror maſculino eum genere cupidinẽ dixiſſe, quum hac ſignificatione Hæc cupiditas (ſed. Hæc cupido ſcribo)



dicatur. Nam quum hîc dicit se mirari eum ita voce illa vsum esse, modeste taxare eum videtur. Verum hoc ipse miror, eum affirmare ausum non esse, Cupidinẽ hîc non pro amore, sed pro cupiditate ab Horatio positum esse. nam vel adiectio epitheti *sordidus* id testari dici potest. Quam adiectionem excusare etiam Horatium, non immeritò fortasse dixerimus, quum ea ambiguitas tollatur. Quomodo enim *sordidus* Cupidini amorem significanti adiungeretur? Contrà verò, vt Sordes de avaritia, & ea quidem præsertim quæ est summa, dici solent, ita & cupiditatem auarorum seu ipsam avaritiam vocari sordidã, rationi consentaneum est. Cæterum non hîc tantum sed aliis etiam locis masculinum genus huic vocabulo in ea significatione dedit: monete & Acrone nouum hunc vsum esse: quam tamen nouitatem imitatus est Seneca. Sunt verò qui ita excusant vt dicant, in illis etiam locis Cupidinem esse dei nomen: quòd Cupido sit autor amoris & desiderij ac cupiditatis quarumvis rerum, generaliter.

Atque vt apud Virgilium alicubi Seruius quæ ambigüe dicta sunt notat (vt quum in hunc versum libri x i, *Addit equos & tela, quibus spoliauerat hostem, scribit, Vel Pallas, vel Aeneas. nam ambigüe positum est*) etiam est hoc vnum ex iis quæ à Porphyryone apud Horatium notantur: & quidem ita vt diligenter in ea inquirere dici possit, apud eum fortasse frequentius quam apud alium occurrentia. Sic hunc in locum,

Audiet pugnas vitio parentum

Rara iuuentus,

admonet, non intelligi ab illo *pugnas parentum*, sed *vitio parentum*. Debuit tamẽ (vt opinor) & de hoc admonere,

nere, istud, *rara iuuentus*, ad illud *vitio parentum* referri: perinde acsi dictum esset, *Iuuentus*, quæ *vitio parentum* *rara* erit. id est, *rara* ex illis pugnīs supererit.

Talem admonitionem habemus & ubi scribitur ab Horatio, (libri videlicet primi ode trigesima. quinta)

—ô *utinam noua*

Incude diffingas retusum in

Massagetis Arabasque ferrum.

Esse enim ἀμφιβολοῦται: sed non intelligi debere, *retusum in Massagetis*, verum, *diffingas in Massagetis*. vel *diffundas*, vt quoddam vetus exemplar vtrobique habet.

In hunc quoque locum satyræ primæ libri secundi,

Ceruius iratus leges minitatur, & urnam,

Canidia Albuti, quibus est inimica, venenum,

annotat, amphibolicè posuisse, aut *Canidia Albuti venenum minitatur*, aut, *Albuti venenū*. hunc enim *Albutium* veneno uxorem suam dici peremisse. Sed malè in quibusdam typographicis editionibus scriptum est ita, *Aut Canidia Albuti venenum minitatur*, aut *Albutius venenum*: quum scribendum sit, aut *Albuti venenum*. Verum potest defendi aduersus Porphyriōnē, quod quum ita genitiuus proprii nominis ponitur nomini proprio proximus, de filio aut filia soleat intelligi: vt, *Deiphobe Glauci*. Quod exemplū & ab Acronē seu Pseudacronē affertur: sed apud eundem sequitur, *Alij uxore dicunt*. post quæ verba videtur esse quorundam aliorum ellipsis. Alioqui dicemus, his verbis significari, alios existimare, *Canidiam*, uxorem *Albuti*, non filiā, ab Horatio vocari. Cæterum hīc quoque in vet. Porphyrii exempl. legitur, *amphibolicè*, quum

in iisdem illis edit. typographicis, quæ habent *Albinius*, legatur ἀμφιβολικῶς: cui vocabulo locum in Græca lingua dare non possumus, si τὸ ἀμφιβολία locus non est: de quo & mox dicam.

In istum autem locum, odes xiiii, libri i,

-non tibi sunt integra lintea,

Non di, quos iterum pressa voces malo,

quum editiones typographicæ nobis hæc tantum exhibeant Porphyriionis verba, *Quos iterum pressa voces malo*, *Amphibologia*: in vet. exēpl. post illa Horatij verba, *Quos it. pr. voces malo*, legimus, *Non, iterum pressa: sed, iterum voces, malo pressa. Amphibolia*.

Verum sunt & loci in quibus illam dubitationem amphibolicam (vt ita dicam) proponit quidē, sed non & soluit. vt Serm. lib. ii, Satyra iiii,

Vinea summittit capreas non semper edules. Postquam enim capreas pro hædis poni dixit, addit, *Et est ἀμφιβολία. aut, non semper summittit: aut, non semper edules.* Verum quemadmodum docui modo, non ἀμφιβολικῶς sed amphibolicè in vet. exempl. scriptum esse, ita hic nō ἀμφιβολία sed ἀμφιβολία ibi legitur: quod, meum de his duabus vocibus iudicium confirmat, cuius mentionem in libello De Græcæ linguæ abusu feci. Ceterum videndum est annon excusari possit hoc loco Horatius aduersus Porphyriionem, tanquam ita loquutus vt dubitationem illam minimè reliquerit: quoniam si cum verbo *summittit* nomen illud *edules* iungere libuisset, in promptu erat dicere,

Vinea non semper capreas summittit edules.

Talem porro de amphibolico Horatij dicto dubitationem proponit Porphyrio & hic, (ode. xxv libri i i),

-dulce

-dulce periculum est

O Lenæ sequi deum

Cingentem viridi tempora pampino.

Amphibolicè dictum (inquit) *utrum sibi tantum cingentem, an quoscunque suo nomine (sed numine scribo) replere consuevit. Melius etiam scriberetur, an omnibus quoscunque suo num.*

Idem facit & hîc, (ode xiii, libri iii) *-non sine floribus* *Cras donaberis hædo.* ἀμφίβολον enim esse hîc quoque ait: quum incertum sit utrum dicat, Hædo donaberis & floribus: an, Donaberis hædo, qui erit cum floribus. id est coronatus.

Est verò & amphibolia, quam vocat amphiboliā per casus. Ut in hunc locum odes xiiii, libri i, *Quāvis Pontica pinus, Sylva filia nobilis, lactes & genus & nomē inutile.* Scribit enim, *Sylva filia nobilis, an, tu nobilis,* amphibolia per casus. Ita certè vocari possit & quæ huic loco subest, *Nec cursus duplicis per mare Ulysei.* nā siue pro genitiuo qui iungatur cum *Ulysei*, siue pro accusatiuo, quem iungamus cum *cursus*, legisse videtur *duplicis.*

Quum porro in his omnibus & quibusdam aliis locis ἀμφίβολον tantum dicat, (quum alioqui sint etiam loci quos duobus modis posse intelligi ostendit, & vtro debeamus eos intelligere docet, quamvis neque vocem ἀμφίβολον, neque ambiguum, neque quidquā tale præfigat) alicubi & nimis ἀμφίβολον dicit. quod est apertius reprehendentis, aut certè magis. Exemplum autem habemus in istum locum odes viii, libri ii, *-ferus & Cupido Semper ardentes acuens sagittas Cote cruenta.* Nam scribit, *Nimium ἀμφίβολον.* utrum enim *Semper ardentes* intelligendum, an *Semper acuens*?

Iam verò & σόλοιμον apud eum esse scribit, in versu isto, Serm. lib. II, satyra I,

Lucili ritu, nostrum melioris utroque.

Nam in hæc verba, *Nostrum melioris utroque*, annotat, *Mei & tui. σόλοιμον est. dicendum erat, nobis.* Sed non immeritò quis miretur cur σόλοιμον hîc esse putet. quidni enim *melioris utroque nostrum*, rectè dicatur? Quòd si tamen emendatè scripta essent quæ pronomen illud *nobis* sequuntur, non miraremur quid eum mouisset ut hoc diceret. Nam illud *utroque* non censuit iungendum cum *nostrum*, sed ita accepit acsi dictum esset *Utraque re.* Hanc autem expositionem partim ex veteri exemplari colligo, in quo legitur, *Mei & tui. σόλοιμον erit. Debebat enim dicere, Nobis & sensu* (sed *censu* scribendum) *& ingenio melioris:* partim ex Acrone, seu Pseudacrone, apud quem habemus, *Nostrum melioris utroque. Hoc est, Qui melior fuit & me & te, Trebati, vita, sua. id est, censu & natalibus. Fuit enim valde nobilis Lucilius.* Leguntur autem eadem propemodum apud illum anonymum commentatorem, quem Iacobus Cruquius in lucem dedit. *Hoc est, Qui melior fuit & te & me, ô Trebati, censu & natalibus. Fuit enim vir bonus, & valde nobilis: utpote Magni Pompeij avus.* At in typographicis editionibus locus ille Porphyriionis partim hoc scriptus est modo, *Nostrum mel. utr. Mei & tui. Solæcon est. dicendum erat nobis. Aristot. sententia est sensu & ingenio meliori.* Obiter autem lectorem hîc considerare iubebo, quàm periculosum sit aliqua verba vel ex eo loco in quo superuacanea sint, detrachere, lectore non admonito. Nam ita scribendo illic, *Dicendum erat nobis. Aristot. sententia est sensu & ingenio meliori,* sunt quidè superuacanea ista, *Aristot. sententia est:* verùm si ea tamè ex Porphyriionis

com-

commentario non tollas, sed lectorem moneas ut suum illis locum quærat, cum inueniet inter illa quæ proximè sequuntur, & vna eadèmq; opera duos locos restituet, ex vno verba illa detrahendo, in alterum eadem reponendo. Proximè enim hæc sequuntur apud Porphyriionem, *Ille velut fid. Ille enim in suis scriptis ostendit, Sapphonis & Alcai volumina se loco sodalium habuisse.* Sed illis verbis, *Ille enim in suis lib. præfigenda sunt ista, Aristoxenis sententia est.* pro quibus vides alieno scriptum loco fuisse, *Aristo. sententia est.* Atque ita in hunc locum, *Ille velut fid.* à Porphyriione annotata habebimus ista, *Aristoxenis sententia est. ille enim in suis scriptis ost.* &c.

Verum ad illam Porphyriionis reprehensionem ut redeam, tanquam Horatii sermone solæcum habente: fateor quidem *σόλοικον* hunc sermonem esse, *Nostrum melioris*, pro Nobis melioris: sed quid impedit quominus *melioris* cum utroque potius iungamus, ad quod illud *nostrum* referatur? Quæ quamuis à me dicantur, animaduerto tamen quid Porphyriioni occasionem locum illum ita exponendi præbuerit. Sequitur enim non procul à fine huius satyræ,

-quidquid sum ego, quamuis
Infra Lucili censum ingeniūmq; tamen me
Cum magnis vixisse inuita fatebitur usque
Inuidia.

Quinetiam non seruati decori Horatium accusare videri potest, quum in istos versus odes secundæ libri primi,

Piscium & summa genus hæsit vlmo,
Nota quæ sedes fuerat columbis,
scribit, Leuiter in re tam atroci & piscium & columbarum.

(ita enim apud eum, non autem *columborum*, scriptum est) *meminit*. Sed excusat tamen, istis quæ subiungit verbis, *Nisi quòd hi excessus lyricis concessi sunt*.

Cæterum qui his in locis accusator Horatii est Porphyrio, in multis est eiusdem excusator. Sic in istum locum odes xxxv, libri i, *Tespes, & alborara Fides colit Velata panno*, Posset (inquit) videri scrididè dixisse panno, nisi vellet hac conceptione intelligi, à pauperibus magis coli fidem. Vt autem aliud accusationis genus, ita & aliud excusationis, in epoden nonam. Nam ubi canit Horatius, *Romanus (eheu posteri negabitis) Emancipatus fœminæ, Fert vall. &c. à Porphyrione scribitur, Qui non intelligunt, putant importunum transitum repente à Sex. Pompeio ad Antonium factum: nescientes redire poetam ad initium eclogæ, ubi ait, Victore latus Casare. ubi de Antonio & Cleopatra victore vult accipi. Deinde comparatione latitiæ presentis, mentione facta Sex. Pompeij & fugæ eius, referens se, id quod cæperat, exequitur turpitudinem Antony partiumque eius.*

Nec Porphyrio tantum, sed & Acro, seu Pseudacro, alicubi huiusmodi aduersus Horatium objectionibus respondet. Quod fieri ab eo videmus in satyram quintam (siue eclogam) libri primi, in hos videlicet versus,

-nunc mihi paucis

Sarmenti scurra pugnam Messique Cicerri

Musa velim memores, & quo patre natus uterque

Contrulerit lites.

Hic enim ab illis scribitur, quosdam reprehendere Horatium, quòd de rixa dicturus, stultè auxiliū Musæ petiuerit. *Sed oratoriè* (inquit) *hoc fecit. Quando autem* (sed *Quando enim malo*) *de leni re dicturi sumus, attentum debemus*
facere

facere auditorem, propter leuitatem rei. Sed bonam Horatij causam malè hic defendit, meo quidem iudicio: & siue est Pseudacro, siue potius Acro, hoc saltè *Pseudac* dicere videtur, oratoriè ab Horatio id fieri: & quum leui de re dicturi sumus, attentum debere nos auditorem facere, propter leuitatem rei. Cōtrà enim, quis hoc facit, nisi qui inter familiares vult iocari? Alioqui enim hoc esset auditores ludificari: & aduersus talem attentionis comparisonem meritò obliiceretur ex ipso Horatio,

Parturiunt montes, nascetur ridiculus mus.

Sed & hæc siue ab eodem, siue ab alio adiiciuntur, *Vel etiam quia descripturus viam suam, non debuit prætermittere quod in ea incundè factum videbatur, siue ludo narrat poetico.* nisi potius scribèdum, *sed ludo narrare poetico.* Quæ postrema verba ad Horatij defensionem satis esse poterant: vt illi obiectioni responderetur (si tamen tam frigida & inepta obiectio, digna cui responderetur, erat) hanc Musæ inuocationem ludum esse (aut iocum) poeticum.

Quædam alioqui sunt quæ ipse quoque apud hūc suum poetam (id est, cuius se profitetur enarratorem) reprehendit: sed ita vt plerunque leues aut etiam fuitiles dicere possimus esse eas reprehensiones. Quod de iis dici potest locis in quibus abusiue loquutum esse illum ait: vt quum scribit in hunc locum odes secundæ libri primi, *Acer & Mauri peditis cruentum Vultus in hostem*, Maurum abusiue pro quocunque hoste posuisse. Neque enim vocabulo abutitur qui id quod est speciei pro eo quod est generis ponit, vt hic fit ab Horatio. Hoc autem ab illo hūc fieri, etiam Porphyrio annotat, speciem videlicet pro genere poni. Sed

& ista multo accuratior exactiorque est expositio eiusdem, Maurum accipi pro cuiuslibet bellicosę gentis viro: quàm illa, Maurum pro quocunque hoste poni.

Sic etiam, quum *ἀνυελογία* constituat Acro vel Pseudacro in hoc dicto Horatii, *Olenis uxores mariti*, Porphyrio scribit venustè hoc dici. Atque id de isto Virgilij itidem loco pronuntiandum fuerit, *Vir gregis ipse caper*: necnon de isto, *Quem legere ducem, & pecori dixere maritum*, quum alioqui constituenda hinc eadem *ἀνυελογία* esset. Scimus autem à Theocrito hanc venustè loquendi libertatem profectam esse, qui *τῶν αἰγῶν αἰδέα*. Reciproca autem (vt ita dicā) libertate vtens hic poeta, iuuenecos pro iuuenibus dixit, libri secundi ode octaua, *Te suis matres metuunt iuuenis*. Vbi quum eadem ratione *ἀνυελογία* esse dici posset, dixit tamen potius *metaphoram à tauris*. (sed vitulis reponendum) & locum qui eandem habet adiecit, *-nec tauri ruentis In Venerem tolerare pondus*. Hic autem & *iuuencę* de puella dicitur: sed audacem & huius & illius vocabuli vsum allegoria ibi velut tegit. Quemadmodum. verò *ἀνύερος* & illic esse loquutum Horatium enarrator ille dixit, ita certè & de hoc dicturus versu fuit, *Adulteretur & columba miluio*. Vbi quanuis esse itidem *ἀνυελογίαν* negari non possit, tamen & qui venustam seu iucundam metaphoram id vocarit, (est autè *ἀνάλογος* illi qua caprum, maritum, & vicissim capram, vxorem vocari dictum est) non solùm verum dixerit, sed honori poetę magis consuluerit. Cæterùm eodem & Virgilius modo de Latinę linguę abusu accusatur, nonnullis in locis quibus *ἀνυελογία* subesse dicitur: quum & iis aliam subesse figuram dicere possimus,

mus, cuius minus odiosum (vt ita dicam) sit nomen: quod certè dicere de metaphora possumus. Sed minus tamen odiosum est, ἀνύεως loquutum poetā dicere, quàm si lingua ea qua vti debet abusus esse dicatur. Sic tamen & Seruius in Virgilio multa tanquam abusiue, siue vsurpatiuè (nam & hac voce vititur) dicta notat. Interdum verò Græcè κατὰ χρῆσιν dicere mauult. Vsurare etiam aliquot dicit locis pro Vsurpatiuè loqui, vbi mendum subesse putaret qui de hoc admonitus non esset. Sed alicubi Vsurpatiuè aut abusiue loquutum esse dicens, adiungit quod hoc dictum velut molliat. addit enim, More poetico.

Sunt tamen & nonnulla quæ quum itidem inter abusiue siue per abusum dicta alius positurus fuisset, Porphyrio ἀφελῶς dicta esse scribit. Ex his est istud, de quo antea dictum à me fuit, ex ode tertia libri primi, *-væ meum Feruens difficili bile tumet iecur.* Ibi enim scribit, *Iecur pro corde, ἀφελῶς.* Eodem modo & in hæc eiusdem poetæ verba, *-vbi Maura semper AEstuet vnda,* annotat, *Maura hic pro Africa ἀφελῶς dicitur: scilicet quòd tam Africa quàm Mauritania generaliter Libya dicitur.* Ita enim in vet. exempl. legitur, quum typographicae editiones habeant non ἀφελῶς, sed ἀπλῶς. Hic autem locus reuocare nobis in memoriam debet eum de quo paulo antè disserui, *Acer & Mauri peditis cruentum Vultus in hostem.* Neque enim video quid obftet quominus & ibi ἀφελῶς esse loquutum poetam dicamus. Cæterum in illo priori loco vbi *Iecur pro corde ἀφελῶς* dictum esse annotatur, additur quidem explicatio Latina, *id est simpliciter:* sed eam Porphyrii esse vix crediderim: tum quòd nullam huiusmodi vocibus Græcis addere interpretationem solerent:

tum etiā quòd vel alio Latino vocabulo vſurus fuiſſe videtur Porphyrio, vel ei aliud ſaltem fuiſſe adiecturus. Hoc quidem certè conſtat, illud Simpliciter in vna ſignificatione nō minus alterius aduerbij ἀπλῶς interpretationem eſſe, quàm huius ἀφελῶς in altera. Ac nos in illius vocis mentione recordari oportet, ea quæ figuratè dicta ſunt, illis opponi quæ ſimpliciter, apud ſcholiaſtas. Exempla multa apud Seruium, ſed & quædam apud alios, ac nominatim apud Porphyrionem, habemus. Sic in iſtum locum ſatyrae v 1, libri 1, -*quò tibi Tulli Sumere depositum clauum, fierique tribuno*, annotat, *figuratè per datiuum caſum dixit ad pronomen tibi, tribuno: cæterum illud ſimplicius erat, fierique tribunum.* Vbi tamen potius erat dicendum (ac fortasſe dixit) *ſimplex erat.* Intellige autem, figuratè dictum eſſe *tribuno*, reſpiciendo ad pronomen *tibi*: vel referendo ad pron. *tibi*. Ac fortasſe horum vocabulorum alterum à librario omiſſum fuit. Sic porro & in oden ſextam libri primi figuratæ eloquutioni ſimplicem opponit. At verò apud Seruium, ei quod figuratè dictum eſt videmus opponi etiā quod eſt integrum, quamuis non magis illic quàm hîc vlla ſit ellipſis. Cæterum alicubi idem Porphyrio aliquid non tantum ait eſſe figuratè dictum, ſed mira figura. nam in hunc locum odes xiiii, libri 1, -*ac ſine funibus Vix durare carinae Poſſint imperioſius AEquor?* annotat, *Mira figura dicitur, pro Sustinere vim æquoris.* Iſtud autem *mira*, nō tanquam à reprehendente, ſed potius tanquam à laudante quam ſibi permiſit loquendi libertatem, dictū debere accipi, oſtendunt alij plerique loci, in quibus itidem aliquid mirè dici ſcribit. Eſtque illi hoc vocabulum cum aliis enarratoribus, ac nominatim cum

Ælio

Ælio Donato & Seruio, commune: modò hac, modò illa de causâ, quod à poeta dictum est, magni facientibus.

Sed ego, antequam Porphyrii & Acroni (seu Pseudacroni) valedicam, mirum quid me apud hunc legisse non dissimulabo, in loco qui ei quem modò proposui valde est vicinus: mirum inquam, non itidem præstantiæ, solertiæ, elegantiae ergo, sed potius inscitiae: cuius dedecus in ipsum Horatium redundaret, si fidem huic eius enarratori habere vellemus. Nâ quum in eadem illa ode scripserit, *-tu, nisi ventis Debes ludibrium, caue*, enarrator ille hæc perinde exponit ac si Horatius aliquid à Latinitate omnino alienum sibi permisisset. hoc videlicet modo, *Tu, nisi caue, (pro caueas) debes ludibrium ventis. Id est, eris exercitium ventorum*. Sed apud cõmentatorem anonymum, qui ante aliquot annos editus fuit, affertur & alia expositio, ista, *Tu nihil debes ventis nisi ludibrium: caue*. Atque ille ipse qui hûc cõmẽtatore luce donauit, putat, (quod & ipsum miror) exponendum, *Tu nihil nisi ventis debes ludibrium. vt nisi* positum sit pro *quàm*, per ellipsin *et nihil*. Quâuis autem minorem Latinitati faceret iniuriam Horatius si hoc quàm si illo modo loqueretur, tamen & sic loquendo, tantam faceret quantam non critici solum, sed ne ij quidem qui criticorû discipuli tantum essent, tolerare possent. In nunc, & quorundam enarratorum confisus præsidio, criticam de poetis censuram aude agere.

DE CRITICIS Latinis dicendi finem tandem faciam, si prius ad quæstionem illam respondero, an omnes grammatici, omnes saltẽ illustres (vt quidem à Suetonio Tranquillo honorantur) critici fuerint: &

de ea quam in poetarum præsertim libros conferebant opera, disseruero.

Dico igitur, illos omnes illustres grāmaticos, criticos quidem fuisse *δυνάμεις*, aut saltem haberi voluisse: at *ἐργῶ*, nequaquam omnes fuisse. Id est, non omnes quidem illos criticorum partes suscepisse, siue criticorum officio functos esse, sed nullum tamen fuisse qui doctrina ad criticen idonea instructus non esset, aut saltem haberi non vellet. Legimus quidem certè, apud Suetonium, appellationem grammaticorum Græca consuetudine inualuisse, quum initio literati vocarentur: ac Cornelium Nepotem, in libello quo distinguit literatum ab erudito, tradere, literatos quidem vulgò appellari eos qui aliquid diligenter & acutè scientérque possint aut dicere aut scribere: cæterùm propriè sic appellandos poetarum interpretes. Sed totum locû eo quo apud Suetonium scriptus est modo proferam, simûlque, quid in eius scriptura mutandum censeam, non tacebo. Apud eum igitur (in ea quidem editione cui Achillis Statij Lusitani commentatio adiuncta est) legimus, *Cornelius quoque Nepos, in libello quo distinguit literatum ab erudito, literatos quidem vulgò appellari ait eos qui aliquid diligenter & acutè scientérque possint aut dicere aut scribere. Cæterùm propriè sic appellandos poetarum interpretes, qui à Græcis grammatici nominentur, eosdem literatos vocitatos.* Nam primùm quidem, post *scribere* malè posita est stigma *πελεια*, quasi hæc, *Cæterùm propriè sic appellandos poet. ἀπ' ἀλλῆς ἀρχῆς* dicantur: quum tamen opponantur præcedentibus, post quæ suspensa relinquitur oratio: deinde ante pronomen *qui* omissam esse arbitror causalem particulam *nam*, vel *enim*. vt totus locus

ita legatur, *Cornelius quoque Nep. in lib. quo dist. lit. ab erudito, lit. quidem vulgo appellari ait eos qui aliquid dilig. & ac. scienterque possint aut dicere aut scribere: ceterum propriè sic appellandos poetarum interpretes. nam qui à Græcis grammatici nominentur, eosdem literatos vocitatos. vel, qui enim à Gr.* Ut perinde sit ac si scriberet, Id quod de grammaticis dicatur, eorum esse partes poetas interpretari, de illis itidem qui literati vocentur, esse intelligendum: quum non alij sint hi quàm illi, sed tantum appellatio vetus Latina in Græcam mutata sit. Possit tamen fortasse illa particula & post *nominentur* poni: hoc modo, *ceterum propriè sic appellandos poetarum interpretes, qui à Græcis grammatici nominentur. nam eosdem literatos vocitatos. vel, eosdem enim literatos vocitatos.* Quemadmodum autem pro grammaticis Literatos dixisse Latinos ait, ita pro grammatice eos Literaturam dixisse scimus: quamvis & secus hoc vocabulo vtatur Cicero. Nec video (quod pace Quintiliani dictum sit) quid obftet quominus & Literatoria dici possit, imo certè magis hæc vocabuli Latini forma formæ Græci respondere videtur quàm illa altera. Vnum tantum hic incommodum animaduerto, quòd Literatoriam si dicamus, hoc vocabulo vtemur, perinde ac si præcedat Literator: quum non itidem in sermone Græco illa voce *γραμματική* aliam priorem imaginemur, quæ illi Literator respondeat. Sed ne Literatrix quidem video cur illi displicere debuerit, tanquam non satis Græci verbi vim exprimens. Ac totus sanè ille Fabij locus subtilius quiddam quàm verius (si de critice agenti aliquid *κρίτικος* obiter de eo dicere fas est) habere mihi videtur.

Rhetoricen in Latinum transferentes (inquit) *tum Oratoriam, tum Oratricem nominauerunt. Et, paucis interiectis, Et hæc interpretatio non minus dura est quam illa Flauij, Essentia atque Entia. Sed ne propria quidem. nam Oratoria sic effertur ut Eloquutoria: Oratrix, ut Eloquutrix. Illa autem de qua loquimur, Rhetorice, talis est qualis Eloquentia. Nec dubiè apud Græcos quoque duplicem intellectum habet. nanque vno modo fit appositum, Ars rhetorica, ut Navis piratica: altero, nomen rei, qualis est Philosophia, Amicitia. Nos ipsam nunc volumus significare substantiam. ut Grammaticæ Literatura est, non Literatrix, quemadmodum Oratrix: nec Literatoria, quemadmodum Oratoria. Verùm in Rhetorice non sic. Quem locum scio nonnullis multum negotij facessere: sed ex obscuro clarum reddam, deinde quid mihi videatur iis quæ dicit opponendum, subiungam. Ille igitur interpretationem hanc qua Rhetorice redditur Oratoria vel Oratrix, non solum durâ, sed etiam impropiam esse ait: quòd Rhetorice tanquam substantiium nomen debeat à nobis considerari, (huc enim illa pertinent, nos ipsam nunc volumus significare substantiam) non tanquam adiectiium, (pro quò appositum dicit, quod respondet τῷ ἑπιδετοῦ, seu ἑπιδετικόν) sicut quum dicitur *Ars rhetorica*: ideòque sicut pro Grammaticæ non dicitur Literatrix, nec Literatoria, sed Literaturæ: ita inueniendum esse quod pro Rhetorice eodem modo dicatur: id est, substantiui formam itidem habens. at Latinam linguam nihil tale formare nobis permittere: ideòque necesse habere Græco Rhetorice uti. Sed his oppono, tum etiâ quum ῥητορικὴ dicitur, sine adiectione, tamē τέχνη subaudiri: eodemque modo, quum γερμανική: ideòque nec malè illic dici Oratoria, vel Eloquutoria, siue Oratrix, vel Eloquutrix:*

trix: neq; hîc, Literatoria, vel Literatrix. quidni enim Ars à Latinis, vt à Græcis τέχνη, subaudietur? Scio tamen, multis Rhetorice quidem & Grammaticæ, aliâque huiusmodi, substantiua videri, sicut Rhetorica & Grammatica, & similia, non nisi adiectiua: ac fateor quidem illa magis substantiuorum formam habere, sed vnicum tamen ῥητορικὴν esse pro vtroque illorum Latinorū, itidemq; vnicū esse γραμματικὴν pro duobus illis Latinis, fateri etiam necesse est: ideóque, si in his Græcis sit ea quam dico ellipsis (qua de re mihi cum Quintiliano cōtrouerfia est) non minus esse in vtroque nomine Latino.

Ad ῥητορικὴν autē quod attinet, hoc etiā habet cum nomine *oratoria* siue *eloquentia*, commune, quòd vt ῥήτορς appellatio illud præcedit, ita prius est illo quidem, *orator*, hoc autem, *eloquentor*. Verùm si γραμματικὴν pariter interpretemur *literatoria*, haud scio an itidem satis aptè *literator*, quod natura præcedit, si ipsa formatio spectetur, prius esse dicemus, ipsam rei naturam considerando. Quomodo enim *literator* quis esse potest antequam *literatorem*, per quam aliquis fit *literator*, didicerit? Atqui eadem & de *oratoria* moueri quæstio potest: dicet aliquis. quomodo enim *oratorē* imaginari possumus alium quàm eum qui iam *oratoriā* artem didicerit? Respondeo, posse nos ῥήτωρ illud quod ῥητορικὴν præcedit, simpliciter etiam pro eo qui ῥητὴρ poeticè dicitur, accipere. Qua tamen de re ἐπέχων, & ad illam *literatoris* appellationem sermonem vertēs, lectorem admoneo, quamuis eadem videri possit cum *grammatici* appellatione, atque adeo apud Catullum *literator* à plerisque non aliter exponatur: tamen à Suetonio discrimen inter hæc poni,

Hh.j.

ex nonnullorum sententia. *Sunt* (inquit) *qui literatum à literatore distinguant, ut Græci grammaticum à grammatista: & illum quidem, absolute, hunc, mediocriter doctum existiment.* Et addit, eorum opinionem ab Orbilio exemplis confirmari. Nam apud maiores, quàm alicuius familia venalis produceretur, nō temere aliquem in titulo non literatum, sed literatorem inscribi solitum, quasi non perfectum literis, sed imbutum.

Sed ut de officio literati saltem (si eo inferior est literator) id est grammatici, pergam verba facere, eius esse poetas interpretari, Cicero etiam testatur, libro De diuinatione primo. Nam de oraculis & de fortibus loquutus, *Quorum omnium* (inquit) *interpretes (ut grammatici poetarum) proximè ad eorum quos interpretantur diuinationem videntur accedere.* Quàm multarum autem rerum cognitio ad poetarum interpretationem requiratur, ostendit Quintilianus. Verum in eo dissentit à Suetonio, quod hic probare videtur veterum grammaticorum morem docendi rhetoricam, ille, improbare. Postquam enim dixit Suetonius, veteres grammaticos rhetoricam etiam docere fuisse solitos, ac multorum de utroque arte commentarios ferri: secundum quam consuetudinem posteriores quoque existimat, quanquam iam discretis professionibus, nihilominus vel retinuisse vel instituisse & ipsos quædam genera institutionum ad eloquentiam præparandam, ut problemata, periphrases, eloquutiones, (sed paraphrases scribendū puto, & vocem eloquutiones suspectam habeo) ethologias, atque alia id genus, ne scilicet ficci omnino atque aridi pueri rhetoribus traderentur: hæc (inquam) postquam dixit, ista proximè addit, *Quæ quidem omitti iam video, desidia quorundam*

rundam & infantia. nō enim fastidio putem. At Fabius postquam initio libri secundi dixit tenuisse consuetudinem, quæ quotidie magis inualesceret, vt præceptoribus eloquentiæ, Latinis quidem semper, sed etiam Græcis interim, discipuli serius quàm ratio postulat traderentur: eius rei duplicem esse causam ait, quòd & rhetores Latini suas partes omiserunt, & grammatici alienas occupauerunt. Nam & illos declamare modò, & scientiam declamandi ac facultatem tradere, officij sui ducere, idque intra deliberatiuas iudicialesque materias (nā cætera vt professione sua minor, despiciere) & hos non satis credere, excepisse quæ relictæ erant (quo nomine gratia quoque his sit habenda) sed ad prosopopœias vsque & ad suasorias, in quibus onus dicendi vel maximum est, irrumpere. *Hinc ergo accidit* (inquit) *vt quæ alterius artis prima erant opera, facta sint alterius nouissima: & ætas altioribus iam disciplinis debita, in schola minore subsideat, ac rhetoricē apud grammaticos exerceat.* Sed quanuis hîc ista scribat, tamē rhetorica quædam (id est, ad rhetoricam artem pertinentia) doceri à grammaticis permittit, libri primi capite decimo quinto: inter quæ numerat ethologias, quarū & à Suetonio fieri mentionē videmus. Verū longè vltèrius olim fuisse progressos quosdam grammaticodidascalos, & simul etiam rhetoricodidascalos omnino fuisse, discimus ex iis quæ addit Suetonius, *Audiebam etiam, memoria patrum quosdam è grammaticis statim (vel Staty) ludo transisse in forum, atque in numerum præstantissimorum patronorum receptos.* Iam verò apud eundem legimus fuisse & qui rhetoricam prius docuerit quàm grammaticam. nam Aurelium Opiliū philosopham primò, deinde rhetoricā, nouissimè gram-

maticam docuisse. Sed quorsum hæc quæstio, an grammaticos aliquid etiam rhetoricum docere oporteat. Aliena certe non est ab eo quod tracto argumento: quoniam criticum (cuius officio fungi debere si non quemlibet grammaticum, at saltè insignem quemvis grammaticum, dictum est) in ea vel maxime inquirere oportet quæ ad artem rhetoricam pertinent, ubicunque poemati aliqua huiusmodi inspersa sunt. Multa autem talia Virgiliano poemati nominatim inspersa esse, vel ex eo constat quod apud Seruium legimus, fuisse qui declamationes in Virgilium scripserit, id est, quarum argumenta ex Virgilio sumpta essent. Meminit harum, cum alibi, tum hunc in locum libri Æneidos decimi,

-- *Æneas contra cui talia reddit;*

Argenti atque auri memoras quæ multa talenta

Gnatis parce tuis.

Hæc enim apud eum legimus hunc in locum, *Qui in Virgilium scripsit declamationes, de hoc loco hoc ait, Improbus es, qui aut regi dones, aut filios ex heredes.*

Criticorum porro munere eo digniores fuisse quosdam grammaticos quo magis varia eorum erat eruditio, nemo negauerit. Hoc autem de plerisque persuasum nobis esse potest ex iis quæ à Suetonio scribuntur: & quidè nominatim de Aurelio Opilio. neque enim de eo hoc tantum testatur (quod & modo retuli) philosophiam primò, deinde rhetoricam, nouissimè grammaticam docuisse: sed etiam composuisse variæ eruditionis aliquot volumina.

Cæterum has criticorum partes suscipere fuisse solitos, ex eodè colligimus: præsertimque ex iis quæ de Q. Rhénio Palamone refert (licet arrogantia plenius dicere

dicere eum solitum, nomen suū in Bucolicis non temere positū, sed presagiente Virgilio, fore quandoq; omniū poetarum ac poematū Palæmonem iudicem. Nam iudicem, id est *κρίτην*, de eo etiā qui *κρίτην* censuram in poetas exerceret, intelligebant. Nec fortasse aliter vsus est Horatius, vbi dixit,

Non quivis videt immodulata poemata iudex.

Itidēque hoc in loco,

Albi, nostrorum Sermonum candide iudex.

Non minor est porro honor qui Valerio Catoni grāmatico deferebatur, ad officiū illud quod attinet, quā is quē & ipse sibi Palæmon tribuebat. Idē enim Suet. de eo scribit, *Visusq; est peridoneus præceptor maximè ad poeticā tendētib;: ut quidē appar. re vel his versiculis potest.*

Cato grammaticus, Latina siren,

Qui solus legit ac facit poetas.

Neque verò eum appellare cor *Zenodoti*, & iecur *Crateris*, aliud erat (ut opinor) quā præstantissimum vel summum criticum vocare. Illa autem de eo dicta videmus fuisse ab horum versiculorum autore,

Catonis modò Galle Tusculanum.

Tota creditor urbe venditabat.

Mirati sumus, unicum magistrum;

Summum grammaticum, optimum poetam.

Omnes soluere posse quæstiones,

Unum difficile expedire nomen.

En cor Zenodoti, en iecur Crateris.

Postquā enim lusit in ambigua vocabuli nomen significatione, nō aliter tamē quā si de difficultate loquutus esset quā exhiberet alicui grāmatico proposita de quopīā nomine quæstio, ita suum sermonē claudit,

En cor Zenodoti, en iecur Crateris.

perinde (ut opinor) ac si diceret, En quantum illi pro-
 fit duorum præstantissimorum & grammaticorum
 & criticorum (vel potius præstantissimorum inter
 grammaticos criticorum) Zenodoti & Cratetis cor
 habere. Sed festiuius vnius quidē cor, alterius autem
 iccur dixit. Scimus autem Græcum fuisse vtrunque:
 quamuis inter Latinos à Suetonio Cratetis quoque
 fiat mentio, & quidem tanquā primi in Vrbe gram-
 matici. Sed animaduertendum nobis est quod à qui-
 busdā minimē animaduersum fuisse video, non dici
 tamen eum Latinæ linguæ grammaticen docuisse,
 sed Latinis grammaticis exemplo fuisse ad imitandū.
Primus igitur (inquit) quantum opinamur, studium gramma-
tice in Urbem intulit Crates Mallotes, Aristarchi æqualis.
 Quibus addit, eum missum ad senatum ab Attalo re-
 ge inter secundum ac tertium bellum Punicum, sub
 ipsam Ennij mortem, quum in regione palatij pro-
 lapsus in cloacæ foramen crus fregisset, per omne le-
 gationis simul & valetudinis tēpus plurimas *ἀνεγὰς*
 subinde fecisse, assiduēque disseruisse, ac Romanis
 (nam Nostris dicit) exemplo fuisse ad imitandū. Sed
 & addit, qua in re versaretur illa imitatio, vel potius,
 quibus in rebus. eiusmodi autē sunt ut inter eas quo-
 que aliquid ad officiū critici pertinens agnoscamus.
 Addit enim, *Haftenus tamen imitati ut carmina parum ad-*
huc diuulgata vel defunctorum amicorum, vel si quorum aliorum
probaſſent, diligentius retractarent, ac legendo commentandōq,
etiam cæteris nota facerent. ut C. Octavius Lampadio Næuij
Punicum bellum, quod unico volumine & continenti scriptura
expositum, diuisit in septem libros. Sed obseruandum est in-
 ter cætera illud legendo: quod peculiarem quendam
 vsum habere videtur quum de legente grammatico

& eo quidē critico dicitur: perinde fortasse ac si criticum non aliorū more, sed criticè, id est, cum critico quodam iudicio, legere dicendum esset. Atque id multo etiam iustius dictum iri videtur de illo *legit* quod habemus in vno illorum de Valerio Catone versuum,

Cato grammaticus, Latina siren,

Qui solus legit ac facit poetas.

At verò de Q. Cæcilio scribit, eum dici, primū, Latine ex tempore disputasse, ac primum, Virgilium & alios poetas novos prælegere (ita enim, non perlegere, scribendum) cœpisse. Quod etiā (inquit) Domitij Marfi versiculus indicat,

Epeiora tenellorum nutricula vatum.

Quamvis porro Suetonius inter illa quæ de grammaticis scribit, in nullo (quod sciam) mentionem aliquorum eius scriptorum ad criticen pertinentium faciat, verisimile tamen est plerosque talia quædam reliquisse. Atque hoc vel ex iis quæ de Valerio Probo alibi legimus, colligere est. cum enim nō pauca eiusmodi scripserit ostendūt ea quæ extant talis scriptio-
nis velut *stigmata*: quum tamen nullam Suetonius in eius vita mentionem talium scriptorum faciat, sed tantum illum nimis pauca & exigua de quibusdam minutis quæstiunculis edidisse tradat. Sed & hæc de illo, quæ ad criticen pertinent, scribit, *Multaque exemplaria contracta emendare ac distinguere & adnotare curavit, soli huic nec ulli præterea grammatices parti deditus.*

Nec hoc quidem omittendum est, licet criticorum multi fungentes officio in exercenda aduersus poemata censura, poetæ tamen non essent, sed simul etiam vice cotis (ut loquitur Horatius) fungerentur,

quæ acutum ferrum valet reddere, quum secandi ipsa sit exors: fuisse tamen ex illis & qui poetæ essent, & quidem eorum etiam grammaticorū, quorum vitas scripsit Suetonius, nonnullos. Nam de Rhemnio Palæmone dicit, *Nec non etiam poemata faciebat ex tempore.*

• *Scripsit ex* (nisi potius legendū *Scripsit ea*) *variis nec vulgaribus metris.* Scripsisse ait & Valeriū Catonē præter grammaticos libellos etiam poemata, ex quibus præcipuè probari Lydiam & Dianā. Quinetiā in eo capite quo agit de grammaticorum appellatione, *Significat enim haud dubiè* (inquit) *Valerium Catonem, poetam simul grammaticūque notissimum.* Hic verò aliquid mihi in mentem venit quod apud Acronem, siue potius Pseudacronem, legi, annotatum ab eo in ista Horatij verba, (quæ non procul absunt à fine libri prioris Sermorum) — *& hæc utinam Viscorum laudet uterque.* In hæc enim verba scribit, *Visci, duo fratres fuerunt, optimi poeta.*

Alij dicunt criticos fuisse. Miratus sum sanè ita hæc ab isto dici, quasi in eundem non caderet & poetam esse & criticum. Sed apud eum commentatorem quem Iacobus Cruquius, primus (ut opinor) in lucē dedit, aliam lectionem, & mihi satisfaciētem, & lectori itidem, ut spero, satisfacturam, inueni, *Visci, duo fratres fuerunt, optimi poetae, & iudices critici.* Non tamen omnes grammaticos qui illustribus illis posteriores fuerunt, præsertimque eos quos postremum aut postremo proximum Latinitatis seculum tulit, ea doctrina fuisse quæ ad critice requiritur, apparet vel ex iis quæ ab Aulo Gellio de quorundam ad nonnullas quæstiones responsionibus commemorantur. Quibus certè non immeritò quis Tiberium Donatum addiderit, cuius inscitiam, & crassam eam quidem, nonnulla à nobis

nobis in præcedentibus allata satis supérque prodút. Illis autem pleraque similia, aut non multum dissimilia, qui extant commentarij exhibent: quos ideo falsò illi adscribi nò immeritò suspicaremur, nisi & ipsum Seruium talia in illo reprehendentem audiremus. Ad Valerium autem Probum quod attinet, vereor ne illi iniuriã faciamus, nisi pleraque sub eius nomine edita tanquam *ψευδὲς πηγὰς* reiiciamus.

NEC VERO soli grammaticì censuram criticam in aliquorum scripta exercuerunt, nec tales censores, siue grammaticì fuerint, siue alij, in alia nulla scripta quàm poetica inquisuerunt. Atque vt de censuris in poetæ quæ ab aliis quàm grammaticis profectæ sunt, prius verba faciam, Senecæ quædam in Virgilium extant. Nam epistola LIX legimus, *Itaque quum dicat (nisi dici potius scribendum est) Virgilius noster, — & mala mentis Gaudia, disertè quidem dicit, sed parum propriè. nullum enim malum gaudium est. Voluptatibus hoc nomen imposuit, &c.* Sed inter omnes reprehensiones grauissima esse illa videtur quam epistola LXXXVI legimus. de hoc enim ipso poeta scribit, *Qui non quid verissimè sed quid decentissimè diceretur aspexit: nec agricolas docere voluit, sed legentes delectare.* At ego Georgicò poema ita esse poeticum dico, id est, ita stylo & ornatu poetico esse scriptum, vt interim sit *διδασκαλικόν*: ideóque agricolas *διδάσκειν*, esse illius *ἔργον*: lectores delectare, esse *πάρρησιν*. Quid? nónne & Æneis est poema *διδασκαλικόν*? Respondeo, alio modo esse *διδασκαλικούς* libros illos, alio, libros Æneidos, qui sub figmentis nos *διδάσκουσι*.

Quidam etiam sunt loci huius poetæ quos examinari ab eo diligentissimè, ac (propè dixerim) curiosissimè, videmus: sed ita vt laudentur potius quàm re-

prehendantur. Sic etiam epistola ciiii, postquam attulit hunc versum, (qui libro Æneidos sexto legitur)

Terribiles visu formæ, Lethumque, Labosque,
ei quidem velle contradicere videtur initio, (scribit enim, *Minimè quidem, si rectis oculis intueri illa possis, & tenebras perrumpere. Multa per noctem habita terrori dies vertit ad risum*) sed ubi more suo iterum eundem versum nobis proposuit, *Terrib. v. f. &c.* exclamat, (nam epiphonematis speciem præ se ferunt illa verba) *Egregiè Virgilius noster, non re dixit terribiles esse, sed visu id est, videri, non esse. Quibus addit, Quid (inquam) in istis est tam formidabile quàm fama vulgavit? Quid est, obsecro te, Lucili, cur timeat laborem vir, mortem homo?* Sed aliquis non immeritò fortasse negauerit Senecæ, ea, aut saltem quædam ex iis quæ visu terribilia sint, non etiam re ipsa esse talia. At verò hoc ipsum in alium huius poetæ locum ab eo annotatum, verum esse fateantur omnes necesse est. *Virgilius* (inquit) *ait de nauibus, - credas innare reuulsas Cycladas. Quòd non dicit hoc fieri, sed videri, propiciis auribus auditur* (malè enim videtur in typogr. editionibus) *quamuis incredibile est: quòd excusatur antequam dicitur.* Præcedunt autem ista de alio eiusdem loco, *Virgilius quidem ait, Rapiat haud partem exiguum montis: ita magnitudini se dat. Sed vt non impudenter discedat à fide, est inflatum.* Videtur autem hæc dicere de isto loco qui legitur libro x,

Fert ingens toto connixus corpore saxum,

Haud partem exiguum montis, Lyrnessius Acmon.

Alius certè loci non recordor, in quo scripserit, aliquem rapere haud exiguum montis partem. Cæterum quum dicit Seneca, *Sed vt non impudenter discedat à fide,*

à fide, est inflatum, intelligi ab eo puto, hoc dictum Virgilij, quamvis non habeat impudentem hyperbolen, esse tamen inflatum. Fortasse tamen hic locus mendo nō caret: & quidē huius loci ista nominatim verba, *ita magnitudini se dat*, nō immeritō suspecta cuipiā fuerint.

Observationes insuper quasdam tanquam ex aliis affert, accuratam poematum Virgilij lectionem testantes. Ex illis duæ extant in epistolæ CVIII, (quæ vulgò malè CIX numeratur) extrema parte. *Nunquam Virgilius (inquit) dies dicit ire, sed fugere: (quod currendi genus concitatissimum est) & optimos quosque, primos rapi.* Quis autem est qui hoc apud Senecam inquit? is qui ad philosophiam spectās Virgilium scrutatur. Quum enim scripsisset Seneca, aliquid præcipientium vitio peccari, qui nos docent disputare, non vivere: aliquid & vitio discientium, qui propositum afferunt ad præceptores suos, non animum excolendi, sed ingenium: atque hinc, quæ philosophia fuerat, factam fuisse philologiam: addidit, *Multum autem ad rem pertinet, quo proposito ad quam rem accedas.* Atque istud exemplis facere manifestum volens, addit, *Qui grammaticus futurus Virgilium scrutatur, non hoc animo legit illud egregium, - fugit irreparabile tempus, Vigilandum est: nisi properamus, relinquitur. agit nos agiturque velox dies, inscijs rapimur. omnia in futurum disponimus, & inter præcipitia lenti sumus. Sed ut observet, quoties Virgilius de celeritate temporum dicit, hoc uti verbo illum,* FUGIT. Atque hinc ad aliud exemplum venit talis vsus verbi illius fugit:

Optima quæque dies miseris mortalibus æni.

Prima fugit: subeunt morbi tristisque senectus,

Et labor & duræ rapit inclementia moris,

Atque his versibus subiungit mentionē eius quoque qui in Virgilij lectione ad philosophiam spectat. Illum enim qui ad philosophiam spectat, hæc eadem quo debet dicit adducere. *Nunquam Virgilius* (inquit) *dies dicit ire, sed fugere: quod curr. &c.* ut paulo antè habuisti. Antequam verò longius abeam, de hoc obiter monebo, videri posse quædam deesse ante illa verba, *Vigilandum est: nisi properamus, relinquimur: & vel hanc esse loci huius lectionem, Qui grammaticus futurus Virgilium scrutatur, non hoc animo legit illud egregium, -fugit irreparabile tempus, ut statuat, Vigilandum est. vel hanc, inquam, germanam lectionem esse, vel non absimilem (cuiusmodi hæc fuerit, ut apud se consideret) quum sequatur, sed ut obseruet. Sed potest etiam existimari integer esse hic locus, ut ista verba, *Non hoc animo legit illud egregium, -fugit irreparabile tempus, Vigilandum est, &c.* ita accipiamus. Dum legit illud egregium, illi in mentē ista non veniunt, *Vigilandum est, &c.* Vel brevius, *Ista non cogitat, Vigilandum est, &c.**

Cæterum interiectis quibusdam eodem pertinentibus, ad hæc venit, *Itaque toto hoc agamus animo, & omis- sis ad quæ diuertimus, in rem vnam laboremus, nec* (sed ne scribendū) *hanc temporis perniciosi celeritatē, quam retinere nō possumus, relictī demum intelligamus. Primus quisque tanquam optimus dies placeat, & redigatur in nostrum. Quod fugit occupandum est.* Hæc autem postquam dixit, ad illum reuertens qui grammaticus futurus Virgilium scrutatur, & venusto loquendi genere de eo utrēs, *Hoc* (inquit) *non cogitat ille qui grammaticis oculis carmen istud legit, ideo optimum quæque primum esse diem, quia subeunt morbi, quia senectus premit, & adhuc adolescentiam cogitantibus supra caput est.* Atque hinc

hinc ad aliam obseruationem transit, quam ex eius persona proponit. Scribit enim, *Sed ait, Virgilium semper vnà ponere morbos & senectutem: non mehercule immeritò. Senectus enim, insanabilis morbus est. Præterea, inquit, hoc senectuti cognomen imposuit: tristem illam vocat. - subeunt morbi tristiisque senectus.* Sed multa his quæ à Seneca proponuntur ex grammatici persona, ab eodem addi potuissent: ab eodem inquam Seneca, ex eiusdem persona. Nam ad illam morborum cum senectute coniunctionem vel prouerbiū ipsum facit, αὐτὸ τὸ γῆρας, νόσος, quod ex Græco & quidē apud Græcos antiquo prouerbio translatum ab eo esse constat: quum etiam Apollodorus (teste Ælio Donato) eo vsus esset, ex quo & alia multa eundem comicum in eandem comædiam, Phormionem videlicet, transtulisse, verbū verbo reddentem, videmus. Hæc autem sunt Apollodori de senectute verba, τὸ γῆρας ὅστιν αὐτὸ νόσημα. Quinetiā addere posset istos ad illud prouerbiū pertinentes senarios Antiphanis,

Πρὸς γὰρ τὸ γῆρας, ὥσπερ ἐργαστήριον,

Ἀπαντα τῶν θρόπτων πρὸς φοιτᾷ κακὰ

Id est,

Nanque ad senectutem, officinam ceu suam,

Humana sese conferunt mala omnia.

Sed longè absum ab eo vt possim, vel potius longè abest Latina lingua ab eo vt possit idem tam significanter dicere. Dum enim consideramus nominis ἐργαστήριον originem ὑπὸ τῷ ἐργάζεσθαι, iam nobis repræsentamus & ante oculos ponimus tā varios morbos (nam hîc ἀπαντα κακὰ, id est, omnia mala, sunt ἀπαντα νόσηματα, id est, omnes morbi) tam varia ἔργα in humanis corporibus senectute affectis, tanquam in ergasteriis.

fuis, ἐργαζομένης, ideóque verti, (etiá in libello in quem Græcorum comicorum sententias collegi) *officinam seu suam*, quum antea *officinam quampiam* legeremus in ista horum senariorum interpretatione,

Miseram ad senectam, ut ad officinam quampiam,

Malis uniuersa confluunt mortalium.

Extant & alij duo pertinentes codé senarij, sub eiusdem comici, Antiphanis inquam, nomine,

Τὸ γὰρ εἰς ἀσπερ βωμὸς ὅτι τῷ κακῶν

Πάντ' ἐς' ἰδεῖν εἰς τοῦτο καταπεφύγτα.

Id est,

Senium, malorum ara velut est mortalibus,

Confugere ad illud conspiciamur omnia.

quum antea hi versus ita redditi fuerint,

Quædam est malorum ara senectus omnium:

Adeo videre est cuncta ad hanc recurrere.

In qua interpretatione minimè seruatur proprietas vocabuli καταπεφύγτα. ea enim vt seruaretur, dicendum erat *Ad aram confugere*, non *Ad aram recurrere*. Sed vt ad aliam maioris momenti censuram veniam, (quæ aut critica, aut tanquam critica est) haud aptè senectutem aræ comparasse videtur Antiphanes. quã enim analogiam habet comparatiō eorum qui ad aram confugiunt, cum malis, id est morbis, ad senectutem, tanquam ad sedem sibi destinatam, conuenientibus? Qui ad aram confugiunt, non de inferendo iniuriam, sed tantum de supplicando cogitant: nullique magis demisso sunt animo: at morbi qui in senectutem, id est, in corpora senectute affecta, confluunt, illis omne iniuriæ genus inferre parati veniunt: & quidem cum magna confidentia ad hoc agendum accedunt. At verò qui senectutem λιμνα esse

dixit,

dixit, id est portum, non itidem reprehendendus esse videtur.

Cæterum quum prouerbio dicatur, *Senectus ipsa est morbus*, Seneca non nihil ab illo deflectens, dicit, *Senectus, insanabilis morbus est*. Quid: an illum hac adiectione aduersus prouerbiū agere criticum voluisse dicemus? voluisse illud *κατὰ νόον* reprehendere? Imo verò suum sensum habent illa prouerbij verba, suum verba Senecæ. Nam qui dicit, *Senectus ipsa est morbus*, intelligit, hominem senem, eo ipso quòd sit senex, morbi expertem non esse: at qui ait, *Senectus, morbus insanabilis est*, vltèrius etiam progreditur. quum enim ex morbis alij sanabiles sint, alij insanabiles: perinde est ac si diceretur, *Senectus ipsa morbus est, & quidem insanabilis*. vel, *& quidem ex insanabilium numero*.

Hæc autem omnia tanquam *ἐν παρρησίᾳ* proposui, sed non tamen à meo argumento aliena: partim quòd sint velut supplementum eorum, quæ cogitare potest aut etiam debet is qui grammaticis oculis illud Virgilij carmen legit: (non propositurus tamè, nisi vidissem, Græca ista quæ illi Virgilij consuetudini pondus addunt, atque adeo illam confirmant, ab iis prætermissa qui alioqui Græcorum locos cum Virgilianis aut hos cum illis adeo curiosè contulerunt, vt multa etiam leuia & *ἀπερὸς δόρυυσα* admiscuerint) partim, quòd formando ad critice iudicio apta esse videantur.

Iam verò (vt ad obseruationes reuertar) tertia quoque duabus illis adiici (meo quidem iudicio) potuisset: Virgilium aliquoties laborem & mortem copulare. Legimus enim in duorum præcedentium locorum vno,

Terribiles visu formæ, Lethûmque, Labóſque:
in altero,

Et labor & duræ rapit inclementia mortis.

Est sanè (ni fallor) obſervatio iſta non minoris momenti & non minus grammaticis oculis perſpici digna quàm illæ duæ nobis à Seneca propoſitæ. Et verò hunc ipſum vno eodémque in loco mortis & laborum mentionem facere animaduerti, commentarij De vita beata capite xx, *Qui ſibi hoc propoſuit, Ego mortem eodem vultu audiam quo videbo: ego laboribus, quancunque illi erunt, parebo, animo fulciens corpus.* Sed aut aliud verbû in locum τὸ videbo hîc ſubſtituendum eſt, aut ordine mutato ſcribendum eſt, *ego mortem eodem vultu videbo quo audiam.* Videbo (inquam) quamuis, vt modò dictum fuit, ſint *Terribiles visu formæ, Lethûmque, Labóſque.*

SED vt ab his ad aliud veniam quod magis ad argumentum noſtrum pertinet: id eſt, ad inſigne iudicij verè critici exemplum: lectorem legere apud eundem Senecam finem Controuerſiæ primæ libri primi iubebo: vel potius ipſemet inde locum depromptum ei proponam. Ibi enim de Cæſtro rhetore ſeu oratore loquens, dicit, eum in quadam narratione, quum fratrem traditum ſibi deſcriberet, placuiſſe ſibi in hac explicatione vna & infelici, *Nox erat concubia, & omnia, iudices, canentia ſideribus muta erant.* Quibus addit, Montanum Iulium, qui comis fuit quique egregius poeta, dicere ſolitum, illum imitari voluiſſe Virgilij deſcriptionem,

Nox erat, & terras animalia feſſa per omnes

Alituum pecudûmque genus ſopor altus habebat.

At Virgilij imitationem bene ceſſiſſe, qui illos optimos verſus Varronis expreſſiſſet in melius,

Deſie-

Desierant latrare canes, vrbsque silebant:

Omnia noctis erant placida composita quiete.

His autem criticum Ouidij iudicium subiungit. Solebat Ouidius (inquit) de his versibus dicere , potuisse fieri longè meliores , si secundi versus vltima pars abscinderetur , & sic desineret, *Omnia noctis erant*. Sed harum Controuersiarum autor suam de hoc critico iudicio sententiã profert: his verbis, Varro quem voluit sensum optimè explicuit : Ouidius in illius versu suum sensum inuenit. aliud enim intercisus versus significaturus est, aliud totus significat. Quid hac de sententia dicemus? an illi esse assentiendum? ego certè Ouidio potius assentiendum esse dixerim. Nisi fortè obiiciat quispiam , ita excusari Varronem, vt tamen non negetur quod ab Ouidio dicitur , fieri potuisse hos versus longè meliores si secundi versus vltima pars abscinderetur. Quod si ita est, intelligemus, eũ, postquam dixit, Varronem, quem voluit sensum optimè expressisse : addentem, Ouidium in illius versu suum sensum inuenisse: inficiari noluisse, hũc alterum sensum quem Ouidius in Varronis versu inuenerit , altero longè meliorem esse. Nam quis neget, hæc verba, *Omnia noctis erant*, non minus elegans quàm nouũ loquendi genus habere, & multo latius patentem noctis descriptionem complecti, quàm cõplexura, versu manente integro, essent? Quod autem de hoc loco iudicauit Ouidius, de aliis plerisque iudicaturus est lector apud poetas , qui aliquid *νεμῆος δινάμεις* habebit. In quorundam certè epigrammatis, ego, qui me tamen in numero criticorum non pono (absit vt tanto me digner honore) meminì animaduerrere, longè venustiora futura fuisse si quis vltimam partem, id est duo disticha, vltimum & penultimum, aut

saltem vltimum ex illis abscidisset.

Ac, quoniam in mentionem huius censuræ Ouidianæ incidi, addā de illo, multo plus valuisse iudicio quàm vulgus credat: & quidē adeo valuisse vt tutum se fortasse à criticorū reprehensionibus præstare potuerit, si voluisset. id est, si ingenio téperare quàm indulgere maluisset (vt scribit Fabius, *Ouidij Medea ostendit quantum vir ille præstare potuisset si ingenio suo temperare, quàm indulgere maluisset.*) Manifestum autē huius rei argumentum habere nos contendo in eo quod à Seneca libro Controuersiarum secūdo, nec non secundo Declamationum (si tamen Senecæ sunt & illæ declamationes) de ipso legimus: Rogatum aliquando ab amicis suis vt tolleretur tres versus, petiisse inuicem vt ipse tres exciperet, in quos nihil illis liceret. Quum igitur æqua lex visa esset, & scripssissent illi secretò quos tolli vellent, hic, quos tutos esse vellet: in vtrisque codicillis eosdem versus inuentos fuisse: ex quibus primum fuisse narrabat Albinouanus Peto, qui inter arbitros fuit,

Semibouémque virum, semiuirúmque bouem:

secundum,

Et gelidum (vel *Egelidū* potius) *borean, egelidūq; notū.* Nec verò is à quo hæc narrantur (siue Seneca is est, siue alius) illud tacet quod de Ouidio dixi, aut certè ali-quid ei simile. *Ex quo apparet* (inquit) *summi ingenij viro non iudicium defuisse ad compescendam licentiam carminum suorum, sed animum.* Quinetiam dicitur in illo Controuersiarū loco non ignorauisse vitia sua, sed amauisse. Ibi enim legimus, *Declamabat autem Naso rarò* (verum nō rarò scribendum suspicor) *controuersias: sed non nisi ethicas. Libentius dicebat suasorias.* molesta illi erat omnis argum-
tatio.

tatio. Verbis minimè licenter vsus est, nisi in carminibus: in quibus non ignorauit vitia sua, sed amauit. Dixi suspicari me scribendum non raro, quia sequitur sed nonnisi ethicas. Alioqui certè videtur subiuncturus potius fuisse, & nonnisi ethicas. Cæterùm hæc verba, Nasonè non ignorauisse sua vitia, sed ea amauisse: item, illi non defuisse iudicium ad compescendam licentiam carminum suorum, sed animum: planè conueniunt cum illis Fabianis, illum ingenio suo indulgere quàm temperare maluisse. Sed an istud concedere Senecæ (aut illi quicumque id dixit) debemus, Nasonem verbis licenter in carminibus esse vsum? Ego certè magis licenter illis vsum esse quàm Virgilium, vix concesserim.

Cæterùm criticum de quodam Nasonis loco iudicium, his quæ de illius natura ex Seneca & Fabio attuli appositè adiecturus mihi videor: quòd is locus ex iis sit vnus propter quos potissimùm talem de eo sententiam tulisse crediderim. Legimus igitur Controuersia quinta libri noni, itidémque Declamatione quinta libri quarti, Montanum oratorem laborare hoc vitio, quòd sententias suas repetèdo corrumpat, & dum non est contentus vnâ rem semel bene dicere, efficere ne bene dixerit: & propter hoc atque alia quibus orator potest similis poetæ videri, solitum Scaurum, Montanum vocare Ouidium inter oratores. Quibus additur, *Nam & Ouidius nescit quod bene cessit relinquere. Non multa referam quæ Montaniana Scaurus notabat: (nisi fortè, quæ Montaniana in illo Scaurus notabat, scribendum est) vno hoc contentus ero. Quum Polyxena esset adducta vt ad tumulum Achillis immolaretur, Hecuba dixit,*

-ciris ipse sepulchri In genus hoc pugnat.

Poterat hoc contentus esse: adiecit,

-tumulo quoque sensimus hostem.

Nec hoc contentus, adiecit, *AEacida fecunda fui.*

Deinde Scauri generalem de hoc & talibus locis sententiam affert, *Aiebat autem Scaurus (inquit) non minus magnam virtutem esse, scire desinere, quàm scire dicere.* Hæc ille, vel potius illi: at ego fateor quidem esse virtutem istud, scire desinere, non minus quàm scire dicere: & in illum qui desinere nesciat, iactari posse illud, cum nescire manum de tabula ponere (etiamsi magis in illum quadret qui nunquam limam è suis scriptis scit deponere: quum tamen nimius limæ vsus illa interdum atterat: vt scribit Plinius in quadam epistola, *Perfectum opus absolutumque est, nec iam splendet lima, sed atteritur*) fateor, inquam, virtutem esse, scire desinere: & vitium esse vicissim, nescire finem dicendi facere: fateor insuper, istud Ouidio ab aliis quoque obiectum fuisse: sed vt de aliis taceam locis qui hoc fuerunt nomine reprehensi, in hunc certè reprehensionem istam nego cadere: & ex criticis non pauciores defensores quàm accusatores habere potuisse. Quæ enim persona loquitur? primum quidem mulier: (atqui scimus muliebre sexum natura esse *μεμφμοίον*) deinde vetula (notum verò est, senilis ætatis magis esse *τὸ μεμφμοίον*) postremò, mulier quæ regina fuit, & regio spiritus non omnino deposuit. iniuriam autè tali personæ factam, multo maiorem videri, & maiore querendi occasionem præbere constat. Hæc autem quæ ita sint, & quæ etiam quorumvis *μεμφμοιουώτων* (præsertimque quum simul etiam *θρηνουώτες* id faciunt) sit *μακρολογεῖν*, atque adeo *ταυτολογεῖν*, quam hîc criticis reprehenden-

prehendendi sui materiam dare Ouidianam Hecubam dicemus? Cæterum non legimus apud Ovidiū, *-in genus hoc pugnat, sed, in genus hoc sævit*, quod multo est significantius. estque fortassis Senecæ ἀμαρτυρα μνημονίων. (quod & de loco illo suspicari ausim, paulo ante allato, *rapit haud partem exiguam montis*) Totusque locus (vt de iis quæ afferuntur à Seneca, certius iudicare lector possit) est hic, in quo Hecuba filix suæ Polyxenæ iacturam deplorans, hæc inter alia ait, libro Metamorph. XIII,

-at te, quia sæmina, rebar

A ferro tutam: cecidisti & sæmina ferro.

Torque tuos idem fratres, te perdidit idem,

Exitum Troiæ, nostrique orbator Achilles.

At postquam cecidit Paridis Phæbique sagittis,

Nunc cerè, dixi, non est metuendus Achilles.

Nunc quoque mi metuendus erat: cinis ipse sepultri

In genus hoc sævit: tumulo quoque sensimus hostem:

A Eacida sæcunda fui.

Quem locum si totum lector consideret, eo facilius, vt spero, subscribet meæ illi sententiæ, qua Nasonem aduersus criticam illorum censuram tueor, aut tueri saltem conor. Scio alioqui, Nasonē, præsertim si cum Marone conferatur, habere nonnulla quæ detrahi posse videantur, sicut aliqua esse quæ quis huic non immeritò forsitan adici posse dixerit. Qua de re habes à me epigrammata posteriori meæ editioni huius poetæ præfixa: quorum primum est istud,

Grandiloquum vt nulla ars potis est curasse Maronem,

Auctior vt tu sis, ars dare, Nasos erigit.

At verò vltimum, est hoc,

Ami vt pulchrisso Nasonis comparas, eras,

KLIII.

Sic etiam musam comparo Virgili:

Sed supra ripas sæpe ille extenditur amnis,

Se se intra ripas continet ille suas.

Quidam verò sint loci quos Seneca (nam ad eum reuertendum est) reprehendit, dum in eos nimis fortasse philosophicè inquit. Exemplum habemus epistola LVI. siquidem postquã dixit, *Animum enim cogo sibi intentum esse, nec auerari ad externa. Omnia licet foris resonent, dum intus nihil tumultus sit, dum inter se non rixentur cupiditas & timor, dum auaritia luxuriæque non dissideant, nec altera alteram vexet. Nam quid prodest totius regionis silentiũ, si affectus fremunt?* Hæc inquam postquam dixit, affert hunc versum,

Omnia noctis erant placida composita quiete.

(ita enim scribendum est, non tacita) & hæc illi velut indignabundus ἐμπνεῖ, *Falsum est. nulla placida quies est, nisi quam ratio composuit. Nox exhibet molestiam, non tollit, & sollicitudines mutat.* (sed hoc mutat ex coniectura muto in inuitat.) Nam dormientium quoque insomnia tam turbulenta sunt quàm dies. Illa tranquillitas vera est, in quam bona mens explicatur. Nec contentus his, considerare nos iubet aliquem ex diuitibus vel potius prædiuitibus, cui quum modis omnibus silentium procuraretur ad somnum capiendum, hunc tamen nullo capere modo potest. *Aspice* (inquit) *illum cui somnus laxa domus silentio queritur, cuius aures nequis agitet sonus, omnis seruorum turba conticuit, & suspensum accedentium propius vestigium ponitur. Huc nempe versatur atque illuc, somnum inter agritudines leuem captans: quæ non audit, audisse se queritur. Quid in causa putas esse? animus illi obstrepit: hic placandus est, huius compefcenda est seditio. quem non est quod existimes placidum si iacet corpus.* Hæc & alia multa aduersus locum illum affert,

affert, vt mendacij conuincat. Sed pro Varrone (eo fortasse qui Atacinus cognominabatur) responderi posse videtur, non esse verè quietem, eam quæ placida non sit, eam quæ (vt ipse statim pòst loquitur Seneca) inquieta sit. Ac nec istud pro eo malè (vt opinor) respondeatur, eum de quiete illa quæ est *ἡ φύσις*, & non quæ *παρὰ φύσιν*, verba facere. Est autè *παρὰ φύσιν* quies eius cui animus est inquietus. tranquilla enim vita & otiosa ex animi tranquillitate & otio iudicanda est: vt vel ex isto eius loco discimus, (libri De ira II, capite XIII) *Quid enim quiete otiosus animi?* Huc verò pertinentia multa legimus apud Horatium, qui & hac ipsa voce *otium* ita vtitur: ode XVI, libri secundi, *Otium diuos rogat in patenti Prensus AEgeo*, &c. nam de aliis etiam rogantibus diuos otium loquutus, subiungit,

*Non enim gaze neque consularis
Summonet lictor miseros tumultus
Mentis, & curas laqueata circum
Tecta volantes.*

Legimus verò apud eundem, ode prima libri tertij, *-neque Decedit arata triremi, & Post equitem sedet atra cura.* Quinetiam audimus eundem canentem epistola secunda libri prioris,

*Non domus & fundus, non aris aceruus & auri
Ægroto domini deduxit corpore febres,
Non animo curas.*

Sed quamuis Horatius de vera quiete idem sentiat quod Seneca, non tamen & de illa reprehensione versus Varronis, quo placidā appellat quietem, ei assentiretur: sed vel id quod dixi, vel aliquid tale (vt opinor) ad eius defensionem afferret.

Iam verò & aliud apud Senecam obseruaui, quod critico minus quam cuiquam alij conuenire, ac potius ab eo prorsus alienum esse, meritò quis dixerit: eum diuersis locis diuersum eodem de loco iudiciũ ferre. cuius rei (si bene memini) mentio à me facta fuit in libro nuper edito, cui titulus est AD SENECÆ LECTIIONEM PROODOPOEIA. Insigne autem exemplũ habemus in illa ab omnibus decantata Hesiodi sententia, qua virtutẽ in arduo sitam esse tradit. hanc enim quũ vno in loco improbet, cõtrà in altero probat. Nā libri De ira secũdi tmemate xiii, postquã, de malò irẽ loquẽs, dixit non esse quòd patrociniũ nobis queramus, & excusatam licentiam, dicentes aut vtile esse, aut ineuitabile: nec esse quòd dicamus, hoc vel illud vitium excidi non posse: hæc subiungit, *Sanabilibus egrotamus malis: ipsæque nos in rectum genitos natura, si emendari velimus, inuat. Nec, ut quibusdam visum est, arduum in virtutes & asperum iter est: plano adeuntur.* Quintetiam ista adiicit, *Non vana vobis autor rei venio. facilis est ad beatam vitam via. inite modò bonis auspicijs, ipsæque dijs bene inuantibus.* Neque enim dubium est quin hĩc reprehendatur ista Hesiodi sententia,

Τῆς δ' ἀρετῆς ἰδ' ἐστὶν θεοὶ παρὰ τοὺς ἄνθρωποι
 Ἀθάνατοι· μακρὸς δὲ καὶ ὄρσιος οἶμος ἐπ' αὐτῶν,
 Καὶ τριχὺς ποταμὸς ἐπὶ τῷ δὲ εἰς ἀκρον ἵκηται,
 Πνιδὴν δ' ἥπειτα πέλει χαλεπή περ ἐοῦσα.

At ecce alium eiuldem Senecæ locũ, vbi contrà huic sententiæ assentitur. Nam capite vigesimo libelli De vita beata, ista legimus, *Interim non est quòd contemnas bona verba, & bonis cogitationibus plena præcordia. Studiorum salutarium, etiam curra affectum, laudanda oratio vel potius tractatio est. Quid mirum si non ascendunt (nisi potius scribendum*

bendum est, si qui non ascendunt in altum? *Ardui aggressus ad virtutes. suscipe, etiamsi decidunt magna conantes.* Sed alia etiam lectio affertur, *Arduos aggressus virtutis suscipe, etiamsi decidunt, magna conantur.* Sed non minus altera illa mihi probatur, qui illud *aggressus* potissimum suspectum habeo, & *accessus* in eius locum libenter substituerim. Cæterum verbis illis ista subiungit, *Generosa res est, respicientem* (pro quo tamen *respicere* legitur in superioris temporis editionibus) *non ad suas sed ad naturæ suæ vires, conari alta, tentare. & mente maiora concipere quam etiam ingēti animo adornatis effici possint.* Quæ omnia cum illo veteri dicto conueniunt, *In magnis & voluisse sat est.* Eodēque pertinent ista, in quibus statuitur capitis xxi initium, *Qui hoc facere proponet, volet, tentabit, ad deos iter faciet. hoc ille etiamsi nō tenuerit, magnis tamen excider ausis.* Quibus verbis prouerbialis quodammodo datus est vsus, ex Ouidiano Phaëthontis epitaphio sumptis. Interim autem eum assentiri (vt dixi) illi Hesiodæ sententiæ videmus: cui contrā aperte repugnat in isto qui antea fuit allatus loco, *Nec, vt quibusdam visum est, arduum in virtutes & asperum iter est.* Quid? an quod Senecam excuset inueniemus? Ego certè illum more oratorum alicubi facere dico, qui idem modò probant, modò improbāt, vt causæ seruiant. Sed & hoc obseruandum est, in cuius persona Hesiodum illud dictum reprehendat.

Cæterum, si vsq; ad nostri seculi criticos deueniendum esset, inter hos & quosdam huius ipsius poetæ reprehēsores inueniremus, eūque nominatim qui duos è suis de poetice libris, vnum, Criticum, alterū, Hypercriticum appellauit. Ac quamuis non ad illos vsque deuenire, sed eos in aliud tempus reseruare sta-

tertium, ex hoc tamen aliquot exempla talium reprehensionum afferre, & aduersus quasdam poëtam hunc liber defendere. Incipiam igitur ab vna quę illi Senecę vel potius Scauri est similis. nam quemadmodum hunc audisti accusantem Ouidium quod rem vnam non vno dicere modo contentus esset, in illo Metamorphoseos loco,

— cinis ipse sepultri

Ingenus hoc pugnat (vel scuit potius) tumulo quoque sensimus hostem.

Æacida fecunda fui:

hic ille, vbi fatetur Ouidium ita esse mutuatum Hesiodi secula (ita enim vocat descriptiones seculorum) vt eum longē post se reliquerit: & istum huius locum,

— καρπὸν δ' ἔρεπε ζείδωρος ἀεὺρα

Αὐτομάτῃ πολλὸν τε καὶ ἀφ' ὄρου,

his duobus versibus expressisse docet;

Ipsa quoque immunis, astroque intacta, sine vllis

Saucia vomeribus per se dabat omnia tellus.

addit reprehensionem de mala repetitione. nam hæc adiicit, *Quod male repetit, Mox etiam fruges tellus intrata ferebat.* Atqui versus illos longiusculo intervallo sequitur hic, *Mox etiam fr. t. i. ferebat,* & quidem interiecta veris mentione: cui quum versum istum subiungit, *Mox etiam fr. &c.* perinde est ac si non ætatis quidem (nam ver fuisse æternū dixit) sed eius boni quod postea mortales non nisi ætatis beneficio consequi cœperunt, metionem subnecteret. Nam versus illos, *Ipsa quoque imm. r. int. sine vllis Sauc. v. p. se d. o. tellus,* sequuntur isti,

Concentique cibus nullo cogente creatis,

Arbu-

Arbutos fetus montanæque fraga legebant,

Cornæque, & in duris hærentia mora rubetis,

Et, quæ deciderant patula Iovis arbore, glandes.

Ver erat æternum: placidique tepentibus auris

Mulcebant zephyri natos sine semine flores.

Atque his versibus proximè adiiçitur ille, in quem ab eo inquitur,

Mox etiam fruges tellus inarata ferebat.

Illumque iste excipit, eodem pertinens, qui alioqui reprehensionem, tanquam male repetitus, non minus mereri dici posset quam alter:

Nec renouatus ager gravidis canebat arista.

Idem criticus in eodem quinto de arte poetica libro, quem criticum vocat, aliùm huius poetæ locum malæ repetitionis velle videtur accusare. Vbi enim attulit hos illius versus, (qui sunt ex eius Metamorphoseon libro septimo sumpti, in descriptione pestilentiae,

Admoti quoties templis, dum vota sacerdos

Concipit, & fundit purum inter cornua vinum,

Haud expectato ceciderunt vulnere tauri?

Vbi (inquam) hos versus attulit, Et mox, ait, more suo iterum,

-mugitus victima diros

Edidit, & subito collapsa sine ictibus vllis

Exiguo tinxit subiectos sanguine cultros.

Neque enim dubium est quin verbis illis innuere velit malum illum eadem repetendi morem. Atqui non adiuncti sunt versus hi illis absque vllò intervallo, sed hæc interiecta sunt,

Ipse ego sacra Iovi pro me patriaque tribusque

Quum facerem natis.

quibus verbis exemplū eius quod dixit, incipit proponere. cur autē in proponendo exemplo non idem aliis verbis dicat? & cur, dum id facit, tanquam mala repetitione vtens, accusetur?

Sic & alij plerique loci reprehenduntur, tanquam vitiosas repetitiones habeant: quorum defensionem apud omnem æquum iudicē suscipere minimē dubitarim. Et sunt tamen (fateor) nonnulli etiam loci in quos fortasse illa reprehensio cadere dici possit: sed ita vt non minus quosdam Virgilianos ei esse obnoxios, ausim contendere. Inter quos numerandum esse istum dixerim, ex *Æneidos* primo,

*Quem si fata virum seruant, si vescitur aura
Ætheria, nec adhuc crudelibus occubat umbris.*

nec non istum ē tertio,

Quid puer Ascanius? superatne, & vescitur aura?

Quis enim in his aliisque huiusmodi locis non solum repetitionem, sed *πλεωρολογικῶς* eam quidem, seu *ταυτολογικῶς*, esse negauerit? Minorem tamen esse hīc *πλεωρολογίαν*, seu *ταυτολογίαν*, quā illic, fateor, ac potuisset minore ista contentus & in illo priore loco esse, hoc modo,

Quem si fata virum seruant, si vescitur aura,
non addito sequente versu. Alioqui, si adiectione illius adiectiui *ætheria* opus illic erat post *aura*, certē & hīc opus ea fuisse dicemus: nec minus certē & quā vocem *ætheria* sequuntur potuisse conuenire: ita,

*Quid puer Ascanius? superatne, & vescitur aura
Ætheria? nec adhuc crudelibus occubat umbris?*

Aliud tamen perissologiæ genus à Seruio in multis huius poetæ locis constituitur: ē quorum numero est hic libro primo,

-vt faciem mutatus & ora Cupido

Pro dulci Ascanio veniat.

Nam hic annotat, *Quod autem addidit, & ora, perissologia est.* Cui loco multi similes inueniri possunt: id est, qui talem perissologiam habeant. Sola autem breuitate (vt opinor) ab altera differre dici potest: ideoque breuiorem perissologiam vocauerim. Sed & perissologia quæ est in repetitione, mentionem facit idem scholiastes. Nam in hunc locum libri *Georgicon* secundi,

Nunc, quo quaque modo possis cognoscere, dicam.

Rara sit, an supra morem si densa, requiras:

Altera frumentis quoniam fauet, altera Baccho:

Densa magis Cereri, rarissima quaque Lyæo:

annotat, istos versus esse incomparabiles, qui tantam habeant sine aliqua perissologia repetitionem. Nam ex his ostendit existimare se, repetitionem sæpe vitio perissologiae non carere.

Verum vt à Virgilio ad Ouidium reuertar, & quidem ab illis Ouidij locis qui ob repetitionem reprehenduntur (quòd videatur perissologica, seu tautologica, si his vti vocabulis licet) ad alia quædam vitia ab eodem critico alibi repressa (nisi potius, tanquam vitia, dicere debui) veniam, antequam huic sermoni finem imponam: idem criticus hunc versum, qui est primæ epistolæ secundus,

Nil mihi rescribas, attamen ipse veni,

ex illis esse putat qui vitio non careant. *Quid enim hic aduersatiua?* inquit. At ego ab interpunctiuncula loco alieno posita (vide lector quàm exigua res in quantum errorem, etiam magnum vel potius maximum virum impellat) deceptum esse respondeo. nam quæ

est ante vocem *attamen* hypostigme, post ipsam est collocanda: hoc modo,

Hanc tua Penelope lento tibi mittit Ulysse:

Nil mihi rescribas attamen, ipse veni.

Tibi (inquit) scribit tua Penelope: cuius tamen desiderio non satisfeceris si rescripseris (id est, vicissim scripseris) sed petit ut ipse met venias, & sis rerum tuarum ἀντάγιστος. Vide quanto hoc sit rectius, quam quod ille, hunc versum reformans, substituit,

-ocyus ipse veni.

Quinetiam totum locum, id est utrūque versum, ita reformat,

Hanc tua Penelope (an memori?) tibi mittit Ulysse:

Scribendi perijt tempus: at ipse veni.

Sed magna illi vocabulo *lento* fieri iniuria videtur, ipsum è sede sua extrudendo: quum soleant mulieres de maritis vel de amatoribus hoc nomine potissimum queri quòd sint ad reditum suum lenti: & ab his nihil magis enixè peti soleat quàm ut illi veniant.

Longè grauior est quæ ab eodem critico proximè additur accusatio. Nam *solæcon* est, inquit,

Denique quisquis erat castris ingulatus Achivis,

Frigidius glacie pectus amantis erat.

Et addit, *Quid enim facit illud Quisquis?* Quid? an & in *solæcon* incidisse sermonem Ouidij credemus? Imò verò ne credibile quidem est. hîc certè nec *σολαικον* nec *σολαιμοφανές*: quidquam legimus, nihil quod in Latîna oratione, & quidem soluta etiam, locū non habeat. Nam quum dicitur,

Denique quisquis erat castris ingulatus Achivis,

Frigidius glacie pectus amantis erat,

perin-

perinde est ac si diceretur, Denique quemcunque audiebam iugulatum in Achiuis castris esse, pectus mihi frigidius glacie erat.

Illam censoriam notam proximè sequitur ista, in alium eiusdem epistolæ locum, qui non longo intervallo ab hoc est dissitus. Postquam enim hæc verba attulit,

-victa suis Troica fata canunt,
subiungit, *Non erant victa fata, imò Troianum fatum vicit.* vicit enim Troianorum vota: quia in fatis erat Troiam capi. Hæc ille: aduersus quæ antequam Ouidio patrocinari aggrediar, eundem versum cum quinque præcedentibus proponam:

Sed bene consuluit casto deus æquus amori:

Versa est in cineres sospite Troia viro:

Argolici rediere duces, altaria fumant:

Ponitur ad patrios barbara præda deos:

Grata ferunt nymphe pro saluis dona maritis

Illi victa suis Troica fata canunt.

Atque his versibus isti duo proximè sunt adiecti,

Æranturi istique senes eripideæque puellæ:

Narrantis cœnux pender ab ore viri.

Ex his quum totius loci sensus possit lectori patefieri, videndum est an male sit loquutus Ovidius, quum dixit *victa fata*: quæ ab illo censore notantur verba. Ego igitur contrà esse rectè & propriè loquutum hunc poetam dico, quum essent Troianorum & Græcorum inter se fata contraria, poetice quidem certè loquendo: atque adeo inter se velut pugnarent. Nouum autem non esse ut dicantur aliqua fata esse fati aliis contraria, ex eo poeta quem tanto pere admiratur, tantòque in pretio (& meritò quidè)

ille ipse cenfor habet, facillimum mihi fuerit ostendere. Nam legimus libro Æneidos septimo, Iunonem de his ipsis Troianis querentem quòd illorum fata suis essent contraria. de hac enim dea ista ibi canit,

*Tum quassans caput, hac effudit pectore dicta,
Heu stirpem inuisam, & satis contraria nostris
Fata Phrygum.*

Libro item primo audimus in Veneris querela, de Ænea,

*Hoc equidem occasum Troiæ tristèsque ruinas
Solabar, fatis contraria fata rependens.*

Quinetiam libro ix audire est Turnum ista magnificè loquentem,

*-nil me fatalia terrent,
Siqua Phryges præ se iactant responsa deorum.
Sat fatis Venerique datum est, tetigere quòd arua
Fertilis Ausonia Troes: sunt & mea contrà
Fata mihi, ferro sceleratam excindere gentem,
Coniunge prærepta.*

Quòd si quis mihi opponat aduersus ea quæ profero istorum locorum testimonia, non audire hîc nos fata quæ vno eodémque tēpore inter se contraria essent, sed dici ista de fatorum contrariorum vicissitudine, vt ita loquar: alium proferam cui istud nequaquam poterit opponere, ex libro x i i,

*Iuppiter ipse duas æquato examine lances
Sustinet, & fata imponit diuersa duorum,
Quem damnet labor, & quòd vergat pondere lethum.*

Atque huius loci eo esse maior debet autoritas, quòd autorem habet Homerum. apud eum enim legimus Iliad: 2.

Καὶ τότε δὴ χρύσφα πατὴρ ἐπίταψε τάλαντα·

Εν δ' ἐπ' ὅθ' δύο κῆρε ταυηλεγέος θανάτοιο,

Τὼ μὲν, Ἀχλλῆος, τὼ δ', Ἐκτορος ἰπποδάμοιο·

Ἐλκε δὲ μέσσα λαβάν' ῥέπε δ' Ἐκτορος αἰσίμον ἥμαρ.

Quidni verò à calce poematis Virgiliani ad principium regrediar, & ex libri secundi initio eum locum depromam in quo Danaï, quorum tandem facta victoriam adepta sunt, fatis repulsi esse dicuntur?

-fracti bello fatisque repulsi

Ductores Danaûm, tot iam labentibus annis,

Instar montis equum diuina Palladis arte

Ædificant, sectæque intexunt abiete costas.

Quòd si nihil absurdi nihil noui nostris auribus afferunt ista quæ de fatis à Virgilio dicuntur, si apud illum fatorum pugnam admittimus, cur & fatorum victoriam apud Ouidium non admittemus? id est, non probabimus quod ab eo dicitur, victa Troianorum fata fuisse? Ita enim ille,

Illi victa suis Troica fata canunt.

Fuit autem in primis editionibus typographicis alia lectio, sed iam pridem explosa, *Troica facta*, pro illa, *Troica fata*. Nam vel vnus ille locus quem ex principio libri secundi attuli, fatis confirmare *Troica fata* videtur. Ibi certè *fatique repulsi* exponens Seruius, dicit, Oraculis tribus: vita scilicet Troili, Palladij conseruatione, integro sepulcro Laomedontis, quod in Scæa porta fuit, vt in Bacchidibus lectum est. Secundum alios verò pluribus: vt de Æaci gente aliquis interesset. (vnde Pyrrhus admodum puer euocatus ad bellum est: vnde dictus est Neoptolemus, Νέος εἰς πτόλεμον) vt Rhæsi equi tollerentur: vt Hercules interesset sa-

gittæ: quas misit Philoctetes, quum ipse non potuisset afferre, morte præuentus. Hæc Seruius. Sed de tribus illis tantum inter se omnes ferè cōsentiunt. Quibus tamen nonnulli quartum addūt: quod & à quodam locum illum Ouidij exponente adiectum fuit. Fata victa sunt (inquit) in quibus defensio Troianorū consistebat: quæ quum diu Græcos fatigassent, & ab illius vrbis expugnatione repellerent, tandem infidiis Sinonis victa sunt, equo ligneo armatis viris pleno in urbem introducto. Fata autem hæc Troianorum dicuntur fuisse, vita Troili, cōseruatio Palladij, (id est simulacri Palladis, quod Troiani habebāt in vrbe:) & vt sepulcrum Laomedontis, quod erat in porta Scæa, seruarietur integrū: & vt equi Rhesi possent à Troianis recipi. Hæc omnia fata vicerunt Græci, nam Achilles Troilum secum congressum interfecit: Palladium verò ab Vlysse & Diomede, clam noctu urbem ingressis, cæsis arcis custodibus, asportatum est: equi Rhesi ab Vlysse & Diomede abducti sunt: porta verò Scæa diruta fuit ab ipsis Troianis, vt equus introduceretur. & ita fata Troiana victa sunt. Hæc ille: sed de Palladio potissimum dici istud potest, quum ipse Maro *Palladium* appellare *fatale* non dubitet. Canit enim libro secundo,

*Omnis spes Danaum & cæpti fiducia belli
Palladis auxilijs semper stetit: impius ex quo
Tydides sed enim scelerumque inuentor Ulysses
Fatale aggressi sacrato auellere templo
Palladium, cæsis summa custodibus arcis,
Corripuere sacram effigiem, manibusque cruentis
Virgineas ausi diuæ contingere vittas:
Ex illo fluere & retro sub lapsa referri*

Spes Danaum: fractæ vires, auersa deæ mens.

Vbi de illo vocabulo *fatale* Seruius scribit, esse *ἡ μέ-
σος*. significare enim & quod custodit & quod in-
terimit: atque pro loco esse intelligendum. At Do-
natus *fatale* exponit, In quo staret fatum Græcorum:
quum potius videatur dicere debuisse, In quo staret
fatum Troianorum. Rationi enim consentaneum
est vt sterisse dicatur, quamdiu victum non fuit: at
quum vinci contigit, cecidisse. Sed nec Seruio assen-
tiri possum, volenti fatorum appellatione oracula si-
gnificari, in altero illo eiusdem libri loco, *-fracti bel-
lo, fatisque repulsi Ductores Danaum*. Ex ipsis enim oracu-
lis discebantur quidem fata: sed non ideo fata de o-
raculis dixisse Virgilium, illi concesserim. Neque ta-
men negauerim interim, ne hunc quidem appella-
tionis fatorum vsum videri satis aptum quo dicun-
tur tres illæ res, Troianorum fata fuisse, vita Troili,
conseruatio Palladij, &c. Hoc certè minimè dubium
est, quin, si *fatale* esse *ἡ μέσος* concedatur, idem &
de voce *fatum* sit concedendum.

Venio ad alius accusationis defensionem. Quum
non multis interiectis versibus sequantur hi apud
Ouidium,

Omnia nanque tuo senior te querere misso

Retrulerat nato Nestor, at ille mihi,

ita ille criticus de his versibus, Neque hîc vlla causa
reddenda est. itaque illud nanque dispungendum. non enim
relatio Telemachi efficiebat vt Græci pralia pingerent vxo-
ribus. At ego respondeo, particulam nanque aptis-
simum contrà hîc locum habere: sed eam per quen-
dam *ἰδιωτισμὸν* ita poni, vt à lectore referenda sit ad
ea quæ subaudienda relinquuntur: quum ea eiusmodi

Mm.ij.



sint vt plerunque cogitentur tantùm, non etiam dicantur. Ita igitur Penelope, *Omnia nanque sen. &c.* perinde ac si diceret, Mirum tibi videbitur hæc omnia mihi atque aliis esse nota: sed mirari nō debes. *Omnia nanque tuos sen. &c.*

Idem venit statim pōst ad hunc locum,

Sed mihi quid prodest vestris disiecta lacertis

Ilios, & murus quod fuit ante solum?

& durum esse hoc ait, *murus, quod fuit ante solum. Necurus* enim (inquit) nunquam *fuit solum.* Et addit, *Itaque melius in Fastis,*

Hic ubi nunc vrbs est, tunc locus vrbs erat.

At ego miror, tantillam rem tantum virum in errorem iterum impulisse. nam rursus ei imposuit interpunctiūcula. Aliquam enim editionem sequutus est in qua hæc ante *quod* collocata erat, quā sit ante *solum* collocanda: hoc modo,

- & murus quod fuit antè, solum.

Ita enim interpungendo non erit accusandus Ovidius, tanquam murus ab eo dicatur fuisse aliquando solum: sed contrā fatendum, eum nouo & eleganti pariter loquendi genere expressisse quod in soluta diceretur oratione. (dici autem posset & in carmine) Murus solo æquatus. Neque verò hīc altera illa phrasi vti poterat, qua vsus est in Fastis, quum dixit, *Hic ubi nunc vrbs est, tunc locus vrbs erat.* & qua item alibi, vbi legimus, *Ventris erat pro ventre locus.* Cur verò aliam quā qua vsus est in illo de quo nunc agitur versu quaesivisset?

Proximè sequitur hic versus ex Briseidis epistola,

Auxerunt blanda grandia dona prece,

• vbi admonet, *Vide an melius* (sed annon melius scripsisse illum

illum puto) *blanda preces*. Quòd si varias editiones inter se contulisset, hanc alteram lectionem in quibusdam inuenisset. Verùm cur hæc alteri sit præferenda non video: præsertim quum *prece inuocòs* magis sit poeticum.

Ab illo versu transit ad hunc eiusdem epistolæ,

Iuro: fallentem deseruisse velis:

& insuauem ac languidam esse hanc orationem queritur: ac se malle ita,

Iuro: si fallam, desere: pœna decet. aut pœna placet.

Ego totum Ouidij locum lectori proferam, vt de eo iudicium ferat.

Ne quædam (memini) dominam captiua vocabat:

Seruitio, dixi, nominis addis onus.

Pertamen ossa viri subito malè tecta sepulcro,

Semper iudicijs ossa verenda meis:

Pérque trium fortes animas, mea numina, fratrum,

Qui bene pro patria cum patriâque iacent:

Pérque tuum nostrumque caput, quod iunximus vnâ,

Pérque tuos enses, cognita tela meis,

Nulla Mycenaëum sociasse cubilia mecum

Iuro: fallentem deseruisse velis.

Ego certè non insuauem quidem sed quodammodo languidam esse orationem fateor: quam tamen Ouidius si mutare voluisset, aliter quàm illum facturum id fuisse arbitror.

Hunc item versum,

Est mihi qui fossò pectore sanguis eat,

non video cur parum probet, & istum aptiorem fore putet,

Vt tibi dilecto pectore sanguis eat.

Totus locus est hic,

*At si versus amor tuus est in tædia nostri,
 Quam sine te cogis viuere, cogere mori.
 Utque facis, coges. abiit corpusque colorque:
 Sustinet hoc animæ spes tamen vna tui.
 Qua si desituar, repetam fratresque virumque.
 Nec tibi magnificum scæmina iussa mori.
 Cur autem iubeas, stricto pete corpora ferro:
 Est mihi qui fossæ pectore sanguis eat.*

Hic certè vltimus versus multo magis mihi placet,
 quàm si in illum mutatur, *Ut tibi dilecto pectore sanguis
 eat*: præsertim quum istud *dilecto* repugnet quodam-
 modo iis quæ dixit, *At si versus amor tuus est in tædia no-
 stri*. Adde quòd, ita loqui, esset simul petentis vt vul-
 nus lethale sibi infligatur, simul ab eo infligendo de-
 terrentis: perinde ac si diceret, Fodi gladio meum pe-
 ctus: si tamen in pectus adeo dilectum committere id
 potes. Præterea post illa verba, *pete corpora ferro*, videri
 posset otiosa hæc adiectio, *vt sanguis eat è pectore*. At hæc
 verba, *Est mihi qui fossæ pectore sanguis eat*, aliquid in re-
 cessu habent: perinde ac si diceretur, Non frustra me
 ferro petes, sed tuo illi tædio hac ratione remedium
 inuenies. nam è nostro etiam pectore sanguis mana-
 bit, sicut ex hostium quos petisti pectoribus ma-
 nantem sæpe vidisti. Siquidem *Est mihi* dictum pu-
 to à virgilio. Est etiam mihi. Eandemque ellipsin apud
 hunc poetam cum alibi obseruasse mihi videor, tum
 verò in isto versu epistolæ Phadræ ad Hippolytum,
 de Amore, *Regnat, & in dominos ius habet ille deos*. Neque
 enim dubito quin dicturus fuerit, *In dominos etiam ius
 habet ille deos*: nisi verbi *regnat* usum hîc sibi magis ne-
 cessarium putasset, quòd metaphoram valde signifi-
 cantem habeat. Denique non aliter dictum est il-
 lud ab

lud ab Ouidiana Briseide,

Est mihi qui fesso pectore sanguis eat,
quàm illud à Virgiliano Turno,

— & nostro sequitur de vulnere sanguis.

non quòd eodem sensu dicatur (nam hìc *nostro de vulnere* actiua significatione intelligitur, de vulnere quod nos inferimus) sed quoniã utrobique dicitur quod satis superque scitur, etiamsi taceatur. Videntum autem annon talia ad ἰδιωτισμὸν referri debeant. Scio alioqui Tiberium Donatum secus locum istum exponere: ut perinde sit ac si diceret, *Novimus sic hostem petere ut ictum nostrum plaga sequatur & sanguis.* Et addit, illũ hoc dicto velle adstruere quòd toties feriat quoties miserit ferrum: nec aliquando frustretur, sed semper quẽ prosterнат inueniat. Verũ pro me & præcedentia faciunt, meo quidem iudicio. totus enim locus est hic,

Et nos tela pater ferrũque haud debile dextra;

Spargimur & nostro sequitur de vulnere sanguis.

Transit ille criticus ad Phædræ epistolam, quam Hippolyto scripsit: & in ea carpit hunc versum,

Et pariter nostrũ fiet uterque nocens.

In hoc enim versu Ovidium pessimè consuluisse persuasioni ait: quinetiam ista addit, Omnino eum sustulerim, atque hunc aut huic similem substituerim,

Quæ mihi amor certus, quæ tibi fata parant.

Ego ex totius loci lectione iudicium lectori tam de Ouidij versu, quàm de hoc qui substituitur, relinqũ: atque istud tantũ addã, videri quidẽ primo aspectu verba illius Ouidiani versus parum esse ad persuadendũ apta (quod puto criticũ illum significare voluisse,

quum dixit, pessimè illum persuasioni consuluisse)
sed consentanea tamen præcedentibus ac sequenti-
bus in eo dici: nec posse hūc versum reprehendi, quin
& alij quidam in reprehensionem cadant.

Censuram subnectit in duos versus, non aliam
ob causam quàm quòd sint ex iis qui vulgo leonini
appellantur. In OEnones epistola (inquit) versus
leoninus,

Vim licet appelles, & culpam nomine veles.

Sicut & in Hermiones,

Vir, precor, vxori, frater succurre sorori.

Et addit, se ideo malle priorem illum ita scribere,

Vim licet hanc dicas, & culpam nomine veles.

Atqui Quidium talem *ἐν τῷ ὁμοιοτελευτεον* soni eiusdem
repetitionem animaduertisse, ac, si cā vitare necesse
putauisset, id facillimè facturum fuisse existimo. Ego
certè, cui tā pauper est facultatis poeticæ penu, quàm
illi diues erat, tamen ex paupere meo istos decem ex
tempore depromo versus, qui eundem cum illo Oui-
dium sensum, sed non idem incommodum (absit e-
nim vt vitium appellé) habent. Videat lector, is qui-
dem certè qui cū illo critico sentiet, an aliquis inter
hos inuenietur quem nō minus dignum qui substi-
tuatur iudicet, eo qui ab illo critico substituitur.

Primus igitur erit iste,

Vim licet appelles, & nomine culpa tegatur.

sicut legimus epistola IIII, *Cognato poterit nomine cul-
pa tegi.*

Secundum hic locum tenebit,

Vim licet appelles, abscondens nomine culpam.

Tertium iste,

Vim licet id dicas, culpam hoc sub nomine celans.

Quartum

Quartum hic,
qui Virgilianum loquendi genus habet,
Vim licet, hoc culpam prætexens nomine, dicas.

Quinta sedes huic dabitur,
in quo cōtrà retinetur Ouidiani versus vocabulum,
Vim licet appelles, hoc velans nomine culpam.

Sexta isti, qui idem seruat,
Vim licet, vt culpa hoc veletur nomine, dicas.

Septimus ordine hic erit,
in quo item videri poterit seruata vox Ouidiana, quā
velamen, quod ex ea deductum est, habeat,
Vim licet (id culpæ est velamen) dicere malis.

Octauo hic loco erit,
Vim licet, vt culpa hoc lateat sub nomine, dicas.

Nonam hic sedem habebit,
Vim licet (id latebras est culpæ quærere) dicas.

Decimam denique iste,
in quo mihi aliquid amplius quàm in præcedenti-
bus permitto,

Vim licet appellans, hoc nomine crimen obumbres.

Vndecima sedes huic dabitur, qui paulo est li-
berior,

Vim licet appelles: quod culpam est nolle fateri.

Duodecimum denique locum hic sibi vindicabit,
qui & ipse aliquid libertatis sibi sumit,

Disimulans quamuis culpam, vim dicere malis.

Quòd si duodecim hi in poetico meo agello, vel po-
tius agellulo, penè sterili, nasci tã breui tēpore potue-
runt, quot in illius viri tam fertili agro nasci potuisse
credemus? tam fertili (inquam) vt fertiliorē nun-
quam fuisse, ac ne esse quidem posse existimem.

Ad alterum autem leoninum versum quod atti-

net, hunc videlicet, (qui est ex epistola Hermiones ad Orestem)

Vir, precor, uxori, frater succurre sorori:

eum idem ille criticus haud facile esse dicit mutare: quòd oporteat tota illa stare, *fratris, mariti auxilium, sorori, uxori.* Addit tamen statim, *In praesentia illud excogitavi,*

Fratrem orat soror ut pugnet pro coniuge coniux.

Sed non video, quomodo versui Ovidiano respondere hic dici possit: qui ut intelligatur, totum locum proponam,

Sic quoque eram repetenda tamen. nec turpe marito est,

Aspera pro charo bella tulisse toro.

Quid quòd aliis nobis idem Pelopaeus Atreus?

Et, si non esses vir mihi, frater eras?

Vir, precor, uxori, frater succurre sorori.

Instant officio nomina bina tuo.

Cernere (inquam) non possum quì sexto illi versui, *Vir, precor, uxori, fr. &c.* respondere iste dici possit, *Fratrem orat soror ut pugnet pro coniuge coniux.* Neque enim ullus magis obuius est (meo quidem iudicio) huius versus sensus, quàm iste, Soror fratrem orat ut suam ille coniugem non deserat, sed pro ea pugnet: & ita non eadem dicetur soror & coniux, nec pro se, sed pro alia, quæ ei est glos, fratrem orabit.

Mutans igitur Ovidianum versum & aliter, *Illud simplicius*, inquit,

Uxorem tibi vir, frater defende sororem.

Vbi non placet tibi, & tu aptius futurum fuisse existimo. Addens & tertium, *Illud coactius*, ait,

Ecce, soror fratrem expecto, coniuxque maritum.

Sed hoc expecto non satis convenientem habet hic locum,

locum, mea quidem sententia. Adiicit & quartum:
& *Illud rectius*, inquit,

Fratris opem soror imploro, coniuxque mariti.

Quinetiam addit, se multa aliter posse quæ non vult:
ac ne hæc quidem positurum se fuisse, nisi necesse
fuisset ostendere quantum vir ille sibi pepercerit,
quæ meliora multo posset. Ego, quamvis non tanto-
pere mihi versus ille Ovidianus displiceat, tamen
quod in præcedente feci, idem hîc quoque faciam:
ut hunc quoque quàm facile Ouidio fuerit muta-
re (licet criticus ille non facilè mutari posse dicat) ex
eo quod ipse hac in re præstabo, lector coniiciat. Di-
co igitur in hanc mutari formam potuisse,

Uxori tu vir, frater succurre sorori.

Necnon in istam,

Uxori vir ades, tu frater adesto sorori.

Aut in hanc, quæ parum à præcedente habet discrimi-
nis,

Uxori tu vir, tu frater adesto sorori.

Sed quoniam hi quoque versus ὁμοιοτέλευτα habent;
quæ licet magis tolerabilia sint, aliquem tamen mo-
rosus iudicem possunt offendere: en tibi eundem
versum in alias insuper formas mutatum: quarum
prima erit hæc,

Vir, quæso, nuptam, fraterque tuere sororem.

Nisi quis ita malit,

Vir precor ut nuptam, frater tutere sororem.

Nescio an magis placitura sit ista, quæ epanalepsin
habet,

Tu nuptæ vir opem, fer opem fraterque sorori.

Aut ista,

Qui vir es & frater, nuptæ ad sis atque sorori.

En tibi & aliam, quæ (ni fallor) nulli aliarum cedit,

Et peto fratris opem soror, & peto nupta, mariti.

Nisi fortè hæc tibi gratior futura est,

Inuoco fratris opem soror, inuoco nupta, mariti.

Aut certè ista,

Nupta eadèmq; soror fratrem inuocat atque maritum.

Sed nec ista (vt opinor) displicebit,

Te fratrem soror imploro, te nupta maritum.

Ac fortasse ne ista quidem reicula videbitur,

Sum fratri atque viro supplex ego, nupta sororq;.

Possem verò & aliter mutare: sed quum in alterius mutatione duodenarium numerum prætergressus non sim, hîc quoque eum non excedam. Simul verò huic de quorundâ Ouidij versuû reformatione sermoni finem imponam: in quem vides vt inciderim, quum alioqui de nouis criticis hîc agere non statuerim: inter quos iste non tantum primum locum tenet, sed eum ferè quem inter discipulos præceptor tenere solet. Quanto autem maior est hic vir qui critici partes suscepit, tanto magis perspicere possumus quàm periculosum sit hoc munus. Quis enim ita hoc fungi se posse speret vt nō labatur, quum ne ille quidem plerosque locos ἀπὸ τοῦ περὶ τοῦ pertransire potuerit?

SED quum de nouis criticis nunc agere non statuerim, vtî modò dixi, (licet in vnus eorum mentionem incidens sermo, haud statim à me reuocari potuerit) ad eam dissertatiunculam cuius expectationē sibi à me motam esse lector fortasse dixerit, conuertenda fuerit oratio. Duo enim in præcedentibus (ea videlicet pag. quæ 249 est) à me proposita fuerunt, de quibus supererat vt dicerem. vnum, haud solos grammaticos censuram criticam in aliquorum scripta

pta exercuisse: alterum, tales censores, tum grammaticos, tum alios, in alia etiam quàm poetica scripta inquisiuisse: & prius quidem illud à me tractatum est, at hoc posterius tractandum est. Ut igitur ab Asinio Pollione initium sumam, qui non inter grammaticos sed oratores numeratur, eum videmus de nonnullis etiam historicis quædam *κρινῶς* pronuntiasse. Is enim est qui in Tito Livio miræ alioqui facundiæ viro inesse quandam Patauinitatem existimauit: is est qui librum edidit in quo (Suctonio teste) Salustij scripta reprehendit, ut nimia priscorum verborum affectatione oblita. Quid quòd criticum eius (ut ita loquar) iudiciū inuenit & quod in ipso Cicerone carperet? Atq; adeo de utroque Asinio Pollione (id est, tam filio quàm patre) hoc testatur Fabius. *Quanquam (inquit) neq; ipsi Ciceroni Demosthenes videatur satis esse perfectus, quem dormire interim dicit: nec Cicero Bruto Caluòque, qui certè compositionem illius etiam apud ipsum reprehendunt: nec Asinio virique, qui vitia orationis eius etiam inimicè pluribus in locis insequuntur.* Quod tamen addit, inimicè, iudicium eorum reddere nobis suspectum potest: præsertim verò filij iudiciū ex eo nobis in suspicionē meritò venerit, quòd tantus admirator eloquentiæ paternæ fuerit, ut librum composuerit in quo à Ciceroniana eloquentia multa peccari, atque adeo patrem suum Cicerone eloquentiorem ostendere conatus sit. Sed Claudius imperator tantum honoris manibus Ciceronis detulit, ut eius defensionem aduersus illum suscepit. *Composuit item (inquit Suctonius) Ciceronis defensionem aduersus Asinij Galli libros satis eruditam.*

Præsertim autem apud Senecam in Controuersijs multa de multis oratoribus *κρινῶς* dicta legimus.

quale est illud de Montano Votieno, cum, dum non est contentus vnam rem semel bene dicere, efficere ne bene dixerit: & ideo solitum à Scauro inter oratores Ovidium vocari. Quem locum à me allatum habes suprà, pag. 259, in mentione Ovidij. Sed ibi exemplum huius vitij (vt quidem ab illis iudicatur) ex Ouidio tantùm attuli: nunc igitur & ex Montano duo afferam, quæ à Seneca proponuntur. Prius est istud, Ex vncia hæres erat patris sui Galla, obijciebatur illi veneficium: dixit rem discretissimam & omnibus seculis duraturam, qua nescio an quidquam melius in eo genere causerum dictum, *Vnciam nec filiae deberi, nec veneficæ.* Non fuit contentus: adiecit, *In paternis tabulis filiae locus aut sius debetur, aut nullus.* Etiamnum adiecit, *Relinquis nocenti nimium, innocenti parum.* Ne sic quidem satiare se potuit: adiecit, *Non potest filia tam angustè paternis tabulis adherere, quas aut totas possidere debet, aut totas perdere.* & plura multa, quæ memoria non repeto. Et paucis interiectis, hæc tanquam criticus seu censor pronuntiat, Nihil non ex iis bellum esse, si solum sit, nihil non rursus ex eis alteri obistere. At ego nec tot modis illud ab eo dici debuisse censeo, nec reprehendendum tamen fuisse si duobus tantùm dixisset modis: & ex reliquis illum potissimum delegisset qui breuissimus est, *Relinquis nocenti nimium, innocenti parum.* Nam coherere ita dictum istud cum præcedente potest, vt sit rationem reddentis: ita, *Vncia nec veneficæ debetur, nec filiae. hoc enim fuerit, relinquere nocenti nimium, innocenti parum.* Alium quoque locum affert, in quo illum de re eadem reprehendit, *Erras pater, & vehementer erras: quos perdidisti non quæris, quem quæris non perdidisti.* Deinde, *Puer iste inuen-*

tus perit. Deinde, Quisquis puero fauet, ne inueniatur opter. Deinde, Puer nisi auium sequitur, fratres sequunturus est. De sine querere, quem si inueneris, sic perdes ut inuenire non possis. Et deinde, Rapuit istum auus, ne raperet nouerca. Et deinde, Unum tantum pater ex liberis suis querit qui saluus est.

Libri primi Controuersia v i, reprehēditur Triarius, quod, dum sententiam puerilem captat, ineptum quiddam dixerit. Locum illum proferā, postquam ipsius Controuersiaē thema, ex quo is intelligatur, attulero. Id igitur est huiusmodi, Captus à piratis scripsit patri redemptionem: non redimebatur: archipiratae filia iurare eum coegit ut duceret se uxorem, si dimissus esset. Iurauit, relicto patre sequuta est adolescentem: rediit ad patrem: duxit illam. Orba incidit: pater imperat ut archipiratae filiam dimittat, & orbam ducat: nolentem abdicat. Venio nunc ad illam censuram: *Triarius* (inquit) *dum sententiam puerilem captat, ineptè dixit iurasse & se per orbam. Aiebat enim Cæsius valde hanc fieri orbam, etiamsi iurasset. Latro aiebat quodque iusiurandum ineptum esse. nihil enim minus conuenire quàm aliquem per patrem iurare, patrem relictae.* Qui locus non videtur satis integer. Dixerat autem paulo antè, *Butco longè accersito colore usus est. Voluit eam nibere non inuito patre, sed secretò suadente, palam dissimulante.* De hoc autem Buteone queritur & alibi, nimirum Controuersia quarta libri septimi, *Apollonius Graecus & Buteo* (inquit) *fatuam questionem mouerunt: primam, An lex quæ de alendis parentibus lata est, ad patris tantum nomen pertineat.* Musam etiā quendā carpit Controuersia quinta lib. v i, postquā dictū quoddā Bassi Sepullij retulit. Ex illis (inquit) qui res ineptas dixerūt

primus ibi ante omnes Musa ridetur, qui quum vulnus nouercæ descripsisset, adiecit, *At Hercules, pater meus tanquam paries perfossus est.* Alias multas censorias reprehensiones habes per totum illud Controuersiarum opus sparsas, necnon earum declamationū quæ Suasoriæ vocantur: (quarum neutræ eidem Senecæ, sed eius patri adscribendæ existimantur) ad eas ego te remitto. De hoc autem moneo, sæpe, quod ineptè dictum est, aut saltem non satis conuenienter rationi, vocari ab eo corruptum. Ita Suasoria prima, Sic Cæstius descripsit, *Fremit Oceanus, quasi indignetur quòd terras relinquant. Corruptissimam rem omnium quæ vnquam dictæ sunt, ex quo homines diserti insanire cœperunt, putabant.*

Criticas seu censorias quorūdam locorum reprehensiones apud Quintilianum quoque habemus, qui etiam librum de causis corruptæ eloquentiæ se scripsisse testatur, non procul ab initio libri sexti. Sed & in fine octauī, *Eundem, inquit, locum plenius in eo libro quo causas corruptæ eloquentiæ reddebamus, tractauimus.*

Siue autē hic ipse de quo sermo est Quintilianus, siue Tacitus (quod minus credibile est) librum eum scripsit cui nunc à quibusdam datus ille titulus fuit, De causis corruptæ eloquentiæ (quum antea De oratoribus, aut De claris oratoribus, inscriberetur) certè & in eo critica pleraque leguntur: sed ita vt criticè de docendi genere quod sequuti sunt quidam oratores iudicetur, non autem aliqui eorum loci criticæ censuræ seu critico examini subiiciantur. Quinetiam ad antiquos oratores quod attinet, aliquid est quod nō tantū de illorum quodā aut quibusdā censoriè pronuntiatur, sed de tota eorū cohorte. Nam ibi scriptū est, *Hæc ideo prædixi, vt si qua ex horum oratorum fama gloriæq;*
laus

*laus temporibus acquiritur, eandem docerem in medio sitam, & propiorem nobis quam Ser. Galba, Cato Carboni, quosque alios antiquos merito vocaremus. Sunt enim horridi & impoliti & rudes & informes: & quos utinam imitatus non esset (alius vester, aut Cælius, aut ipse Cicero. Sic & alibi de antiquis oratoribus pronuntiat, ubi tristem & impexam antiquitatem dicit: item ubi sordes verborum & hiantem compositionem atque inconditos sensus redolere antiquitatem dicit. quibus adiicit, Nec quēquam adeo antiquarium puto ut Cælium ex ea parte laudet qua antiquus est. Dum autē hic sordes verborum lego, recordor eius quod à Dionysio Halicarnasæo, maximo & celeberrimo apud Græcos in hoc præsertim genere critico, de priscis oratoribus Græcis dicitur (sed in laudem, non in vituperiū) *χρὸς ἀρχαϊσµὸς*: adeo ut hic criticus de suis oratoribus Græcis antiquis longè melius quam ille (si & ipse inter criticos est numerandus) de suis Latinis sentiat. Illis enim & alia obiicit. siquidem de Cicerone loquens, Nam priores eius orationes (inquit) non carent vitiis antiquitatis. lentus est in principiis, longus in narrationibus, otiosus circa excessus. tardè commouetur, rarò incallescit: pauci sensus opt. & cū quodam lumine terminantur. Nihil excerpere, nihil referre possis: & velut in rudī ædificio, firmus sanè paries & duraturus, sed non satis expolitus & splendens.*

Apud Aulum Gellium quoque videmus quorūdam veterum oratorum locos criticè aut tanquam criticè reprehendi: sed ad C. Gracchi locum quod attinet, quamvis eum T. Castricius reprehēderit, quem ipse Gellius graui atque firmo iudicio virum fuisse testatur, hac tamen reprehensione iniuriam illi fieri,

& librarij infidelitatem potius accusandam esse, attingi in meis Noctibus Parisiensibus in Atticas Auli Gellij Noctes: sed alibi idem plenius & apertius ostendi.

Sed ut ab antiquis oratoribus ad eorum posteros veniam, multa & in iis carpi videmus, in tota etiam eorum cohorte, (ut paulo antè de veteribus sum loquutus) aut ferè tota: & quidem ab illo etiam ipso siue Tacito, siue potius Quintiliano. Nam in illo cuius mentionem feci dialogo, *Neque enim (inquit) oratorius iste, immo hercule ne virilis quidem cultus est, quo plerique temporum nostrorum actores ita utuntur, ut lascivia verborum & leuitate sententiarum, & licentia compositionis, histrionales modos exprimant: quòdque vix audiri fas esse debeat, laudis et gloriæ et ingenij loco plerique iactant, cantari saltarique commentarios suos.* Quinetiam quum monet de iis quæ orationes scribentibus vitanda sunt, non dubium est quin ad quorundam vitia respiciat. *Quædam verò (inquit) procul arceantur, ut iam oblitterata et olentia: nullum sit verbum velut rubigine infectum.* Et paucis interiectis, *Fugiat sædam & insulsam scurrilitatem.* Quinetiâ crebrum vsus illorum verborum, *ESSE VIDEATUR*, qui hîc carpitur, scimus carpi ab eodem Quintiliano (si quidem huius dialogi esse autor censendus est) sicut & in Institutionum oratoriarû opere: vbi etiam additur quod hic tacetur, eos qui verbis illis utebantur, Ciceronianum dicendi genus exprimere sibi videri. Eius verba sunt, libro decimo, *Noueram quosdam qui se pulchrè expressisse genus illud caelestis huius in dicendo viri (de Cicerone loquitur) sibi viderentur, si in clausula posuissent, ESSE VIDEATUR.* Ac de vitiis quibus orationes multorum laborabant, dum pro virtutibus eorum

rum quos imitandos sibi propofuerant, vitia confe-
 ctarentur, ibidem agit. fcribit enim, *Hoc autem iis ac-*
cidit qui non introſpectis penitus virtutibus, ad primum ſe velut
aſpectum orationis aptarunt: & quum iis feliciffimè ceſſit imi-
tatio, qui (ſed in quia muto) verbis atque numeris ſunt non
multum differentes, vim dicendi atque inuentionis non aſſe-
quuntur: ſed plerunque declinant in peius, et proxima virtu-
tibus vitia comprehendunt. Quinetiam de illorum vitiis
 nominatim mentionem facit, quum addit, *ſiuntque*
pro grandibus tumidi (quale vitium eſt poetæ qui *profu-*
ſus grandia turgent, apud Horatium) *preſſis exiles, ſ. rariſ*
remerarij, latius corrupti, compoſitis (ſed incompoſitis ſcribo)
exultantes, ſimplicibus negligentes. Atque ibidem alia
 quædam huc pertinentia iſtis adiiciuntur. Et alibi
 Aſianum dicendi genus & Atticum, tanquam vnius
 harum virtutum vniuſque horum vitiorum exem-
 pla aſſert. Nam libro duodecimo legimus, antiquam
 illam diuiſionem inter Aſianos atque Atticos fuiſſe,
 quum hi, preſſi & integri, contrà inflati illi & inanes
 haberentur: & in his nihil ſuperflueret, illis iudicium
 maximè ac modus deeſſet. Et quibuſdam interiectis,
 addit ſibi videri & dicentium & audientium naturas
 orationis differentiam feciſſe: quòd Attici, limati
 quidem & emuncti nihil inane aut redundans fer-
 rent, Aſiana gens, tumidior alioqui & iactantior, va-
 niore etiam dicendi gloria inflata eſſet. Et interiecta
 Rhodiorum oratorum, tãquam tertij generis, men-
 tione, ruruſum vt Atticis eandem illam virtutem, ſic
 Aſianis idem vitium tribuit. *Neque enim Atticè preſſi*
(inquit) neque Aſianè ſunt abundantes. Legimus verò &
 alibi eandem Aſianorum oratorum. apud eum repre-
 henſionè, necnon aliorum qui alio modo peccabāt.

Corruptæ porro eloquentiæ culpâ in iudices ipsos & auditores ex parte videmus conferri ab illius dialogi autore. Præcurrit (inquit) hoc tempore iudex dicentem: & nisi aut cursu argumentorum, aut colore sententiarum, aut nitore & cultu descriptionum inuitatus & corruptus est, auersatur dicentem. Vulgus quoque assistentium, & affluens & vagus auditor assuevit iam exigere lætitiâ & pulchritudinem orationis. &c.

Verùm vt ad illum De oratoribus seu De claris oratoribus dialogum redeam (quem & De causis corruptæ eloquentiæ inscribi à nonnullis dixi, eumque esse existimari cuius Quintilianus tanquam sui meminerit) & de criticis aduersus quosdam peculiariter latis in eo sententiis agere incipiâ, audire te primùm iubebo quàm asperè quædam Ciceronem ipsum tractarint. *Satis constat* (inquit) *nec Ciceroni quidem obrectatores defuisse: quibus inflatus & tumens, nec satis pressus, supra modum exsultans & superfluens & parum antiquus videretur.* Vbi mirari quis possit istud *parum antiquus*, postquam tam multa quæ in antiquitate vituperat considerauerit. Cæterum & Ciceronis ipsius vicissim censorias quorundam reprehensiones, nominatimque Calui & Bruti, & quæ pariter hi in illo censoriè aut tanquam censoriè reprehenderint, ibidem legimus. Hæc enim sequuntur, *Legisti utique & Calui & Bruti ad Ciceronem missas epistolas: ex quibus facile est deprehendere, Caluum quidem Ciceroni visum exsanguem & attritum: Brutum autem otiosum atq; disiectum. Porsumque Ciceronem à Caluo quidem male audiuisse, tanquam solutum & eneruè: à Bruto autem (vt ipsius verbis utar) tanquam fractum atq; elumbè.* Inter quæ aliquid suspectum mihi est, eo in loco, *Brutum autem,*
otiosum

otiosum atq; disinctum. nā pro hoc *disinctum* magis mihi placeret *disinctum*. Ad vocem autem *otiosum* quod attinet, eandem apud eundem (si Quintilianū esse dialogi illius autorem extra cōtrouersiam est) habemus, nō procul ab iis quæ inde modò attuli. *Tristes* (inquit) *ac ieiuni Pollionem amulantur*: (id est, se Pollionem æmulari credunt. aut dicunt) *otiosi & supini, siquid modò longius circumduxerunt, iurant Ciceronē ita loquuturum fuisse.* Quinetiam in alio eiusdem dialogi loco, vbi de Cicerone agitur, *Nā priores eius orationes non carent vitijs antiquitatis. lētus est in principijs, lōgus in narrationibus, otiosus circa excessus.*

Vt autem quædam quorundam oratorum reprehēssiones eode modo in illo dialogo quo & in opere Institutionum oratoriarum scribuntur, ita & quædā laudationes. Nā illic legimus, *At strictior Caluus, numerosior Asinius, splendidior Cæsar, amarior Cælius, grauior Brutus*: eodēque modo hīc (id est, in Institutionibus oratoriis) *grauitatem Bruti* legimus. Ibidē verò maturitas Afro tribuitur, quæ illic L. Crasso. Quinetiā ipsius M. Tullij Ciceronis ibidem (in eodem illo inquam Oratoriarum institutionum loco) & laudationem & criticam reprehēssionem inueniemus. Postquā enim aliorum aliquot oratorum mentionem fecit, & suam cuique in vna re laudē concessit, *At Marcum Tullium,* inquit, *non illum habemus Euphranorem, circa plurium artiū species præstantem, sed in omnibus quæ in quoque laudantur, eminentissimum.* Sed his proximē ista subiungit, *Quē tamen & suorum homines temporum incescere audebant, ut tumidiore & Asianum & redundante, & in repetitionibus nimium, & in salibus aliquando frigidum, & in compositione fractum, exultantem, ac penē (quod procul absit) viro molliorem.*

Quām autem diuersa sint quorundā hominū siue

criticorum siue aliorum iudicia de iis etiã quę alioqui calculis omniũ probari existimantur, ex his Fabij verbis apparet, nec non ex iis quę de aliis eiusdẽ oratoris, Ciceronis inquã, reprehensoribus, sumpta ex illo dialogo retuli. Quid quod inuēti sunt iudices corã quibus de principatu eloquentiæ cum Cicerone litigare Caluus auderet? Legimus enim apud Senecã, Senecæ patrẽ, *Caluus, qui diu cum Cicerone iniquissimã litẽ de principatu eloquentiæ habuit.* Hic autem est ille Caluus cuius non solum Fabius, sed & autor illius De oratoribus dialogi (si fortè alius est quàm Fabius) & quidam alij meminerunt: quorum est & Cicero in Bruto, seu in dialogo De claris oratoribus.

Verũ ecce, ad mentionem Ciceroniani cuiusdam libri me deduxit orationis meę series, quem nondum inter criticos, aut saltem critica multa habentes, à me esse commemoratum, mirabuntur fortasse nonnulli. Sed quum tam multa liber ille critica habeat, vt meritò dubitaturus sit quilibet quidnam potissimum ex eo debeat excerpere ad hoc argumẽtũ pertinens, sermonẽ hunc mẽtione illius claudere, fatis esse putaui: ita quidẽ vt ad illũ lectores remitterẽ. Quidni verò & ad eũ librũ qui Orator inscriptus est, & ad eum qui De optimo genere oratorũ, necnõ ad tres De oratore libros, quos ad Q. fratrẽ scripsit, eadẽ opera illos remittã? Id certè & facere debeo, & facio.

Criticorum siue hominum, siue librorum appellationem erunt interim (sat scio) qui me vltra suos fines extendere querantur. Illi, quicunque erunt, hoc à me respõsum ferent, adeo nõ ignorare me quod veterũ criticorum, quibus hoc datum nomen fuit, officium fuerit, vt etiam alios hoc ipso libro docuerim: & fateri quidem non itidem professione criticos fuisse illos,

nec plenè criticorum partes impleuisse: sed velle hoc mihi vicissim cōcedi, quatenus ab illis ad criticos pertinens argumentum in libris eiusmodi tractatur, & illis & eorū libris nomen hoc posse tribui. A Seneca certè in Cōtrouersis melius quàm ab aliis critici officio satisfieri videmus: quū non tantū sententia in oratores aut declamatores nonnullos feratur, sed in quosdā etiam locos eorū inquiratur, ne indicta causa damnati existimentur. Cuius rei exēpla fuerunt à me in superioribus allata: quibus adiici & istud potest, ex Controuersia quarta libri septimi, de Caluo, Hic tamen (inquit) in epilogo quem pro Messio tunc tertio causam dicente habuit, non tantū leuiter cōponit, sed quū dicit, (*redite mihi, non est turpe misereri*, & omnia in illo epilogo fere, non tantū emollitē cōpositionis sunt, sed in fractē. Dixerat alio qui de illo, in iis quę proximè præcedunt, cōpositionem eius in actionib. ad exemplum Demosthenis rigere, nihil in illa placidum, nihil leue esse: omnia excitata & fluctuantia. Cui criticæ sententiæ (in qua & quod dicitur de Demosthene est obseruandum) illa critica reprehensio subiungitur, Hic tamen in epilogo quem pro Mess. &c. At si illam critici appellationem tam latè quàm dixi extendamus, hoc nomen Fabius cum alibi tum vel maximè libro decimo (in quo tam Græcis quàm Latinis scriptoribus suum locum & tanquā gradum assignat) mereri dicetur: atque adeo liber ipse, in prima quidē sui parte, eodē fortasse titulo insigniri poterit.

NEQUE verò hīc de Dionysio Halicarnasseo tacendū est, & quibusdā aliis Græcis, qui itidem criticā in scriptores Græcos, & quidem solutæ orationis, nō carminis, censurā sibi permiserūt. Atqui de illis prius

quàm de Latinis dicendū erat, obiiciet quispiā. Præcedere illos debuisse fateor, sicut quū de criticis poetarū agerem (quos & prius & magis propriè ita dictos fuisse existimo) ab Aristarcho & aliis qui critice in poetas Græcos exercuerunt, initium sumpsi: sed licentiæ Homericæ auxilium, qua ille *ὅς τε* quod est *ὅς τε* ponit, implorabo.

Ex illis igitur criticis ad nos duo peruenerūt, Dionysius Halicarnasseus (ille ipse qui & Romanā historiam scripsit) & Dionysius Lōginus. Sed hic multo illo fuit posterior, illo inquam Dionysio Halicarnasseo, quo vix quēquam magis exactè accuratēque functū critici officio crediderim. De hoc saltē mihi assensuros omnes puto, qui audacius quosuis scriptores reprehēderit, fuisse neminem. Præsertim verò aduersus Thucydidē insigne huius audaciæ exēplū habemus. De qua quum dicturus sim in iis quæ (Deo fauente) in nouā Thucydidis præfabor editionem, quin etiam, si tantū cōcedatur otij, huius aduersus illū apologiam sim scripturus) eius hīc mentionē fecisse satis habebō.

Scio superesse quædā ad hāc de criticis dissertationē pertinētia, si eam plenè tractare vellē. Nā & de amicis criticis, quibus scripta recitabātur, differendū præterea esset, & ad Græcos criticos, à quibus sumptū erat initiū, reuerti oporteret, & quædā eorū (præsertimq; Aristarchi) siue *πολήματα* siue *ᾠδαὶ πολήματα* essent non solum cōmemoranda, sed etiā examinanda, quorum in mea ad lectorē epistola memini: sed hanc vel *ᾠδαὶ πλήροσιν* vel *προςθήκῃ* aut alij delegabo, aut mihi in aliud tempus (quo & de nouis criticis differere vacabit) reseruabo.

QVONIAM multa ex doctissimis Seruij in Virgilium commentariis hoc in libro afferuntur, & facta est à me in quodā eius loco mentio restitutionis magnæ & accessionis quæ illis ex quodam perueteri libro contigit, atque huius exempla in meis Schediasmatum libris allaturum me promisi: nequis interim nimio ea videndi desiderio angatur, potius representanda hîc existimaui: simul tamen monendum te, ne ideo quæ hætenus sub huius enarratoris edita nomine fuerunt, asperneris: quum ea quoque magna ex parte ibi legantur.

DE HOC moneo primùm, quosdam Virgilij locos insertos commentariis, aliter ibi scriptos esse: atque huius diuersæ scripturæ exemplum memorabile proponam, istum ex Ecloga VI versum,

Ah virgo infelix herbis pasceres amaris:

quum lectio ab omnibus, & omnium (etiam librorū, ut opinor) consensu recepta, sit hæc,

Ah virgo infelix tu nunc in montibus erras.

Atque huic versui subiunguntur ista, *Quidam virgo, non quòd virum illo tempore non haberet, sed quia talis ei pœna iam virgini destinata sit, intelligunt: ob iram scilicet Veneris, quæ irata Soli, quòd se, ut quidam volunt, Anchisæ, aut (ut alij) Marti coniunctam prodidisset, sobolem eius inhonestis amoribus subiecit: ut Circen, Medeam, Pasiphaen. Et hoc dicit, in illa commiserabili dementia feliciores fuisse quæ se animalia credant, quàm Pasiphaen, quæ quum sciret se hominem, taurum sectabatur. Et in illa verba, quæ te dementia cepit, quæ efficiunt*

posterius hemistichium versus qui paulo ante præcedit, & illud ipsum principium habet, *Ah virgo infelix*: in hæc inquam verba in veteri illo codice annotantur ista, *Hic obiurgare magis quàm consolari videtur. an quia consolantis & hoc officium est, ut mærentem strictim obiurget?*

In illum autem versum,

Prætidæ implerunt falsis mugitibus agros,
 - ultra hæc, *Prætidæ, Præti & Sthenobææ* siue *Antiopæ*, secundum *Homerum*, filie fuerunt (quæ in typographicis editionibus leguntur) addita sunt earum hæc nomina, *Lysippe, Hipponoe, Cyriana*. Et post hæc verba, *Hæ se Iunoni in pulchritudine quum prætulissent*, habet idem liber ista, vel, ut quidam volunt, quum essent antistites, ausa sunt vesti eius aurum detractum in usum suum convertere. quas voces hæc in typogr. editionibus sequuntur, illa irata hunc errorem earum immisit mentibus, ut se vaccas putarent, adeo ut plerumque mugirent. quas itidem in libro scripto, paucis mutatis, habes, illa irata hunc furorem earum immisit mentibus ut se vaccas putantes in saltus abirent, & plerumque mugirent. Sed statim post, pro his, *Has Melampus postea purgasse* perhibetur, hæc in vet. scripta sunt, *Quas Melampus Amythaonis filius pacta mercede ut Cyriana* uxorem cum parte regni acciperet, placata *Iunone*, infecto (si ita legendum est) fonte ubi solite erant bibere, purgavit & in pristinum sensum reduxit.

In multis verò locis quædam adiecta sunt iis quæ editiones typogr. habent, & quidem alicubi post ultimum verbum quo ibi sermo clauditur. Ut in versum hunc,

Pasiphaenæ nivi solatur amore iuenci,
 ita in typogr. libris, *Crætesium reginam, Minois uxore: quæ tauri amore flagrauit*: at in vet. ista insuper habemus, &

enixa

enixa. Nototaurum crimen dementiae suae publicauit. Ac certè passim lector inueniet locos in quibus fabulae multo latius commemorantur. Sic in versum istum,

His adiungit, Hylam nautæ quo fonte relictum Clamassent. quum ista tantum legatur vulgò, Puerum comitem Herculis, quem perdidit in finibus Ioniis, iuxta Mysiam: nec usquam potuit reperire: in eo libro hæc extant, Hylas puer, Thiodamantis filius, ob speciem Herculi fuit charissimus: quem sequutus nauigantem cum Argonautis, in finibus Ioniæ iuxta Mysiam apud fontem Calci amnis, quum aquatum isset, à nymphâ raptus est: nec usquam pot. rep. vel, nec unquam.

Expositioni item horum verborum (quæ proximè præcedunt versum modò allatum) — *fartumque Promethei*, adiunguntur ibi pluscula, quæ & ipsa, *μυθίζε* sunt. Nam post has voces (quibus expositio illa clauditur) *Hinc est quòd igne rapto ab iratis numinibus morbi hominibus dicuntur immissi*, in vet. cod. legimus, *Ergo secundum fabulam ὡς ἐοργίζε* est. nam prius fuit ut Prometheus crimen admitteret, post pateretur supplicia: qui tamen postea præcepto Iouis occisa per Herculem aquila liberatus est. Alij hunc ferula ignem de celo subripuisse feruat, & ideo à Ioue relig. &c.

Antequam verò discedam ab hac de Prometheo fabula, de hoc etiam monebo: quum in nostris typogr. exemplaribus legamus, Prometheum, post factos à se homines auxilio Mineruæ cælum ascendisse, & adhibita facula ad rotam solis, ignem furatum esse: & ob hanc causam iratos deos duo mala terris immisisse, febres & morbos: in illo vet. libro, non *febres & morbos*, sed *mulieres & morbos* legimus. Nec multo post, non *eius cor exederet*, sed *eius iecur exederet*, in eodem scriptum est. Aliquanto post idem vet. cod. habet, *Deprehendit præterea rationem fulminum eliciendorum.*

In versum autem qui isto in quo mentio fit Promethei, prior est, hunc videlicet,

Hinc lapides Pyrrhæ iactos, Saturnia regna,
postquam dixit Seruius, *Quæstio est hoc loco* (fortasse autē de hoc loco scribendum est) *nam relictis prudentibus rebus de mundi origine, subito ad fabulas transiit fecit. Sed dicimus aut expr. &c. usque ad huius finem sermonis: in illo vet. exempl. adiicitur tota fabula de diluuiō, vel potius narratio (nam Christiani fabulosum non esse diluuiū sciunt, etiam si multa fabulosa illi adfingantur) præfixis hisce verbis, Sanè fabula talis est. Quibus additur, Iupiter quum perosum haberet, propter feritatem gigantum, genus humanum, scilicet quod ex illorum sanguine editi erant mortales, diluuiō inundauit terras, omnesque homines necauit, exceptis Pyrrhæ & Deuc. &c.*

In hunc etiam eclogæ V locum,

Extinctum nymphæ crudeli funere Daphnim Flebant,
quum ista tantum annotata habeamus, *Multi dicunt, simpliciter hoc loco desleri Daphnim quendam pastorem: in veteri libro hæc subiunguntur, quem mater sua compressa à Mercurio & enixa abiecit. Hunc pastores inuenerunt inter lauros, & Daphnim vocauerunt. quem Pan musicen docuisse dicitur. &c.*

Affertur in illo exemplari & quædā fabula de Calamo in hunc eiusdem eclogæ versum,

Nec calamis solum equiparas sed voce magistrum.
Illius fabulæ principium est istud, *Veteres Zephyro vëto vnam ex Horis coniugē assignant: ex qua & Zephyro Carpon filium pulcherrimi corporis editum dicunt: quem quum Calamus Meandri fluij filius amaret. &c.*

In hunc item locum, *Alter erit tum Tiphys, longa affertur fabula. Sanè fabula de hoc gubernatore (inquit)*

quit) talis est, Pelias quum accepisset responsum ab Apolline, fore ut ab eo priuaretur regno & vita qui altero pede nudo ei sacrificanti occurrisset, fortè vidit Iasonem nudo pede venisse. &c.

Quinetiam nonnulla ibi, non itè in nostris libris, leguntur: quæ licet non proponantur tãquam inter fabulas poeticas numeranda, tamen fabulosa videri possunt, vel quòd hyperbolica sint, vel aliam ob causam. Inter hyperbolica quidem certè ponendũ quispiam dixerit quod ibi de Alcone legitur, in ista verba, *Aut Alconis habes laudes.* quum enim typogr. editiones hæc tantum nobis exhibeant, *Hic Cretenfis sagittarius fuit.* in vet. cod. ista insuper legimus, *comes Herculis, ita peritus utictus eius non falleretur. nanque positos supra capita hominum annulos traiebat, capillos spiculis sagittarum rumpebat: sagittas sine ferro, positas ex aduerso gladiatorum lancearumve mucronibus, sindebat.*

Illam autem quæ de victo Sileno à Virgilio referuntur, ex Theopompo esse sumpta, ibidem legimus: his verbis, Sanè hoc de Sileno non dicitur fictum à Virgilio, sed à Theopompo translatum. Is enim apprehensum Silenum à Midæ regis pastoribus dicit crapula madentem, & ex ea soporatum: illos dolo aggressos dormientem vinxisse: postea vinculis sponte labentibus liberatũ, de rebus naturalibus & antiquis Midæ interroganti respondisse. &c. Iterumque in ista verba, *Huic aliud mercedis erit,* postquã annotauit, *Nympha minatur stuprum latenter: quod verecundè dixit Virgilius,* addit, (si quidem illi vetusto exemplari fidem habemus) *Hæc autem omnia de Sileno à Theopompo in eo libro qui Δαυμώσια appellatur conscripta sunt.*

Nec verò paucis in locis secunda aut etiam ter-

tia expositio adiicitur, quam in nostris exempl. non habemus. vt in illa ipsa verba *Saturnia regna*, quæ versum paulo antè allatum finiunt, videmus ibi & ista annotari, *Alij Saturnia regna pro regnis Iouis accipiunt: quo regnante diluuium factum volunt, sub Deucalione & Pyrrha: non aureo seculo, quo Saturnus regnavit.*

Sic in ista quæ eclogam quartam claudunt,

Nec Deus hunc mensa, dea nec dignata cubili est,

addit, alios ita intelligere, quasi tam citò extinctus sit vt nec Veneri nec Libero potuerit operari. Atque hic quoque fabula quædam de Vulcano affertur (ante illa videlicet verba) Alios dicere quòd quum Vulcanus parentes suos diu quæreret, nec inueniret, sedile fecerit tale, vt in eo qui sedisset surgere nō posset. &c.

Ac quum nostri libri in hunc versum, *Tum durare solum & discludere Nerea ponto*, nobis hæc tantummodo legenda exhibeant, Canebat etiā quemadmodū terra rerum sumpserit formam: in illo exemplari hæc omnia ad huius versus expositionē pertinentia scripta sunt, Canebat etiam quemadmodum se durare cœperit solum, & mixtam sibi antè aquam sua constrictione discludere. Sanè *solum* si nominatius est, *durare* absolutè accipimus, & ad omnia quæ infrà dicuntur, ad *solum* & rerum terrestrium * referentur: si accusatius, ad *mundi orbem* cuncta pertinebunt. & *rerum paulatim sumere formas*. Canebat etiam quemadmodum terra rerum sumpserit formam.

De Virgilij etiam poematibus, id est, quæ ille suscepit, multa dicuntur in expositione horum verborum, *Quum canerem reges & prelia*, & istorum, *deductum dicere carmen*, quæ à typogr. editionibus absunt. Alij (inquit) Scyllam cum scribere cœpisse dicunt: in quo libro Nisi & Minois regis Cretensium bellum de-

scribebat: alij de bellis ciuilibus dicunt: alij de tragœdia Thyestis. Et, nonnullis interiectis, postquàm *deductum* carmen exposuit bucolicum: addit, Sanè *quum canerem reges & praelia, & deductum dicere carmen*, quidam volunt hoc significasse Virg. se quidē altiorē de bellis & regibus ante bucolicū carmen elegisse materiam: sed cōsiderata ætatis & ingenij qualitate, mutasse cōfiliū, & arripuisse opus mollius: quatenus vires suas leuioribus præludendo ad altiora narrāda præpararet. In hūc etiā versum, *Tēq; adeo decus hoc aui te cōsule inibit*, annotat, *Et ideo Inibit, non inuit, quia consul designatus erat.* Quibus addit, *Quidā Saloninum Pollionis filium accipiunt: alij Asinium Gallum, fratrem Salonij, qui prius natus est, Polliōne cōsule designato. Asconius Pedianus à Gallo audisse se refert, hanc eclogam in honorem eius factam.*

Multa etiā quibus allegoriæ quādā exponūtur, aut (si mauis) quibus quādā ad allegoricū sensum in illo vet. referūtur, à nostris typogr. editionibus absunt, aut secus in iis legūtur. Cuius rei exēplū inueniemus in loco ei qui proximē allatus fuit vicino. Nā ibi scriptū est, *Quidā hoc loco, Casta faue Lucina, tuus iā regnat Apollo, Octauiā sororē Augusti significari adfirmāt, ipsūmq; Augustū, Apollinē.* Sic in istū versū, *Extinctū nymphae crudeli funere Daphnim Flebāt*, quū legamus in vulgaribus libris, multos dicere, simpliciter hoc loco deseri Daphnim quendā pastore: alios autē dicere, significari per allegoriā C. Iuliū Cæsare, qui in senātu à Cassio & Bruto vigintiquatuor vulneribus interēptus est: vnde & *crudeli vulnere* illos velle dictū esse: in vet. cod. hæc insuper scripta sunt, Sed si de Caio Cæsare dictū est, multi per *matrem*, Venerē accipiunt: per *leones & tigres*, populos quos subegit: per *thiasos*, sacra quæ pōtifex instituit: per *firmosum pecus*, pop. Romanū.

In istum quoque locum,

Candidus insuetum miratur limen olympi,

Sub pedibusque videt nubes & sidera Daphnis,

annotatur in illo vet. libro, *Miratur quasi novus deus. Et quibusdam videtur per allegoriam Cæsarem dicere, qui primus diuinos honores meruit, & diuus appellatus est. Ut autem à Iulio Cæsare ad Augustum veniam, ibidem hunc in versum, Mistâque videnti colocasia fundet acantho, ista legimus, Hanc herbam videtur in honorem Augusti creuisse, quæ Romæ post deuictam ab eo Ægyptum innotuit. Et dicendo Fundet, abundantiam floris ostendit. Vbi deesse puto verbum significare, aut dicere, post velante videtur.*

Alia multa sunt quæ nobis ille vetus liber (cū quo alium magna ex parte consentientem habeo) ultra ea quæ in typographicis editionibus leguntur, affert. Nam & ad ritus priscos pertinentia quædam, & ad Latinæ linguæ proprietatem spectantia non pauca, historica etiam nonnulla (nam de fabulosis iam

dixi) illis typographorum libris adiicit:

sed vniuscuiusque horum specimen mea Schediasmata ti-

bi exhibere poterunt.



118741769



6

Deo et

Sancto

spiritui

76

colorchecker classic



calibrite